

Namo tassa bhagavato arahato sammāsambuddhassa

# Saṃyuttanikāye

## Sagāthāvaggaṭikā

### Ganthārambhakathāvaṇṇanā

1. Saṃvaṇṇanārambhe ratanattayavandanā saṃvaṇṇetabbassa dhammassa pabhavanissayavisuddhipaṭivedanattam, taṃ pana dhammasaṃvaṇṇanāsu viññūnaṃ bahumānuppādanattam, taṃ sammadeva tesam uggaṇadhāraṇādikkamaladdhabbāya sammāpaṭipattiyā sabbahitasukhanipphādanattanti. Atha vā maṅgalabhāvato, sabbakiriyāsu pubbakiccabhāvato, paṇḍitehi samācaritabhāvato, āyatim paresam diṭṭhānugatiāpajjanato ca saṃvaṇṇanāyam ratanattayapaṇāmakiriyāti. Atha vā ratanattayapaṇāmakaraṇam pūjanīyapūjāpuññavisesanibbattanattam, taṃ attano yathāladhasampattinimittakassa kammassa balānuppādanattam, antarā ca tassa asaṃkocāpanattam, tadubhayam anantarāyena aṭṭhakathāya parisamāpanattanti idameva ca payojanam ācariyena idhādhippetam. Tathā hi vakkhati “iti me pasannamatino...pe... tassānubhāvenā”ti. Vatthuttayapūjā hi niratisayapuññakkhettsaṃbuddhiyā aparimeyyapabhāvo puññātisayoti bahuvidhantarāyepi lokasannivāse antarāyanibandhanasakalasaṃkilesavidhamsanāya pahoti, bhayādiupaddavañca nivāreti. Yathāha “pūjārahe pūjayato”tiādi (dha. pa. 195; apa. therā 1.10.1), tathā “ye, bhikkhave, buddhe pasannā, agge te pasannā, agge kho pana pasannānam aggo vipāko hoti”tiādi (itivu. 90).

“Buddhoti kittayantassa, kāye bhavati yā pīti;  
Vameva hi sā pīti, kasiṇenapi jambudīpassa;  
Dhammoti...pe..., saṅghoti...pe..., jambudīpassā”ti. (dī. ni. aṭṭha. 1.6);

Tathā “yasmim, mahānāma, samaye ariyasāvako tathāgataṃ anussarati, nevassa tasmim samaye rāgapariyuṭṭhitam cittaṃ hoti, na dosa...pe... na mohapariyuṭṭhitam cittaṃ hoti”tiādi (a. ni. 6.10; 11.11). “Araññe rukkhamūle vā...pe... bhayam vā chambhitattam vā lomahaṃso na hessati”ti (saṃ. ni. 1.249) ca.

Tattha yassa vatthuttayassa vandanam kattukāmo, tassa guṇātisayayogasandassanattam “**karuṇāsītalahadaya**”ntiādinā gāthattayamāha. Guṇātisayayogena hi vandanārahabhāvo, vandanārahe ca katā vandanā yathādhippetam payojanam sādhetīti. Tattha yassā desanāya saṃvaṇṇanam kattukāmo, sā na vinayadesanā viya karuṇāppadhānā, nāpi abhidhammadesanā viya paññāppadhānā, atha kho karuṇāpaññāppadhānāti tadubhayappadhānameva tāva sammāsambuddhassa thomanam katum tammūlakattā sesaratanānam “**karuṇāsītalahadaya**”ntiādi vuttam. Tattha kiratīti **karuṇā**, paradukkham vikkhipati apanetīti attho. Atha vā kiṇatīti **karuṇā**, paradukkhe sati kārūṇikam himsati vibādhatīti attho. Paradukkhe sati sādhuṇam kampanam hadayakhedam karotīti vā **karuṇā**. Atha vā kamiti sukham, taṃ rundhatīti **karuṇā**. Esā hi paradukkhāpanayanakāmatālakkhāṇā attasukhanirapekkhatāya kārūṇikānam sukham rundhati vibandhatīti attho. Karuṇāya sītalam **karuṇāsītalam**, karuṇāsītalam hadayam assāti **karuṇāsītalahadayo**, taṃ karuṇāsītalahadayam.

Tattha kiñcāpi paresam hitopasaṃhārasukhādiaparihānicchanasabhāvatāya, byāpādāratīnam ujuvipaccanīkatāya ca sattasantānagatasantāpavicchedanākārapavattiyā mettāmuditānampi cittasītalabhāvākāraṇatā upalabbhati, tathāpi paradukkhāpanayanakārappavattiyā parūpatāpāsahanarasā avihimsābhūtā karuṇāva visesena bhagavato cittassa cittaṃpassaddhi viya sītibhāvanimittanti vuttam “**karuṇāsītalahadaya**”nti. Karuṇāmukhena vā mettāmuditānampi hadayasītalabhāvākāraṇatā vuttāti

daṭṭhabbā.

Atha vā chaasādhāraṇañāṇavisesanibandhanabhūtā sātisayaṃ niravasesaṅca sabbaññutaññāṇaṃ viya savisayabyāpitāya mahākaraṇābhāvamupagatā karaṇāva bhagavato abhisayena hadayasītalabhāvahetūti āha “**karuṇāsītalahadaya**”nti.

Atha vā satipi mettāmoditānaṃ sātisaye hadayasītibhāvanibandhanatte sakalabuddhaguṇavisesakāraṇatāya tāsampi kāraṇanti karaṇāva bhagavato “hadayasītalabhāvakāraṇa”nti vuttā. Karaṇānidānā hi sabbepi buddhaguṇā, karaṇānubhāvanibbāpiyamānasamaṃsāradukkkhasantāpassa hi bhagavato paradukkhāpanayanakāmatāya anekānīpi asankhyeyyāni kappānaṃ akilantarūpasseva niravasesabuddhakaradhammasambharaṇaniyatassa samadhigatadhammādhipeyyassa ca sannihitesupi sattaśāṅghāṭasamupanītahadayūpatāpanimittesu na īsakampi cittasītibhāvassa aññathattamahosīti. Etasmiṅca atthavikappe tīsupi avatthāsu bhagavato karaṇā saṅgahitāti daṭṭhabbā.

Pajānātīti **paññā**, yathāsabhāvaṃ pakārehi paṭivijjhatīti attho. Paññāva ñeyyāvaraṇappahānato pakārehi dhammasabhāvajotanaṭṭhena pajjototi **paññāpajjoto**. Savāsanappahānato visesena hatam samugghātitaṃ **vihatam**. Paññāpajjotena vihatam **paññāpajjotavihatam**. Muihanti tena, sayam vā muihati, mohanamattameva vā tanti **moho**, avijjā. Sveva visayasabhāvapaṭicchādanakaraṇato andhakārasarikkhātāya tamo viyāti **tamo**. Paññāpajjotavihato mohatamo etassāti **paññāpajjotavihatamohatamo**, tam paññāpajjotavihatamohatamaṃ. Sabbesampi hi khīṇāsavānaṃ satipi paññāpajjotena avijjandhakārassa vihatabhāve saddhādhimuttehi viya diṭṭhippattānaṃ sāvakehi paccekasambuddehi ca savāsanappahānena sammāsambuddhānaṃ kilesappahānassa viseso vijjatīti sātisayena avijjāppahānena bhagavantaṃ thomento āha “**paññāpajjotavihatamohatama**”nti.

Atha vā antarena paropadesam attano santāne accantaṃ avijjandhakāravigamassa nibbattitattā, tathā sabbaññutāya balesu ca vasībhāvassa samadhigatattā, parasantatiyaṅca dhammadesanāṭisayānubhāvena sammadeva tassa pavattitattā bhagavāva visesato mohatamavigamena thometabboti āha “**paññāpajjotavihatamohatama**”nti. Imasmiṅca atthavikappe “paññāpajjoto”ti padena bhagavato paṭivedhapaññā viya desanāpaññāpi sāmāññaniddesena, ekasesanayena vā saṅgahitāti daṭṭhabbā.

Atha vā bhagavato ñāṇassa ñeyyapariyantikattā sakalañeyyadhammasabhāvāvabodhanasamatthena anāvaraṇañāṇasaṅkhātēna paññāpajjotena sabbañeyyadhammasabhāvachchādakassa mohandhakārassa vidhamitattā anaññāsādhāraṇo bhagavato mohatamavināsoti katvā vuttaṃ “**paññāpajjotavihatamohatama**”nti. Ettha ca mohatamavidhamanante adhigatattā anāvaraṇañāṇaṃ kāraṇūpacārena sasantāne mohatamavidhamananti daṭṭhabbāṃ. Abhinīhārasampattiyā savāsanappahānameva hi kilesānaṃ ñeyyāvaraṇappahānanti, parasantāne pana mohatamavidhamanassa kāraṇabhāvato phalūpacārena anāvaraṇañāṇaṃ “mohatamavidhamana”nti vuccatīti.

Kim pana kāraṇaṃ avijjāsamugghātōyeveko pahānasampattivāsena bhagavato thomanānimittaṃ gayhati, na pana sātisayaṃ niravasesakilesappahānanti? Tappahānavacaneneva tadekaṭṭhatāya sakalasaṃkilesagaṇasamugghātassa jotitabhāvato. Na hi so tādiso kilesa atthi, yo niravasesaavijjāppahānena na pahīyatīti.

Atha vā vijjā viya sakalakusaladhammasamuppattiyā niravasesākusaladhammanibbattiyā saṃsārappavattiyā ca avijjā padhānakāraṇanti tabbighātavacanena sakalasaṃkilesagaṇasamugghātō vutto eva hotīti vuttaṃ “**paññāpajjotavihatamohatama**”nti.

Narā ca amarā ca **narāmarā**, saha narāmarehīti **sanarāmaro**, sanarāmaro ca so loko cāti **sanarāmaraloko**, tassa garūti **sanarāmaralokagaru**, tam sanarāmaralokagaruṃ. Etena

devamanussānaṃ viya tadavasitṭhasattānampi yathārahaṃ guṇavisesāvahatāya bhagavato upakārataṃ dasseti. Na cettha padhānāppadhānabhāvo codetabbo. Añño hi saddakkamo, añño atthakkamo. Edisesu hi samāsapadesu padhānampi appadhānaṃ viya niddisīyati yathā “sarājikāya parisāyā”ti (apa. aṭṭha. 1.1.82). Kāmañcetta sattasaṅkhārokāsavasena tividho loko, garubhāvassa pana adhippetattā garukaraṇasamatthasseva sattalokassa vasena attho gahetabbo. So hi lokīyanti ettha puññapāpāni tabbipāko cāti “loko”ti vuccati. Amaraggahaṇena cettha upapattidevā adhippetā.

Atha vā samūhattho **loka**-saddo samudāyavasena lokīyati paññāpīyatīti. Saha narehīti **sanarā**, sanarā ca te amarā cāti **sanarāmarā**, tesaṃ lokoti **sanarāmaralokoti** purimanayeneva yojetabbaṃ. Amara-saddena cettha visuddhidevāpi saṅgayhanti. Te hi marañābhāvato paramatthato amarā, narāmarānaṃyeva gahaṇaṃ ukkaṭṭhaniddesavasena yathā “satthā devamanussāna”nti (dī. ni. 1.157). Tathā hi sabbānattaparīharaṇapubbaṅgamāya niravasesahitasukhavidhānatapparāya nirisatīyāya payogasampattiyā sadevamanussāya pajāya accantamupakāritāya aparimitanirupamappabhāvaguṇavisesasamaṅgītāya ca sabbasattuttamo bhagavā aparimāṇāsu lokadhātūsu aparimāṇānaṃ sattānaṃ uttamaṃ gāravatṭhānaṃ. Tena vuttaṃ “**sanarāmaralokagaru**”nti.

Sobhanaṃ gataṃ gamaṇaṃ etassāti **sugato**. Bhagavato hi veneyyajanupasaṅkamaṇaṃ ekantena tesaṃ hitasukhanipphādanato sobhanaṃ, tathā lakkhaṇānubyañjanapaṭimaṇḍitarūpakāyatāya dutavilambitakhalitānukaḍḍhananippīlanukkuṭṭikakuṭṭīlākulatādi-dosarahitamavahasarājahaṃsavasabhavāraṇamigarājagamaṇaṃ kāyagamaṇaṃ ñāṇagamaṇaṃ vipulanimalakaruṇāsativīriyādiguṇavisesasahitamabhinīhārato yāva mahābodhi niravajjatāya sobhanevāti.

Atha vā sayambhūñāṇena sakalamapi lokaṃ pariññābhisamayavasena pariñānanto ñāṇena sammā gato avagatoti **sugato**, tathā lokasamudayaṃ pahānābhisamayavasena pajahanto anuppattidhammataṃ āpādentō sammā gato atītoti **sugato**, lokanīrodhaṃ nibbānaṃ sacchikīriyābhisamayavasena sammā gato adhigatoti **sugato**, lokanīrodhagāminīṃ paṭipadaṃ bhāvanābhisamayavasena sammā gato paṭipannoti **sugato**. “Sotāpattimaggena ye kilesā pahīnā, te kilese na puneti na pacceci na paccāgacchatīti sugato”tiādīnā nayena (mahāni. 38) ayamattho vibhāvetabboti.

Atha vā sundaraṃ ṭhānaṃ sammāsambodhiṃ, nibbānameva vā gato adhigatoti **sugato**. Yasmā vā bhūtaṃ tacchaṃ atthasamhitaṃ veneyyānaṃ yathārahaṃ kālayuttameva ca dhammaṃ bhāsati, tasmā sammā gadati vadatīti **sugato** da-kārassa ta-kāraṃ katvā. Iti sobhanagamaṇatādīhi **sugato**, taṃ sugataṃ.

Puññapāpakehi upapajjanavasena gantabbato **gatiyo**, upapattibhavavisesā. Tā pana nirayādivasena pañcavidhā. Tā hi sakalassapi bhavagāmikammassa ariyamaggādhigamena avipākārahabhāvakaraṇena nivattitattā bhagavā pañcahipi gatīhi suṭṭhu mutto viśaṃyuttoti āha “**gativimutta**”nti. Etena bhagavato katthacipi apariyāpannataṃ dasseti, yato bhagavā “devātidevo”ti vuccati. Tenāha –

“Yena devūpapatyassa, gandhabbo vā vihaṅgamo;  
Yakkhattaṃ yena gaccheyyaṃ, manussattañca abbaje;  
Te mayhaṃ āsavā khīṇā, viddhastā vinalīkatā”ti. (a. ni. 4.36);

Taṃtaṃgatisaṃvattanakānañhi kammakilesānaṃ aggamaggena bodhimūleyeva suppahīnattā natthi bhagavato gatipariyāpannatāti accantameva bhagavā sabbabhavayonigativīññāṇaṭṭhitīsattāvāsasattanikāyehi suparimutto. Taṃ gativimuttaṃ. **Vandeti** namāmi, thomeṃti vā attho.

Atha vā **gativimuttanti** anupādisesanibbānadhātuppattiyā bhagavantaṃ thometi. Ettha hi dvīhi ākārehi bhagavato thomanā veditabbā attahitasampattito parahitapaṭipattito ca. Tesu **attahitasampatti**

anāvaraṇañāṇādhigamato, savāsanānaṃ sabbesaṃ kilesānaṃ accantapahānato, anupādisesanibbānappattito ca veditabbā. **Parahitapaṭipatti** lābhasakkārādinirapekkhacittassa sabbadukkhanīyānikadhammadesanato, viruddhesupī niccaṃ hitajjhāsayasasena ñāṇaparipākakālāgamanato ca. Sā panettha āsayato payogato ca duvidhā parahitapaṭipatti, tividhā ca attahitasampatti pakāsītā hoti, kathaṃ? “Karūṇāsītalahadaya”nti etena āsayato parahitapaṭipatti, sammāgadanatthena sugata-saddena payogato parahitapaṭipatti, “paññāpajjotavihatamohatamaṃ gativimutta”nti etehi catusaccapaṭivedhatthena ca sugata-saddena tividhāpi attahitasampatti, avasiṭṭhatthena tena “paññāpajjotavihatamohatama”nti etena ca sabbāpi attahitasampatti parahitapaṭipatti pakāsītā hotīti.

Atha vā tīhi ākārehi bhagavato thomanā veditabbā – hetuto phalato upakārato ca. Tattha **hetu** mahākaruṇā, sā paṭhamapadena dassitā. **Phalaṃ** catubbidham ṇāṇasampadā pahānasampadā ānubhāvasampadā rūpakāyasampadā cāti. Tāsu ñāṇapahānasampadā dutiyapadena saccapaṭivedhatthena ca sugata-saddena pakāsītā hontī, ānubhāvasampadā pana tatiyapadena, rūpakāyasampadā yathāvuttakāyagamanasobhanatthena sugata-saddena lakkhaṇānubyañjanapāripūriyā vinā tadabhāvato. **Upakāro** anantaraṃ abāhiraṃ karitvā tividhayānamukhena vimuttidhammadesanā. So sammāgadanatthena sugata-saddena pakāsito hotīti veditabbam.

Tattha “karūṇāsītalahadaya”nti etena sammāsambodhiyā mūlaṃ dasseti. Mahākaruṇāya sañcoditamānaso hi bhagavā saṃsārapaṅkato sattānaṃ samuddharaṇattham katābhinihāro anupubbena pāramiyo pūretvā anuttaraṃ sammāsambodhiṃ adhigatoti karuṇā sammāsambodhiyā mūlaṃ. “Paññāpajjotavihatamohatama”nti etena sammāsambodhiṃ dasseti. Anāvaraṇañāṇapadaṭṭhānañhi maggañāṇaṃ, maggañāṇapadaṭṭhānañca anāvaraṇañāṇaṃ sammāsambodhiṃ vuccatīti. Sammāgamanatthena sugata-saddena sammāsambodhiyā paṭipattiṃ dasseti līnuddhaccapaṭiṭṭhānāyūhanakāmasukhallikattakilamathānuyoga-sassatucchedābhiniivesādi-antadvayarahitāya karuṇāpaññāpariggahitāya majjhimāya paṭipattiyā pakāsanato sugata-saddassa. Itarehi sammāsambodhiyā padhānāppadhānabhedam payojanaṃ dasseti. Saṃsāramahoghatto sattanāraṇaṇhettha padhānaṃ payojanaṃ, tadanāmapadhānaṃ. Tesu padhānena parahitapaṭipattiṃ dasseti, itarena attahitasampattiṃ, tadubhayena attahitāya paṭipannādīsu catūsu puggalesu bhagavato catutthapuggalabhāvaṃ dasseti. Tena ca anuttaradakkhiṇeyyabhāvaṃ, uttamavandanīyabhāvaṃ, attano ca vandanakiriyaṃ khettaṅgatabhāvaṃ dasseti.

Ettha ca karuṇāgahaṇena lokiyesu mahaggatabhāvappattāsādhāraṇaguṇadīpanato bhagavato sabbalokiyaguṇasampatti dassitā hoti, paññāgahaṇena sabbāññutaññānapadaṭṭhānamaggañāṇadīpanato sabbalokuttaraguṇasampatti. Tadubhayaggahaṇasiddho hi attho “sanarāmaralokagaru”ntiadinā vipaṅcīyatīti. Karuṇāgahaṇena ca upagamaṇaṃ nirupakkilesaṃ dasseti, paññāgahaṇena apagamaṇaṃ. Tathā karuṇāgahaṇena lokasamaññānurūpaṃ bhagavato pavattiṃ dasseti lokavohāravisaṃyattā karuṇāya, paññāgahaṇena samaññāya anatidhāvanaṃ. Sabhāvānavabodhena hi dhammānaṃ samaññaṃ atidhāvitvā sattādiaparāmasanaṃ hotīti. Tathā karuṇāgahaṇena mahākaruṇāsamāpattivihāraṃ dasseti, paññāgahaṇena tīsu kālesu appaṭihatañāṇaṃ catusaccañāṇaṃ catuṭṭhisambhidāñāṇaṃ catuvesārajañāṇaṃ, karuṇāgahaṇena mahākaruṇāsamāpattiñāṇassa gahitattā sesādhāraṇañāṇāni cha abhiññā aṭṭhasu parisāsu akampanañāṇāni dasa balāni cuddasa buddhañāṇāni soḷasa ñāṇacariyā aṭṭhārasa buddhadhammā catucattālīsa ñāṇavattūni sattanattati ñāṇavattūnīti evamādīnaṃ anekesaṃ paññāpabhedānaṃ vasena ñāṇacāraṃ dasseti. Tathā karuṇāgahaṇena caraṇasampattiṃ, paññāgahaṇena vijjāsampattiṃ. Karuṇāgahaṇena attādhīpatitā, paññāgahaṇena dhammādhīpatitā. Karuṇāgahaṇena lokanāthabhāvo, paññāgahaṇena attanāthabhāvo. Tathā karuṇāgahaṇena pubbakāribhāvo, paññāgahaṇena kataññūtā. Karuṇāgahaṇena aparantapatā, paññāgahaṇena anattantapatā. Karuṇāgahaṇena vā buddhakaradhammasiddhi, paññāgahaṇena buddhabhāvasiddhi. Tathā karuṇāgahaṇena paresaṃ tāraṇaṃ, paññāgahaṇena sayamaṃ tāraṇaṃ. Tathā karuṇāgahaṇena sabbasattesu anuggahacittatā, paññāgahaṇena sabbadhammesu virattacittatā dassitā hoti.

Sabbesañca buddhaguṇānaṃ karuṇā ādi tannidānabhāvato, paññā pariyosānaṃ tato uttari karaṇīyābhāvato. Iti ādipariyosānadassanena sabbe buddhaguṇā dassitā honti. Tathā karuṇāgahaṇena sīlakkhandhapubbaṅgamo samādhikkhandho dassito hoti. Karuṇānidānañhi sīlaṃ tato pāṇātipātādiviratippavattito, sā ca jhānattayasampayoginīti. Paññāvacanena paññākkhandho. Sīlañca sabbabuddhaguṇānaṃ ādi, samādhī majjhe, paññā pariyosānanti evampi ādimajjhapariyosānakalyāṇadassanena sabbe buddhaguṇā dassitā honti nayato dassitattā. Eso eva hi niravasesato buddhaguṇānaṃ dassanupāyo, yadidaṃ nayaggahaṇaṃ, aññathā ko nāma samattho bhagavato guṇe anupadaṃ niravasesato dassetuṃ. Tenevāha –

“Buddhōpi buddhassa bhāṇeyya vaṇṇaṃ,  
Kappampi ce aññaṃabhāsamaṇo;  
Khīyetha kappo ciradīghamantare,  
Vaṇṇo na khīyetha tathāgatassa”ti. (dī. ni. aṭṭha. 1.304; 3.141; ma. ni. aṭṭha. 3.425; udā. 53;  
bu. vaṃ. aṭṭha. 4.5; cariyā. aṭṭha. nidānakathā, pakiṇṇakakathā; apa. 2.7.20) –

Teneva ca āyasmataṃ sārīputtattherenapi buddhaguṇaparicchēdanāṃ pati anuyuttēna “no hetāṃ, bhante”ti paṭikkhipitvā “api ca me, bhante, dhammanvayo vidito”ti (dī. ni. 2.146) vuttaṃ.

2. Evaṃ saṅkhepena sakalasabbaññaṅguṇehi bhagavantaṃ abhiththavitvā idāni saddhammaṃ thometuṃ “**buddhōpi**”tiādimāha. Tattha **buddhō**ti kattuniddeso. **Buddhabhāvanti** kammaniddeso. **Bhāvetvā sacchikatvā**ti ca pubbakālakiriyāniddeso. **Yanti** aniyamato kammaniddeso. **Upagatoti** aparakālakiriyāniddeso. **Vandeti** kiriyāniddeso. **Tanti** niyamaṇaṃ. **Dhammanti** vandanakiriyāya kammaniddeso. **Gatamalaṃ anuttaranti** ca tabbisesanaṃ.

Tattha buddhasaddassa tāva – “bujjhitaṃ saccānīti buddho, bodhetā pajjyāti buddho”tiādinā niddesanayena (mahāni. 192; cūḷani. pārāyanatthutīgāthāniddesa 97) attho vedītabbo. Atha vā savāsānāya aññaṇaniddāya accantavigamato, buddhiyā vā vikasitabhāvato buddhavāti **buddho** jāgaraṇavikasanatthavasena. Atha vā kassacipi ñeyyadhammassa anavabuddhassa abhāvena ñeyyavisesassa kammabhāvena aggahaṇato kammavacanicchāya abhāvena avagamanatthavaseneva kattuniddeso labbhatīti buddhavāti **buddho** yathā “dikkhito na dadāti”ti. Atthato pana pārāmitāparibhāvito sayambhūññaṇena saha vāsānāya vihataviddhastaniravasesakilesa mahākaruṇā sabbaññaṇāññaṇādiaparimeyyaguṇaṅgañādhāro khandhasantāno buddho. Yathāha – “buddhoti yo so bhagavā sayambhū anācariyako pubbe ananussutesu dhammesu sāmaṃ saccāni abhisambujjhi. Tattha ca sabbaññaṇaṃ patto balesu ca vasībhāva”nti (mahāni. 192). **Api**-saddo sambhāvane. Tena “evaṃ guṇavisesayutto sopi nāma bhagavā”ti vakkhamānaguṇe dhamme sambhāvanaṃ dīpeti. **Buddhabhāvanti** sammāsambodhiṃ. **Bhāvetvā**ti uppādetvā vaḍḍhetvā ca. **Sacchikatvā**ti paccakkhaṃ katvā. **Upagatoti** patto, adhigatoti attho. Etassa “buddhabhāva”nti etena sambandho. **Gatamalaṃ**ti vigatamalaṃ, niddosanti attho. **Vandeti** paṇamāmi, thomemi vā. **Anuttaranti** uttararahitaṃ, lokuttaranti attho. **Dhammanti** yathānusiṭṭhaṃ paṭipajjamāne apāyato saṃsārato ca apatamāne dhāretīti **dhammo**.

Ayañhettha saṅkhepattho – evaṃ vividhaguṇaṅgaṇasamannāgato buddhōpi bhagavā yaṃ ariyamaggasaṅkhātaṃ dhammaṃ bhāvetvā phalaṇibbānasaṅkhātaṃ pana dhammaṃ sacchikatvā anuttaraṃ sammāsambodhiṃ adhigato, tametaṃ buddhānampi buddhabhāvahetubhūtaṃ sabbadosamalarahitaṃ attano uttaritarābhāvena anuttaraṃ paṭivedhasaddhammaṃ namāmīti. Pariyattisaddhammassapi tappakāsanattā idha saṅgaho daṭṭhabbo. Atha vā “abhidhammanayasamuddaṃ adhigacchi, tīṇi piṭakāni sammasī”ti ca aṭṭhakathāyaṃ vuttattā pariyattidhammassapi sacchikiriyasammasanapariyāyo labbhatīti sopi idha vutto evāti daṭṭhabbaṃ.

Tathā “yaṃ dhammaṃ bhāvetvā sacchikatvā”ti ca vuttattā buddhakaradhammabhūtāhi pārāmitāhi saha pubbabhāge adhisīlasikkhādayopi idha dhamma-saddena saṅgahitāti vedītabbaṃ. Tāpi hi malapaṭipakkhatāya gatamalaṃ anaññaśādhāraṇatāya anuttarā cāti. Tathā hi sattānaṃ

sakalavattadukkhaniissaraṇatthāya katamahābhinihāro mahākaruṇādhivāsapesalajjhāsayo paññāvisesaparidhotanimmalānaṃ dānadamasaññamādīnaṃ uttamadhammānaṃ satasahassādhikāni kappānaṃ cattāri asaṅkhyeyyāni sakkaccaṃ nirantaraṃ niravasesānaṃ bhāvanāpaccakkhakarāṇehi kammādīsu adhigatavasibhāvo acchariyācinteyyamahānubhāvo adhisīlādhicittānaṃ paramukkaṃsapāramippatto bhagavā paccayākāre catuvīsatiakoṭisatasahassamukhena mahāvajiraññaṃ pesetvā anuttaraṃ sammāsambodhiṃ abhisambuddhoti.

Ettha ca “bhāvetvā”ti etena vijjāsampadāya dhammaṃ thometi, “sacchikatvā”ti etena vimuttisampadāya. Tathā paṭhamena jhānasampadāya, dutiyena vimokkhasampadāya. Paṭhamena vā samādhisampadāya, dutiyena samāpattisampadāya. Atha vā paṭhamena khayeññābhāvena, dutiyena anuppādeññābhāvena. Purimena vā vijjūpamatāya, dutiyena vajirupamatāya. Purimena vā virāgasampattiyā, dutiyena nirodhasampattiyā. Tathā paṭhamena niyyānabhāvena, dutiyena nissaraṇabhāvena. Paṭhamena vā hetubhāvena, dutiyena asaṅkhatabhāvena. Paṭhamena vā dassanabhāvena, dutiyena vivekabhāvena. Paṭhamena vā adhipatibhāvena, dutiyena amatabhāvena dhammaṃ thometi. Atha vā “yaṃ dhammaṃ bhāvetvā buddhabhāvaṃ upagato”ti etena svākkhātāya dhammaṃ thometi, “sacchikatvā”ti etena sandiṭṭhikatāya. Tathā purimena akālikatāya, pacchimena ehipassikatāya. Purimena vā opaneyyikatāya, pacchimena paccattaṃ veditabbatāya dhammaṃ thometi. “Gatamala”nti iminā saṃkilesābhāvādīpanena dhammassa parisuddhataṃ dasseti. “Anuttara”nti etena aññaṃsa visiṭṭhassa abhāvādīpanena vipulaparipuṇṇataṃ. Paṭhamena vā pahānasampadaṃ dhammassa dasseti, dutiyena sabhāvasampadaṃ. Bhāvetabbatāya vā dhammassa gatamalabhāvo yojetabbo. Bhāvanābalena hi so dosānaṃ samugghātako hotīti. Sacchikātabbabhāvena anuttarabhāvo yojetabbo. Sacchikiriyānibbattito hi tatuttarikaṇṇīyābhāvato anaññasādhāraṇatāya anuttaroti. Tathā “bhāvetvā”ti etena saha pubbabhāgasīlādīhi sekkhā sīlasamādhipaññākkhandhā dassitā honti. “Sacchikatvā”ti etena saha asaṅkhatāya dhātuyā asekkhā sīlasamādhipaññākkhandhā dassitā hontīti.

3. Evaṃ saṅkhepeveva sabbadhammaguṇehi saddhammaṃ abhitthavitvā idāni ariyaṅghaṃ thometuṃ “**sugatassā**”tiādīmāha. Tattha **sugatassā**ti sambandhaniddeso. Tassa “puttāna”nti etena sambandho. **Orasānanti** puttavisesanaṃ. **Mārasenamathanānanti** orasaputtabhāve kāraṇaniddeso. Tena kilesapahānameva bhagavato orasaputtabhāve kāraṇaṃ anujānātīti dasseti. **Aṭṭhannanti** gaṇanaparicchedaniddeso. Tena ca satipi tesam sattivisesabhāvena anekasahassasaṅkhābhāve imaṃ gaṇanaparicchedaṃ nātivattantīti dasseti maggaṭṭhaphalaṭṭhabhāvānativattanato. **Samūhanti** samudāyaniddeso. **Ariyaṅghanti** guṇavisiṭṭhasaṅghātābhāvaniddeso. Tena asatipi ariyapuggalānaṃ kāyasāmaggiyaṃ ariyaṅghabhāvaṃ dasseti diṭṭhisīlasāmaññaṃ saṃhatabhāvato.

Tattha urasi bhavā jātā saṃbaddhā ca orasā. Yathā hi sattānaṃ orasaputtā attajātāya pitu santakassa dāyajassa visesena bhāgino honti, evametepi ariyapuggalā sammāsambuddhassa dhammassavanante ariyāya jātiyā jātāya bhagavato santakassa vimuttisukhassa ariyadhammaratanassa ca ekantabhāginoti orasā viya **orasā**. Atha vā bhagavato dhammadesanānubhāveveva ariyabhūmiṃ okkamamānā okkantā ca ariyasāvaka bhagavato urena vāyāmajanitābhijātīya nippariyāyena orasā puttāti vattabbaṃ arahanti. Sāvakehi pavattiyamānāpi hi dhammadesanā “bhagavato dhammadesanā”icceva vuccati tammūlikattā lakkhaṇādivisesābhāvato ca.

Yadipi ariyasāvakaṇaṃ ariyamaggādhigamasamaye bhagavato viya tadantarāyakaraṇatthaṃ devaputtamāro, māravāhinī vā na ekantena apasādeti, tehi pana apasādetabbatāya kāraṇe vimathite tepi vimathitā eva nāma hontīti āha “**mārasenamathanāna**”nti. Imasmiṃ panatthe “māramārasenamathanāna”nti vattabbe **mārasenamathanānanti** ekadesasarūpekaṃ katoti daṭṭhabbaṃ. Atha vā khandhābhisaṅkhāramāraṇaṃ viya devaputtamārassapi guṇamāraṇe sahāyabhāvūpagamanato kilesabalakāyo “senā”ti vuccati. Yathāha “kāmā te paṭhamā senā”tiādi (su. ni. 438). Sā ca tehi diyaḍḍhasahassabhedā, anantabhedā vā kilesavāhinī satidhammavicayavīriyasamathādiguṇapaharaṇehi odhiso vimathitā vihatā viddhastā cāti **mārasenamathanā**, ariyasāvaka. Etena tesam bhagavato anujātaputtataṃ dasseti.

Ārakattā kilesehi, anaye na iriyanato, aye ca iriyanato **ariyā** niruttinayena. Atha vā sadevakena lokena saraṇanti araṇiyato upagantabbato, upagatānañca tadatthasiddhito **ariyā**. Ariyānaṃ saṅghoti **ariyasaṅgho**. Ariyo ca so saṅgho cāti vā **ariyasaṅgho**. Bhagavato aparabhāge buddhadhammaratanānampi samadhigamo saṅgharatanādhīnoti assa ariyasaṅghassa bahūpakāratam dassetuṃ idheva “**sirasā vande**”ti vuttanti daṭṭhabbam.

Ettha ca “sugatassa orasānaṃ puttāna”nti etena ariyasaṅghassa pabhavasampadam dasseti, “mārasenamathanāna”nti etena pahānasampadam sakalasaṃkilesapahānadīpanato, “aṭṭhannampi samūha”nti etena ñāṇasampadam maggaṭṭhaphalaṭṭhabhāvadīpanato. “Ariyasaṅgha”nti etena pabhavasampadam dasseti sabbasaṅghānaṃ aggabhāvadīpanato. Atha vā **sugatassa orasānaṃ puttānanti** ariyasaṅghassa visuddhanissayabhāvadīpanam. **Mārasenamathanānanti** sammāujuṇāyasāmīcippaṭipannabhāvadīpanam. **Aṭṭhannampi samūhanti** āhuneyyādībhāvadīpanam. **Ariyasaṅghanti** anuttarapuññakhettabhāvadīpanam. Tathā “sugatassa orasānaṃ puttāna”nti etena ariyasaṅghassa lokuttarasaraṇagamanasabhāvam dīpeti. Lokuttarasaraṇagamanena hi te bhagavato orasaputtā jātā. “Mārasenamathanāna”nti etena abhinīhārasampadāya siddham pubbhāge sammāpaṭipattim dasseti. Katābhinihārā hi sammāpaṭipannā māraṃ mārapariṣaṃ vā abhivijjanti. “Aṭṭhannampi samūha”nti etena paṭividdhastavipakkhe sekkhāsekkhadhamme dasseti puggalādhiṭṭhānena maggaphaladhammānaṃ pakāsītattā. “Ariyasaṅgha”nti aggadakkhiṇeyyabhāvam dasseti. Saraṇagamañca sāvakaṇaṃ sabbaguṇānaṃ ādi, sapubbabhāgapaṭipadā sekkhā sīlakkhandhādayo majjhe, asekkhā sīlakkhandhādayo pariyosānanti ādimajjhapariyosānakalyāṇā saṅkhepato sabbe ariyasaṅghaguṇā pakāsītā honti.

4. Evaṃ gāthāttayena saṅkhepato sakalaguṇasaṃkittanamukhena ratanattayassa paṇāmaṃ katvā idāni taṃ nipaccakāraṃ yathādhippete payojane pariṇāmento “**iti me**”tiādimāha. Tattha ratijananatṭhena **ratanam**, buddhadhammasaṅghā. Tesaṃhi “itipi so bhagavā”tiādinā yathābhūtaguṇe āvajjentassa amatādhigamahetubhūtam anappakaṃ pītipāmojjam uppajjati. Yathāha –

“Yasmiṃ, mahānāma, samaye ariyasāvako tathāgataṃ anussarati, nevassa tasmim samaye rāgapariyuṭṭhitam cittaṃ hoti, na dosapariyuṭṭhitam cittaṃ hoti, na mohapariyuṭṭhitam cittaṃ hoti, ujugatamevassa tasmim samaye cittaṃ hoti tathāgataṃ ārabba. Ujugatacitto kho pana, mahānāma, ariyasāvako labhati atthavedaṃ, labhati dhammavedaṃ, labhati dhammūpasamhitam pāmojjam, pamuditassa pīti jāyatī”tiādi (a. ni. 6.10; 11.11).

Cittikatādībhāvo vā ratanaṭṭho. Vuttañhetam –

“Cittikataṃ mahaggañca, atulaṃ dullabhadassanaṃ;  
Anomasattaparibhogaṃ, ratanaṃ tena vuccatī”ti. (dī. ni. aṭṭha. 2.33; khu. pā. aṭṭha. 6.3; su. ni. aṭṭha. 226; mahāni. aṭṭha. 50) –

Cittikatabhāvādayo ca anaññasādhāraṇā buddhādīsu eva labbhantīti.

Vandanāva **vandanāmayaṃ** yathā “dānamayaṃ sīlamaya”nti. Vandanā cettha kāyavācācittēhi tiṇṇam ratanānaṃ guṇaninnatā, thomanā vā. Pujjabhavaphalanibbattanato **puññaṃ**, attano santānaṃ punātīti vā. **Suvihatantarāyoti**. Suṭṭhu vihatantarāyo. Etena attano pasādasampattiyā, ratanattayassa ca khettabhāvasampattiyā taṃ puññaṃ atthappakāsanassa upaghātaupaddavānaṃ vihanane samatthanti dasseti. **Hutvāti** pubbakālakiriyā. Tassa “attham pakāsayissāmī”ti etena sambandho. **Tassāti** yaṃ ratanattayavandanāmayaṃ puññaṃ, tassa. **Ānubhāvenāti** balena.

5. Evaṃ ratanattayassa nipaccakāre payojanaṃ dassetvā idāni yassā dhammadesanāya attham saṃvaṇṇetukāmo, tassā tāva guṇābhittavanavasena upaṇṇāpanattham “**samyuttavaggapaṭimaṇḍitassā**”tiādi vuttam, devatāsamyuttādisamyuttehi ceva naḷavaggādivaggehi

ca vibhūsitassāti attho. Tattha “saṃyutta”nti “saṃyogo”ti ca atthato ekaṃ. Kesam saṃyuttam? Suttavaggānaṃ. Yathā hi byañjanasamudāyo padam, evam atthesu ca katāvadhiko padasamudāyo vākyam, vākyasamudāyo suttam, suttasamudāye vaggoti samaññā, tathā suttavaggasamudāye saṃyuttasamaññā. Saṃyujjantīti ettha suttavaggāti **saṃyuttam**. Yadi pi avayavavinimutto samudāyo nāma paramatthato natthi, avayave eva taṃtaṃsannivesavisiṭṭhe upādāya padādisamaññā viya suttavaggasamaññā saṃyuttasamaññā āgamasamaññā ca, tathāpi paramatthato avijjamānopi samudāyo buddhiparikappitarūpena vijjamāno viya gayhamāno avayavānaṃ adhiṭṭhānabhāvena voharīyati yathā “rukkhe sākha”ti, tasmā vuttam “**saṃyuttavaggapaṭimaṇḍitassā**”ti.

Nanu saṃyuttavaggo eva āgamo, tassa pana kehi maṇḍananti? Na codetabbametam. Bhavati hi abhinnepi vatthusmiṃ yathādhippetavisesāvabodhanato bhedakasamudācāro yathā “silāputtakassa sarīra”nti. Āgamissanti ettha, etena, etasmā vā attatthaparathādayoti **āgamo**, ādikalyāṇādiguṇasampattiyā uttamattṭhena taṃtaṃmabhipatthitasamidhahetutāya paṇḍitehi varitabbato **varo**, āgamo ca so varo cāti **āgamavaro**. Āgamasammatehi vā varoti **āgamavaro**, saṃyutto ca so āgamavaro cāti **saṃyuttāgamavaro**, tassa. Buddhānaṃ anubuddhā **buddhānubuddhā**, buddhānaṃ saccapaṭivedham anugamma paṭividdhasaccā aggasāvakādayo ariyā. Tehi atthasaṃvaṇṇanāguṇasaṃvaṇṇanānaṃ vasena **saṃvaṇṇitassa**.

Atha vā buddhā ca anubuddhā ca **buddhānubuddhā**ti yojetabbaṃ. Sammāsambuddheneva hi vinayasuttaabhidhammānaṃ pakiṇṇakadesanādivasena yo paṭhamaṃ attho vibhatto, so eva pacchā tesam atthavaṇṇanāvāsena saṅgītikārehi saṅgahaṃ āropitoti. Ettha ca saṃyuttānaṃ vaggā samūhāti **saṃyuttavaggā**, sagāthāvaggādayo. Tappariyāpannatāya saṃyuttasu vaggā **saṃyuttavaggā**, naḷavaggādayo. Saṃyuttāva vaggā **saṃyuttavaggā**. Tividhepi te ekasesanayena gahetvā vuttam “**saṃyuttavaggapaṭimaṇḍitassā**”ti.

Tattha sagāthāvagge tāva ekādasa saṃyuttāni aṭṭhatimsa vaggā. Nidānavagge nava saṃyuttāni ekūnacattālīsa vaggā. Khandhavagge ekādasa saṃyuttāni ekūnasatṭhi vaggā. Saḷāyatanavagge nava saṃyuttāni aṭṭhatimsa vaggā. Mahāvagge dvādasa saṃyuttāni aṭṭhacattālīsa vaggā. Idamettha saṃyuttantaravaggānaṃ parimāṇam.

**Ñānappahedajananassāti** paṭiccasamuppādakhandhāyatanādīkathābahulatāya gambhīrañānacariyāvibhāvanato paññāvibhāgasamuppādakassa. Idha pana “paññāppahedajananassā”ti svāyamāgamo thomito, saṃvaṇṇanāsu cāyam ācariyassa pakati, yadidaṃ taṃtaṃsaṃvaṇṇanānaṃ ādito tassa tassa saṃvaṇṇetabbassa dhammassa visesaguṇakittanena thomanā. Tathā hi sumaṅgalavilāsinīpapañcasūdanīmanorathapūraṇāṭṭhasālinīdāsu ca yathākkamaṃ “saddhāvahaguṇassa, paravādamathanassa, dhammakathikapuṅgavānaṃ vicittapaṭibhānajanana, tassa gambhīrañānehi ogāḷhassa abhiṇhaso nānāyavicittassa abhidhammassā”tiādīnā thomanā katā.

6. Attho kathīyati etāyāti **atthakathā**, atthakathāva **aṭṭhakathā** ttha-kārassa ṭṭha-kāram katvā yathā “dukkhassa pīḷanaṭṭho”ti. **Āditoti** ādimhi paṭhamasaṅgītiyam. Chaḷabhiññatāya paramena cittavasibhāvena samannāgatattā jhānādīsu pañcavidhavasitāsambhāvato ca **vasino**, therā mahākassapādayo. Tesam satehi pañcahi. **Yāti** yā aṭṭhakathā. **Saṅgīti**ti attham kathetum yuttatṭhāne “ayam etassa attho, ayam etassa attho”ti saṅgahetvā vuttā. **Anusaṅgīti** ca yasattherādīhi **pacchāpi** dutiyatatiyasaṅgīti. Iminā attano saṃvaṇṇanāya āgamanavisuddhiṃ dasseti.

7. Sīhassa lānato gahaṇato **sīhaḷo**, sīhakumāro, tabbaṃsajātātāya tambapaṇḍidīpe khattiyā, tesam nivāsātāya tambapaṇḍidīpassa ca sīhaḷabhāvo veditabbo. **Ābhatāti** jambudīpato ānītā. **Athāti** pacchā. Aparabhāge hi nikāyantaraḷaddhīhi asaṅkarattham sīhaḷabhāsāya aṭṭhakathā ṭṭhapitāti. Tena mūlaṭṭhakathā sabbasādhāraṇā na hotīti idaṃ atthappakāsaṇam ekantena karaṇīyanti dasseti. Tenevāha “**dīpavāsīnamatthāyā**”ti. Ettha **dīpavāsīnanti** jambudīpavāsīnam, sīhaḷādīpavāsīnam vā atthāya sīhaḷabhāsāya ṭṭhapitāti yojanā.



**8. Apanetvāti** kañcukasadisam sīhaḷabhāsam apanetvā. **Tatoti** aṭṭhakathāto. **Ahanti** attānaṃ niddisati. **Manoramaṃ bhāsanti** māgadhabhāsam. Sā hi sabhāvaniruttibhūtā paṇḍitamanaṃ ramayati. Tenevāha “**tantinayānucchavika**”nti, pāḷigatiyā anulomikaṃ pāḷichāyānuvidhāyininti attho. **Vigatadosanti** asabhāvaniruttibhāsantararahitaṃ.

**9. Samayaṃ avilomentoti** siddhantaṃ avirodhento. Etena atthadosābhāvamāha. Aviruddhattā eva hi theravādāpi idha pakāsīyissanti. **Theravaṃsadīpānanti** thirehi sīlakkhandhādīhi samannāgatattā **therā**, mahākassapādayo. Tehi āgatā ācariyaparamparā **theravaṃso**, tappariyāpannā hutvā āgamādhigamasampannattā paññāpajjotena tassa samujjalanato **theravaṃsadīpā**, mahāvihāravāsino, tesam. Vividhehi ākārehi nicchīyatīti **vinicchayo**, gaṇṭhiṭṭhānesu khilamaddanākārena pavattā vimaticchedanī kathā. Suṭṭhunipuṇo saṅho vinicchayo etesanti **sunipuṇavinicchayā**. Atha vā vinicchīnotīti **vinicchayo** vuttappakāraṅvisayaṃ ṇāṇaṃ. Suṭṭhu nipuṇo cheko vinicchayo etesanti yojetabbaṃ. Etena mahākassapāditheraparamparāgato, tato eva ca aviparīto saṅho sukhumo mahāvihāravāsīnaṃ vinicchayo, tassa pamāṇabhūtataṃ dasseti.

**10. Sujanassa cāti ca-saddo** sampiṇḍanatto. Tena “na kevalaṃ jambudīpavāsīnameva atthāya, atha kho sādhujanatosanattañcā”ti dasseti. Tena ca “tambapaṇṇidīpavāsīnampi atthāyā”ti ayamatto siddho hoti uggahaṇādisukaratāya tesampi bahukārattā. **Ciraṭṭhitatthanti** ciraṭṭhitattham, cirakālapavattanāyāti attho. Idañhi atthappakāsanam aviparītapadabyañjanasunikkekhepassa atthasunayassa ca upāyabhāvato saddhammassa ciraṭṭhitiyā pavattati. Vuttañhetam bhagavatā “dveme, bhikkhave, dhammā saddhammassa ṭhitiyā asamosāya anantaradhānāya samvattanti. Katame dve? Sunikkhittaṇca padabyañjanaṃ attho ca sunīto”ti (a. ni. 2.20).

**11-12.** Yam atthavaṇṇanaṃ kattukāmo, tassā mahattaṃ pariharitum “**sāvatthipabhūtina**”ntiādi vuttaṃ. Tenevāha – “**na idha bhiyyo vitthārakathaṃ karissāmi, na taṃ idha vicārayissāmi**”ti ca. **Saṅgītinam dvinnanti** dīghamajjhimanikāyānaṃ.

**13.** “Na idha bhiyyo vitthārakathaṃ karissāmi”ti sāmāññato vuttassa atthassa avassayaṃ dassetuṃ “**suttānaṃ panā**”tiādi vuttaṃ.

**14.** Yam aṭṭhakathaṃ kattukāmo, tadekadesabhāvena visuddhimaggo gahetabboti kathikānaṃ upadesaṃ karonto tatta vicāritadhamme uddesavasena dasseti “**sīlakathā**”tiādinā. Tattha **sīlakathāti** cārittavārittādivasena sīlassa vitthārakathā. **Dhutadhammāti** piṇḍapātikaṅgādayo terasa kilesadhunanakadhammā. **Kammaṭṭhānāni sabbānīti** pāḷiyam āgatāni aṭṭhattiṃsa, aṭṭhakathāyaṃ dveti niravasesāni yogakammassa bhāvanāya pavattiṭṭhānāni. **Cariyāvidhānasahitoti** rāgacariyādīnaṃ sabhāgādividhānena sahito. **Jhānāni** cattāri rūpāvacarajjhānāni, **samāpattiyo** catasso arūpasamāpattiyo. Aṭṭhapi vā paṭiladdhamattāni **jhānāni**, samāpajjanavasibhāvappattiyā **samāpattiyo**. **Jhānāni** vā rūpārūpāvacarajjhānāni, **samāpattiyo** phalasaṃpattinirodhasamāpattiyo.

**15.** Lokiyalokuttarabhedā cha abhiññāyo **sabbā abhiññāyo**. Ñānavibhaṅgādīsū āgatanayena ekavidhādīnā paññāya saṅkaletvā sampiṇḍetvā nicchayo **paññāsāṅkalananicchayo**.

**16.** Paccayadhammānaṃ hetuādīnaṃ paccayuppannadhammānaṃ hetupaccayādibhāvo **paccayākāro**, tassa desanā **paccayākāradesanā**, paṭiccasamuppādakathāti attho. Sā pana nikāyantaraḷaddhisāṅkararahitatāya suṭṭhuparisuddhā, ghanavinibbhogassa ca sudukkaratāya nipuṇā saṅhasukhumā, ekattanayādisahitā ca tattha vicāritāti āha “**suparisuddhanipuṇanayā**”ti. Paṭisambhidādīsū āgatanayaṃ avisajjetvā vā vicāritattā **avimuttatantimaggā**.

**17. Iti pana sabbanti iti-saddo** parisamāpane, **pana-saddo** vacanālaṅkāre, etaṃ sabbanti attho. **Idhāti** imissā aṭṭhakathāya. **Na taṃ vicārayissāmi** punaruttibhāvatoti adhippāyo.

18. Idāni tasseva avicāraṇassa ekantakāraṇaṃ niddhārento “**majjhe visuddhimaggo**”tiādimāha. Tattha “majjhe thatvā”ti etena majjhatṭhabhāvadīpanena visesato catunnaṃ āgamānaṃ sādharmaṇaṭṭhakathā visuddhimaggo, na sumaṅgalavilāsiniādayo viya asādharmaṇaṭṭhakathāti dasseti. “Visesato”ti ca idaṃ vinayābhidhammānampi visuddhimaggo yathārahaṃ atthavaṇṇanā hoti evāti katvā vuttaṃ.

19. **Icevāti** iti eva. **Tampīti** visuddhimaggampi. **Etāyāti** sārathhappakāsiniyā.

Ettha ca “sīhaḷadīpaṃ ābhatā”tiādinā aṭṭhakathākaraṇassa nimittaṃ dasseti, “dīpavāsīnamatthāya sujanassa ca tuṭṭhatthaṃ ciratṭhitatthaṃca dhammassā”ti etehi payojanaṃ, “saṃyuttāgamavarassa atthaṃ pakāsayissāmī”ti etena piṇḍatthaṃ, “apanetvāna tatohaṃ sīhaḷabhāsa”ntiādinā “sāvatthipabhūtina”ntiādinā “sīlakathā”tiādinā ca karaṇappakāraṃ. Heṭṭhimanikāyesu visuddhimagge ca vicāritānaṃ atthānaṃ avicāraṇampi hi idha karaṇappakāro evāti.

Ganthārambhakathāvaṇṇanā niṭṭhitā.

## 1. Devatāsaṃyuttaṃ

### 1. Naḷavaggo

#### 1. Oghataraṇasuttavaṇṇanā

Vibhāgavantānaṃ sabhāvavibhāvanaṃ vibhāgadassanavaseneva hotīti paṭhamaṃ tāva saṃyuttavaggasuttādivasena saṃyuttāgamassa vibhāgaṃ dassetuṃ “**tattha saṃyuttāgamō nāmā**”tiādimāha. Tattha **tatthāti** yaṃ vuttaṃ – “saṃyuttāgamavarassa atthaṃ pakāsayissāmī”ti, tasmim vacane. **Tatthāti** vā “etāya aṭṭhakathāya vijānātha saṃyuttanissitaṃ attha”nti ettha yaṃ saṃyuttaggahaṇaṃ kataṃ, tattha. Pañca vaggā etassāti **pañcavaggo**. Avayavena viggaho, samudāyo samāsatto.

Idāni taṃ ādito paṭṭhāya saṃvaṇṇetukāmo attano saṃvaṇṇanāya tassa paṭhamamahāsaṅgītiyaṃ nikkhittānukkameneva pavattabhāvaṃ dassetuṃ, “**tassa vaggesu sagāthāvaggo ādī**”tiādi vuttaṃ. Tattha yathāpaccayaṃ tattha tattha desitattā paññattattā ca vippariṇānaṃ dhammavinayānaṃ saṅgahetvā gāyanaṃ kathaṃ **saṅgīti**, mahāvisayattā pūjanīyattā ca mahatī saṅgīti **mahāsaṅgīti**. Paṭhamā mahāsaṅgīti **paṭhamamahāsaṅgīti**, tassā pavattitakālo **paṭhamamahāsaṅgītikālo**, tasmim paṭhamamahāsaṅgītikāle.

Nidadāti desanaṃ desakālādivasena aviditaṃ viditaṃ katvā nidassetīti **nidānaṃ**. Yo loke ganthassa upogghātoti vuccati, svāyamettha “evaṃ me suta”nti-ādiko gantho veditabbo, na pana “sanidānāhaṃ, bhikkhave, dhammaṃ desemi”tiādisu (a. ni. 3.126) viya attajjhāsayādidesanuppattihetu. Tenevāha – “evaṃ me sutanti-ādikaṃ āyasmata ānandena paṭhamamahāsaṅgītikāle **vuttaṃ nidānamādi**”ti. Kāmañcetta yassaṃ paṭhamamahāsaṅgītiyaṃ nikkhittānukkamena saṃvaṇṇanaṃ kattukāmo, sā vitthārato vattabbā, sumaṅgalavilāsiniyaṃ pana attanā vitthāritattā tattheva gahetabbāti imissā saṃvaṇṇanāya mahattaṃ parihaaranto “**sā panesā**”tiādimāha.

1. Evaṃ bāhiraṇidāne vattabbaṃ atidisitvā idāni abhantaraṇidānaṃ ādito paṭṭhāya saṃvaṇṇetuṃ “**yaṃ paneta**”ntiādi vuttaṃ. Tattha yasmā saṃvaṇṇanaṃ karontena saṃvaṇṇetabbe dhamme padavibhāgaṃ padatthaṃca dassetvā tato paraṃ piṇḍatṭhādiddassanavasena saṃvaṇṇanā kātābbā, tasmā padāni tāva dassento “**evanti nipātapada**”nti-ādīmāha. Tattha **padavibhāgoti** padānaṃ viseso, na padaviggaho. Atha vā padāni ca padavibhāgo ca **padavibhāgo**. Padaviggaho ca padavibhāgo ca **padavibhāgoti** vā ekasesavasena padapadaviggahā padavibhāgasaddena vuttāti veditabbaṃ. Tattha

padaviggaho ‘jetassa vanam jetavana’ntiadinā samāsapadesu daṭṭhabbo.

**Atthatoti** padatthato. Tam pana padattham atthuddhārakkamena paṭhamam evamsaddassa dassento “**evamsaddo tāvā**”tiādīmāha. **Avadhāraṇādīti** ettha **ādi**-saddena idamatthapucchāparimāṇādiatthānam saṅgaho daṭṭhabbo. Tathā hi “evamgatāni puthusippāyatanāni (dī. ni. 1.163, 165), evamvidho evamākāro”ti ca ādisu idam-saddassa atthe evam-saddo. Gata-saddo hi pakārapariyāyo, tathā vidhākāra-saddo ca. Tathā hi gatavidhāākārasadde lokiyā pakāratthe vadanti. “Evam su te sunhātā suvilittā kappitakesamassū āmuttamālābharaṇā odātavattavasanā pañcahi kāmagaṇehi samappitā samaṅgībhūtā paricārenti, seyyathāpi tvam etarahi saccariyakoti. No hidam, bho gotamā”tiādīsu (dī. ni. 1.286) pucchāyam, “evam lahuparivattam (a. ni. 1.48), evamāyupariyanto”ti (pārā. 12) ca ādisu parimāṇe.

Nanu ca “evam su te sunhātā suvilittā, evamāyupariyanto”ti ettha evam-saddena pucchanākāraparimāṇākāraṇam vuttatā ākāratho eva evam-saddoti? Na, visesasabbhāvato. Ākāramattavācako hi evam-saddo, ākārathoti adhippeto yathā “evam byākho”tiādīsu, na pana ākāravisesavācako. Evañca katvā, “evam jātena maccenā”tiādīni (dha. pa. 53) upamādisu udāharaṇāni upapannāni honti. Tathā hi “yathāpi...pe... bahu”nti (dha. pa. 53)? Ettha puppharāsīṭṭhāniyato manussūpapattisappurisūpanissaya-saddhammassavana- yonisomanasikāra- bhogasampattiādidānādīpuññakiriyahetusamudāyato sobhāsugandhatādiguṇayogato mālaguḷasadiyo pahūtā puññakiriyā maritabbasabhāvātāya maccena sattena kattabbāti jotitattā puppharāsīmālāguḷāva upamā, tesam upamākāro yathā-saddena aniyamato vuttoti “evam-saddo upamākāranigamanattho”ti vatthum yuttam, so pana upamākāro niyamiyamāno atthato upamāva hotīti āha “**upamāyam āgato**”ti. Tathā “evam iminā ākārena abhikkamitabba”ntiadinā upadisiyamānāya samaṇasārubbāya ākappasampattiyā yo tattha upadisanākāro, so atthato upadeso evāti vuttam, “**evam te...pe... upadeso**”ti. Tathā “evametaṃ bhagavā, evametaṃ sugatā”ti ettha ca bhagavatā yathāvuttamattham aviparītato jānantehi kataṃ tattha samvijjamānaguṇānam pakārehi haṃsanam udaggaṭākaraṇam sampahaṃsanam. Yo tattha sampahaṃsanākāroti yojetabbam.

**Evamevam panāyanti** ettha garaṇākāroti yojetabbam, so ca garaṇākāro vasalīti- ādikhuṃsanasaddasannidhānato idha evam-saddena pakāsītōti viññāyati. Yathā cettha, evam upamākārādayopi upamādivasena vuttānam puppharāsīdisaddānam sannidhānatōti daṭṭhabbam. Evam, bhanteti pana dhammassa sādhuṃ savanamānasikāre sanniyojitehi bhikkhūhi attano tattha ṭhitabhāvassa paṭijānavasena vuttatā ettha evam-saddo “**vacanasampañchanattho**”ti vutto. Tena **evam, bhanteti** sādhu, bhante, suṭṭhu, bhanteti vuttam hoti. **Evañca vadehīti** yathāham vadāmi, evam samaṇam ānandaṃ vadehīti yo evam vadanākāro idāni vattabbo, so evam-saddena nidassiyatīti “**nidassanattho**”ti vuttoti. **Evam noti** etthāpi nesam yathāvuttadhammānam ahitadukkhāvahabhāve sanniṭṭhānanattham anumatigahaṇavasena “samvattanti vā no vā, katham vo ettha hoti”ti pucchāya katāya “evam no ettha hoti”ti vuttatā tadākārasanniṭṭhānam evam-saddena vibhāvītanti viññāyati. So pana tesam dhammānam ahitāya dukkhāya samvattanākāro niyamiyamāno avadhāraṇattho hotīti āha – “**evam no ettha hotītiādīsu avadhāraṇe**”ti.

**Nānāyanipuṇanti** ekattanānattaabyāpāraevam dhammatāsāṅkhātā, nandiyāvattatipukkhalasīhavikkīlītaṅkusadisālocanasāṅkhātā vā ādhārādibhedavasena nānāvidhā nayā **nānāyā**. Nayā vā pāḷigatiyo tā ca paññattianupaññattīdivasena samkilesabhāgiyādīlokiyādītadubhayavomissakādivasena kusalādivasena khandhādivasena saṅghādivasena samayavimuttādivasena ṭhapanādivasena kusalamūlādivasena tikappatṭhānādivasena ca nānappakārāti **nānāyā**, tehi nipuṇam saṅgam sukhumanti **nānāyanipuṇam**. Āsayova **ajjhāsayo**, te ca sassatādibhedena tattha ca apparajakkhatādibhedena **aneke**, attajjhāsayaḍayo eva vā samuṭṭhānam uppattihetu etassāti **anekajjhāsayasamuṭṭhānam**. **Atthabyañjanasampannanti** atthabyañjanaparipuṇam upanetaḥbhāvato, saṅkāsanapakāsanavivaraṇavibhajanauttānīkaraṇapaññattivasena chahi atthapadehi akkharapadabyañjanākāraniruttiniddesavasena chahi byañjanapadehi ca samannāgatanti vā attho

datṭhabbo.

**Vividhapāṭihāriya**nti ettha pāṭihāriyapadassa vacanattham (udā. aṭṭha. 1; itivu. aṭṭha. nidānavaṇṇanā; dha. sa. mūlaṭī. 2) “paṭipakkhaharaṇato rāgādikilesāpanayanato **pāṭihāriya**”nti vadanti. Bhagavato pana paṭipakkhā rāgādayo na santi ye haritabbā, puthujjanānampi vigatūpakkilese aṭṭhaguṇasamannāgate citte hatapaṭipakkhe iddhividham pavattati, tasmā tattha pavattavohārena ca na sakkā idha “**pāṭihāriya**”nti vuttam. Sace pana mahākāruṇikassa bhagavato veneyyagatā ca kilesā paṭipakkhā, tesam haraṇato “**pāṭihāriya**”nti vuttam, evam sati yuttametam. Atha vā bhagavato ca sāsanaṇṇa ca paṭipakkhā titthiyā, tesam haraṇato **pāṭihāriyam**. Te hi diṭṭhiharaṇavasena diṭṭhippakāsane asamatthabhāvena ca iddhiādesanānusāsanihi haritā apanītā hontīti. **Paṭīti** vā ayam saddo “pacchā”ti etassa attham bodheti “tasmim paṭipavittamhi, añño āgañchi brāhmaṇo”tiādīsu (su. ni. 985; cūḷani. vatthugāthā 4) viya, tasmā samāhite citte vigatūpakkilese katakiccena pacchāharitabbam pavattetabbanti paṭihāriyam, attano vā upakkilesesu catutthajjhānamaggehi haritesu pacchā haraṇam paṭihāriyam, iddhiādesanānusāsaniyo ca vigatūpakkilesena katakiccena ca sattahitattham puna pavattetabbā, haritesu ca attano upattilesesu parasattānam upakkilesaharaṇāni hontīti paṭihāriyāni bhavanti, paṭihāriyameva **pāṭihāriyam**. Paṭihāriye vā iddhiādesanānusāsaniyamudāye bhavam ekekaṃ **pāṭihāriya**nti vuccati. Paṭihāriyam vā catutthajjhānam maggo ca paṭipakkhaharaṇato, tattha jātam, tasmim vā nimittabhūte, tato vā āgatanti **pāṭihāriyam**. Tassa pana iddhiātibhedena visayabhedena ca bahuviddhassa bhagavato desanāyam labbhamānattā āha “vividhapāṭihāriya”nti.

Na aññathāti bhagavato sammukhā sutākārato na aññathāti attho, na pana bhagavato desitākārato. Acinteyyānubhāvā hi bhagavato desanā. Evañca katvā “sabbappakārena ko samattho viññātu”nti idaṃ vacanam samatthitam bhavati, dhāraṇabaladassanañca na virujjhati sutākāraavirajjanassa adhippetattā. Na hettha atthantarapārihāro dvinnampi atthānam ekavisayattā. Itarathā thero bhagavato desanāya sabbathā paṭiggahaṇe samattho asamattho cāti āpajjeyyāti.

“Yo paro na hoti, so attā”ti evam vuttāya niyakajjhattasaṅkhātāya sasantatiyā vattanato tividhopi me-saddo kiñcāpi ekasmim eva atthe dissati, karaṇasampadānasāminiddesavasena pana vijjamānam bhedaṃ sandhāyāha, “**me-saddo tīsu atthesu dissatī**”ti.

Kiñcāpi upasaggo kiriyam viseseti, jotakabhāvato pana satipi tasmim suta-saddo eva tam tam attam vadatīti anupasaggassa suta-saddassa atthuddhāre saupasaggassa gahaṇam na virujjhatīti dassento “**saupasaggo anupasaggo cā**”tiādīmāha. **Assāti** suta-saddassa. Kammabhāvasādhanāni idha sutasadde sambhavantīti vuttam “**upadhāritanti vā upadhāraṇanti vā attho**”ti. **Mayāti atthe satīti** yadā me-saddassa kattuvaseṇa karaṇaniddeso, tadāti attho. **Mamāti atthe satīti** yadā sambandhavasena sāmīniddeso, tadā.

Suta-saddasannidhāne payuttana evam-saddena savanakiriyājotakena bhavitabbanti vuttam “**evanti sotaviññāṇādiviññāṇakiccanidassana**”nti. **Ādi**-saddena sampañicchanādīnam pañcadvārikaviññāṇānam tadabhinīhaṇāñca manodvārikaviññāṇānam gahaṇam veditabbam. Sabbesampi vākyānam evakāratthasahitattā “suta”nti etassa sutamevāti ayamattho labbhatīti āha “**assavanabhāvapaṭikkhepato**”ti. Etena avadhāraṇena nirāsaṅkatam dasseti. Yathā ca sutam sutamevāti niyametabbam, tam sammā sutam hotīti āha “**anūnādhikāviparītaggahaṇanidassana**”nti. Atha vā saddantarathāpohanavasena saddo attham vadatīti sutanti asutam na hotīti ayametassa atthotī vuttam “**assavanabhāvapaṭikkhepato**”ti. Iminā diṭṭhādivinivattanam karoti.

Idam vuttam hoti – na idam mayā diṭṭham, na sayambhūñāṇena sacchikatam, atha kho sutam, tañca kho sammadevāti. Tenevāha “**anūnādhikāviparītaggahaṇanidassana**”nti. Avadhāraṇatthe vā evam-sadde ayamatthayojanā kariyatīti tadapekkhassa suta-saddassa ayamattho vutto “**assavanabhāvapaṭikkhepato**”ti. Tenevāha “**anūnādhikāviparītaggahaṇanidassana**”nti.

Savanasaddo cettā kammaṭṭho veditaḅbo ‘‘suyyatī’’ti.

Evam savanahetusavanavisesavasena padattayassa ekena pakārena atthayojanam dassetvā idāni pakārantarehi taṃ dassetuṃ ‘‘**tathā eva**’’ntiādi vuttaṃ. Tattha **tassā**ti yā sā bhagavato sammukhā dhammassavanākārena pavattā manodvāraviññānavīthi, tassā. Sā hi nānappakārena ārammaṇe pavattetuṃ samatthā. Tathā ca vuttaṃ ‘‘**sotadvārānusārenā**’’ti. **Nānappakārenā**ti vakkhamānānam anekavihitānam byañjanatthaggaṇānam nānakārena. Etena imissā yojanāya ākāratto evaṃ-saddo gahitoti dīpeti. **Pavattibhāvappakāsananti** pavattiyā atthitāpakāsanam. **Sutanti dhammappakāsananti** yasmiṃ ārammaṇe vuttappakāra viññānavīthi nānappakārena pavattā, tassa dhammatā vuttaṃ, na suta-saddassa dhammatthattā. Vuttassevatthassa pākāṭikaraṇam ‘‘**ayaṃ hetthā**’’tiādi. Tattha **viññānavīthiyā**ti karaṇatthe karaṇavacanam, **mayā**ti kattuatthe.

**Evanti niddisitabbappakāsananti** nidassanatthamevaṃ saddam gahetvā vuttaṃ nidassetabbassa niddisitabbattābhāvābhāvato. Tena evaṃ-saddena sakalampi suttaṃ paccāmaṭṭhanti dasseti. Suta-saddassa kiriyāsaddattā savanakiriyāya ca sādharānaviññānappabandhapaṭibaddhattā tattha ca puggalavohāroṭi vuttaṃ ‘‘**sutanti puggalakiccappakāsa**’’nti. Na hi puggalavohārarahite dhammappabandhe savanakiriyā labbhātī.

**Yassa cittasantānassā**tiādipi ākārattameva evaṃ-saddam gahetvā purimayojanāya aññathā atthayojanam dassetuṃ vuttaṃ. Tattha **ākārapaññattī**ti upādāpaññatti eva dhammānam pavattīākārupādānavasena tathā vuttā. **Sutanti visayaniddeso**ti sotabbabhūto dhammo savanakiriyākattupuggalassa savanakiriyāvasena pavattitṭhānanti katvā vuttaṃ. Cittasantānavinimuttassa paramatthato kassaci kattu abhāvepi saddavohārena buddhiparikappitabhedavacanicchāya cittasantānato aññam viya taṃsamaṅgiṃ katvā vuttaṃ ‘‘**cittasantānena taṃsamaṅgīno**’’ti. Savanakiriyāvisayopi sotabbadhammo savanakiriyāvasena pavattacittasantānassa idha paramatthato kattubhāvato, savanasena cittappavattiyā eva vā savanakiriyābhāvato taṃkiriyākattu ca visayo hotīti vuttaṃ ‘‘**taṃsamaṅgīno kattuvise**’’ti. Sutākārassa ca therassa sammānicchitabhāvato āha ‘‘**gahaṇasanniṭṭhāna**’’nti. Etena vā avadhāraṇattham evaṃ-saddam gahetvā ayamattayojanā katāti datṭhabbam.

Pubbe sutānam nānavihitānam suttasaṅkhātānam atthabyañjanānam upadhāritarūpassa ākārassa nidassanassa, avadhāraṇassa vā pakāsanasabhāvo evaṃ-saddoti tadākārādiupadhāraṇassa puggalapaññattiyā upādānabhūttadhammappabandhabyāpārātāya vuttaṃ ‘‘**evanti puggalakiccaniddeso**’’ti. Savanakiriyā pana puggalavādinopi viññānanirapekkhā natthīti visesato viññānabyāpāroṭi āha ‘‘**sutanti viññānakiccaniddeso**’’ti. **Meti** saddappavattiyā ekanteneva sattavisayattā viññānakiccassa ca tattheva samodahitabbato ‘‘**meti ubhayakiccupattapuggalaniddeso**’’ti vuttaṃ. Avijjamānapaññattivijjamānapaññattisabhāvā yathākkamaṃ evaṃ-saddasuta-saddānam atthāti te tathārūpa-paññatti-upādānabhūta-dhammappabandhabyāpārābhāvena dassento āha – ‘‘**evanti puggalakiccaniddeso, sutanti viññānakiccaniddeso**’’ti. Ettha ca karaṇakiriyākattukamma-visesappakāsanavasena puggalabyāpārāvisaya-puggalabyāpāranidassanavasena gahaṇākāragāhakatābbisayavisesaniddesavasena kattukaraṇabyāpāra-kattuniddesavasena ca dutiyādayo catasso atthayojanā dassitāti datṭhabbam.

Sabbassapi saddādhigamanīyassa atthassa paññattimukheneva paṭipajjitabbattā sabbapaññattīnañca vijjamānādivasena chasu paññattibhedesu antogadhattā tesu ‘‘eva’’ntiādīnam paññattīnam sarūpaṃ niddhārento āha ‘‘**evanti ca meti cā**’’tiādi. Tattha evanti ca meti ca vuccamānassa atthassa ākārādīno dhammānam asalakkhaṇabhāvato avijjamānapaññattibhāvoti āha ‘‘**saccikaṭṭhaparamatthavasena avijjamānapaññatti**’’ti. Tattha **saccikaṭṭhaparamatthavasena**ti bhūttatthuttamatthavasena. Idaṃ vuttaṃ hoti – yo māyāmarīciādayo viya abhūttattho, anussavādīhi gahetabbo viya anuttamattho ca na hoti, so rūpasaddādisabhāvo, rupanānubhavanādisabhāvo vā attho saccikaṭṭho paramattho cāti vuccati, na tathā evaṃ meti padānam atthoti. Etamevattham pākāṭataram kātuṃ ‘‘**kiṃhetthata**’’ntiādi vuttaṃ.

Sutanti pana saddāyatanam sandhāyāha “**vijjamānapaññattī**”ti. Teneva hi “**yañhi tam ettha sotena upaladdha**”nti vuttam. Sotadvārānūsārena upaladdhanti pana vutte atthabyañjanādi sabbam labbhatīti. **Tam tam upādāya vattabbatoti** sotapathamāgate dhamme upādāya tesam upadhāritākārādino paccāmasanavasena evanti, sasantatipariyāpanne khandhe upādāya meti vattabbattāti attho. Diṭṭhādisabhāvarahite saddāyatane pavattamānopi sutavohāro “**dutiyaṃ tatiya**”ntiādiko viya paṭhamādīni diṭṭhamutaviññāte apekkhitvā pavattoti āha “**diṭṭhādīni upanidhāya vattabbato**”ti. Asutam na hotīti hi sutanti pakāsitoyamatthoti.

Attanā paṭividdhā suttassa pakāravisesā evanti therena paccāmaṭṭhāti āha “**asammohaṃ dīpetī**”ti. **Nānappakārapaṭivedhasamattho hotīti** etena vakkhamānassa suttassa nānappakāratam duppaṭivijjhatañca dasseti. **Sutassa asammosaṃ dīpetīti** sutākārassa yāthāvato dassiyamānattā vuttam. **Asammohenāti** sammohābhāvena, paññāya eva vā savanakālasambhūtāya taduttarakālapaññāsiddhi. Evaṃ **asammosenāti** etthāpi vattabbam. Byañjanānam paṭivijjhatabbo ākāro nātigambhīro yathāsutadhāraṇameva tattha karaṇīyanti satiyā byāpāro adhiko, paññā tattha guṇībhūtāti vuttam “**paññāpubbaṅgamāyā**”tiādi paññāya pubbaṅgamāti katvā. Pubbaṅgamatā cettha padhānatā “**manopubbaṅgamā**”tiādīsu viya. Pubbaṅgamatāya vā cakkhuvīññādīsu āvajjanādīnam viya appadhānante paññā pubbaṅgamā etissāti ayampi attho yujjati, evaṃ sati **pubbaṅgamāyāti** etthāpi vuttavipariyāyena yathāsambhavam attho vedītabbo. **Atthabyañjanasampannassāti** atthabyañjanaparipuṇṇassa, saṅkāsana-pakāsana-vivaraṇa-vibhajana-uttānīkaraṇapaññattivasena chahi atthapadehi, akkharapadabyañjanākāraniruttiniddesavasena chahi byañjanapadehi ca samannāgatassāti vā attho daṭṭhabbo.

**Yoniso manasikāraṃ dīpeti** evaṃ-saddena vuccamānānam ākāranidassanāvadhāraṇatthānam aviparītasaddhammavisayattāti adhippāyo. **Avikkhepaṃ dīpetīti** “**ogharaṇasuttam kattha bhāsita**”ntiādipucchāvasena pakaraṇappavattassa vakkhamānassa suttassa savanam samādhānamantarena na sambhavatīti katvā vuttam. **Vikkhittacittassāti**ādi tassevatthassa samatthanasena vuttam. **Sabbasampattiyāti** atthabyañjanadesaka-payojanādisampattiyā. Aviparītasaddhammavisayehi viya ākāranidassanāvadhāraṇatthehi yonisomanasikāraṃ, saddhammassavanena viya ca avikkhepassa yathā yonisomanasikārena phalabhūtena attasammāpaṇidhipubbekatapuññānaṃ siddhi vuttā tadavinābhāvato, evaṃ avikkhepeneva phalabhūtena kāraṇabhūtaṃ saddhammassavanasappurisūpanissayānaṃ siddhi dassetabbā siyā assutavato sappurisūpanissayarāhitassa ca tadabhāvato. “**Na hi vikkhittacitto**”tiādīna samatthanasena pana avikkhepena kāraṇabhūtena sappurisūpanissayena ca phalabhūtassa saddhammassavanassa siddhi dassitā. Ayaṃ panettha adhippāyo yutto siyā, saddhammassavanasappurisūpanissayā na ekantena avikkhepassa kāraṇam bāhiraṅgattā. Avikkhepo pana sappurisūpanissayo viya saddhammassavanassa ekantakāraṇanti, evampi avikkhepena sappurisūpanissayasiddhijotānaṃ samatthitāva, no na samatthitā vikkhittacittānaṃ sappurisapayirūpāsānābhāvassa atthasiddhito. Ettha ca purimaṃ phalena kāraṇassa siddhidassanaṃ nadīpūrena viya upari vuṭṭhisabbhāvassa. Dutiyaṃ kāraṇena phalassa siddhidassanaṃ daṭṭhabbam ekantavassinā viya meghavutṭhānena vuṭṭhipavattiyā.

Bhagavato vacanassa atthabyañjanapabheda-paricchedavasena sakalāsānasampatti-ogāhanākāro niravasesaparāhita-pāripūrikāraṇanti vuttam “**evaṃ bhaddako ākāro**”ti. Yasmā na hotīti sambandho. **Pacchimacakkadvayasampattinti** attasammāpaṇidhi-pubbekatapuññatā-saṅkhātam guṇadvayaṃ. Aparāparavuttiyā cettha cakkabhāvo, caranti etehi sattā, sampattibhavesūti vā. Ye sandhāya vuttam “**cattārimāni, bhikkhave, cakkāni, yehi samannāgatānaṃ devamanussānaṃ catucakkaṃ vattatī**”tiādi (a. ni. 4.31). Purimapacchimabhāvo cettha desanakkamavasena daṭṭhabbo. **Pacchimacakkadvayasiddhiyāti** pacchimacakkadvayassa ca atthitāya. Sammāpaṇihitatto pubbe ca katapuñño suddhāsayo hoti tadasuddhietūnaṃ kilesānaṃ dūrībhāvatoti āha “**āsayasuddhi siddhā hotī**”ti. Tathā hi vuttam – “**sammāpaṇihitam cittam, seyyaso naṃ tato kare**”ti (dha. pa. 43) “**katapuññosi, tvaṃ ānanda, padhānāmanuyuñja, khippam hohisi anāsavo**”ti (dī. ni. 2.207) ca. Tenevāha

“**āsayasuddhiyā adhigamabyattisiddhī**”ti. **Payogasuddhiyāti** yonisomanasikārapubbaṅgamassa dhammassavanapayogassa visadabhāvena. Tathā cāha “**āgamabyattisiddhī**”ti, sabbassa vā kāyavacīpayogassa niddosabhāvena. Parisuddhakāyavacīpayogo hi vipaṭṭisārābhāvato avikkhattacitto pariyattiyam visārado hotīti.

**Nānappakārapaṭivedhadīpakenā**tiādīnā atthabyañjanesu therassa evaṃ-saddasuta-saddānaṃ asammoḥāsamosadīpanato catupaṭṭisambhidāvasena atthayojanaṃ dasseti. Tattha **sotabbhadapaṭivedhadīpakenā**ti etena ayaṃ suta-saddo evaṃ-saddasannidhānato, vakkhamānāpekkhāya vā sāmāññeneva sotabbadhammavisesaṃ āmasatīti dīpeti. Manodīṭṭhīhi pariyattidhammānaṃ anupekkhanasuppaṭivedhā visesato manasikārapaṭibaddhāti te vuttanayena yonisomanasikāradīpakena evaṃ saddena yojetvā, savanadhāraṇavacīparicayā pariyattidhammānaṃ visesena sotāvadhānapaṭibaddhāti te vuttanayena avikkhepadīpakena suta-saddena yojetvā dassento sāsanasampattiyā dhammassavane ussāhaṃ janeti. Tattha **dhammāti** pariyattidhammā. **Manasā anupekkhitāti** “idha sīlaṃ kathitaṃ, idha samādhi, idha paññā, ettakā ettha anusandhiyo”tiādīnā nayena manasā anupekkhitā. **Dīṭṭhiyā suppaṭividdhāti** nijjhānakkhanti bhūtāya, nītapariññāsāṅkhātāya vā dīṭṭhiyā tattha tattha vuttarūpārūpadhamme “iti rūpaṃ, ettakaṃ rūpa”ntiādīnā suṭṭhu vavatthapetvā paṭividdhā.

**Sakalena vacanenāti** pubbe tīhi padehi visuṃ visuṃ yojitattā vuttaṃ. **Attano adahantoti** “mamedā”nti attani aṭṭhapento. Bhummatthe cetam sāmivacanaṃ. **Asappurisabhūminti** akataññutaṃ. “Idhekacco pāpabhikkhu tathāgatappaveditaṃ dhammavinayaṃ pariyāpuṇitvā attano dahatī”ti (pārā. 195) evaṃ vuttaṃ anariyavohārāvattaṃ, sā eva anariyavohārāvattā asaddhammo. Nanu ca ānandattherassa “mamedāṃ vacana”nti adhimānassa, mahākassapattherādīnañca tadāsāṅkāya abhāvato asappurisabhūmi-samatikkamādivacanaṃ niratthakanti? Nayidamevaṃ. “Evaṃ me suta”nti vadantena ayampi attho vibhāvitoti dassanato. Keci pana “devatānaṃ parivitakkāpekkhaṃ tathāvacananti edisī codanā anavakāsā”ti vadanti. Tasmim kira khaṇe ekaccānaṃ devatānaṃ evaṃ cetaso parivitakko udapādi “bhagavā ca parinibbuto, ayañca āyasmā desanākusalo idāni dhammaṃ deseti, sakyakulappasuto tathāgatassa bhātā cūlapituputto. Kim nu kho sayam sacchikataṃ dhammaṃ deseti? Udāhu bhagavato eva vacanaṃ yathāsuta”nti, evaṃ tadāsāṅkitappakārato asappurisabhūmisamokkamādito atikkamādi vibhāvitanti. **Appetīti** nidasseti. Dīṭṭhadhammika-samparāyika-paramatthesu yathārahaṃ satte netīti netti, dhammo eva netti **dhammanetti**.

Daḷhataraniviṭṭhā vicikicchā **kañkhā**, nātiśamsappanā matibhedamattā **vimati**. **Assaddhiyaṃ vināsetīti** bhagavatā bhāsītattā sammukhāvassa paṭiggahitattā khalitaduruttādīgahaṇadosābhāvato ca. Ettha ca paṭhamādayo tisso atthayojanā ākāradīatthesu aggahitavisesameva evaṃ-saddaṃ gahetvā dassitā, tato parā catasso ākāratthameva evaṃ-saddaṃ gahetvā vibhāvitā. Pacchimā pana tisso yathākkamaṃ ākāratthaṃ nidassanattaṃ avadhāraṇatthañca evaṃ-saddaṃ gahetvā yojitāti daṭṭhabbaṃ.

**Eka-saddo aññasetṭha**asahāyasāṅkhayādīsū dissati. Tathā hesa “sassato attā ca loko ca, idameva saccaṃ moghamaññanti ittheke abhivadanti”tiādīsū (ma. ni. 3.27) aññatthe dissati. “Cetaso ekodibhāva”ntiādīsū (dī. ni. 1.228; pārā. 11) seṭṭhe, “eko vūpakaṭṭho”tiādīsū (dī. ni. 1.405) asahāye, “ekova kho, bhikkhave, khaṇo ca samayo ca brahmacariyavāsāyā”tiādīsū (a. ni. 8.29) saṅkhayāyaṃ. Idhāpi saṅkhayāyanti dassento āha “**ekanti gaṇanaparicchedaniddeso**”ti. **Kālāñca samayañcāti** yuttakālāñca paccayasāmaggiñca. **Khaṇoti** okāso. Tathāgatupādādiko hi maggabrahmacariyassa okāso tappaccayassa paṭilābhahetuttā. Khaṇo eva ca samayo, yo khaṇoti ca samayoti ca vuccati, so eko evāti hi attho. **Mahāsamayoti** mahāsamūho. **Samayopi khoti** sikkhāpadapūraṇassa hetupī. **Samayappavādaketi** dīṭṭhippavādake. Tattha hi nisinnā titthiyā attano attano samayaṃ pavadanti. **Atthābhisamayāti** hitapaṭilābhā. Abhisametabboti abhisamayo, abhisamayo attho **abhisamayatthoti** pīlanādīni abhisametabbabhāvena ekībhāvaṃ upanetvā vuttāni. Abhisamayassa vā paṭivedhassa visayabhūto attho **abhisamayatthoti** tāneva tathā ekattena vuttāni. Tattha **pīlanam** dukkhasaccassa taṃsamaṅgino hiṃsanaṃ avipphārikatākaraṇaṃ, **santāpo** dukkhadukkhātādivasena santāpanaṃ paridhanaṃ.

Tattha sahakārikāraṇaṃ sannijjhaṃ sameti samavetīti **samayo**, samavāyo. Sameti samāgacchati ettha maggabrahmacariyaṃ tadādhārapuggalehīti **samayo**, khaṇo. Sameti ettha, etena vā saṃgacchati satto, sabhāvadhammo vā sahaḥajātādīhi, uppādādīhi vāti **samayo**, kālo. Dhammappavattimattatāya atthato abhūtopi hi kālo dhammappavattiyā adhikaraṇaṃ karaṇaṃ viya ca parikkappaṇāmettasiddhena rūpena voharīyatīti. Samaṃ, saha vā avayavānaṃ ayaṇaṃ pavatti avatṭhānanti **samayo**, samūho yathā “samudāyo”ti. Avayavasahāvattṭhānameva hi samūhoti. Avasesapaccayānaṃ samāgame eti phalaṃ etasmā uppajjati pavattati cāti **samayo**, hetu yathā “samudayo”ti. Sameti saṃyojanabhāvato sambandho eti attano visaye pavattati, daḥaggahaṇabhāvato vā saṃyuttā ayanti pavattanti sattā yathābhinivesaṃ etenāti **samayo**, diṭṭhi. Diṭṭhisamyojanena hi sattā ativiya bajjhantīti. Samiti saṃgati samodhānanti **samayo**, paṭilābho. Samassa nirodhassa yānaṃ, sammā vā yānaṃ apagama apavatti **samayo**, pahānaṃ. Abhimukhaṃ nīṇena sammā etabbo adhigantabboti **abhisamayo**, dhammānaṃ aviparīto sabhāvo. Abhimukhabhāvena sammā eti gacchati bujjhatīti **abhisamayo**, dhammānaṃ aviparītasabhāvāvabodho. Evaṃ tasmim̐ tasmim̐ atthe samayasaddappavatti veditabbā. Samayasaddassa atthuddhāre abhisamayasaddassa udāharaṇaṃ vuttanayeneva veditabbaṃ. **Assāti** samayasaddassa. **Kālo attho** samavāyādīnaṃ atthānaṃ idha asambhavato desadesakaparisānaṃ viya suttassa nidānabhāvena kālassa apadisitabbato ca.

Kasmā panettha aniyamitavaseneva kālo niddiṭṭho? Na utusaṃvaccharādivasena niyamitoti āha “**tattha kiñcāpi**”tiādi. Utusaṃvaccharādivasena niyamaṃ akatvā samayasaddassa vacane ayampi guṇo laddho hotīti dassento “**ye vā ime**”tiādimāha. Sāmaññajotanā hi visese avatiṭṭhatīti. Tattha **diṭṭhadhammasukhavihārasamayo** devasikaṃ jhānaphalasaṃpattīhi vītināmanakālo, visesato sattasattāhāni. **Suppakāsāti** dasasahasilokadhātupakampana-obhāsapātubhāvādīhi pākāṭā. Yathāvuttappabhedesu eva samayesu ekadesaṃ pakāraṇārehi saṅgahetvā dassetuṃ “**yo cāya**”ntiādimāha. Tathā hi nīṇakiccasaṃyayo, atthapāṭipattisaṃyayo ca abhisambodhisamayo, ariyatūṇihbhāvasamayo, diṭṭhadhammasukhavihārasamayo, karuṇākiccaparahitapaṭipattidhammīkathāsamayā, desanāsamayo eva.

Karaṇavacanena niddeso katoti sambandho. **Tatthāti** abhidhammatadaññasuttapadavinayesu. **Tatthāti** bhummakaraṇehi. **Adhikaraṇattho** ādhārattho. Bhāvo nāma kiriyā, tāya kiriyantaralakkhaṇaṃ **bhāvenabhāvalakkhaṇaṃ**. Tattha yathā kālo sabhāvadhammaparicchinno sayamaṃ paramatthato avijjamānopi ādhārabhāvena paññāto taṅkhaṇappavattānaṃ tato pubbe parato ca abhāvato “pubbaṇhe jāto, sāyanhe gacchati”ti ca ādisu, samūho ca avayavavinimutto visuṃ avijjamānopi kappanāmettasiddho avayavānaṃ ādhārabhāvena paññāpiyati yathā “rukke sākā, yavarāsiyaṃ sambhūto”tiādisu, evaṃ idhāpīti dassento āha “**adhikaraṇāhi...pe... dhammāna**”nti. Yasmiṃ kāle, dhammapuñje vā kāmāvacaraṃ kusalaṃ cittaṃ uppannaṃ hoti, tasmim̐ eva kāle dhammapuñje ca phassādayopi honṭīti ayaṃ hi tattha attho. Yathā ca “gāvīsu duyhamānāsu gato, duddhāsu āgato”ti dohanakiriyāya gamanakiriyā lakkhīyati, evaṃ idhāpi yasmiṃ samaye, tasmim̐ samayeti ca vutte “sati”ti ayamattho viññāyamāno eva hoti padatthassa sattāvīrahābhāvatoṭi samayassa sattākiriyāya cittaṃ uppādakiriyā phassādibhavanakiriyā ca lakkhīyati. **Yasmiṃ samayeti** yasmiṃ navame khaṇe, yasmiṃ yonisomanasikārādihetumhi, paccayasamavāye vā sati kāmāvacaraṃ kusalaṃ cittaṃ uppannaṃ hoti, tasmim̐yeva khaṇe, hetumhi, paccayasamavāye vā phassādayopi honṭīti ubhayattha samayasadde bhummaniddeso kato lakkhaṇabhūtabhāvayuttoti dassento āha “**khaṇa...pe... lakkhīyati**”ti.

**Hetuattho karaṇattho ca sambhavati** “annena vasati, vijjāya vasati, pharasunā chindati, kudālena khaṇati”tiādisu viya. Vītikkamañhi sutvā bhikkhusaṅghaṃ sannipāṭepetvā oṭiṇṇavatthukaṃ puggalaṃ paṭipucchitvā vīgārahitvā ca taṃ taṃ vatthuotiṇṇakālaṃ anatikkamitvā teneva kālena sikkhāpadāni paññapento bhagavā viharati sikkhāpadapaññattihetuṇca apekkhamāno tatiyapārājikādisu viya.

**Accantameva** ārambhato paṭṭhāya yāva desanāniṭṭhānaṃ. Parahitapaṭipattisaṅkhātena **karuṇāvihārena**. **Tadatthajotanatthanti** accantasamyogethājotanattham̐. **Upayoganiddeso kato** yathā



“māsaṃ sajjhāyati”ti. **Porāṇāti** aṭṭhakathācariyā. **Abhilāpamattabhedoti** vacanamattena viseso. Tena suttavinayesu vibhattibyattayo katoti dasseti.

**Seṭṭhanti** seṭṭhavācakaṃ vacanaṃ “seṭṭha”nti vuttaṃ seṭṭhaguṇasahacaraṇato, tathā “**uttama**”nti etthāpi. **Gāravayuttoti** garubhāvayutto garuṇayogato, garukaraṇārahatāya vā gāravayutto. **Vuttoyeva**, na pana idha vattabbo visuddhimaggassa imissā aṭṭhakathāya ekadesabhāvatoti adhippāyo.

Aparo nayo (itivu. aṭṭha. nidānavaṇṇanā; sāratta. ṭī. 1.1.veraṇjakaṇḍavaṇṇanā; visuddhi. mahāṭī. 1.144) – bhāgavāti bhagavā, bhataṅvāti bhagavā, bhāge vanīti bhagavā, bhage vanīti bhagavā, bhattavāti bhagavā, bhage vamīti bhagavā, bhāge vamīti bhagavā.

“Bhāgavā bhataṅvā bhāge, bhage ca vani bhattavā;  
Bhage vami tathā bhāge, vamīti bhagavā jino”.

Tattha kathaṃ **bhāgavāti bhagavā**? Ye te sīlādayo dhammakkhandaṃ guṇabhāgā guṇakoṭṭhāsā, te anaññasādhāraṇā nīratisayā tathāgate atthi upalabbhanti. Tathā hissa sīlaṃ samādhi paññā vimutti vimuttiñānadassanaṃ, hirī ottappaṃ, saddhā vīriyaṃ, sati sampajaññaṃ, sīlavissuddhi diṭṭhivissuddhi, samatho vipassanā, tīṇi kusalamūlāni, tīṇi sucariṭāni, tayo sammāvitakkā, tisso anavajjasaññā, tisso dhātuyo, cattāro satipaṭṭhānā, cattāro sammappadhānā, cattāro iddhipādā, cattāro ariyamaggā, cattāri ariyaphalāni, catasso paṭisambhidā, catuyoniparicchedakañāṇāni, cattāro ariyavaṃsā, cattāri vesārajjañāṇāni, pañca padhāniyaṅgāni, pañcaṅgiko sammāsamādhi, pañcañāṇiko sammāsamādhi, pañcīndriyāni, pañca balāni, pañca nissāraṇiyyā dhātuyo, pañca vimuttāyatanañāṇāni, pañca vimutti-paripācaniyyā saññā, cha anussatiṭṭhānāni, cha gāravā, cha nissāraṇiyyā dhātuyo, cha satatavihārā, cha anuttariyāni, cha nibbedhabhāgiyyā saññā, cha abhiññā, cha asādhāraṇāñāṇāni, satta aparihāniyyā dhammā, satta ariyadhammā, satta ariyadhanāni, satta bojjhaṅgā, satta sappurissadhammā, satta nijjaravatthūni, satta saññā, sattadakkhiṇeyyapuggaladesanā, sattakhīṇāsavabaladesanā, aṭṭhapaññāpaṭilābhahetudesanā aṭṭha sammattāni, aṭṭhalokadhammātikkaṃ, aṭṭha ārambhavatthūni, aṭṭhaakkhaṇadesanā, aṭṭha mahāpurissavitakkā, aṭṭhaabhibhāyatanadesanā, aṭṭha vimokkhā, nava yonisomanasikāramūlakā dhammā, nava pārisuddhipadhāniyaṅgāni, navasattāvāsadesanā, nava āghātapāṭivīniyā, nava saññā, navanānattā, nava anupubbavīhārā, dasa nāthakaraṇā dhammā, dasa kasiṇāyatanañāni, dasa kusalakammāpathā, dasa sammattāni, dasa ariyavāsā, dasa asekkhadhammā, dasa tathāgatabalāni, ekādasa mettānisamsā, dvādasa dhammācakkākarā, terasa dhutaṅgā, cuddasa buddhañāṇāni, pañcadasa vimutti-paripācaniyyā dhammā, soḷasavidhā ānāpānassati, soḷasa aparantapaniyyā dhammā, aṭṭhārāsa buddhadhammā, ekūnavīsati paccavekkhaṇāñāṇāni, catucattālīsa ṇāṇavatthūni, paññāsa udayabbayañāṇāni, paropaññāsa kusalā dhammā, sattasattati ṇāṇavatthūni, catuvīsati koṭṭisatasahassasaṅkhasamāpattisañcāri mahāvajirañāṇāṇāni, anantanayasamantapaṭṭhāna-pavicaya-paccavekkhaṇadesanāñāṇāni, tathā anantāsu lokadhātūsu anantānaṃ sattānaṃ āsayādivibhāvanañāṇāni cāti evamādayo anantāparimāṇabhedā anaññasādhāraṇā nīratisayā guṇabhāgā guṇakoṭṭhāsā saṃvijjanti upalabbhanti, tasmā yathāvuttavibhāgā guṇabhāgā assa atthīti “bhāgavā”ti vattabbe ākārasa rassattaṃ katvā “bhagavā”ti vutto. Evaṃ tāva bhāgavāti **bhagavā**.

“Yasmā sīlādayo sabbe, guṇabhāgā asesato;  
Vijjanti sugate tasmā, bhagavāti pavuccati”.

Kathaṃ **bhataṅvāti bhagavā**? Ye te sabbalokahitāya ussukkamāpanehi manussattādike aṭṭha dhamme samodhānetvā sammāsamābodhiyā katamahābhīṇiṅharehi mahābodhisattehi paripūritabbā dānapāramī, sīla, nekkhamma, paññā, vīriya, khanti, sacca, adhiṭṭhāna, mettā, upekkhāpāramīti dasa pāramiyo, dasa upapāramiyo, dasa paramatthapāramiyoti samatīmsa pāramiyo, dānādīni cattāri saṅgahavatthūni, saccādīni cattāri adhiṭṭhānāni, āṅgapariccāgo, jīvita, rajja, putta, dārapariccāgoti pañca mahāpariccāgā, pubbayogo, pubbacariyā, dhammakkhānaṃ, ñātattacariyā, lokattacariyā, buddhicariyāti evamādayo, saṅkhepato vā sabbe puññañāṇasambhārā buddhakaradhammā, te



hi te attano jīvitapariccāgepi tattha pasādaṃ na pariccajanti, tassa vā āṇaṃ daḷhabhattibhāvato.

Tenevāha –

“Yo ve kataññū katavedi dhīro;  
Kalyāṇamitto daḷhabhatti ca hotī”ti. (jā. 2.17.78);

“Seyyathāpi, bhikkhave, mahāsamuddo ṭhitadhammo velaṃ nātivattati, evameva kho, bhikkhave, yaṃ mayā sāvakanāṃ sikkhāpadaṃ paññattaṃ, taṃ mama sāvakā jīvitahetupi nātikkamantī”ti (udā. 45; cūlava. 385) ca. –

Evam bhattavāti **bhagavā** niruttinayena ekassa ta-kārassa lopam katvā itarassa ga-kāram katvā.

“Guṇāṭṭisayayuttassa, yasmā lokahitesino;  
Sambhattā bahavo satthu, bhagavā tena vuccatī”ti.

Kathaṃ **bhage vamīti bhagavā**? Yasmā tathāgato bodhisattabhūtopi aparimāṇāsu jātisu pāramiyo paripūrento bhagasāṅkhātaṃ sirim issariyaṃ yasañca vami uggiri, khelaṇḍaṃ viya anapekkho chaḍḍayi, carimattabhāvepi hatthagataṃ cakkavattisirim devalokādhīpaccaḍḍisaṃ catudīpissariyaṃ cakkavattisampattisannissayaṃ sattaratanasamujjalaṃ yasañca tiṇṇāyapi amaññamāno nirapekkho pahāya abhinikkhamitvā sammāsambodhiṃ abhisambuddho, tasmā ime sirīādike bhage vamīti **bhagavā**. Atha vā bhāni nāma nakkhattāni, tehi samaṃ gacchanti pavattantīti bhagā, sineruyugandharauttarakuruhimavantātibhājanalokavisesasannissayā sobhā kappatṭhiyabhāvato, tepi bhagavā vami tannivāsīsattāvāsasamatikkamato tappaṭibaddhachandarāgappahānena pajahīti. Evampi bhage vamīti **bhagavā**.

“Cakkavattisirim yasmā, yasaṃ issariyaṃ sukhaṃ;  
Pahāsi lokacittañca, sugato bhagavā tato”ti.

Kathaṃ **bhāge vamīti bhagavā**? Bhāgā nāma sabhāgadhammakotṭhāsā, te khandhāyatanadhātādivasena, tatthāpi rūpavedanādivasena pathaviyādivasena atītādivasena ca anekavidhā, te ca bhagavā sabbaṃ papañcaṃ sabbaṃ yogaṃ sabbaṃ ganthaṃ sabbaṃ saṃyojanaṃ samucchinditvā amatadhātuṃ samadhigacchanto vami uggiri, anapekkho chaḍḍayi na paccāvami. Tathā hesa “sabbatthakameva pathaviṃ āpaṃ tejaṃ vāyaṃ, cakkhuṃ sotaṃ ghānaṃ jivhaṃ kāyaṃ manaṃ, rūpe sadde gandhe rase phoṭṭhabbe dhamme, cakkhuvīññāṇaṃ...pe... manovīññāṇaṃ, cakkhusamphassaṃ...pe... manosamphassaṃ, cakkhusamphassajaṃ vedanaṃ...pe... manosamphassajaṃ vedanaṃ, cakkhusamphassajaṃ saññaṃ...pe... manosamphassajaṃ saññaṃ, cakkhusamphassajaṃ cetanaṃ...pe... manosamphassajaṃ cetanaṃ, rūpataṇhaṃ...pe... dhammataṇhaṃ, rūpavitakkaṃ...pe... dhammavitakkaṃ, rūpavicāraṃ...pe... dhammavicāra”ntiādinā anupadadhammavibhāgavasenaṃpi sabbeva dhammakotṭhāse anavasesato vami uggiri, anapekkhapariccāgena chaḍḍayi. Vuttañhetam “yaṃ taṃ, ānanda, cattaṃ vantaṃ muttaṃ pahīnaṃ paṭinissatṭhaṃ, taṃ tathāgato puna paccāvamissatīti netam ṭhānaṃ vijjati”ti (dī. ni. 2.183). Evampi bhāge vamīti **bhagavā**. Atha vā **bhāge vamīti** sabbepi kusalākusale sāvajjānavajje hīnapanāṭe kaṇhasukkasappaṭibhāge dhamme ariyamaggañānamukhena vami uggiri, anapekkho pariccaji pajahi, paresaṅca tathattāya dhammaṃ desesi. Vuttampi cetam “dhammāpi vo, bhikkhave, pahātabbā, pageva adhammā (ma. ni. 1.240). Kullūpamaṃ vo, bhikkhave, dhammaṃ desessāmi nittharaṇatthāya, no gahaṇatthāyā”tiādi (ma. ni. 1.240). Evampi bhāge vamīti **bhagavā**.

“Khandhāyatanadhātādi-dhammabhāgā-mahesinā;  
Kaṇhasukkā yato vantā, tatopi bhagavā mato”ti.

Tena vuttaṃ –

“Bhāgavā bhataṃ bhāge, bhage ca vani bhattavā;  
Bhage vami tathā bhāge, vami bhagavā jino”’ti.

**Dhammasarīraṃ paccakkhaṃ karotīti** “yo vo, ānanda, mayā dhammo ca vinayo ca desito paññatto, so vo mamaccayena satthā”’ti vacanato dhammassa satthubhāvaparīyāyo vijjatīti katvā vuttaṃ. **Vajirasāṅghātasamānakāyo** parehi abhejjasarīrattā. Na hi bhagavato rūpakāye kenaci sakkā antarāyaṃ kātunti. **Desanāsampattim niddisati** vakkhamānassa sakalassa suttassa “**eva**”’nti nidassanato. **Sāvakasampattim niddisati** paṭisambhidāppattena pañcasu ṭhānesu bhagavatā etadagge ṭhapitena mayā mahāsāvakena suttaṃ, tañca kho mayāva suttaṃ, na anussuttaṃ na paraṃparābhatanti imassatthassa dīpanato. **Kālasampattim niddisati** bhagavāsaddasannidhāne payuttassa समयasaddassa buddhuppādaṭṭhānaṃ dīpanato. Buddhuppādaparamā hi kālasampadā. Tenetaṃ vuccati –

“Kappakasāye kaliyuge, buddhuppādo aho mahacchariyaṃ;  
Hutāvahamajjhe jāttaṃ, samuditamakaramaravinda”’nti.

**Bhagavāti desakasampattim niddisati** guṇavisiṭṭhasattuttamabhāvādīpanato garugāravādhivacanabhāvato.

**Avisesenāti** na visesena, viharabhāvasāmaññenāti attho. **Iriyāpatha...pe... vihāresūti** iriyāpathavihāro, dibbavihāro, brahmavihāro, ariyavihāro etesu catūsu vihāresu. **Samaṅgīparīdīpananti** samaṅgībhāvaparīdīpanaṃ. **Etanti** “viharatī”’ti etaṃ padaṃ. Tathā hi taṃ “idhekacco gihīhi saṃsaṭṭho viharatī sahanandī sahasokī”’tiādīsu (saṃ. ni. 4.241) iriyāpathavihāre āgataṃ. “Yasmim, bhikkhave, samaye bhikkhu vivicceva kāmehi...pe... paṭhamam jhānaṃ upasampajja viharatī”’ti (dha. sa. 160; vibha. 624) ettha dibbavihāre. “So mettāsahagatena cetasā ekaṃ disaṃ pharitvā viharatī”’tiādīsu (dī. ni. 1.556; 3.308; ma. ni. 1.77; 2.309; 3.230) brahmavihāre. “So kho ahaṃ, aggivessana, tassāyeva kathāya pariyoṣāne tasmim eva purimasmim samādhinimutte ajjhattameva cittaṃ saṅghapemi sannisādemī ekodim karomī samādahāmi, yena sudaṃ niccakappaṃ viharāmi”’tiādīsu (ma. ni. 1.387) ariyavihāre.

Tattha iriyanaṃ vattanaṃ **iriyā**, kāyappayogo. Tassā pavattanupāyabhāvato ṭhānādi **iriyāpatho**. Ṭhānasamaṅgī vā hi kāyena kiñci kareyya gamanādīsu aññatarasamaṅgī vā. Atha vā iriyati pavattati etena attabhāvo kāyakiccaṃ vāti **iriyā**, tassā pavattiupāyabhāvato iriyā ca so patho cāti **iriyāpatho**, ṭhānādi eva. So ca atthato gatinivattiādīkārena pavatto catusantirūpapabandho eva. Viharaṇaṃ, viharatī etenāti vā **vihāro**, iriyāpatho eva viharo **iriyāpathavihāro**. Divi bhavo **dibbo**, tattha bahulappavattiyā brahmapārisajjādevāloke bhavoti attho. Tattha yo dibbānubhāvo, tadatthāya saṃvattatīti vā **dibbo**, abhiññābhinihāravasena mahāgatikattā vā **dibbo**, dibbo ca so viharo cāti **dibbavihāro**, catasso rūpāvacarasamāpattiyo. Āruppasamāpattiyopi ettheva saṅgahaṃ gacchanti. Brahmūnaṃ, brahmāno vā viharā **brahmavihārā**, catasso appamaññāyo. Ariyānaṃ, ariyā vā viharā **ariyavihārā**, cattāri sāmāññaphalāni. **So hi ekaṃ iriyāpathabādhananti** yadipi bhagavā ekenapi iriyāpathena cirataraṃ kālaṃ attabhāvaṃ pavattetuṃ sakkoti, tathāpi upādinnaṃ sarīraṃ nāma ayaṃ sabhāvoti dassetuṃ vuttaṃ. Yasmā vā bhagavā yattha katthaci vasanto vineyyānaṃ dhammaṃ desento, nānāsamāpattīhi ca kālaṃ vītināmento vasatīti sattānaṃ attano ca vividhaṃ hitasukhaṃ harati upaneti uppādeti, tasmā vividhaṃ haratīti evamettha attho vedītabbo.

Paccatthike jinātīti **jetto**. Jeta-saddo hi sota-saddo viya kattusādhanopi atthīti. Rañño vā paccatthikānaṃ jītakāle jātattā **jetto**. Rañño hi attano jayaṃ tattha āropetvā jītavāti jetoti kumāro vutto. Maṅgalakāmatāya vā jetotissa nāmaṃ kataṃ, tasmā “jeyyo”’ti etasmim atthe “jeto”’ti vuttanti daṭṭhabbaṃ. Tassa jetassa rājakumārassa. **Vaneti**ādito paṭṭhāyeva taṃ tassa santakanti dassetuṃ “**taṃ hi**”’tiādī vuttaṃ. Sabbakāmasamiddhitāya vigatamalamaccheratāya karuṇādiguṇasamaṅgitāya ca

niccakālaṃ upaṭṭhapito anāthānaṃ piṇḍo etassa atthīti **anāthapiṇḍiko**, tassa anāthapiṇḍikassa. Yadi jetavanaṃ, kathaṃ anāthapiṇḍikassa ārāmoti āha “**anāthapiṇḍikenā**”tiādi. Pañcavidhasenaṅgasampattiyā āramanti ettha pabbajitāti **ārāmo**, tasmim ārāme. Yadi so bhūmibhāgo koṭisantharena mahāsetthinā kīto, rukkhā pana jetena na vikkīti tāṃ “jetavana”nti vattabbaṃ labhatīti vadanti. Ubhinnampi vā tattha pariccāgavisesakittanattaṃ ubhayavacanaṃ, jetenapi hi bhūmibhāgavikkayaena laddhadhanaṃ tattha dvāraḥkoṭṭhakakaraṇavasena viniyuttaṃ. Sāvattijetavanānaṃ bhūmibhāgavasena bhinnattā vuttaṃ “**na hi sakkā ubhayattha ekaṃ samayaṃ viharitu**”nti.

**Apākaṭā**ti sakko suyāmotiādinā anabhiññātā. Abhiññātānampi aññatarasaddo dissateva ekasadisāyattattāti dassetuṃ “**abhijānāti no**”tiādi vuttaṃ. **Ahunā** idāneva. **Sādhāraṇavacanaṃ** dibbataṃ antonītaṃ katvā. Devo eva **devatā** purisepi vattanato. Tenevāha “**imasmim panatthe**”tiādi. Nanu ca rūpāvacarasattānaṃ purisindriyaṃ natthi, yena te purisāti vucceyyuṃ? Yadi purisindriyaṃ natthi, purisasaṅghānassa pana purisavesassa ca vasena purisapuggalātveva vuccanti purisapakatibhāvato.

**Abhikkantā**ti atikkantā, viḡatāti atthoti āha “**khaye dissati**”ti. Teneva hi “**nikkhanto paṭhamo yāmo**”ti upari vuttaṃ. **Abhikkantataroti** ativiya kantataro. Tādiso ca sundaro bhaddako nāma hotīti āha “**sundare dissati**”ti. **Koti** devanāyakkhagandhabādīsu ko katamo? **Meti** mama. **Pādānīti** pāde. **Iddhiyāti** imāya evarūpāya deviddhiyā. **Yasasāti** iminā edisena parivārena paricchadena ca. **Jalanti** vijjotamāno. **Abhikkantenāti** ativiya kantena kamaniyena abhirūpena. **Vaṇṇenāti** chavivaṇṇena sarīravaṇṇanibhāya. **Sabbā obhāsayaṃ disāti** sabbāpi disā pabhāsento cando viya sūriyo viya ca ekobhāsaṃ ekālokaṃ karontoti gāthāya attho. **Abhirūpeti** ulārarūpe sampannarūpe.

Kaṅcānāsannibhattacatā suvaṇṇavaṇṇaggahaṇena gahitāti adhippāyenāha “**chaviya**”nti. Chavigatā pana vaṇṇadhātu eva “suvaṇṇavaṇṇo”ti ettha vaṇṇaggahaṇena gahitāti apare. Vaṇṇanaṃ kittiyā ugghosananti **vaṇṇo**, thuti. Vaṇṇiyati asaṅkarato vavattapīyātīti **vaṇṇo**, kulavaggo. Vaṇṇiyati phalaṃ etena yathāsabhāvato vibhāvīyātīti **vaṇṇo**, kāraṇaṃ. Vaṇṇanaṃ dīgharassādivasena saṅghāhananti **vaṇṇo**, saṅghānaṃ. Vaṇṇiyati aṇumahantādivasena pamīyātīti **vaṇṇo**, pamāṇaṃ. Vaṇṇeti vikāraṃ āpajjamānaṃ hadayaṅgatabhāvaṃ pakāsetīti **vaṇṇo**, rūpāyanaṃ. Evaṃ tena tena pavattinimittena vaṇṇasaddassa tasmim tasmim atthe pavatti veditabbā. **Iddhim māpetvāti** vatthālaṅkārayādīhi obhāsamuṅcanādivasena dibbaṃ iddhānubhāvaṃ nimminivā. **Kāmāvacarā anabhisaṅkhatenapi āgantūṃ sakkonti** oḷārikarūpattā. Tathā hi te kabalīkārahakkhā. **Rūpāvacarā na sakkonti** tato sukhumatararūpattā. Tenāha “**tesaṃ hi**”tiādi. Tattha “**atisukhumo**”ti mūlapaṭisandhirūpaṃ sandhāya vadati. **Na tena iriyāpathakappanaṃ hotīti** etena brahmalokepi brahmāno yebhuyyena nimmitarūpeneva pavattantīti dasseti. Itarañhi ativiya sukhumaṃ rūpaṃ kevalaṃ cittuppādassa nissayādhiṭṭhānabhūtaṃ saṅghānavantaṃ hutvā tiṭṭhati.

**Anavasesattaṃ** sakalatā. **Yebhuyyatā** bahulabhāvo. **Abyāmissatā** vijātiyena asaṅkaro. Sukhena hi avokiṇṇatā tattha adhippetā. **Anatirekatā** taṃparamatā visesābhāvo. **Kevalakappanti** kevalaṃ daḷhaṃ katvāti attho. **Saṅghabhedāyāti** saṅhe vivādāya, vivāduppādāyāti attho. Kevalaṃ vuccati nibbānaṃ sabbasaṅkhatavivittattā, etassa taṃ atthīti **kevalī**, sacchikatanirodho khīṇāsavo. Tenāha “**visaṃyogo attho**”ti.

Kappasaddo panāyaṃ saupasaggo anupasaggo cāti adhippāyena okappaniyapade labbhamānaṃ kappasaddamattaṃ dasseti, aññathā kappapadaṃ anidassanameva siyā. **Samaṇakappehīti** vinayasiddhehi samaṇavohārehi. **Niccakappanti** niccakālaṃ. **Paññattīti** nāmaṃ. Nāmañhettaṃ tassa āyasmato, yadidaṃ kappoti. **Kappitakesamassūti** kattarikāya cheditakesamassu. **Dvaṅgulakappoti** majjhanhikavelāya vītikkantāya dvaṅgulatāvīkappo. **Lesoti** apadeso. Anavasesaṃ pharitaṃ samatthassaapi obhāsassa kenacipi kāraṇena ekadesapharaṇampi siyā, ayaṃ pana sabbasova pharatīti dassetuṃ samantattho kappa-saddo gahitoti āha “**anavasesaṃ samantato**”ti. Īsaṃ asamattaṃ, kevalaṃ

vā **kevalakappam**. Bhagavato ābhāya anobhāsītameva hi padesaṃ devatā attano pabhāya obhāsenti. Na hi bhagavato pabhā kāyaci pabhāya abhibhuyyati, sūriyādīnampi pabham sā abhibhuyya tiṭṭhatīti.

**Yena vā kāraṇenāti** hetumhi idaṃ karaṇavacanam. Hetuattho hi kiriyāya kāraṇam, na karaṇam viya kiriyattho, tasmā nānappakāra-guṇavisesādhigamanatthā idha upasaṅkamanakiriyāti “annena vasati, vijjāya vasatī” tiādīsu viya hetuatthameva taṃ karaṇavacanam yuttam na karaṇattham tassa ayujjamānattāti vuttam “yena vā kāraṇenā” tiādi. Bhagavato satatappavattaniratisaya-sāduvipulamatarasa-saddhammaphalatāya sādupalaniccaphalitamahārukkheṇa bhagavā upamito. Sādupalūpabhogādhippāyaggahaṇeneva hi mahākāruṇikassa sādupalatā gahitāti. **Upasaṅkamīti** upasaṅkantā. Sampattakāmatāya hi kiñci ṭhānam gacchanto taṃtampadesātikkamanena upasaṅkami, upasaṅkantoti vattabbaṃ labhati. Tenāha “**gatāti vuttam hotī**” ti, upagatāti attho. **Upasaṅkamitvāti** pubbakālakiriyānidhesotī āha “**upasaṅkamanapariyosānadīpana**” nti. **Tatoti** yaṃ ṭhānam pattā “upasaṅkamī” ti vuttā, tato upagataṭṭhānato.

Gatinivattiattatho sāmāññato āsanampi ṭhānaggahaṇena gayhatīti vuttam “**āsanakusalatāya ekamantaṃ tiṭṭhanti**” ti. Nisinnāpi hi gamanato nivattā nāma honti ṭhatvā nisīditabbattā, yathāvuttaṭṭhānādayopi āsaneneva saṅgahitāti. Atidūraaccāsannapaṭikkhepena nātidūranaccāsannaṃ nāma gahitaṃ. Taṃ pana avakamsato ubhinnaṃ pasāritahatthasaṅghaṭṭanena datṭhabbam. **Gīvaṃ pasāretvāti** gīvaṃ parivattanavasena pasāretvā.

Kāmaṃ “katha” nti ayamākārapucchā, taraṇākāro idha pucchito. So pana taraṇākāro atthato kāraṇamevāti āha “**kathaṃ nūti kāraṇapucchā**” ti? **Pākaṭo** abhisambodhiyaṃ mahāpathavīkampanādiānekacchariyapātubhāvādinā.

Marisaṇaṭṭhena pāpānaṃ rogādiānatthānaṃ abhibhavanaṭṭhena **māriso**, dukkharahito. Tenāha “**niddukkhāti vuttam hotī**” ti. Nirayapakkhe piyālanavacanavasena upacāravacanañcetaṃ yathā “devānaṃ piyā” ti. Tenevāha “**yadi eva**” ntiādi. **Saṅkunā saṅkūti** matthakato samakoṭṭitena yāva hadayapadesā nibbijhitvā otiṇṇena saṅkunā pādatalato samakoṭṭito saṅku nibbijhitvā ārohanto **hadaye** hadayassa padese samāgaccheyya, atha nesam saṅkūnaṃ samāgamasamakāle **nam** yathātikantasaṅkukaraṇakālaṃ jāneyyāsi. Kiñci nimittaṃ upādāya kismiñci atthe pavattassa saddassa tannimittarahite pavatti rullhī nāma gamanakiriyārahite sāsanaḍimati paṭipiṇḍe yathā gosaddassa.

**Oghamatarīti** yesam oghānaṃ taraṇam pucchitaṃ, te gaṇanaparicchedato sarūpato ca dassetuṃ “**cattāro**” tiādi vuttam. Kasmā panettha cattāro eva oghā vuttā, te ca kāmādayo evāti? Na codetabbametam, yasmā dhammānaṃ sabhāvakkavisesaṅñunā bhagavatā sabbam ñeyyaṃ yāthāvato abhisambujjhitvā ettakāva oghā desitā, ime eva ca desitāti. Vaṭṭasmiṃ ohananti osīdāpentīti oghā, ohananti heṭṭhā katvā hananti gāmenti, tathābhūtā satte adho gāmenti nāma. Ayañca attho “sabbopi cesā” tiādinā parato aṭṭhakathāyameva āgamissati. Kāmaṇaṭṭhena **kāmo**, kāmo ca so yathāvuttenatthena ogho cāti, kāmesu oghoti vā **kāmogho**. Bhavogho nāma bhavarāgoti dassetuṃ “**rūpārūpabhavesu chandarāgo jhānanikanti cā**” ti vuttam. **Sumaṅgalavilāsini**ādīsu (dī. ni. aṭṭha. 3.312) pana “sassatadiṭṭhisahagatarāgo cā” ti vuttam. Tattha paṭhamo upapattibhavesu rāgo, dutiyo kammabhava. Bhavadiṭṭhiviniṃuttassa diṭṭhigatassa abhāvato. “**Dvāsattḥiditṭhiyo diṭṭhogho**” ti vuttam, catusaccantogadhattā sabbassa ñeyyassa “**catūsu saccesu aññānaṃ avijjogho**” ti āha.

Idāni tesam oghasaṅkhātānaṃ pāpadhammānaṃ uppattiṭṭhānaṃ dassetuṃ “**tatthā**” tiādi vuttam, pavattiṭṭhānaṃ pana kāmagaṇādayo dassitā eva. “Pañcasu kāmagaṇesu chandarāgo kāmogho” ti ettha bhavogham ṭhapetvā sabbo lobho kāmoghoti vuttam siyā. Sassatadiṭṭhisahagato rāgo bhavadiṭṭhisampayuttattā bhavoghoti aṭṭhakathāsu vutto, bhavogho pana diṭṭhigatavippayuttesu eva uppajjati pāliyaṃ vutto. Tenevāha – “**bhavogho catūsu diṭṭhivippayuttalobhasahagatacittuppādesu uppajjati**” ti. Tasmā diṭṭhisahagatalobhopi kāmoghoti vuttam siyā.

Diṭṭhadhammikasamparāyikadukkhānañhi kāraṇabhūtā kāmāsavādayopi dvidhā vuttā, āsavā eva ca oghā. Kāmāsavaniddese ca kāmesūti kāmāragadiṭṭhirāgādīnaṃ ārammaṇabhūtesu tebhūmakesu vatthukāmesūti attho sambhavati. Tattha hi uppajjamānā sāyaṃ taṇhā sabbāpi na kāmācchandaḍḍināmaṃ na labhatīti.

Yadi pana pañcakāmaguṇiko ca rāgo kāmoghoti vuttoti katvā brahmānaṃ vimānādīsu rāgassa diṭṭhirāgassa ca kāmoghabhāvo paṭisedhitabbo siyā, evaṃ sati kāmoghabhavoghavinimuttana nāma lobhena bhavitabbaṃ. So yadā diṭṭhigatavippayuttesu uppajjati, tadā tena sampayutto avijjogho oghavippayuttoti domanassavicikicchuddhaccasampayuttassa viya tassapi oghavippayuttatā vattabbā siyā “catūsipi diṭṭhigatavippayuttalobhasahagatesu cittuppādesu uppanno moho siyā oghasampayutto siyā oghavippayutto”ti. “Kāmogho aṭṭhasu lobhasahagatesu cittuppādesu uppajjati”ti, “kāmoghaṃ paṭicca diṭṭhogho avijjogho”ti ca vacanato diṭṭhisahagato kāmogho na hotīti na sakkā vuttuṃ. Tathā hettha “rūpārūpabhavesu chandarāgo jhānanikanti ca bhavogho nāmāti ettakameva vuttuṃ, na vuttuṃ sassatadiṭṭhisahagato rāgo”ti.

**Adhogamaṇaṭṭhenāti** heṭṭhāpavattanaṭṭhena. Heṭṭhāpavattanañcettha na kevalaṃ apāyagamaniyabhāvena, atha kho saṃsāratarakāvarodhanenapīti dassetuṃ “**uparibhavañcā**”tiādi vuttuṃ. Kāmaṃ nibbānaṃ arūpibhāvā adesamaṃ, na tassa ṭhānavasena uparigahaṇaṃ, sabbasaṅkhatavinissaṭṭatā pana sabbassapi bhavassa uparīti vattabbataṃ arahatīti katvā vuttuṃ “**uparibhavaṃ nibbāna**”nti. “Mahāudakogho”tiādīsu rāsattḥho ogha-saddoti “mahā heso kilesarāsī”ti vuttuṃ **sesesupīti** bhavoghādīsipi.

Appatiṭṭhahantoti kilesādīnaṃ vasena asantiṭṭhanto, asaṃsīdantoti attho. **Anāyūhantoti** abhisāṅkhārādivasena na āyūhanto majjhimaṃ paṭipadaṃ vilaṅghitvā nibbuyhanto. Tenāha – “**avāyamanto**”ti, micchāvāyāmasena avāyamantoti adhippāyo. Gūḷhanti saṃvutaṃ. **Paṭicchannanti** tasseva vevacanaṃ. Atthavasena vā saṃvuttaṃ **gūḷhaṃ**, saddavasena api apākaṭaṃ **paṭicchannaṃ** antaradīpādike **ṭhātabbaṭṭhāne**. **Āyūhantāti** hatthehi ca pādehi ca vāyamantā. **Etamaṃ** atthajātaṃ, **etamaṃ** vā vissajjanaṃ.

Idāni yenādhippāyena bhagavatā tathāgūḷhaṃ katvā pañho kathito, taṃ dassetuṃ “**kiṃ panātiādi** vuttuṃ. **Niggahamukhenāti** veneyyānaṃ vinayaupāyabhūtaniggahavasena. Tenāha **ye paṇḍitamānino**”tiādi. **Pavayha pavayhāti** ophuṇitvā ophuṇitvā.

Soti devaputto **nihatamāno** ahosi yathāvissajjitassa atthassa ajānanto. **Yathāti** aniyamavacanaṃ niyamaniddiṭṭhaṃ hoti, taṃsambandhañca kathanti pucchāvacaṇanti tadubhayassa atthaṃ dassento “**yathāhaṃ jānāmi, evaṃ me katthehi**”ti āha.

**Yadāsvāhanti** yadā su ahaṃ, su-kāro nipātamattaṃ “yadidaṃ kathaṃ sū”tiādīsu viya. **Sabbapadesūti** “tadāssu saṃsīdāmī”tiādīsu tīsipi padesu. **Atarantoti** oghānaṃ atikkamanatthaṃ taraṇappayogaṃ akaronto. **Tatthevāti** oghaniyaoghesu eva. **Osīdāmīti** nimujjāmi oghehi ajjhotthaṭṭho homi. **Nibbuyhāmīti** oghehi nibbūḷho homi. **Ṭhātuṃ asakkonto** asaṃsīdanto. **Ativattāmīti** anupayogaṃ atikkamāmi, apanidhānavasena sammāpaṭipattiṃ virādhemīti attho. **Ṭhāne ca vāyāme cāti** vakkhamānavibhāge patiṭṭhahane vāyāme ca **dosamaṃ disvāti** patiṭṭhānāyūhanesu saṃsīdananibbuyhanasaṅkhātamaṃ taraṇassa vibandhanabhūtaṃ ādīnavaṃ disvāna. Idamaṃ bhagavatā bodhimūle attanā pavattita-pubbabhāga-manasikāravasena vuttuṃ. **Atiṭṭhanto avāyamantoti** patiṭṭhānāyūhanakaraṇakilesādīnaṃ parivajjanena asaṃsīdanto anibbuyhanto. **Devatāyapi paṭividdho** tadattho upanissayasampannatāya vimutti-paripācanīyadhammaṃ paripakkattā. **Na pana pākaṭo** vipaṇcitanānūādīnaṃ, ugghaṭitanānūanaṃ pana yathā tassā devatāya, tathā pākaṭo evāti. **Satta dukā** idāni vuccamānarūpā **dassitā** porāṇaṭṭhakathāyaṃ. **Kilesavasena santiṭṭhantoti** lobhādīhi abhibhūtatāya saṃsāre patiṭṭhahanto sammā appaṭipajjanena tattheva saṃsīdati nāma. **Abhisāṅkhāravasena** ti tatthevābhisāṅkhāracetanāya cetento sammāpaṭipattiyogyassa khaṇassa ativattanena nibbuyhati nāma.

Iminā nayena sesadukesupi attho veditabbo.

Ettha ca vaṭṭamūlakā kilesāti tesam vasena saṃsāre avaṭṭhānaṃ taṃtaṃkammunā tattha tattha bhava abhinibbatti, kilesā pana tesam paccayamattaṃ. Tattha tattha bhava aparāparaṃ nibbattento saṃsāre nibbuyhati nāmāti imassa atthassa dassanavasena **paṭhamaduko** vutto. Ime sattā saṃsāre paribbhamantā duvidhā taṇhācaritā diṭṭhacaritā cāti tesam saṃsāranāyikabhūtānaṃ dhammānaṃ vasena santiṭṭhānaṃ, tadaññesaṃ pavattipaccayānaṃ vasena āyūhananti imassa atthassa dassanavasena **dutiyaduko** vutto. Saṃyojanīyesu dhammesu assādadassanasabhāvāya taṇhāya vasena visesato patiṭṭhānaṃ, amuttimamme muttimaggaparāmāsato tathā āyūhanampi diṭṭhiyā vasena hotīti dassetuṃ **tatiyaduko** vutto. **Catutthaduko** pana adhippāyo aṭṭhakathāya eva vibhāvito. Yasmā “sassato attā”ti abhinivisanto arūparāgaṃ, asaṅṅūpagaṃ vā avimokkhaṃyeva vimokkhoti gahetvā saṃsāre eva olīyati. Tenāha “**olīyanābhīnivesā hi bhavadiṭṭhī**”ti. Yasmā pana kāmabhavādīsu yaṃ vā taṃ vā bhavaṃ patvā attā ucchijjati vinassati, na hoti paraṃ maraṇāti abhinivisanto bhavavippamokkhāvahāya sammāpaṭipattiyā appaṭipajjanena taṃ ativattati. Tena vuttaṃ “**atidhāvanābhīnivesā vibhavadiṭṭhī**”ti.

**Līnavasena santiṭṭhantoti** kosajjādivasena saṃkocāpajjanena sammā appaṭipajjanto. **Uddhaccavasena āyūhantoti** sammāsamādhino abhāvena vikkhepavasena **pañcamo duko** vutto. Yathā kāmasukhaṃ pavīṭṭhassa samādhānaṃ natthi cittassa upakkiliṭṭhattā, evaṃ attaparitāpanamanuyuttassa kāyassa upakkiliṭṭhattā. Iti cittakāyaparikkilesakarā dve antā taṇhādiṭṭhinissayatāya saṃsīdananibbuyhananimittā vuttā **chaṭṭhaduko**. Pubbe sappadesato va saṃkilesadhammā “saṃsīdananimitta”nti dassitāti idāni nippadesato dassanavasena, pubbe ca sādharāṇato abhisāṅkhāradhammā “nibbuyhananimitta”nti dassitāti idāni puññāneñjābhisaṅkhāre eva “āyūhananimitta”nti dassanavasena **sattamaduko** vutto. Evañhi duggatisugatūpapattivasena saṃsīdananibbuyhanāni vibhajja dassitāni hotīti. Tenevāha “**vuttampi ceta**”ntiādi. Adhobhāgaṃ duggatiṃ gamentīti **adhobhāgaṅgamanīyā** anuṇāsikalopaṃ akatvā. Tathā uparibhāgaṃ gamentīti **uparibhāgaṅgamanīyā**.

Ettha ca oghataraṇaṃ pucchitena bhagavatā “**appaṭiṭṭhaṃ anāyūha**”nti tassa pahānaṅgameva dassitaṃ, na sampayogaṅganti? Na evaṃ daṭṭhabbaṃ, yāvata yena patiṭṭhānaṃ hoti, yena ca āyūhanaṃ, tadubhayapaṭikkhepamukhena tappaṭipakkhadhammadassanametanti. Na hesa a-kāro kevalaṃ paṭisedhe, atha kho paṭipakkhe “akusalā dhammā, ahito, adhammo”tiādīsu viya, tasmā **appaṭiṭṭhaṃ anāyūhanti** patiṭṭhānāyūhanānaṃ paṭipakkhavasena pavattamāno tathāpavattihetūvāti ayamettha attho. **Khoti** ca avadhāraṇatthe nipāto “assosi kho”tiādīsu (pārā. 1) viya. Tena appaṭiṭṭhānassa ekaṃsikaṃ dasseti. Soyaṃ kho-saddo “anāyūha”nti etthāpi ānetvā vattabbo. Anāyūhanampi hi ekaṃsikamevāti tassa paṭipakkho saha vipassanāya ariyamaggo. Tena hi oghataraṇaṃ hoti, na aññathā. Evamayam yathānusandhidesanā katā, devatā ca sahavipassanaṃ maggaṃ paṭivijjhīti paṭhamaphale patiṭṭhāsi. Tena vuttaṃ “**imaṃ pañhavissajjana**”ntiādi.

“Cīrassā”ti iminā samānatthaṃ padantarametanti āha “**cīrassa kālassā**”ti yathā “mamaṃ vā, bhikkhave”ti (dī. ni. 1.5-6) ettha “mamā”ti iminā samānatthaṃ padantaraṃ mamanti. **Na diṭṭhapubbāti** adassāvī. Adassāvī ca disvā kattabbakiccassa asiddhatāya veditabbā. Aññathā kā nāma sā devatā, yā bhagavantaṃ na diṭṭhavatī? Tenāha “**kiṃ panimāyā**”tiādi. **Dassanaṃ upādāya evaṃ vattum vattatīti** yadā kadāci kañci piyajātikaṃ disvā taṃ dassanaṃ upādāya “cīrena vata mayaṃ āyasmantaṃ passāmā”ti adīṭṭhapubbaṃ diṭṭhapubbaṃ vā evaṃ vattum yujjati, ayam loke nirulhe samudācāroti dasseti. Brahmaṃ vā vuccati ariyamaggo, tassa aṇanato jānato paṭivijjhanato **brāhmaṇo**. **Kilesanibbānenāti** kilesānaṃ accantasamucchedasaṅkhātena nibbānena **nibbutaṃ** sammadeva vūpasanta-sabbakilesadaratha-pariḷāhaṃ. **Āsattavisattādīhīti ādi**-saddena visatādīākāre saṅgaṇhāti. Vuttañhetam –

“Visatāti visattikā, visaṭāti visattikā, visālāti visattikā, visakkatīti visattikā, visaṃvādīkāti visattikā, visaṃ haratīti visattikā, visamūlāti visattikā, visaphalāti visattikā, visaparibhogoti



visattikā, visālā vā pana sā taṇhā rūpe sadde gandhe rase phoṭṭhabbe dhamme kule gaṇe visatā vitthatāti visattikā”ti (mahāni. 3).

Tattha **visatā**ti vitthatā rūpādīsu tebhūmakadhammesu abhibyāpanavasena **visatā**ti purimavacanameva ta-kārassa ṭa-kāraṃ katvā vuttaṃ. **Visālā**ti vipulā. **Visakkatī**ti parisakkati, sahati vā. Ratto hi rāgavatthunā pādena tāḷiyamānopi sahatīti. Osakkanam vipphandanam vā “**visakkana**”ntipi vadanti. Aniccādiṃ niccādito. Gaṇhātīti **visaṃvādikā** hoti. **Visaṃ haratī**ti tathā tathā kāmesu ānisaṃsaṃ passantī vividhehi ākārehi nekkhammābhimukhappavattito cittaṃ saṃharati saṃkhipati, visaṃ vā dukkhaṃ, taṃ haratī, vahaṭīti attho. Dukkhanibbattakakammassa hetubhāvato **visaṃulā**. Visaṃ vā dukkhābhībhūtā vedanā mūlaṃ etissāti **visaṃulā**. Dukkhasamudayattā visaṃ phalaṃ etissāti **visaphalā**. Taṇhāya rūpādikassa dukkhasseva paribhogō hoti, na amatassāti **visaparibhogoti** vuttā, sabbattha niruttivasena padasiddhi veditabbā. Yo panettha padhāno attho, taṃ dassetuṃ puna “visālā vā panā”tiādi vuttanti evamettha visattikāpadassa attho veditabbo. **Tiṇṇam** paṭhamadutiyamaggehi. **Nittiṇṇam** tatiyamaggena. **Uttiṇṇam** catutthamaggena.

**Samanuññoti** sammadeva katānuñño. Tenāha “**ekajjhāsayo ahoṣi**”ti. **Antaradhāyī**ti adassanam agamāsi. Yathā pana antaradhāyī, taṃ dassetuṃ “**abhisaṅkhatakāya**”ntiādi vuttaṃ. **Mālehī**ti liṅgavipallāsena vuttaṃ, “mālāhī”ti keci paṭhanti, “malyehī”ti vattabbe ya-kāralopaṃ katvā niddeso. Ayaṃ tāva aṭṭhakathāya līnatthavaṇṇanā.

### Nettinayavaṇṇanā

Idāni pakaraṇanayena pāḷiyā atthavaṇṇanam karissāma. Sā pana atthavaṇṇanā yasmā desanāya samuṭṭhānappayojanabhājanesu piṇḍatthesu ca niddhāritesu sukarā hoti suviññeyyā ca, tasmā suttadesanāya samuṭṭhānādīni paṭhamam niddhārayissāma. Tattha **samuṭṭhānam** tāva desanānidānam, taṃ sādharmaṇam asādharmaṇanti duvidham. Tattha sādharmaṇampi abhantarabāhirabhedato duvidham. Tattha **sādharmaṇam abhantarasamuṭṭhānam** nāma lokanāthassa mahākaruṇā. Tāya hi samussāhitassa bhagavato veneyyānam dhammadesanāya cittaṃ udapādi, yaṃ sandhāya vuttaṃ – “sattesu ca kāruṇīyatam paṭicca buddhacakkhunā lokam volokesī”tiādi (ma. ni. 1.283; sam. ni. 1.172; mahāva. 9). Ettha ca hetuavatthāyapi mahākaruṇāya saṅgaho daṭṭhabbo yāvadeva saṃsāramahoghatō saddhammadesanāhatthadānehi sattasantāraṇattham taduppattito. Yathā ca mahākaruṇā, evam sabbaññutaññānam dasabalaññādīni ca desanāya abhantarasamuṭṭhānabhāvena vattabbāni. Sabbañhi ñeyyadhammam tesam desetabbappakāram sattānañca āsayānusayādiṃ yāthāvato jānanto bhagavā ṭhānāṭṭhānādīsu kosallena veneyyajjhāsayanurūpaṃ vicittanayadesanam pavattesīti. **Bāhiram** pana **sādharmaṇam samuṭṭhānam** dasasahassamahābrahmaparivāra-sahampatimahābrahmuno ajjhesanam. Tadajjhesanuttarakālañhi dhammagambhīratāpaccavekkhaññājanitam apposukkataṃ paṭippassambhetvā dhammassāmī dhammadesanāya ussāhajāto ahoṣi. Asādharmaṇampi abhantarabāhirabhedato duvidhameva. Tattha **abhantaram** yāya mahākaruṇāya yena ca desanāññānena idaṃ suttaṃ pavattitam, tadubhayam veditabbam **bāhiram** pana tassā devatāya pucchā, pucchāvasiko hesa suttanikkhepo. Tayidaṃ pāḷiyam āgatameva.

**Payojanampi** sādharmaṇāsādharmaṇato duvidham. Tattha **sādharmaṇam** anukkamena yāva anupādāparinibbānam vimuttirasattā bhagavato desanāya. Tenevāha “etadatthā kathā, etadatthā mantanā”tiādi (pari. 366). **Asādharmaṇam** pana tassā devatāya dassanamaggasamadhigamo, ubhayampetaṃ bāhirameva. Sace pana veneyyasantānagatampi desanābalasiddhisāṅkhātam payojanam adhippāyasamijjanabhāvato yathādhippetatthasiddhiyā mahākāruṇikassa bhagavatopi payojanamevāti gaṇheyya, iminā pariāyenassa abhantaratāpi siyā.

Apica tassā devatāya oghataraṇākārassa yāthāvato anavabodho imissā desanāya samuṭṭhānam, tadavabodho payojanam. So hi imāya desanāya bhagavantam payojeti tannipphādanaparāyam desanāti katvā. Yañhi desanāya sādhetabbam phalam, taṃ ākaṅkhitabbattā desakam desanāya payojeti

payoĵananti vuccati. Tathā devatāya tādāññesañca vineyyānaṃ paṭiṭṭhānāyūhanavissajjanañcetta payoĵanaṃ. Tathā saṃsāracakkani vatti-saddhammacakkappavattissatādīmichhācāra-nirākaraṇaṃ sammāvādapurekkhāro akusalamūlasamūhananaṃ kusalamūlasamāropanaṃ apāyadvārapidahaṇaṃ saggamokkhadvāravaraṇaṃ pariyaṭṭhānavūpasamaṇaṃ anusayasamugghātaṇaṃ “mutto mocessāmī”ti purimaṭṭhānāvīsaṃvādanaṃ tappaṭṭhānāvīsaṃvādanaṃ tittṭhiyasamayanimmathanaṃ buddhadhammapaṭiṭṭhāpananti evamādīnipi payoĵanāni idha veditaḅbāni.

Yathā devatā oghatareṇe saṃsayapakkhanda, tādisā aññe ca saṅkhātadhammānaṃ sammāsambuddhassa ca paṭipattiṃ aĵānantā asaddhammassavana-dhāraṇa-paricaya-manasikāravipallatthabuddhikā saddhammassavana-dhāraṇa-paricayavimukhā ca bhavavimokkhesino vineyyā imissā desanāya **bhājanaṃ**.

**Piṇḍatthā** pana “appaṭiṭṭhaṃ anāyūha”nti padadvaye catusaccakammaṭṭhānānuyogavasena yonisomanasikārabahulīkāro kusalamūlasamāyogo olīyanātidhāvanāvissajjanaṃ upāyavinibandhavidhamanaṃ micchābhīnivesadūribhāvo taṇhāvījĵāvisodhanaṃ vaṭṭattayavicchedanupāyo āsavogha-yoga-ganthāgati-taṇhuppādupādānaviyogo cetokhilavivecanaṃ abhinandanānīvaraṇaṃ saṃsaggātikkaṃo vivādamūlapariccāgo akusalakammaṭṭhānānuyogavasena micchattātivattanaṃ anusayamūlacchedo. Sabbakilesa-darathapariĵāha-sārambhapaṭippassambhanaṃ dassanasavanañiddeso vijĵūpamavajirūpamadhammāpadeso apacayagāmidhammavibhāvanā pahānattayadīpanā sikkhattayānuyogo samathavipassanānuṭṭhānaṃ bhāvanāsacchikiriyāsiddhi-sīlakkhandhādīpārisuddhīti evamādayo veditaḅbā.

Tattha yesaṃ kilesādīnaṃ vasena paṭiṭṭhāti saṃsīdati, yesaṃ abhisāṅkhārādīnaṃ vasena āyūhati nibbuyhati, ubhayametāṃ samudayasaccaṃ, tappabhāvitā tadubhayañissitā ca khandhā dukkhasaccaṃ, tadubhayaṃmattho, “appaṭiṭṭhaṃ anāyūha”nti adhippetassa atthassa paṭicchanaṃ katvā desanā upāyo mānaniggaṇhanavasena tassā devatāya saccābhīsamaya-kāraṇabhāvato paṭiṭṭhānāyūhanapaṭikkhepopadesena caturghanirattharaṇatthikehi antadvayarahitā majĵhimā paṭipatti-paṭipajjitabbāti ayamettha bhagavato āṇattīti ayaṃ **desanāhāro**.

Parasaṃsayapakkhandañāyā ñātukāmatāya ca **kathaṃ nūti** pucchāvasena vuttaṃ? Abhimukkhabhāvato ekapuggalabhāvato ca “tva”nti vuttaṃ. Paramukkaṃsagatassa garubhāvassa anaññāyogyassa saddhammadhurassa paridīpanato sādḅhūti marisa-sīlādiguṇatāya “**mārisā**”ti vuttaṃ. Avahanañato rāsībhāvato ca “**ogha**”nti vuttaṃ. Nātuṃ icchitassa atthassa katattā pariyo-sāpitattā “**iti**”ti vuttaṃ. Saṃsīdanalakkhaṇassa paṭiṭṭhānassa akātabbato sabbaso ca akatattā. “**Appaṭiṭṭha**”nti vuttaṃ. Tayidaṃ akaraṇaṃ ekasīkanti **khoti** avadhāraṇavasena vuttaṃ. Tassa ca appaṭiṭṭhānassa sasantaḅgatattā “tva”nti ca pucchitattā “**aha**”nti vuttaṃ. Devatāya sambodhanañato piyālapanañato ca, “**āvuso**”ti vuttaṃ. Nibbuyhanalakkhaṇassa āyūhanañassa akātabbato sabbaso ca akatattā **anāyūhanti** vuttaṃ. Tiṇṇākārañassa oghānaṃ anicchitabhāvato eva tattha saṃsayassa anapagatatā oghatareṇassa ca avisesattā “**yathā kathaṃ panā**”ti vuttaṃ. Tathā saṃsīdanalakkhaṇaṃ paṭiṭṭhānaṃ saṃsāre ca saṅghānanti anattāntarattā abhinna-kālikāṃ. Tathā nibbuyhanalakkhaṇaṃ āyūhanaṃ sammāpaṭipattiyā ativattānanti anattāntarattā abhinna-kālikānti vuttaṃ “**yadā svāhaṃ...pe... tadāssu nibbuyhāmī**”ti. Tadubhayañassa paṭipakkhabhāvato paṭibāhanañato ca oghātiṇṇāti vuttaṃ “**evaṃ khvāhaṃ...pe... oghamatari**”nti.

Ekabuddhāntarantārikattā sudūrakālikatāya “**cirassa**”nti vuttaṃ. Antarā adīṭṭhapubbatāya vimhayañiyatāya ca “**vatā**”ti vuttaṃ. Tadā upalabbhamāñatāya atpaccakkhatāya ca “**passāmī**”ti vuttaṃ. Bāhitāpāpato brahmassa ca ariyamaggassa aṇanañato paṭivījĵhanañato “**brāhmaṇa**”nti vuttaṃ. Kilesasāntāpavūpasamañato dukkhasāntāpavūpasamañato ca sabbaso nibbutattā “**parinibbuta**”nti vuttaṃ. Taraṇapayogassa nibbatitattā upari taritābbābhāvato ca “**tiṇṇa**”nti vuttaṃ. Nāñacakkhunā oloketābbato lujĵanañato palujĵanañato ca “**loke**”ti vuttaṃ. Visayesu sañĵanañato jātabhāvato “**visattika**”nti vuttaṃ. Nāñassa paccakkhabhāvato nigamañato ca “**ida**”nti vuttaṃ. Bhāsītattā parisamattattā ca

“**avocā**”ti vuttaṃ. Paṭhamañ gahitattā paccāmasanato ca “sā devatā”ti vuttaṃ. Paṭikkhepassa abhāvato atthassa anumoditabbato “**samanuñño**”ti vuttaṃ. Vineyyānaṃ sāsanaṭo paramatthasampattito ca “**satthā**”ti vuttaṃ. Cakkhupathātikkaṃena tirobhāvūpagamanato “**antaradhāyī**”ti vuttanti ayaṃ anupadavicayato **vicayahāro**.

Appatiṭṭhānāyūhanehi oghataraṇaṃ yujjati kilesābhisaṅkhāravijahanena pārasampattisamijjhanato. Sabbakilesa-taṇhādīṭṭhi-taṇhāyatana-sassatādivasena santiṭṭhato saṃsāre saṃsīdanāṃ hotīti yujjati kāraṇassa suppatiṭṭhitabhāvato. Abhisaṅkharaṇakicce kilesābhisaṅkhāre vijjamāne sabbadiṭṭhābhinivesa-atidhāvanābhinivesādīnaṃ vasena āyūhantassa saṃsāramahoghena nibbuyhanaṃ hotīti yujjati sammāpaṭipattiyā ativattanato. Brahmassa ariyamaggassa aṇanato paṭivijjhanato brāhmaṇabhāvo yujjati bāhitapāpattā. Sammadeva santadhammasamadhighamato parinibbutabhāvo yujjati sabbaso savāsanapahīnakilesattā. Tathā ca visattikāya tiṇṇabhāvo yujjati yathā yāya lesopi na dissati, evañ aggamaggena tassā samucchinnattāti ayaṃ **yuttihāro**.

Kilesavaṭṭavasena patiṭṭhānaṃ visesato kammavaṭṭassa padaṭṭhānaṃ. Abhisaṅkhāravasena āyūhanaṅca vipākavaṭṭassa padaṭṭhānaṃ. Appatiṭṭhānāyūhanāni oghataraṇassa padaṭṭhānaṃ, oghataraṇaṃ anupādisesanibbānassa. Taṇhāvasena patiṭṭhānassa assādānupassitā padaṭṭhānaṃ. Tenāha bhagavā – “saṃyojanīyesu, bhikkhave, dhammesu assādānupassino taṇhā pavaḍḍhatī”ti (saṃ. ni. 2.52, 56).

Khandhāvijjā-phassa-saññā-vitakkāyonisomanasikāra-pāpamittaparatoḥosā diṭṭhivasena patiṭṭhānassa padaṭṭhānaṃ. Yathāha – **paṭisambhidāmagge** (paṭi. ma. 1.124) “khandhāpi diṭṭhiṭṭhānaṃ, avijjāpi diṭṭhiṭṭhāna”ntiādi. Taṇhādīṭṭhābhinandanaavasesakilesābhisaṅkhāravasena āyūhanassa padaṭṭhānaṃ. Iminā nayena yathārahaṃ taṇhādīṭṭhādivasena patiṭṭhānāyūhanānaṃ padaṭṭhānabhāvo vattabbo. Sesamettha pālito eva suniddhāriyaṃ. Ayaṃ **padaṭṭhānahāro**.

**Appatiṭṭhaṃ anāyūhanti** patiṭṭhānāyūhanapaṭikkhepena vissajjentena niyyānavahā sammāpaṭipatti gahitā ekantato oghanittharaṇūpāyabhāvato. Taggahaṇena ca sabbepi sattatiṃsa bodhipakkhiyadhammā gahitā honti niyyānalakkhaṇena ekalakkhaṇattāti ayaṃ **lakkhaṇahāro**.

**Nidānamassā** devatāya oghataraṇākārassa yāthāvato anavabodhoti vuttovāyamattho. Aññepi ye imaṃ desanaṃ nissāya oghataraṇūpāyaṃ paṭivijjhanti, tepi imissā desanāya nidānanti daṭṭhabbā. “Kathaṃ nu kho imaṃ desanaṃ nissāya sammadeva paṭivijjhantā catubbidhampi oghaṃ tarantā sakalasaṃsāramahoghato nitthareyyuṃ, pare ca tatha patiṭṭhapeyyu”nti ayamettha bhagavato **adhippāyo**. Padanibbacanaṃ **niruttaṃ**, taṃ “eva”ntiādinidānapadānaṃ “katha”ntiādi pālīpadānaṅca aṭṭhakathāya tassā līnatthavaṇṇanāya ca vuttanayānusārena sukarattā ativitthārabhayena na vitthārayimha.

Pada-padattha-desanā-nikkhepa-suttasandhi-vasena pañcavidhā **sandhi**. Tattha padassa padantarena sambandho **padasandhi**. Tathā padatthassa padatthantarena sambandho **padatthasandhi**, yo “kiriyaṅkārasambandho”ti vutto. Nānānusandhikassa taṃtaṃanusandhīti sambandho, ekānusandhikassa pana pubbāparasambandho **desanāsandhi**, yā aṭṭhakathāyaṃ “pucchānusandhi ajjhāsāyānusandhi yathānusandhī”ti tidhā vibhattā. Ajjhāsāyo cetha attajjhāsāyo parajjhāsāyoti dvidhā veditabbo. **Nikkhepasandhi** catunnaṃ suttanikkhepānaṃ vasena veditabbā. Yaṃ panettha vattabbaṃ, taṃ **papañcasūdanīṭṭhikāyaṃ** vuttanayena gahetabbaṃ. **Suttasandhi** idha paṭhamanikkhepavasena veditabbā.

“Kasmā panettha oghataraṇasuttameva paṭhamañ nikkhitta”nti nāyamanuyogo kathamaci na pavattati? Apica “appatiṭṭhaṃ anāyūhaṃ oghamatarī”nti patiṭṭhānāyūhanapaṭikkhepavasena antadvayavivajjanamukhena vā majjhīmāya paṭipadāya vibhāvanato sabbapaṭhamamidāṃ suttāṃ idha nikkhittaṃ. Antadvayaṃ anupagamma majjhīmāya paṭipattiyā saṅkāsanaparañhi buddhānaṃ sāsanaṅti.

Yaṃ pana ekissā desanāya desanantarena saddhiṃ saṃsandanaṃ, ayampi desanāsandhi. Sā idha evaṃ veditabbā –

“Appatiṭṭhaṃ...pe... anāyūhaṃ oghamatari”nti ayaṃ desanā –

“Sabbadā sīlasampanno, paññavā susamāhito;  
Āraddhavīriyo pahitatto, oghaṃ taratī duttaraṃ.

“Virato kāmasaññāya, rūpasamyojanātigo;  
Nandīrāgaparikkhīṇo, so gambhīre na sīdati; (Saṃ. ni. 1.96);  
Saddhāya taratī oghaṃ, appamādena aṇṇavaṃ. (saṃ. ni. 1.246; su. ni. 186);

“Pañca chinde pañca jahe, pañca cuttari bhāvaye;  
Pañcasaṅgātigo bhikkhu, oghatiṇṇoti vuccati. (saṃ. ni. 1.5; dha. pa. 370);

“Tasmā jantu sadā sato, kāmāni parivajjaye;  
Te pahāya tare oghaṃ, nāvaṃ sitvāva pāragū. (su. ni. 777; mahāni. 6; netti. 5);

“Ekāyanaṃ jātikhayantadassī, maggaṃ pajānāti hitānukampī;  
Etena maggena tarīṃsu pubbe, tarissanti ye ca tarantī ogha”nti. (saṃ. ni. 5.384, 409; mahāni. 191; cūḷani. pārāyanānugītigāthānidessa 107; paṭhamavagga 121; netti. 170) –

Evamādīhi desanāhi saṃsandatīti ayaṃ **catubyūho hāro**.

**Appatiṭṭhaṃ anāyūhanti** ettha saṃkilesavasena patiṭṭhānaṃ āyūhanañca. Tena ayonisomanasikāro dīpito, santakilesavasena anāyūhanena yonisomanasikāro. Tattha ayonisomanasikaroto taṇhāvijjā pavaddhati. Tesu taṇhāgahaṇena ca taṇhāmūlakā dhammā āvattanti. Avijjāgahaṇena avijjāmūlakam sabbam bhavacakkam āvattati. Yonisomanasikāragahaṇena ca yonisomanasikāramūlakā dhammā āvattanti catubbidhañca sampatticakkam. Patiṭṭhānāyūhanapaṭikkhepena pana sammāpaṭipatti dīpitā, sā ca saṅkhepato sīlādisaṅgahā. Tattha sīlagahaṇena ekādasa sīlanisaṃsā āvattanti, samādhigahaṇena pañcaṅgiko sammāsamādhi pañcaññāṅiko sammāsamādhi samādhiparikkhārā ca āvattanti. Paññāgahaṇena paññā ca sammādiṭṭhīti sammādiṭṭhisudassanā sabbepi ariyamaggadhammā āvattantīti ayaṃ **āvatto hāro**.

Patiṭṭhānaṃ kilesādivasena sattavidhaṃ. Āyūhanaṃ abhisāṅkhārādivasena sattavidhaṃ. Tathā tappaṭipakkhato appatiṭṭhānaṃ anāyūhanañca. Ayametta dhammavibhatti. Padaṭṭhānabhūmivibhattiyo pana heṭṭhā vuttanāyānusārena veditabbā. Ayaṃ **vibhattihāro**.

Pubbabhāgappaṭipadaṃ sammadeva sampādetvā samathavipassanaṃ yuganaddhaṃ katvā bhāvanaṃ ussakkento kilesādīnaṃ dūrīkaraṇato tesam vasena asaṃsīdanto anibbuyhanto appatiṭṭhaṃ anāyūhaṃ oghaṃ taratī. Kilesādīnaṃ vasena pana saṃsīdanto nibbuyhanto saṃsāre patiṭṭhānato āyatim punabbhavābhiniḥbattiyā āyūhanato oghaṃ na taratīti ayaṃ **parivatto hāro**.

Appatiṭṭhaṃ asantiṭṭhanto asaṃsīdanto anibbisam anavinibbanti pariyāyavacanaṃ, anāyūhaṃ anibbuyhanto acetento apakappentoti pariyāyavacanaṃ, oghaṃ kilesasamuddanti pariyāyavacanaṃ, atari atikkami accavāyīti pariyāyavacanaṃ. Iminā nayena sesapadesupi pariyāyavacanaṃ veditabbanti ayaṃ **vevacano hāro**.

**Appatiṭṭhaṃ anāyūhanti** ettha patiṭṭhaṃ āyūhanti kilesānaṃ kiccakaraṇapaññatti. Pariyuṭṭhānānaṃ vibhāvanapaññatti. Abhisāṅkhārānaṃ viruhanapaññatti. Taṇhāya assādapaññatti. Diṭṭhiyā parinipphandaṇapaññatti. Bhavadiṭṭhiyā bhavābhinivesapaññatti. Vibhavadiṭṭhiyā

vipallāsapaññatti. Kāmasukhānuyogassa kāmesu anugijjanapaññatti. Attakilamathānuyogassa attaparitāpanapaññatti. Appatittham anāyūhanti pana abhiññeyyadhammānaṃ abhiññāpaññatti. Pariññeyyadhammānaṃ pariññāpaññatti. Oghamatarinti pahātabbadhammānaṃ pahānapaññatti. Maggassa bhāvanāpaññatti. Nirodhassa sacchikiriyāpaññattīti ayaṃ **paññattihāro**.

**Appatittham anāyūhanti** ettha patitthānāyūhanaggahaṇena oghaggahaṇena ca samudayasaccaṃ gahitaṃ. Appatittham anāyūhaṃ atarinti pana padattayena maggasaccaṃ gahitaṃ, hetugahaṇena ca hetumato gahaṇaṃ siddhamevāti dukkhanirodhasaccāni atthato gahitānevāti ayaṃ saccehi otaraṇā. Tatha ye lokiyā pañcakkhandhā, yesaṃ vasena patitthānāyūhanasiddhi. Ye lokuttarā cattāro khandhā, yesaṃ vasena oghatarānasiddhi. Ayaṃ khandhamukhena otaraṇā. Ye eva pañcakkhandhā dvādasāyatanāni atthārāsa dhātuyo, te cattāro khandhā dvāyatanāni dve dhātuyoti ayaṃ āyatanamukhena dhātumukhena ca otaraṇā. Tathā appatittham anāyūhanti ettha patitthānāyūhanaggahaṇena kilesābhisaṅkhārādīnaṃ gahaṇaṃ. Kilesābhisaṅkhārādayo oghā ca saṅkhārakkhandhā dhammāyatanam dhammadhātu ca, appatitthānānāyūhanaggahaṇena oghatarānavacanena ca saha vipassanāya maggo kathito. Evañca saṅkhārakkhandho dhammāyatanam dhammadhātu ca gahitāti evampi khandhamukhena āyatanamukhena dhātumukhena otaraṇā. Vipassanā ce aniccānupassanā, animittamukhena vimokkhamukhaṃ, dukkhānupassanā ce, appaṇihitavimokkhamukhaṃ, anattānupassanā ce, suññatavimokkhamukhanti evaṃ vimokkhamukhena otaraṇaṃ. Magge sekkhā sīlakkhandhādayo dhammāyatanadhammadhātū anāsavā ca evampi kho khandhādīmukhena otaraṇāti ayaṃ **otaraṇo hāro**.

**Appatitthanti** ārambho. **Anāyūhanti** padasuddhi, no ārambhasuddhi, tathā **oghanti**. **Atarinti** pana padasuddhi ceva ārambhasuddhi cāti ayaṃ **sodhana hāro**.

**Appatittham anāyūhanti** sāmāññato adhiṭṭhānaṃ taṇhādhiṭṭhiādivasena patitthānāyūhanānaṃ sādharānato paṭikkhepacodanāti katvā **oghamatarinti** taṃ vikappetvā visesavacanam. Oghatarānañhi cattāro ariyamaggā. Tatha paṭhamadutiyamaggā avisesena diṭṭhoghatarānaṃ, tatiyamaggo kāmoghatarānaṃ, aggamaggo sesoghatarānanti ayaṃ **adhiṭṭhāno hāro**.

Kilesavasena patitthānassa ayonisomanasikāro hetu. Abhisāṅkhāravasena āyūhanassa kilesā hetū. Appatitthānānāyūhanānaṃ pana yathākkamaṃ yonisomanasikārapahānāni hetū. Saṃyojanīyesu dhammesu assādānupassanā taṇhāvasena yathārahaṃ tassa hetū. Tenāha bhagavā – “saṃyojanīyesu, bhikkhave, dhammesu assādānupassino taṇhā pavaḍḍhatī”ti. Khandhāvijjāphassasaññāvitakkāyonisomanasikārapāpamittaparatoḥosā diṭṭhivasena patitthānassa hetū. Tenāha – **paṭisambhidāmagge** “khandhāpi diṭṭhiṭṭhānaṃ, avijjāpi diṭṭhiṭṭhāna”ntiādi. Taṇhābhinandanā avasesakilesābhisaṅkhāravasena āyūhanassa hetū. Iminā nayena yathārahaṃ taṇhādhiṭṭhivasena patitthānāyūhanānaṃ hetuvibhāgo niddhāretabbo, tabbipariyāyena appatitthānānāyūhanānaṃ. Kilesuppādane hi sammadeva ādīnavadassanaṃ appatitthānassa hetū, abhisāṅkharāṇe ādīnavadassanaṃ anāyūhanassa hetū, vipassanāya ussukkāpanaṃ oghatarānaṃsa hetūti ayaṃ **parikkhāro hāro**.

Yathāvuttavibhāgehi patitthānāyūhanehi catubbidhassapi oghassa parisuddhi. Appatitthānānāyūhanehi pana sotānaṃ saṃvaro sabbaso pidhānañcāti catubbidhassapi oghassa visesato pidhānaṃ appavattikaraṇaṃ. Ariyamaggassa bhāvanāya hi kilesavasena patitthānaṃ abhisāṅkhāravasena āyūhanaṃ upacchinnam, tassa sabbepi oghā tiṇṇā sammatiṇṇā pahīnā hontīti ayaṃ **samāropano hāro**.

**Appatittham anāyūhanti** ettha patitthāgahaṇena taṇhāvijjā gahitā. Tāsaṃ hi vasena satto tatha tatha bhava patitthāti. Āyūhanaggahaṇena tappaccayā abhisāṅkhārādharmā gahitā. Tatha taṇhāya visesato rūpadhammā adhiṭṭhānaṃ, avijjāya arūpadhammā. Tesam yathākkamaṃ samatho ca vipassanā ca paṭipakkhā, te “appatittham anāyūhaṃ oghamatarī”nti padehi pakāsītā hontī, tesu samathassa cetovimutti phalaṃ, vipassanāya paññāvimutti. Tathā hi sā “rāgavirāgā avijjāvīrāgā”ti visesetvā

vuccati. Tattha taṇhāvijjā abhisankhāro ca samudayasaccam, tesam adhiṭṭhānabhūtā rūpārūpadhammā dukkhasaccam, tesam appavatti nirodhasaccam, nirodhapajānanā paṭipadā oghataraṇapariyāyena vuttā maggasaccam. Taṇhāgahaṇena cettha māyā-sāṭṭheyyamānātimāna-madappamāda-pāpicchatā-pāpamittatā-ahirikānottappādivasena akusalapakkho netabbo. Avijjāgahaṇena viparītamanasikāra-kodhūpanāha-makkhapaḷāsa-issāmacchariya-sārambha- dovaccasatā-bhavadiṭṭhiādivasena akusalapakkho netabbo. Vuttavipariyāyena amāyāsāṭṭheyyādiviparītamanasikārādivasena. Tathā samathapakkhiyānaṃ saddhindriyānaṃ vipassanāpakkhiyānaṃ aniccasaññādīnaṃ vasena vodānapakkho netabboti ayaṃ **nandiyāvattassa nayassa bhūmi**.

Tathā vuttanayena gahitesu taṇhāvijjātappakkhiyadhammesu taṇhā lobho, avijjā moho, avijjāya sampayutto lohite sati pubbo viya taṇhāya sati sijjhamāno āghāto doso iti tīhi akusalamūlehi gahitehi, tappaṭipakkhato “appatiṭṭha”ntiādivacanehi ca tīhi akusalamūlāni tīhi kusalamūlāni ca siddhāni eva hontī. Idhāpi lobho sabbāni sāsavakusalamūlāni āyūhanadhammā ca samudayasaccam, tannibattā tesam adhiṭṭhānagocarabhūtā ca upādānakkhandhā dukkhasaccantiādinā saccayojanā yojetabbā. Phalaṃ panettha vimokkhattayavasena niddhāretabbam, tīhi akusalamūlehi tividhaduccarita-saṃkilesamalavisamaakusalasaññā-vitakkādivasena akusalapakkho netabbo, tathā tīhi kusalamūlehi tividhasucarita-samakusalasaññā-vitakka-samādhi-vimokkhamukhādivasena vodānapakkho netabboti ayaṃ **tīpukkalassa nayassa bhūmi**.

Tathā vuttanayena gahitesu taṇhāvijjātappakkhiyadhammesu visesato taṇhādiṭṭhīnaṃ vasena asubhe “subha”nti, dukkhe “sukha”nti ca vipallāsā, avijjādiṭṭhīnaṃ vasena “anicce nicca”nti anattani “attā”ti vipallāsā veditabbā. Tesam paṭipakkhato “appatiṭṭha”ntiādivacanehi ca laddhehi sativīriyasamādhipaññindriyehi cattāri satipaṭṭhānāni siddhāneva hontī.

Tattha catūhi indriyehi cattāro puggalā niddisittabbā. Kathaṃ? Duvidho hi taṇhācarito mudindriyo tikkhindriyoti, tathā diṭṭhicarito. Tesu paṭhamo asubhe “subha”nti vipariyesaggāhī satibalena yathābhūtaṃ kāyasabhāvaṃ sallakkhento bhāvanābalena taṃ vipallāsaṃ samugghātetvā sammattaniyāmaṃ okkamati. Duttiyo asukhe “sukha”nti vipariyesaggāhī “uppannaṃ kāmavitakkaṃ nādhivāseti”tiādinā vuttana vīriyasamvarabhūtena vīriyabalena paṭipakkaṃ vinodento bhāvanābalena taṃ vipallāsaṃ viddhamsetvā sammattaniyāmaṃ okkamati. Tatiyo anicce “nicca”nti ayāthāvaggāhī samathabalena samāhitacitto saṅkhārānaṃ taṅkhaṇikabhāvaṃ sallakkhento bhāvanābalena taṃ vipallāsaṃ samugghātetvā sammattaniyāmaṃ okkamati. Catuttho santati-samūha-kiccārammaṇa-ghanavañcitātāya phassādidhammapuñjamatte anattani “attā”ti micchābhinivesī catukoṭikasūññatāmanasikārena taṃ micchābhinivesaṃ viddhamsetvā sāmāññaphalaṃ sacchikaroti. Subhasaññāsukhasaññādīhi catūhi vā vipallāsehi samudayasaccam, tesam adhiṭṭhānārammaṇabhūtā pañcupādānakkhandhā dukkhasaccantiādinā saccayojanā veditabbā. Phalaṃ panettha cattāri sāmāññaphalāni, catūhi cettha vipallāsehi caturāsavoghayoga-kāyagantha-agati-taṇhuppādupādāna-sattaviññāṇaṭṭhiti-apariññādivasena akusalapakkho netabbo, tathā catūhi satipaṭṭhānehi catubbidhājhāna-vihārādiṭṭhāna-sukhabhāgiyadhamma-appamaññāsammappadhānidhipādādivasena vodānapakkho netabboti ayaṃ **sīhavikkīlitassa nayassa bhūmi**.

Imesaṃ pana tiṇṇaṃ atthanayānaṃ siddhiyā vohāranayadvayaṃ siddhameva hoti. Tathā hi atthanayānaṃ disābhūtaḍḍhammalocanaṃ **disālocanaṃ**, tesam samānayaṇaṃ **añkusoti** pañcapi nayā idha niyuttāti veditabbā. Idañca suttaṃ soḷasavidhe suttantaṭṭhāne nibbedhasekkhabhāgiyaṃ byatirekamukhena paṭiṭṭhānāyūhanāni gahitānti saṃkilesanibbedhasekkhabhāgiyaṃ cāti daṭṭhabbam. Aṭṭhavīsatividhe pana suttantaṭṭhāne lokiyalokuttaraṃ sattādiṭṭhānaṃ ñāṇaṇeyyaṃ dassanabhāvaṇaṃ sakavacanaṃ vissajjanīyaṃ kusalaṃ anuññātanti veditabbam.

Oghataraṇasuttavaṇṇanā niṭṭhitā.

## 2. Nimokkhasuttavaṇṇanā

**2. Paṭhamamāgatanti** saṃvaṇṇanāvasena paṭhamasuttādīsu paṭhamam āgatapadaṃ. **Uttānatthanti** pākaṭatthaṃ. Apubbamaṃyeva hi duviññeyyatthañca padaṃ saṃvaṇṇetabbaṃ. **Noti** pucchāyaṃ **nu-**saddena samānattho nipātoti āha “**jānāsi noti jānāsi nū**”ti. Vaṭṭato nimuccanti tena sattāti **nimokkko**, maggo. So ca pamuccanti tenāti **pamokkko**, pamuccanante pana adhigantabbattāphalaṃ “pamokkko”ti vuttaṃ, yathā arahattaṃ “rāgakkhaya dosakkhaya mohakkhaya”ti vuttaṃ. **Teti** sattā. **Viviccātī** visuṃ asammisso hoti, vigacchatī attho. Viviccati dukkhaṃ etasmāti **viveko**. Dutiyavikappe pana sakalavaṭṭadukkhato sattā nimuccanti ettha pamuccanti viviccanti cāti **nimokkko pamokkko viveko**, nibbānanti attho veditabbo. **Etthāti** ca nimittatthe bhummavacanaṃ daṭṭhabbaṃ. Avadhāraṇattho **kho-**kāro “assosi kho”tiādīsu viya.

Nandīmūlako bhavo **nandībhavo** purimapade uttarapadalopena “sākabhakkho patthavo sākapatthavo”ti yathā. Paṭhamam kammavaṭṭapadhānaṃ atthaṃ vatvā puna kilesakammānaṃ vasena ubhayappadhānaṃ atthaṃ vadanto “**nandiyā cā**”tiādīmāha. **Purimanayeti** nandīmūlako kammabhavo nandībhavoti etasmim pakkhe. **Nandībhavenāti** nandībhavapadena. **Tividhakammābhisaṅkhāravasena**ti puññābhisaṅkhārādivasena kāyasāṅkhārādivasena ca tippakārassa kammābhisaṅkhārassa vasena. **Saṅkhārakkhandho gahito** cetanāpadhānattā saṅkhārakkhandhassa. **Saññāviññāṇehī**ti “saññāviññāṇasaṅkhayā”ti evaṃ vuttasaññāviññāṇapadehi. **Taṃsampayuttā** cāti tena yathāvuttasaṅkhārakkhandhena samaṃ yuttā eva. **Dve khandhāti** saññāviññāṇakkhandhā.

Nanu ettha vedanākkhandho na gahitoti? No na gahitoti dassento “**tehi panā**”tiādīmāha. **Tīhi khandhehī**ti saññāsaṅkhāraviññāṇakkhandhehi. **Gahitāva** avinābhāvato. Na hi vedanārahito koci cittuppādo atthi. **Anupādiṇṇakānanti** kusalākusalānaṃ. Na hettha kiriyākkhandhānaṃ appavatti adhippetā. **Appavattivasenāti** anuppattidhammatāpattivaseṇa. Nibbattanavasena kammakilesehi upādīyatīti **upādi**, pañcakkhandhā. Upādino seso **upādiseso**, saha upādisesenāti **saupādisesaṃ**. **Nibbānaṃ kathitaṃ** sakalakammakilesavūpasamatthassa jotitattā. Heṭṭhā dvīhi padehi anupādiṇṇakakkhandhā gahitāti “vedanāna”nti ettha upādiṇṇakaggahaṇaṃ yuttanti āha “**upādiṇṇakavedanāna**”nti. **Nirodhenāti** tappaṭibaddhachandarāganirodhavasena nirujjanena. **Upasamenāti** accantūpasamena appavattanena. Evañca katvā ca-saddaggahaṇaṃ samatthitaṃ hoti. **Tesanti** tassā vedanāya taṃsampayuttānañca tiṇṇaṃ khandhānaṃ. **Vatthārammaṇavasenāti** vatthubhūtānaṃ channaṃ ārammaṇabhūtānañca sabbesampi upādiṇṇakarūpadhammānaṃ vasena.

Kasmā pana heṭṭhā cattāro arūpakkhandhāyeva vuttā, rūpakkhandho na gahitoti? Visesabhāvato. Saupādisesanibbānappattiyāñhi upādiṇṇakarūpadhammānaṃ viya anupādiṇṇakarūpadhammānaṃ appavattiyeva natthi. **Dutiyānayeti** nandiyā ca bhavassa cāti etamhi pakkhe. Nandiggahaṇena saṅkhārakkhandho gahito taṃsahacaraṇato. **Upapattibhavasāṅkhāto rūpakkhandhoti** upādiṇṇakarūpadhammameva vadati. Taggahaṇeneva ca tannimittakāni utuāhārajāni, viññāṇaggahaṇena cittajānīti catusantirūpassapettha gahitatā veditabbā. **Saññādīhī**ti saññāviññāṇavedanāgahaṇehi tayo khandhā gahitā, tañca kho upādiṇṇā anupādiṇṇāti vibhāgaṃ akatvā avisesato. Avisesena hi pañcannaṃ khandhānaṃ appavatti nibbānaṃ. Tenāha “**evaṃ...pe... nibbānaṃ kathitaṃ hotī**”ti. “Nibbāna”nti hi idha amatamahānibbānaṃ adhippetam. **Imameva ca nayanti** idaṃ yathāvuttaṃ dutiyameva. Cattāro mahānikāye dhāretīti **catunīkāyiko**. Bhaṇḍikanāmakō thero **bhaṇḍikatthero**. **Itīti** vuttappakāraparāmasanaṃ. **Nibbānavasenevāti** paṭhamanaye saupādisesanibbānassa anupādisesanibbānassa ca, dutiye pana “amatamahānibbānassa”ti sabbathāpi nibbānasseva vasena bhagavā desanaṃ niṭṭhapesi samāpesīti.

Nimokkhasuttavaṇṇanā niṭṭhitā.

## 3. Upanīyasuttavaṇṇanā

3. Anekatthattā dhātusaddānaṃ upasaggavasena atthavisesavācako hotīti āha “**upanīyatīti parikkhīyati nirujjhatī**”ti. Vinassatīti attho. Upanīyatīti vā saraseneva jīvitassa maraṇūpagamaṇaṃ vuttanti āha – “**upagacchati vā, anupubbena maraṇaṃ upetīti attho**”ti. Kāmañcetta “upanīyati”ti padaṃ apākaṭakammavisesaṃ vuttaṃ. Yathā pana “sabbaṃ ārogyaṃ byādhipariyosānaṃ, sabbaṃ yobbaṇaṃ jarāpariyosānaṃ, sabbaṃ jīvitaṃ maraṇapariyosāna”nti, “upanīyati jīvita”nti vuttattā “**marāṇaṃ upetī**”ti vuttaṃ. Kammakattuvaseṇa hettaṃ vuttaṃ.

Idāni kammaśādhanaśasena atthaṃ dassetuṃ “**yathā vā**”tiādi vuttaṃ. **Gopālena gogaṇo nīyati** yathicchitaṃ thānaṃ. Jīvanti tena sattā, sahañātadhammā vāti **jīvitaṃ**, tadeva tesāṃ anupālāne ādhipaccasabbhāvato **indriyanti** āha “**jīvanti jīvitindriya**”nti **parittanti** ittaṃ. Tenāha “**thoka**”nti. Pabandhānupachedassa paccayabhāvo idha jīvitassa maraṇakiccanti adhippetanti āha “**sarasaparittatāya cā**”tiādi. **Āyūti** ca paramāyu idhādhippettaṃ, tañca ajjakālavaseṇa vedittabbaṃ.

Imasmiñhi buddhuppāde ayaṃ kathāti jīvitassa atīttarabhāvadīpanaparā ayaṃ desanā. Jīvitindriyavaseṇa jīvitakkhayaṃ niyanta “**ekacittappavattimattoyevā**”ti āha, ekassa cittuppādassa pavattikkhaṇamatto evāti attho. Idāni tamattaṃ upamāya vibhāvetuṃ “**yathā nāmā**”tiādi vuttaṃ. Tatta **pavattamānanti** nemirathīsā vattanti ekeneva nemippadesena pavattati ekasmiṃ khaṇeti adhippāyo. “**Ekeneva tiṭṭhatī**”ti etthāpi eseṇa nayo. **Ekacittakkhaṇikanti** ekacittakkhaṇamattavantaṃ. **Tasmiṃ citteti** tasmiṃ yasmiṃ kismiñci ekasmiṃ citte. **Niruddhamatteti** niruddhabhāvappattamatte. **Niruddhoti vuccatīti** matoti vuccati taṃsamaṅgī satta paramatthato. Aviseṇaviduno pana aviññāyamañantarena anusandhānassa niruddhanaṃ nirodhaṃ sallakkhenti. Yathāvuttamatthaṃ suttāna vibhāvetuṃ “**yathāhā**”tiādi vuttaṃ. Tena tīsupi kālesu sattānaṃ paramatthato jīvaṇaṃ maraṇaṃ cittakkhaṇavaseṇevāti dasseti.

**Jīvanti** jīvitindriyaṃ. **Attabhāvoti** jīvitavedanāviññāṇāni ṭhapetvā avasiṭṭhadhammā adhippetā. **Sukhadukkhāti** sukhadukkhā vedanā, upekkhāpi idha sukhadukkhāsveva antogadhā iṭṭhāniṭṭhabhāvato. **Kevalāti** attanā, niccabhāvena vā avomissā. **Ekacittasamāyuttāti** ekakena cittaṇa sahitā. **Lahuso vattate khaṇoti** vuttanayena ekacittakkhaṇikatāya lahuko atīttaro jīvitādīnaṃ khaṇo vattati.

**Ye niruddhā marantassāti** cavantassa sattassa cutito uddhaṃ niruddhāti vattabbā ye khandhā. **Tiṭṭhamānassa vā idhāti** ye vā idha pavattiyaṃ tiṭṭhamānassa dharantassa bhaṅgappattiyā niruddhā khandhā, **sabbepi sadisā** te sabbepi ekasadisā **gatā** atthaṅgatā **appaṭisandhiyā** puna āgantvā paṭisandhānābhāvena vigatā. Yathā hi cutikhandhā na nibbattanti, evaṃ tato pubbepi khandhā. Tasmā ekacittakkhaṇikaṃ sattānaṃ jīvanti adhippāyo.

**Anibbattena na jātoti** anuppannaṇa cittaṇa jāto na hoti “anāgate cittakkhaṇe na jīvittha na jīvati jīvissatī”ti vattabbato. **Paccuppanna** vattamānena cittaṇa **jīvati** jīvamāno nāma hoti, na jīvittha na jīvissatī. **Cittabhaṅgā mato lokoti** cuticittassa viya sabbassapi tassa tassa cittaṇa bhaṅgappattiyā ayaṃ loko paramatthato mato nāma hoti “atīte cittakkhaṇe jīvittha na jīvati na jīvissatī”ti vattabbato, niruddhassa appaṭisandhikattā. Evaṃ santepi **paññatti paramatthiyā**, yāyaṃ taṃ taṃ pavattaṃ cittaṃ upādāya “tisso jīvati, phusso jīvati”ti vacanappavattiyā visayabhūtā santānapaññatti, sā ettha paramatthiyā paramatthabhūtā. Tathā hi vuttaṃ “nāmagottaṃ na jīratī”ti (saṃ. ni. 1.76).

**Na santi tāṇāti** jaraṃ upagatassa tato taṃnimittaṃ yaṃ vā pāpakārino pāpakammaṇaṃ upaṭṭhānavaseṇa puññakārino piyavippayogavaseṇa cittadukkhaṃ ubhayesampi bandhanachedanādivaseṇa vitujjamaṇaṃ anappakaṃ sarīradukkhaṃ sammohappatti ca hoti, tato tāyantaṃ na santi. Tenāha – “**tāṇaṃ leṇaṃ saraṇaṃ bhavituṃ samatthā nāma keci natthī**”ti. Bhāyati etasmāti **bhayaṃ**, bhayanimitanti āha “**bhayavattū**”ti. Taggahaṇeṇa ca cittutrāsalaṅkhaṇaṃ bhayaṃ gahitameva, sati nimittaṃ nimittaṃ santamevāti. **Pubbacetananti** ekāvajjanavīthiyaṃ nānāvajjanavīthiyaṃ sampavattaṃ upacārajjhānacetaṇaṃ. **Aparacetananti** vasībhāvāpādanavaseṇa parato samāpajjanavaseṇa ca pavattaṃ samāpatticetaṇaṃ. **Muñcetananti** vikkhambhanavaseṇa



pavattaṃ paṭhamappaṇācetaṇaṃ. Kusalajjhānassa vipākajjhāneva labbhamānaṃ sukhaṃ **jhānasukhaṃ**. Itṭhapariyāyo cettha sukha-saddo. Jhāne apekkhā **jhānanikanti**. Jhānassa assādasena pavatto lobho **jhānassādo**. Yena te te brahmāno jhānato vuṭṭhāya “aho sukhaṃ aho sukha”nti vācaṃ nicchāresunti. Yathā devā sukhabahulā tihetupaṭisandhikāvāti paṭipajjantā jhānaṃ adhigantaṃ bhabbā, na itareti “**kāmāvacaradevesū**”ti vuttaṃ. Kāmāvacarā ca uparidevā ca **kāmāvacaradevāti** ekadesasarūpekaseso daṭṭhabbo. Tena manussānampi ekaccānaṃ sabbesampi vā saṅgaho siddho hoti patthanāparikkappaṇāya visayabhāvato. Tenāha “**aho vatime ca...pe... tiṭṭheyyu**”nti. Thullāni phusitāni vipphurāni etthāti thullaphusitako, kālo, deso vā. Tasmim **thullaphusitake**.

“Puññāni kayirātha sukhāvahānī”ti vuttattā “**aniyyānikaṃ vaṭṭakathaṃ kathetī**”ti vuttaṃ. Lujjanapalujjanaṭṭhena loko, kilesehi āmasitabbato āmisañcāti **lokāmisam**. Nippariyāyāmisam pana loko āmisantipi **lokāmisam**. Pariyāyeti sabhāvato parivattetvā nāpeti etenāti pariyāyo, lesa, kāraṇaṃ vāti āha “**nippariyāyena cattāro paccayā**”ti, vaṭṭassa ekantato bālalokeheva āmasitabbabhāvato pariyāyāmisatā vuttā. **Idha pari..pe... adhippetam** vivaṭṭapaṭiyogino icchitattā. Catupaccayāpekkhañhi pahānaṃ. Ekaccassa sakalavaṭṭāpekkhappahānassapi paccayo hotīti “**vaṭṭatiyevā**”ti sāsankam vadati. Vūpasamati ettha sakalavaṭṭadukkhanti **santi**, asaṅkhatadhātūti āha “**nibbānasaṅkhātā**”nti.

Upanīyasuttavaṇṇanā niṭṭhitā.

#### 4. Accentisuttavaṇṇanā

4. Kālayanti khepentīti **kālā**. Purebhaddādayo hi kālā dhammappavattimattatāya paramatthato avijjamānāpi lokasaṅketamattasiddhā tassāyeva dhammappavattiyā gatagatāya anivattanato taṃ taṃ dhammappavattiṃ khepentā vināsayantā viya sayañca tāhi saddhim accentā viya honti. Tenāha – “kālo ghasati bhūtāni, sabbāneva sahattana”ti (jā. 1.2.190). “**Tarayanti rattiyo**”ti etthāpi vuttanayeneva attho veditabbo. “Etaṃ bhayaṃ maraṇe pekkhamāno”ti vuccamānattā puggalaṃ maraṇūpagamaṇāya tarayantīti attho vutto. **Vayogunāti** ettha koṭṭhāsā guṇā. Titthiyānaṃ hi carimacittena sakalacitte vayasamūhe vayasamaññāti āha – “**paṭhamamajjhimapacchimavayānaṃ guṇā, rāsayoti attho**”ti. **Ānisaṃsaṭṭho guṇaṭṭho** “vākaciraṃ nivāsesim, dvādasaguṇamupāgata”ntiādīsu (bu. vaṃ. 2.30) viya. “Tandiguṇāhaṃ karissāmi, diguṇaṃ diguṇaṃ vaddheyyā”ti ca evamādīsu pana **tabbhāvavuttiattho guṇaṭṭho**.

“Asaṅkhyeyyāni nāmāni, saṅgheṇa mahesino;  
Guṇena nāmamuddheyyaṃ, apī nāma saḥassato”ti. (dha. sa. aṭṭha. 1313; udā. 53; paṭi. ma. aṭṭha. 1.1.76) –

Ādīsu **pasamsaṭṭho guṇaṭṭho** daṭṭhabbo. “Vayogunā anupubbaṃ jahantī”ti ettha attho “accenti kālā”ti ettha vuttanayo eva. **Paṭhamamajjhimapacchimavayāti** paṭhamaggahaṇaṇcetta vayasā gatassa apunarāvattidassanattaṃ kataṃ. Tenevāha – “**marāṇakkhaṇe pana tayopi vayā jahantevā**”ti.

Ettha ca pāliyaṃ “accenti kālā”ti sāmāññato kālāssa apagamaṇaṃ dassitaṃ, puna taṃ visetopi dassetuṃ itaradvayaṃ vuttaṃ. Aṭṭhakathāyaṃ pana mudindriyassa vasena “vayogunā anupubbaṃ jahantī”ti vuttaṃ, majjhimindriyassa vasena “tarayanti rattiyo”ti vuttanti adhippāyena “**kālāti purebhaddādayo kālā**”ti vuttaṃ. Tasmā tattha **ādi**-saddena pacchābhattapaṭhamayāma-muhuttakālādi-kālakoṭṭhāso eva aṇupabhedo kālāvibhāgo gahitoti veditabbo. **Sesanti** idha dvīsu gāthāsu pacchimaddho. So hi idha atthato adhigatattā anantarasutte ca vuttattā atidisito.

Accentisuttavaṇṇanā niṭṭhitā.

#### 5. Katichindasuttavaṇṇanā

**5. Chindantoti** samucchindanto. **Kati chindeyyāti** kittake pāpadhamme samucchindeyya, anuppattidhammataṃ pāpeyya. **Sesapadesupīti** sesesupi dvīsu padesu. Jahanto kati jaheyya, bhāvento kati uttari bhāveyyāti imamattamaṃ “**eseva nayo**”ti iminā atidisati. Catutthapadassa pana attho sarūpeneva dassito. **Atthato ekanti** bhāvattatho ekaṃ. Yadi evaṃ kimattamaṃ pariyāyantaraṃ gahitanti āha “**gāthābandhassa panā**”tiādi. Atthato ettha punarutti atthevāti āha “**saddapunaruttiṃ vajjayanti**”ti. Saṅgaṃ atikkamayatīti **saṅgātigoti** āha “**ayamevattho**”ti.

Oraṃ vuccati kāmādhātu, paṭisandhiyā paccayabhāvena taṅca bhajantīti **orambhāgiyāni**. Tattha ca kammaṃ tabbipākaṃ satte dukkhaṃ, kammunā vipākaṃ, sattena dukkhaṃ saṃyojenti **saṃyojanāni**, sakkāyadiṭṭhi-vicikicchā-sīlabbataparāmāsa-kāmarāga-paṭighā. Uddhaṃ vuccati catasso arūpadhātuyo, vuttanayena taṃ bhajantīti **uddhambhāgiyāni, saṃyojanāni** rūpārūparāgamānuddhaccāvijjā. **Āropitavacanānurūpeneva evamāhāti** “pañca chinde pañca jahe”ti evaṃ kathesi tassā devatāya sukhaggahaṇattamaṃ. Na kevalaṃ tāya devatāya vuttavacanānurūpato eva, atha kho tesu saṃyojanesu vattabbākāratopīti dassetuṃ “**atha vā**”tiādi vuttaṃ. Tena orambhāgiyasamyojanāni nāma garūni ducchedāni gāḷhabandhanabhāvato, tasmā tāni sandhāya “**pañca chinde**”ti vuttaṃ.

Uddhambhāgiyasamyojanāni pana lahūni succhedāni heṭṭhā pavattitānukkamena bhāvanāyena pahātābato, tasmā tāni sandhāya “**pañca jahe**”ti vuttaṃ. Tenāha “**pādesu baddhapāsasakuṇo viyā**”tiādi. **Visesanti** bhāvanānaṃ visesaṃ vipassanābhāvanaṃ **bhāvento** uppādentō vipaccento vaḍḍhento ca. Saṃsārapaṅke sañjanaṭṭhena rāgo eva saṅgo “**rāgasāngo**”. Esa nayo sesesupi. Yasmā ettha rāga-moha-diṭṭhi-tabbhāgiyasakkāyadiṭṭhi-sīlabbataparāmāsa-kāmarāgāvijjā atthato oghā eva, itare tadekaṭṭhā, tasmā bhagavā saṃyojanappahānasāṅgātikamehi oghataraṇaṃ kathesi. **Lokiyalokuttarāni kathitāni** “bhāvaye”ti pubbabhāgāya maggabhāvanāya adhippetattā.

Katichindasuttavaṇṇanā niṭṭhitā.

## 6. Jāgarasuttavaṇṇanā

**6. Jāgaratanti** anādare sāmivacanaṃ. Tenāha “**indriyesu jāgarantesū**”ti. “Vissajjanagāthāyaṃ panā”ti imassa padassa “**ayamattho vedītabbo**”ti iminā sambandho. Pucchāgāthāya pana attho imināva nayena viññāyatīti adhippāyo. **Pañca jāgaratamaṃ suttāti** ettha “**suttā**”ti padaṃ apekkhitvā **pañcāti** paccattavacanaṃ “**jāgarata**”nti padaṃ apekkhitvā sāmivasena pariṇāmetabbaṃ “**pañcannaṃ jāgarata**”nti. Tenāha – “**pañcasu indriyesu jāgarantesū**”ti, jāgarantesu baddhābhāvena sakiccappasutatāya sakiccasamatthāya cāti attho. Sottaṃva **suttā** pamādaniddābhāvato. Tameva suttabhāvaṃ puggalādhiṭṭhānāya kathāya dassetuṃ “**kasmā**”tiādi vuttaṃ. Pamajjati, pamādo vā etassa atthīti pamādo, tassa bhāvo **pamādatā**, tāya, pamattabhāvenāti attho.

Evaṃ gāthāya paṭhamassa pādassa atthamaṃ vatvā dutiyassa vattumaṃ “**evaṃ suttēsū**”tiādi vuttaṃ. Tassattho vuttanayena vedītabbo. Yasmā appahīnasupanakiriyāvasena sanīvaraṇassa puggalassa anuppannarāgarājādayo uppajjanti, uppannā pavaḍḍhanti, tasmā vuttaṃ “**nīvaraṇeheva kilesarajama ādiyati**”ti. Tenevāha “**purimā**”tiādi. Purimānaṃ pacchimānaṃ aparāparuppattiyā paccayabhāvo hettha ādiyaṇaṃ. **Pañcahi indriyehi parisujjhatīti** maggapariyāpannehi saddhādīhi pañcahi indriyehi sakalasaṃkilesato visujjhati. Paññindriyameva hi anaññātāññassāmītindriyādīni, itarāni ca anvayāntīti.

Jāgarasuttavaṇṇanā niṭṭhitā.

## 7. Appaṭivīditasuttavaṇṇanā

**7. Pavattinivattitadubhaya**hetuvibhāgassa dhammassapi catusaccantogadhattā āha “**dhammāti catusaccadhammā**”ti. Cattāripi hi ariyasaccāni catusaccantogadhāni. **Appaṭivīddhāti** pariññābhisamayādivasena anabhisamītā. **Diṭṭhigatavādesūti** diṭṭhigatasaññitesu vādesu. Diṭṭhigatehi te

pavattitā. **Ito paresanti** ito sāsānikēhi paresaṃ aññesaṃ. **Dhammatāyāti** sabhāvena, sayamevāti attho. **Gacchantīti** pavattanti diṭṭhivādaṃ paggayha tiṭṭhanti. **Parenāti** diṭṭhigatikenā. **Nīyantīti** diṭṭhivādasaṅgaṅhane uyyojīyanti. Tenāha “**tatthā**”tiādi. **Pabujjhīti** pamādaniddāya paṭibujjhīti. **Paṭipadā** yathādesitassa dhammassa kathitāya, paṭibujjhīti yoniso pavattiyamānattā **bhaddikā**.

**Hetunāti** ñāyena. **Kāraṇenāti** catusaccānaṃ sambodhayuttīyā. Hatthatale āmalakaṃ viya sabbaṃ ñeyyaṃ jānātīti sabbaññū, teneva sabbaññūtābhisambodhena buddhoti **sabbaññubuddho**. Paccekaṃ parehi asādhāraṇatāya viṣuṃ sayambhuññaṇena saccāni buddhavāti **paccekabuddho**. Paropadesena catusaccaṃ bujjhatīti **catusaccabuddho**. Tathā hi so sayambhutāya abhāvato kevalaṃ catusaccabuddhoti vuccati. Sutena sutamayaññaṇena khandhādibhedāṃ ñeyyaṃ buddhavāti **sutabuddho**. Sabbaññubuddhapaccekabuddhe ṭhapetvā avasesā aggasāvaka mahāsāvakaṃ pakatisāvakaṃ vītarāgā **avasesā khīṇāsavā**. **Tayopi purimā vaṭṭanti** sambuddhātīdivacanato. Sannivasati etenāti sannivāso, caritaṃ. Lokassa sannivāso **lokasannivāso**, tasmīṃ. Kāyaduccarītādibhede **visame**. Satisammosena **visame vā sattanikāye**. So hi visamayogato visamo. Rāgavisamādike **visame vā kilesajāte**. Taṃ visamaṃ pahāya taṃ visamaṃ ajjupekkhitvā **samaṃ** sadisaṃ yuttarūpaṃ, purimakehi vā sambuddhehi **samaṃ** sadisaṃ **caranti** vattanti.

Appaṭivīditasuttavaṇṇanā niṭṭhitā.

## 8. Susammutṭhasuttavaṇṇanā

**8. Susammutṭhāti** suṭṭhu ativiya sammutṭhā. Satta sekkhā hi susammusitā vinaṭṭhā. Kathaṃ pana te anadhigatā naṭṭhā nāma hontīti āha “**yathā hi**”tiādi. **Adhigatassāti** adhigato assa. So vadantoti sambandho. **Sesanti** “dhammā”tiādi. **Purimasadisamevāti** anantaragāthāya vuttasadisameva.

Susammutṭhasuttavaṇṇanā niṭṭhitā.

## 9. Mānakāmasuttavaṇṇanā

**9. Seyyādibhedāṃ mānaṃ** appahāya taṃ paggayha vicaranto kāmento nāma hotīti āha “**mānaṃ kāmentassa icchantassā**”ti. Damati cittaṃ etenāti **damo**, satisambojjhaṅgādiko samādhīpakkhiko damo. Manacchaṭṭhāni indriyāni dametīti **damo**, indriyaṣaṃvaro. Kīlese dameti pajahatīti **damo**, paññā. Upavasanaṣasena kāyakammādiṃ dametīti **damo**, uposathakammaṃ. Kodhūpanāhamakkhamānādike dameti vinetīti **damo**, adhvāsānakhanti. **Tenevāti** “damo”ti samādhīpakkhikadhammānaṃ eva adhippetattā. “Na monaṃ atthī”ti ca pāṭho. **Asamāhitassāti** samādhīpaṭikkhepo jotito.

Maccudheyassa pāratarāṇassa vuccamānattā “**monanti catumaggañña**”nti vuttaṃ. Na hi tato aññaṇa taṃ sambhavati. **Jānāti** asamhapaṭivedhavasena paṭivijjhatīti attho. Maccu dhīyati etthāti **maccudheyyaṃ**, khandhapañcakaṃ maraṇadhammattā. **Tassevāti** maccudheyasseva. **Pāraṃ** paratīrabhūtaṃ nibbānaṃ. **Tareyyāti** ettha taraṇaṃ nāma ariyamaggabyāpāroti āha “**paṭivijjheyya pāpuṇeyyā**”ti. Tathā hi vakkhati “paṭivedhatarāṇaṃ nāma vutta”nti. “Na tareyya na paṭivijjheyya na pāpuṇeyya vā”ti ayamettha pāṭho yutto. Aññathā “idaṃ vuttaṃ hotī”tiādivacanāṃ virujjheyya. **Eko araṇṇe viharantoti** ekākī hutvā araṇṇe viharantoti attho.

Kāmaṃ heṭṭhimamaggehipi ekaccassa mānassa pahānaṃ labbhati. Aggamaggeneva pana tassa anavasesato pahānanti āha – “**arahattamaggena navavidhamānaṃ pajahitvā**”ti. Upacārasamādhīpubbako appanāsamādhīti vuttaṃ “**upacārappanāsamādhīhi**”ti, na upacārasamādhimattena samādhimattaṃ sandhāya paccekaṃ vākyaparisaṃpanassa ayujjanato. Na hi appanaṃ appattaṃ lokuttarajjhānaṃ atthi. “**Sucetaso**”ti cittassa ñāṇasahitāya lakkhaṇavacananti āha “**ñāṇasampayuttatāyā**”tiādi. Tathā hi vakkhati “sucetasoti ettha cittena paññā dassitā”ti. “**Sabbadhi**

**vippamutto**”ti sabbesu bhavādīsu viṣaṃsaṭṭhacitto sabbaso khandhādīhi viṣaṃyutto hotīti vuttaṃ “**sabbesu khandhāyatanādīsu vippamutto hutvā**”ti. Pariññāpaṭivedho sacchikiriyapaṭivedhena vinā natthīti āha “**tebhūmaka...pe... vutta**”nti.

Mānaṃ nissāya duccharitacaraṇato **māno nāmāyaṃ sīlabhedano**. Tasmāti mānassa sīlapaṭipakkhabhāvato. **Iminā** paṭipakkhappahānakittanena. **Adhicittasikkhā kathitā** sarūpato evāti adhippāyo. Ettha **cittenāti** su-saddena viṣesitacittena. **Tasmāti** paññāya dassitattā. **Imināti** “sucetaso”ti iminā padena. Adhisīlasikkhā adhicittasikkhā adhipaññāsikkhāti sīlādīnipi viṣesetvā vuttāni. Sambhave byabhicāre ca viṣesanaviṣesitabbatāti taṃ dassento “**adhisīlañca nāma sīle sati hotī**”tiādīṃ vatvā tadubhayaṃ vibhāgena dassetuṃ “**tasmā**”tiādī vuttaṃ. Paṭhamanayo saṅkaravasena pavattoti asaṅkaravasena dassetuṃ “**apicā**”tiādīnā dutiyanayo vutto. “**Samāpannā**”ti etthāpi “nibbānaṃ patthayantenā”ti ānetvā sambandho. Vipassanāya pādakabhāvaṃ anupagatāpi tadattham nibbattanādivasena samāpannāti ayamatto purīmanayato viṣeso. Adhipaññāya panettha purīmanayato viṣeso natthīti sā anuddhaṭā. **Samodhānetvāti** pariyāyato sarūpato ca saṅgahetvā. **Sakalasāsananti** tissannaṃ kathitattā eva sikkhattayaṅgahaṃ sakalasāsaṇaṃ kathitaṃ hotīti.

Mānakāmasuttavaṇṇanā niṭṭhitā.

## 10. Araññasuttavaṇṇanā

**10. Santakilesānanti** vūpasantakilesapariḷāhānaṃ. Yasmā sīlādiguṇasambhavaṃ tato eva bhayasantañca upādāya paṇḍitā “santo”ti vuccanti, tasmā vuttaṃ “**paṇḍitānaṃ vā**”ti. Tenāha “**santo have**”tiādī. **Seṭṭhacārīnanti** seṭṭhacariyaṃ carantānaṃ. Yasmā puthujjanakalyāṇato paṭṭhāya bhikkhu maggabrahmacariyavāsaṃ vasati nāma, tasmā āha “**maggabrahmacariyavāsaṃ vasantāna**”nti. Ariyānaṃ pana mukhavaṇṇassa pasīdane vattabbameva natthi. **Mūlakammaṭṭhānanti** pārihāriyakammaṭṭhānaṃ. **Viṣabhāgasantatīti** nānārammaṇesu pavattacittasantati. Sā hi vikkhepabyākulatāya appasannā samāhitacittasantatiyā viṣabhāgasantati. **Okkamatīti** samādhisabhāgā cittasantati samathavīthiṃ anupavisati. **Cittaṃ pasīdatīti** kammaṭṭhānanirataṃ bhāvanācittaṃ sandhāyāha, taṃ pasannaṃ hutvā pavattati. **Lohitaṃ pasīdatīti** cittakālussiyassābhāvato lohitaṃ anāvilaṃ hoti. **Parisuddhāni honti** kāraṇassa parisuddhabhāvato. **Tālaphalamukhassa viya mukhassa vaṇṇo hotīti** mukha-saddassa ādimhi pamuttapadena yojetabbo. Evañhi cassa pamuttaggahaṇaṃ samatthitaṃ hoti tālaphalamukhassa vaṇṇasampadāsadisattā. Tibhūmako eva **tebhūmako**.

**Atītaṃ nānusocanti** atītaṃ paccayaḷābhaṃ lakkhaṇaṃ katvā na socanti na anutthunanti. Jappanataṇhāya vasena na parikappantīti āha “**na patthenti**”ti. **Yena kenacīti** itarītarena. **Taṅkhaṇe laddhenāti** sannidhikāraparibhogābhāvamāha. **Tividhenapi kāraṇenāti** tippakārena hetunā, tilakkhaṇasantosanimitanti attho.

**Vināsanti** vināsanahetuṃ. Vināsanti etehīti **vināso**, lobhadosaṃ tadekaṭṭhā ca pāpadhammā. Arūpakāyassa viya rūpakāyassapi viṣesato sukkhabhāvakāraṇanti āha “**etena kāraṇadvayenā**”ti. **Lutoti** lūno.

Araññasuttavaṇṇanā niṭṭhitā.

Naḷavaggavaṇṇanā niṭṭhitā.

## 2. Nandanavaggo

### 1. Nandanasuttavaṇṇanā

11. “Tatra bhagavā”ti vutte na tathā byañjanānaṃ siliṭṭhatā, yathā “tatra kho bhagavā”ti vutteti āha “**byañjanasiliṭṭhatāvasenā**”ti. **Parisajetṭhake**ti parisāya jetṭhake, ye tassā desanāya visesato bhājanabhūtā. **Parisajetṭhake bhikkhū**ti catuparisajetṭhake bhikkhū. Catunnaṃ hi parisānaṃ jetṭhā bhikkhuparisā paṭhamuppannattā. **Āmantesū**ti sambodhesi, sambodhanañca jānāpananti āha “**jānāpesi**”ti. **Bhadanteti** garugārasappatissavavacanametam, atthato pana **bhadanteti** bhaddam tava hotu attano niṭṭhānapariyosānattā paresaṅga santatāvahattā. **Bhagavato paccassosunti** ettha **bhagavatoti** sāmivacanaṃ āmantanameva sambandhiatthapadaṃ apekkhatīti adhippāyena āha “**bhagavato vacanaṃ patiassosu**”nti. **Bhagavatoti** pana idaṃ patissavanasambandhena sampadānavacanaṃ yathā “devadattassa paṭissuṇāti”ti. Yaṃ panettha vattabbaṃ, taṃ nidānavaggassa ādisuttavaṇṇanāyaṃ āgamissati.

**Tāvatiṃsakāyoti** tāvatīṃsasaññito devanikāyo. **Dutiya**devalokoti chasu kāmaloakesu dutiyo devaloko. Tettiṃsa janā sahapuññakārino tattha uppannā, taṃsahacaritaṭṭhānaṃ **tāvatiṃsaṃ**, tannivāsīnopi tāvatīṃsanāmākā sahacaraṇaṇāyēnāti āha “**maghena māṇavenā**”tiādi. Ayaṃ pana kecivādo byāpanno hotīti taṃ arocentena “**vadanti**”ti vuttaṃ. Byāpannatam dassento “**yasmā panā**”tiādimāha. Tathā hi vakkhati “evaṃ hi niddosaṃ padaṃ hoti”ti. **Nāmapaṇṇattiyevāti** atthanirapekkhattā niruḷhasamaññā eva.

**Taṃ vananti** taṃ upavanaṃ. Paviṭṭhe paviṭṭhe dukkhappattepi attano sampattiyā nandayati, pageva adukkhappatteti dassetuṃ “**pañcasu hī**”tiādi vuttaṃ. **Pavesitānanti** pakoṭṭhavārena pavesitānampīti adhippāyo. Cavanakāleyeva thokaṃ dissamānavikārā hutvā cavanti, te sandhāya “**himapiṇḍo viya vilīyanti**”ti vuttaṃ. Ye pana adissamānavikārā sahasā antaradhāyanti, te sandhāya “**dīpasikhā viya vijjhāyanti**”ti vuttanti vadanti. **Nandayati** pakatiyā somanassitam domanassitañca. **Nandaneti** evaṃanvatthanāmake uyyāne. **Parivutāti** “devatā”ti vacanaṃ upādāya itthilingavasena vuttaṃ. Devaputto hi so.

Divi bhavattā dibbāti āha “**devaloke nibbattehi**”ti. Kāmetabbatāya **kāmabandhanehi**, tathā aññamaññaṃ asaṃkiṇṇasabhāvatāya **kāmakoṭṭhāsehi**. **Upetāti** upagatā samannāgatā. **Paricārayamānāti** pariramamānā. Idañhi padaṃ apekkhitvā “kāmaguṇehi”ti kattari karaṇavacanaṃ, purimāni apekkhitvā sahayoge. Ramamānā carantīti katvā vuttaṃ “**ramamānā**”ti. **Paricārayamānāti** vā parito samantato cārayamānāti atthoti āha “**indriyāni sañcārayamānā**”ti. Paṭhamanaye hi anubhavanattho paricaraṇasaddo, dutiyanaye parivattanattho. **So panāti** “tāyaṃ velāya”nti vuttakālo. **Adhunāti** sampati. So vicarīti sambandho. **Kāmaguṇehīti** hetumhi karaṇavacanaṃ. **Ovutoti** yathā taṃ na ñāyati, evaṃ pihitacitto. **Nivuto pariyoṇaddhoti** tasseva vevacanaṃ. Tenāha “**lokābhībhūto**”ti. **Āsabhīnti** seṭṭhaṃ “aggohamasmi lokassā”tiādinā (dī. ni. 2.31; ma. ni. 3.207) **bhāsanto** bodhisatto viya.

Kevalaṃ dassanaṃ kimatthiyanti āha – “**ye...pe...vasenā**”ti, tasmīṃ nandanavane avaṭṭhitakāmabhāgānubhavanavaseṇāti attho. **Naradevānanti** purisabhūtadevatānaṃ. Tenāha “**devapurisāna**”nti. Appakaṃ adhikaṃ ūnaṃ vā gaṇanūpagaṃ nāma na hotīti “**tikkhattuṃ dasanna**”nti vuttaṃ. “Tettiṃsāna”nti hi vattabbe ayaṃ ruḷhī. **Parivārasaṅkhātena**, na kittisaṅkhātenāti adhippāyo. Sīlācārādiguṇanemittikā hi kitti. “Tāvatiṃsā devā dīghāyukā vaṇṇavanto sukhabahulā”ti evamādivacanaena yase icchite avisesetvāya “**yasena sampannāna**”nti sakkā vuttaṃ.

**Ariyasāvīkāti** sotāpannā. “Sakadāgāminī”ti keci. **Adhippāyaṃ vivaṭṭetvāti** yathā tvaṃ andhabāle maññasi, dhammasabhāvo evaṃ na hotīti tassā devatāya adhippāyaṃ viparivattetvā. Ekantato sukhaṃ nāma nibbānameva. Kāmā hi dukkhā vipariṇāmadhammāti iminā adhippāyena **tassā adhippāyaṃ paṭikkhipitvā**. Kāmaṃ catutthabhūmakāpi saṅkhārā aniccā eva, te pana sammasanūpagā na hotīti **tebhūmakaggahaṇaṃ** sammasanayoggena. **Hutvāti** pubbe avijjamānā paccayasamavāyena bhavitvā uppajjitvā. Etena nesam bhāvabhāgo dassito. **Abhāvatthenāti** sarasanirodhabhūtena viddhaṃsanabhāvena.

**Aniccā** addhuvā, tato eva “mayhaṃ ime sukhā”ti vā na iccāti **aniccā**. **Uppādavayasabhāvā**ti khaṇe khaṇe uppajjananirujjhanasabhāvā. Tenāha “**uppa...pe...vevacana**”nti. Purimassa vā pacchimaṃ kāraṇavevacananti āha “**yasmā vā**”tiādi. **Tadanantarā**ti tesam uppādavayānaṃ antare. **Vemajjhatthānanti** t̥hitikkhaṇaṃ vadati. Ye pana “sāṅkhārānaṃ t̥hiti natthī”ti vadanti, tesam taṃ micchā. Yathā hi tasveva dhammassa uppādvatthāya bhinnā bhaṅgāvatthā icchitā, aññathā aññaṃ uppajjati, aññaṃ nirujjhatthi āpajjati, evaṃ uppānassa bhaṅgābhimukhāvatthā icchitabbā, sāva t̥hitikkhaṇo. Na hi uppajjamāno bhijjatthi sakkā viññātunti. **Vūpasamasāṅkhātanti** accantaṃ vūpasamasāṅkhātaṃ **nibbānameva sukhaṃ**, na tayā adhippetā kāmāti adhippāyo.

Nandanasuttavaṇṇanā niṭṭhitā.

## 2. Nandatisuttavaṇṇanā

**12. Nandatī**ti ettha nandanaṃ sappītikakāmatanḥākiccanti āha – “**tussatī**”ti, tasmā kāmāparitosaṇa hatthatuṭṭho hofīti attho. **Puttimā**ti puttavā. Pahūte cāyaṃ mā-saddoti āha “**bahuputto**”ti. Bahuputtatāgahaṇena idaṃ payojananti dassento “**tassa hī**”tiādimāha. **Pūrentī**ti padaṃ apekkhitvā **dhaññassā**ti sāmivacanaṃ. **Iti āhā**ti imamatthaṃ sandhāyāha, evaṃadhippāyo hutvāti attho. **Gosāmikoti** gomā. Idhāpi pahūte mā-saddo. **Gorasasampattinti** gorasehi nipphajjanasampattim. **Upadhī**ti paccatabhuvacanaṃ. **Hīti** hetuatthe nipāto. Nandayanti pītīsomānassaṃ janayantīti **nandanā**. Kāmaṃ dukkhassa adhiṭṭhānabhāvato nippariyāyato kāmā “upadhī”ti vattabataṃ arahanti, tassā pana devatāya adhippāyavāsenaṃ “**sukhassa adhiṭṭhānabhāvato**”ti. Kilesavatthuhetukattā sesapadadvayassa kiñcāpi sabbam saṃsāradukkhaṃ kilesahetukaṃ, visesato pana pāpadhammā apāyūpapattim nibbattenti āha – “**kilesāpi apāyadukkhassa adhiṭṭhānabhāvato**”ti. **Upasamharamānā**ti upanentā uppādentā. Manussajātikopi dullabhaḥāsacchādanatāya dukkhabahulo peto viyāti **manussapeto**. Manussajātikopi vuttarūpo anathapātito parehi hiṃsito samāno nerayiko viyāti **manusserayiko**.

**Phalena** rukkhato **phalaṃ** pātentō viya. **Tatheva navahākārehī**ti yathā tīsu kālesu nāsamaṇābhedanavasena puttimā puttanimittaṃ, tatheva gomā gonimittaṃ socati navappakārehi. Pañca kāmāgūṇopadhīpi naraṃ socentīti yojanā. **Tassā**ti yo uttari anugijjhati tassa. **Kāmayānassā**ti jātakāmacchandassa. **Jantunoti** sattassa. **Parihāyanti ce** vinassanti ce. **Sallaviddhovā**ti sallena viddho viya. **Ruppatī**ti vikāraṃ āpajjati, socatīti attho. **Narassa socanā** sokaghatṭanapaccayo. **Upadhayo natthī**ti kāmaṃ kilesābhisaṅkhārūpadhayo tāva khīṇāsavassa nattheva maggādhigāmena nirodhitattā, khandhūpadhayo pana kathanti? Tepi tassa saupādisesakālepi aṭṭhuppattihetubhūtā na santeva, ayañca anupādisesakāle. Tenāha “**so nirupadhi mahākhiṇāsavo**”ti.

Nandatisuttavaṇṇanā niṭṭhitā.

## 3. Natthiputtasamasuttavaṇṇanā

**13. Puttapemaṃ** puttagahaṇena gahitaṃ uttarapadalopenāti āha “**puttapemasama**”nti. **Gosamī**nti gohi samaṃ kataṃ. Tenāha “**gohi sama**”nti. Sūriyassa samāti **sūriyasamā**. Avayavasamābandhe cetam sāmivacanaṃ. Avayavo cettha ābhā evāti viññāyati “anantaraṃ ābhā”ti vuccamānattāti āha “**sūriyābhāya samā**”tiādi. Mahoghābhāvena saranti savantīti **sarā**, mahantā jālasayā. **Sabbe te samuddaparamā** orimajanehi adhiṭṭhāparatīrattā tassa.

**Natthi attasamaṃ pemanti** gāthāya paṭhamagāthāyaṃ vuttanayena attho veditabbo. Attapemena samaṃ pemam nāma natthīti ayamatto. Anudakakantāre ghammasantāpaṃ asahantiyā anke t̥hapitaputtakaṃ kandantaṃ bhūmiyaṃ nipajjāpetvā tassa upari t̥hatvā mataitthivatthunā dīpetabbaṃ. Tenāha – “**mātāpitādayo hi chaḍḍetvāpi puttadhītādayo**”ti. Tathā cāha –

“Sabbā disā anuparigamma cetasā,  
Nevajjhagā piyataramattanā kvaci;  
Evam piyo puthu attā paresam,  
Tasmā na hiṃse paramattakāmo”ti. (saṃ. ni. 1.119; udā. 41; netti. 113);

**Dhaññena samam dhanam nāma natthi**, yasmā tappaṭibaddhā āhārūpajīvinam sattānam jīvitavutti. **Tathārūpe kāleti** dubbhikkhakāle. **Ekadesamyeva obhāsantī** ekasmiṃ khaṇe catūsu mahādīpesu obhāsam pharituṃ asamatthattā sūriyassapī, pageva itaresam. Bodhisattassa udayabbayassa ñāṇānubhāvena sakalajātikhetam ekālokaṃ ahoṣīti āha “**paññā...pe... sakkotī**”ti. **Tamam vidhamatī** pubbenivāsaññādayo paññā yattha pavattanti, tamanavasesam byāpetvā ekappahārena pavattanato. “**Vuṭṭhiyā pana pavattamānāya yāva ābhassarabhavanā**”ti pacuravasena vuttam.

Natthiputtasamasuttavaṇṇanā niṭṭhitā.

#### 4. Khattiyasuttavaṇṇanā

**14. Khetato vivādā satte tāyatīti khattiyo. Vadati** devatā attano ajjhāsayavasena. **Dvipadādīnanti ādi-saddena** catuppadabhariyaputtā gahitā. **Buddhādayoti ādi-saddena** ājānīyasussūsbhariyassavaputtā. **Dvipadānam seṭṭhoti** ettha dvipadānam eva seṭṭhoti nāyam niyamo icchito, seṭṭho evāti pana icchito, tasmā sambuddho dvipadesu aññesu tattha ca uppajjanato seṭṭho eva sabbesampi uttaritarassa abhāvatoti ayamettha attho. Tenāha “**uppajjamāno panesā**”tiādi. Kāraṇākāraṇam ājānātīti **ājānīyo. Gaṇhāpethāti** yathā udako na temissati, evam vālam gaṇhāpetha. “Asussūsā”ti keci paṭhanti. **Āsuṇamānoti** sappāṭissavo hutvā vacanasampācchako.

Khattiyasuttavaṇṇanā niṭṭhitā.

#### 5. Saṇamānasuttavaṇṇanā

**15. Ṭhite majjhanhiketi** pubbaddham nikkhamitvā aparaddham appatvā ṭhitamajjhanhe. **Sannisīvesūti** parissamavinodanatham sabbaso sannisīdantesu. Da-kārassa hi va-kāram katvā niddeso. Tenāha “**sannisīnesu vissamamānesū**”ti. **Sabbasattānanti** sabbesañca āhārūpajīvitasattānam ghammatāpane santattakāyānam **iriyāpathadubbalyakāloti** ṭhānādiiriyāpathassa asamatthakālo. **Saṇati viyāti** saddam karoti viya, yathā tam aññampi mahāvanam vakkhamānanayena. Tenāha “**tappaṭibhāgam nāmeta**”nti **chiddaveṇupabbānanti** randhajātakīcakamahāvelupabbānam. **Dutiyakam** sahāyam alabhantī anabhiratiparitassanāya evamāha. **Anappakam sukhanti** vipulam uḷāram vivekasukham.

Ekavīhāratāya **suññāgāram pavīṭṭhassa**. Tena kāyavivekam dasseti. Aniccānupassanādīhi niccasaññādippahānena **santacittassa**. Tena cittavivekam dasseti. Samsāre bhayam ikkhanato **bhikkhuno** ubhayavivekasampannassa, tato eva uttarim manussadhammato ratim lābhino. **Amānusi ratīti** bhāvanāratī. **Puratoti** purimabhāge. **Pacchatoti** pacchimabhāge. **Aparoti** añño. **Puratoti** vā anāgate, anāgataṃ ārabhāti attho. **Pacchatoti** atīte atītam ārabhā paṭipattiyā vibādhanato. **Paroti** kodho cittapaṭidussanatāya. Na paroti **aparo**, lobho, so **ce na vijjati**. Etena anāgatappajjapanāya atītānusocanāya ca abhāvam dasseti. **Atīva phāsu bhavatīti** nīvaraṇajetṭhakassa kāmacchandassa vigamena vikkhambhitanīvaraṇassa jhānassa vasena ativiya phāsuvihāro hoti. **Ekassa vasato vaneti** taṇhādutiyikābhāvena ekassa araññe vivekavāsam vasato. **Sesam tādisamevāti** sesamettha yam vattabam, tam paṭhamagāthāyam vuttasadisameva.

Saṇamānasuttavaṇṇanā niṭṭhitā.

## 6. Niddātandīsuttavaṇṇanā

16. Pacchime māse pacchābhattaṃ piṇḍapātappaṭikkanto catugguṇaṃ saṅghāṭiṃ paññāpetvā dakkhiṇena passena sato sampajānoti ettakaṃ pāṭhaṃ saṅkhipitvā “**niddaṃ okkamitā**”ti vuttaṃ. Kiriyaṃayacittehi avomisso bhavaṅgasoto **abyākataniddā**. Sā hi khīṇāsavānaṃ uppajjanārahā, tassā pubbhāgāparabhāgesu...pe... uppannaṃ thinamiddhaṃ idhādhippetā niddā, sā akhīṇāsavānaṃ yebhuyyena aniyatakālā, tabbidhuraniyatasabbhāvaṃ dassento “**aticchāta...pe... āgantukaṃ ālasiya**”nti āha. Kāyālasīyapaccayā vīriyassa paṭipakkhabhūtā cattāro akusalakkhandhā **tandī** nāma. **Tandī**ti sabhāvaniddeso. **Tandiyaṇāti** ākāraṇimiddeso. **Tandīmanatāti** tandībhūtacittatā. **Ālasyanti** alasabhāvāharaṇaṃ. **Ālasyāyitanti** alasabhāvappatti. **Kāyavijambhanāti** kāyassa vināmanaṃ. **Akusalapakkhā ukkaṇṭhitatāti** akusalapakkhiyā anabhīrati. **Bhattakilamathoti** yathāvuttassa bhattavatthukassa āhārassa vasena sarīre uppajjanakakhedo. **Upakkiliṭṭhoti** paññāya dubbalīkaraṇena upakkiliṭṭhacitto. Cittassa asamāhitatā **nivāritapātubhāvo**. Ariyamaggassa jotanaṃ nāma uppajjanamevāti āha “**na jotati, na pātubhavatīti attho**”ti. Na hi ariyamaggo jotiajotināmo pavattati.

**Maggasahajātavīriyenāti** lokiyalokuttaramaggasahajātavīriyena. Missakamaggo hi idha adhippeto. **Nīharitvāti** nīharaṇahetu. Hetuattho hi ayaṃ **tvā**-saddo “paññāya cassa disvā”tiādīsu (ma. ni. 1.271) viya. Tena “maggo visujjhatī”ti vacanaṃ samatthitaṃ hoti. “Ariyamaggaṃ visujjhatī”ti keci paṭhanti.

Niddātandīsuttavaṇṇanā niṭṭhitā.

## 7. Dukkarasuttavaṇṇanā

17. Dukkhaṃ titikkhanti **duttitikkhaṃ**. Tañca dukkhaṃ dussahaṇaṃ ārambhavasena dukkaraṃ, anuyuñjanavasena duttitikkhanti. **Abyattenāti** sāmāññaṃ upakāraṇupakāre dhamme jānanaṃ samatthāya veyyattiyasaṅkhātāya paññāya abhāvato na byattena. Tenāha “**bālenā**”ti. Yasmiṃ dhamme sati samaṇoti vuccati, taṃ sāmāññaṃ āha “**samaṇadhammo**”ti. **Imināti** “dukkaraṃ duttitikkhaṃ, abyattena ca sāmāññaṃ”nti iminā gāthaddhena **idaṃ dassetīti** idaṃ idāni vuccamaṇaṃ atthajātaṃ dasseti. **Abhidantanti** abhibhavanadantaṃ, uparidantanti attho. So hi itaraṃ musalaṃ viya udukkhalaṃ visesato kassaci khādanakāle abhibhuyya vattati. **Ādhāyāti** nippīlanavaseneva ṭhapetvā. **Tālup āhaccāti** tālupadesamāhanitvā viya. **Cetasāti** kusalacittena. **Cittanti** akusalacittaṃ. **Abhiniggaṇhitvāti** yathā atisamudācāro na hoti, evaṃ vibādhanavasena niggahetvā. **Āpāṇakoṭikanti** pāṇakoṭipariyosānaṃ, pariṇivanti attho. Sambādhetīti **sambādho**, antarāyiko. **Bahū parissayāti** ayoniso kāmavitakkādivasena.

Pajjati cittametthāti padaṃ, ārammaṇaṃ. Iriyāpathaṃ eva padaṃ **iriyāpathapadaṃ**.

Gīvā cattāro pādāti **gīvapañcamāni**. **Samodahanti** vā samodhānahetūti ayamettha atthoti āha – “**samodahitvā vā**”ti, sammā odhāya anto pavesetvāti attho. **Sake ārammaṇakapāleti** gocarajjhattaṃ vadati. **Samodahanti** samodahanto. **Anissitoti** tebhūmakadhammesu kañcīpi dhammaṃ taṇhādīṭṭhābhīnivesavasena anissito. **Avihimsamāno** vihiṃsānimittānaṃ pajahanena. **Ullumpanasabhāvasaṇṭhitenāti** silabyasanato uddharaṇarūpe saṇṭhitenā, karuṇāyuttenāti attho. Tenāha “**kāruṇātaṃ paṭicca**”ti.

Dukkarasuttavaṇṇanā niṭṭhitā.

## 8. Hirīsuttavaṇṇanā

18. **Nisedhetīti** nivāreti pavattitūṃ na deti. **Pucchati** devatā. **Apaharantoti** apanento, yathā sabbena sabbaṃ akkosavatthu na hoti, evaṃ pariharantoti attho. **Bujjhati** sārathividhaṃ. **Attani**



**nipātaṃ na deti**, ājānīyo hi yuttaṃ pajānāti. Abhūtena **abhūtakkosena parimutto nāma natthi** bālānañca janānaṃ parāpavāde yuttapayuttabhāvato. Tenāha bhagavā –

“Nindanti tuṅhimāsīnaṃ, nindanti bahubhāṇinaṃ;  
Mitabhāṇimpi nindanti, natthi loke anindito”ti. (dha. pa. 227);

**Tanuyāti** vā katipayā. Tenāha “**appakā**”ti. **Sadā satāti** hirinisedhabhāve kāraṇavacanaṃ. **Pappuyāti** patvā adhigantvā. Vānato nikkhantattā **nibbānaṃ**, asaṅkhatadhātu.

Hirīsuttavaṇṇanā niṭṭhitā.

## 9. Kuṭikāsuttavaṇṇanā

**19. Antoti** kucchiabbhantare. **Vasanaṭṭhānaṭṭhenāti** vasanabhāvena. **Kulapaveṇinti** kulācāraṃ kulatantiṃ. **Santānakatṭhenāti** kulasantatiyā bandhanabhāvena. Evaṃ sabbapadehi pucchitatthassa anujānanaśasena “**ekamsavacane nipāto**”ti vuttaṃ. Āpādikā posikā mātucchā mahāpajāpati mātā evāti katvā “**pahāya pabbajitattā**”ti avisesato vuttaṃ. Pahāya pabbajitattā natthīti ānetvā sambandho. Puna mātukucchivāsādīnaṃ abhāvavacaneneva vaṭṭamhi bandhanassa abhāvo dīpito hotīti na gahito. Ayaṃ kira devatā yathā puthujjanā buddhānaṃ guṇe na jānanti, evaṃ na jānāti, tasmā “**mayā sannāhaṃ bandhitvā**”tiādīmāha.

Kuṭikāsuttavaṇṇanā niṭṭhitā.

## 10. Samiddhisuttavaṇṇanā

**20. Tapanabhāvena** tapanodakattā **tapodāti** tassa rahadassa nāmaṃ. Tenāha “**tattodakassa rahadassā**”ti. **Tatoti** nāgabhave udkarahadato tapodā nāma nadī sandati. Sā hi nadī bhūmitalaṃ ārohati. “Edisā jātā”ti vacanaseso. **Petalokoti** lohakumbhinirayā idhādhippetāti vadanti. Rahadassa pana ādito pabbatapādanantaresu bahū petā viharanti, svāyamattho **petavatthupāḷiyā lakkaṇasaṃyuttena** ca dīpetabbo. **Yatāyanti** yato rahadato ayaṃ. **Sātodakoti** madhurodako. **Setodakoti** parisuddhodako, anāvilodakoti attho. **Tatoti** tapodānadito.

**Samiddhoti** avayavānaṃ sampuṇṇatāya saṃsiddhiyāva sammā iddho. Tenāha “**abhirūpo**”tiādi. Padhāne sammasanadhamme niyutto, taṃ vā ettha atthīti **padhāniko**. Senāsanam suṭṭhapitadvāravātapānaṃ, tesam pidahanena **utum gāhāpetvā**.

**Pubbāpayamānoti** nhānato pubbabhāge viya vodakabhāvaṃ āpajjamāno gamento. Avattaṃ paṭikkhipitvā vattaṃ dassetuṃ “**tattha...pe... na otaritabba**”nti paṭhamam vuttaṃ. **Sabbadisāpalokanaṃ** yathā nhāyanaṭṭhānassa manussehi vivittabhāvajānanattham. **Khāṇuādivavatthāpanam** cīvarādīnaṃ ṭhapanattham udakasamīpeti adhippāyo. **Ukkāsanam** amanussānaṃ apagamanattham. **Avakujjaṭṭhānam** taṅkhaṇepi uparimakāyassa ujukaṃ avivaṭakaraṇattham. **Cīvarapiṭṭheya**va ṭhapetabbam yattha vā tattha vā aṭṭhapetvā. **Udakanteti** udakasamīpe. **Sinnaṭṭhānanti** sedagatapadeso. **Pasāretabbam** tassa sukkhāpanattham. **Samharitvā ṭhapanam** puna sukkena gahetvā nivāsanattham. **Nāhippamāṇamattam otaraṇam** tāvatā udakapaṭicchādīlakkaṇappattato. **Vicim anuṭṭhāpententi**ādi saṃyatakāritādassanaṃ. **Nivāsanam parikkhipitvā**ti antaravāsakaṃ kaṭippadesassa yathā parito hoti, evaṃ khipitvā parivasitvā.

**Sarīravaṇṇopi vippasīdi** sammadeva bhāvanānussatimpi vindantassāti adhippāyo. **Samanaṃ niggaḥetunti** kilesavaśam gataṃ attano cittaṃ niggaṇhituṃ. **Kāmūpanīti**ti kāmam upagatacittā. Atha vā kilesakāmena there upanītacittā.

**Aparibhuñjivā**ti ananubhotvā. Anubhavitabbanti atthato āpannamevāti āha “**pañcakāmaguṇe**”ti. **Bhikkhasī**ti yācasi. Tañca bhikkhācariyavasenāti āha “**piṇḍāya carasī**”ti. Kāmaparibhogagarugamanakālo nāma visesato paṭhamayobbanāvattḥāti āha “**daharayobbanakālo**”ti. **Obhaggenā**ti majjhe saṃbhaggakāyena. Jiṇṇakāle hi sattānaṃ kaṭiyāṃ kāyo obhaggo hoti.

**Voti** nipātamattāṃ “ye hi vo ariyā”tiādīsu viya. **Sattānanti** sāmāññavacanāṃ, na manussānaṃ eva. **Dehanikkhepananti** kaḷevaratṭhapitatṭhānaṃ. Natthi etesaṃ nimittanti **animittā**, “ettakaṃ ayaṃ jīvati”tiādīnaṃ sañjānananimittarahitāti attho. **Na nāyareti** na ñāyanti. **Ito paranti** ettha **paranti** aññaṃ kālaṃ. Tena orakālassapi saṅgaho siddho hoti. Paramāyuno orakāle eva cettha paranti adhippetāṃ tato paraṃ sattānaṃ jīvitassa abhāvato. **Vavatthānābhāvato**ti kālavasena vavatthānābhāvato. **Vavatthānanti** cettha paricchedo veditabbo, na asaṅkarato vavatthānaṃ, nicchayo vā. **Abbudapesī**tiādīsu abbudakālo pesikālotiādīnaṃ kāla-saddo paccekaṃ yojetabbo. **Kāloti** idha pubbañhādivelā adhippetā. Tenāha **pubbañhepi** hītiādi. Idheva dehena patitabbanti sambandho. **Anekappakāratoti** nagare jātānaṃ gāme, gāme jātānaṃ nagare, vane jātānaṃ janapade, janapade jātānaṃ vanetiādīnaṃ anekappakāratō. **Ito cutenā**ti ito gatito cutena. **Idha** imissaṃ gatiyaṃ. **Yante yuttagoṇo viyā**ti yathā yante yuttagoṇo yantaṃ nātivattati, evaṃ kālo gatipañcakanti evaṃ upamāsaṃsandanaṃ veditabbaṃ.

**Ayaṃ kāloti** ayaṃ maraṇakālo. **Pacchime kāleti** pacchime vaye. **Tisso vayosīmā**ti. Paṭhamādikā tisso vayassa sīmā atikkantena. Purimānaṃ hi dvinnaṃ vayānaṃ sabbaso sīmā atikkamitvā pacchimassa ādisīmaṃ atikkanto tathā vutto. “**Ayañhi samaṇadhammo...pe... na sakkā kātu**”nti vatvā tamatthaṃ vitthārato dassetuṃ “**tadā hī**”tiādi vuttaṃ. **Gaṇhitunti** pālito atthato ca hadaye ṭhapanavasena gaṇhituṃ. **Paribhuñjunt**ti vuttadhammapariharaṇasukhaṃ anubhavituṃ. Ekassa kathanato paṭhamāṃ gāthaṃ suttaṃ vā ussāreti, tasmim̐ niṭṭhite itaro dhammakathiko taṃyeva vitthārento dhammaṃ katheti, ayaṃ **sarabhañnadhammakathā**. Suttageyyānusārena yāva pariyosānā ussāraṇaṃ **sarabhañnadhammakathā**. “**Mā maṃ kālo upaccagā**”ti vadanto “samaṇadhammassa karaṇassa ayaṃ me kālo”ti katheti, tato paro “pacchimavayo añño kālo”ti katheti. “**Kālaṃ vohaṃ...pe... tasmā abhutvā bhikkhāmī**”ti vadanto attanā kataṃ paṭipattiñca sahetukaṃ sānisamsaṃ katheti.

**Taṃ** gāravakāraṇaṃ sandhāya. **Etanti** “atha kho sā devatā pathaviyaṃ paṭiṭṭhahitvā”ti etaṃ vuttaṃ. **Daharo tvantiādīmāha** lobhābhībhūtatāya adhigatattā. **Sabbasampattiyuttoti** bhogasampadā parivārasampadāti sabbasampattīhi yutto. **Alaṅkāraparihāranti** alaṅkāraṇaṃ. **Anikkīlītāvī**ti akīlītapubbo. Kīḷanañcettaṃ kāmānaṃ paribhogoti āha “**abhuttāvī**”ti. **Akatakāmakīloti** akatakāmānubhavanappayogo. Sayāṃ attanā eva dissantīti sandiṭṭhā, sandiṭṭhā **eva sandiṭṭhikā**, attapaccakkhato sandiṭṭhikā. Pakaṭṭho kālo patto etesanti kālīkā, te **kālike**.

**Cittānantaranti** icchiticittānantaraṃ, icchiticchitārammaṇākāreti attho. Tenevāha “**cittānantaraṃ icchiticchitārammaṇānubhavanaṃ na sampajjati**”tiādi. **Cittānantaraṃ laddhabbatāyā**ti anantaritasamādhicittānantaraṃ laddhabbaphalatāya. **Samohitesupī**ti sambhatesupī. **Sampannakāmassā**ti samiddhakāmassa. **Cittakārā** rūpalābhena, **potthakārā** paṭimākārakā, **rūpakārā** dantarūpakaṭṭharūpa-loharūpādīkārakā. **Ādisaddena** nānarūpavesadhārīnaṃ naṭādīnaṃ saṅgaho. **Sesadvāresūti** ettha gandhabbamālākārasūpakārādayo vattabbā.

**Soti** samiddhitthero. **Samohitasampattinā**ti saṅgāhabhogūpakaraṇasampattinā. **Pattabbadukkhassā**ti kāmānaṃ āpajjanarakkhaṇavasena laddhabbassa kāyikacetāsikadukkhassa. **Upāyāsassā**ti dalhaparissamassa viratassa. “Vissātassā”ti keci. “**Paccavekkhaṇāññāpenā**”ti keci paṭhanti. Asukasmim̐ nāma kāle phalaṃ hotīti evaṃ udikkhitabbo nassa kāloti **akālo**. **Etthāti** etesu navasu lokuttaradhammesu. **Ehipassavidhinti** “ehi passā”ti evaṃ pavattavidhivacanāṃ. Upanetabboti vā upaneyyo, so eva **opaneyyiko**. **Viññūhī**ti vidūhi paṭividdhasaccehi. Te ekamsato ugghaṭṭitaññūdayo honṭīti āha “**ugghaṭṭitaññūādīhi**”ti. “Paccatta”nti etassa patiattanīti bhummavasena attho gahetabboti āha “**attani attanī**”ti.

**Sabbapadehi sambandhoti** “kathaṃ ādīnavo ettha bhiyyo, kathaṃ akāliko”tiādīnā sabbehi paccekaṃ sambandho vedītabbo.

**Navoti** taruṇo na ciravasso. Ye bhikkhunovādakalakkhaṇappattā, te sandhāya “**vīsativassato paṭṭhāya therō**”ti vuttaṃ. Idha sāsanaṃ nāma sikkhattayasāṅgahaṃ piṭakattayanti āha “**dhammena hī**”tiādi. Tattha dhammena vinayo ettha vinā daṇḍasatthehīti **dhammavinayo**. Dhammāya vinayo ettha na āmisatthanti dhammavinayo. Dhammato vinayo na adhammatoti dhammavinayo. Dhammo vā bhagavā dhammassāmī dhammakāyattā, tassa dhammasaññitassa satthu vinayo, na takkikānanti dhammavinayo. Dhamme vinayo na adhamme vinayo. Dhammo ca so yathānusiṭṭhaṃ paṭipajjamāne satte apāyesu apatamāne dhāretīti, sabbe saṃkilesato vinetīti vinayo cāti dhammavinayo. Tenāha “**ubhayampetaṃ sāsanasseva nāma**”nti.

**Dhammavinayoti** dhammena yutto vinayoti dhammavinayo ājaññaratho viya. Dhammo ca vinayo cāti vā dhammavinayo, taṃ **dhammavinayaṃ**. Dhammavinayānañhi satthubhāvavacanato dhammavinayattasaṃsiddhi dhammavinayānaṃ aññamaññaṃ viśesanato. Abhidhammepi vinayavacananti dhammavinayadvayasiddhi, desitapaññattavacanato dhammavinayasiddhi. Dhammo catudhā desito sandassana-samādāpana-samuttejana-sampahaṃsanavasena, vinayo catudhā paññatto silācārato parājītavasena. Dhammacariyā sakavisayo, vinayapaññatti buddhavisayo. Pariyāyena desito dhammo, nipariyāyena paññatto vinayo. Dhammadesanā adhippāyathappadhānā, vinayapaññatti vacanathappadhānā. Paramatthasaccappadhāno dhammo, sammutisaccappadhāno vinayo. Āsayasuddhipadhāno dhammo, payogasuddhipadhāno vinayo.

Kiriyaadvayasiddhiyā dhammavinayasiddhi. Dhammena hi anusāsanāsiddhi, vinayena ovādasiddhi. Dhammena dhammakathāsiddhi, vinayena ariyatunhībhāvasiddhi. Sāvajjadvayaparivajjanato dhammavinayasiddhi. Dhammena hi viśesato pakatisāvajjapariccāgasiddhi, vinayena paññattisāvajjapariccāgasiddhi. Gahaṭṭhapabbajitānaṃ sādharmaṇāsādhāraṇaguṇadvayasiddhi. Bahussutasutapasannadvayato pariyatti-pariyāpuṇana-dhammavihāra-vibhāgato dhammadharavinayadharavibhāgato ca dhammavinayadvayasiddhi, saraṇadvayasiddhiyā dhammavinayadvayasiddhi. Idha sattānaṃ duvidhaṃ saraṇaṃ dhammo attā ca. Tattha dhammo suciṇṇo saraṇaṃ. “Dhammo have rakkhati dhammacāri”nti (theragā. 303; jā. 1.10.102; 1.15.385) hi vuttaṃ. Sudanto attāpi saraṇaṃ “attā hi attano nātho”ti (dha. pa. 160, 380) vacanato. Tena vuttaṃ “saraṇadvayasiddhiyā dhammavinayasiddhi”ti. Tattha yatassa dhammasiddhi, yato ca vinayasiddhi, tadubhayaṃ dassento āha – “**dhammena hettha dve piṭakāni vuttāni, vinayena vinayapiṭaka**”nti. **Adhunā āgato** idāneva na cirasseva upagato.

**Mahante ṭhāne ṭhapetvāti** mahesakkhātādassanattamaṃ attano parivārena mahantaṭṭhāne ṭhapitabhāvaṃ pavedetvā. **Mahatiyāti** upasaṅkamanavandanādivacanāpajjanavasena samāciṇṇāya. Sabbehi kira nisīdantā taṃ ṭhānaṃ ṭhapetvāva nisīdanti. **Thirakaraṇavasenāti** dalhīkaraṇavasena. Ayaṃ kira devatā ñāṇasampannā mānājātikā, tasmā nāyaṃ mānaṃ appahāya mama desanaṃ paṭivijjhitaṃ sakkotīti mānaniggaṇhanattamaṃ ādito duviññeyyaṃ kathento bhagavā “akkheyyasaññino”tiādīnā tāya ñātumicchitakāmānaṃ kālikādibhāvaṃ, dhammassa ca sandiṭṭhikādibhāvaṃ vibhāvento dve gāthā abhāsi.

**Akkheyyatoti** gihilingapariyāyanāmviseśādivasena tathā tathā akkhātābato. Tenāha “**kathānaṃ vatthubhūtato**”ti. **Etesanti** sattānaṃ. **Patitṭhitāti** pavattitā āsattā. Pañcannaṃ kāmasaṅgādīnaṃ vasena āsattā hontu, itaresaṃ pana kathanti? Anitṭhaṅgatopi hi “idaṃ nu kho”tiādīnā kaṅkhatō tattha āsatto eva nāma avijahanato, tathā vikkhepagato vikkhepavattusmiṃ, anusayānaṃ pana āsattabhāve vattābameva natthi. **Maccuno yoganti**, maccubandhanaṃ, maraṇadhammatanti attho. Yasmā aparīññātavatthukā anatītamaraṇattā maccunā yathārucci payojetabbā, tattha tattha uparūpari ca khipitāya āṇāya abbhantare eva honti, tasmā vuttaṃ “**payogaṃ...pe... āgacchantī**”ti. Yasmā tebhūmakā dhammā kamaṇiyatṭhena kāmā, nesampi kālāssa laddhabbatāya kālikatā idha akkheyyavacanena

paveditā. Tenāha – “**evamimāya gāthāya kālikā kāmā kathitā**”ti. Sabbepi tebhūmakā dhammā kamanīyā, yasmā ca kālikānaṃ kāmānaṃ tathāsabhāvātā kathitā. Ayampi gāthā tadatthameva dīpetīti imāya te kathitā eva honti. Ye ca sattā pañcasu khandhesu diṭṭhitaṇḍhādivasena patiṭṭhitā “itthī, puriso, ahaṃ, mamā”ti ca abhinivisiya kāme paribhuñjanti, te maraṇaṃ nātivattanti. Evampettha kāmānaṃ kālikattho kathitoti āha “**kālikā kāmā kathitā**”ti.

**Ayaṃ nātāpariññāti** rūpārūpadhamme lakkhaṇādito ñāte katvā paricchindanapaññā. Tenāha “**evaṃ nātāṃ katvā**”tiādi. Padaṭṭhānaggahaṇeneva cettha tesam rūpārūpadhammānaṃ paccayo gahitoti paccayapariggahassapī saṅgaho daṭṭhabbo. **Tireti** tuletī vīmaṃsati. **Dvācattālīsāya ākārehīti** iminā matthakappattaṃ mahāvīpassanaṃ dasseti. Te pana ākāra visuddhimaggasaṃvaṇṇanāya vuttanayena vedītabbā. “Aniccānupassanāya nīccasaññaṃ pajahatī”tiādinā vipassanākkhaṇepī ekadesena pahānaṃ labbhateva, anavasesato pana pahānavasena pahānapariññaṃ dassento āha “**aggamaggena ...pe... ayaṃ pahānapariññā**”ti. Tathā ca āha “**evaṃ tīhi pariññāhī**”tiādi.

**Akkhātāranti** akkhātābbaṃ, na akkheyyakaṃ. Tenāha “**kammavasena kāraka**”ntiādi. **Kārakanti** ca sādhanamāha. **Na maññatīti** vā maññaṃ nappavatteti **akkhātāranti** khīṇāsavaṃ. Atha vā **tañhi tassa na hotīti** taṃ kāraṇaṃ tassa khīṇāsavassa na hotī na vijjati, **yena** diṭṭhitaṇḍhādikāraṇena **akkheyyaṃ** khandhapañcakaṃ “tisso”ti vā “phusso”ti vā “itthī”ti vā “puriso”ti vā abhinivissa vadeyyāti evamettha attho vedītabbo. Manussanāgādīhi pūjanīyattā “yakkho”ti sabbadevānaṃ sādharmaṇavacananti devadhītāpi “yakkhī”ti vuttā. **Akkheyyanti** pahānapariññāya pahānamaggo, tassa ārammaṇabhūtaṃ nibbānampi gahitaṃ. **Na maññatīti** khīṇāsavassa assa phalappattīti āha “**navavidho lokuttaradhammo kathito**”ti.

**Visesīti** visesajātīdivasena seyyoti attho. **Tesu gahitesūti** tesu seyyamānādīsu tīsu mānesu gahitesu. Tayo seyyamānā, tayo sadisamānā, tayo hīnamānā gahitāva honti. **So puggaloti** so appahīnamaññaṇapuggalo. **Teneva mānena** hetubhūtena. **Upaḍḍhagāthāyāti** purimaddhena pana vatthukāmā vuttāti āha “**kālikā kāmā kathitā**”ti.

Vidhīyati visadisākārena ṭhapīyatīti **vidhā**, koṭṭhāso. **Kathaṃvidhanti** kathaṃ patiṭṭhitaṃ, kena pakārena pavattitanti attho. Vidahanato hīnādivasena vividhenākārena dahanato upadhāraṇato **vidhā**, māno. **Mānesūti** nimittatthe bhummaṃ, mānahetūti attho. **Na calatīti** na vedhati attano parisuddhapakatiṃ avijahanato.

**Paññā “saṅkhā”ti āgatā, paññāti** yoniso paṭisaṅkhānaṃ. **Saṅkhāyakoti** saṅkalanapaduppādanādi-piṇḍagaṇanāvasena gaṇako **papañcasaṅkhāti** mānādīpapañcabhāgā. Te te dhammā sammā yāthāvato saṅkhāyanti upatiṭṭhanti etāyāti **saṅkhā**, paññā. Ekaṃ dvetīādinā saṅkhānaṃ gaṇanaṃ paricchindananti **saṅkhā**, gaṇanā. Saṅkhāyati bhāgaso kathīyatīti **saṅkhā**, koṭṭhāso. Saṅkhānaṃ satto puggalotiādinā saññaṇapananti **saṅkhā**, rattotiādi paṇṇatti. **Khīṇāsavo jahi pajahi** rāgādīnaṃ suppahīnattā. **Navabhedam** pabhedato, saṅkhepatto **tividhamānanti** attho. **Navavidhanti** vā pāṭhe navabhedattā antarabhedavasena navavidhanti attho. Paccayavisesehi itthibhāvādivisesehi visesena mānīyati gabbho etthāti **vimānaṃ**, gabbhāsayo. **Na upagacchīti** na upagamissati. Tenāha “**anāgatatthe atītavacana**”nti. “Nājjhagā”ti hi atītaṃ “na gamissati”ti etasmiṃ atthe. **Chindi** ariyamaggasatthena. **Olokayamānā** upapattīsu. **Sattanivesanesūti** sattānaṃ upapajjaṭṭhānesu. **Lokuttaradhammeva kathesi** arahattassa paveditattā.

“Gāthāya atthaṃ kathetuṃ vaṭṭatī”ti attha-saddo āharitvā vattabbo. **Aṭṭhaṅgikamaggavasena** pīti etthāpi eseva nayo. Satisampajaññaṃ nāma kusaladhammānuyoge kāraṇanti āha “**dasakusalakammapaṭṭhāna**”nti.

**Aṭṭhaṅgikamaggavasena** ca gāthāatthavacane **ayaṃ** idāni vuccamāno vitthāra-nayo. **Tasmiṃ kira ṭhāneti** tasmiṃ kira devatāya pucchitaṃ pañhaṃ vissajjanaṭṭhāne. Devatāya ñānaparipākaṃ

oloketvā anupubbiyā kathāya saddhiṃ sāmukkaṃsikadesanā mahatī **dhammadesanā ahoṣi**. **Ñāṇaṃ pesetvā**ti sathhudesanāya anussaraṇavasena pattavisuddhipāṭipāṭipavattaṃ bhāvanāñāṇaṃ bandhitvā. **Sotāpattiphale patiṭṭhāyā**ti sathhudesanāvilāsenā attano ca paripakkañāṇattā paṭhamam phalaṃ patvā. **Evamāhā**ti evaṃ “pāpaṃ na kayirā”tiādippakārena gāthamāha. **Aṅgaṃ na hoti**, ājīvo yathā kuppamāno vācākkammantavasena kuppāti, tathā sampajjamānopīti. So vācākkammantapakkhiko, tasmā taggahaṇena **gahitova hoti**. **Vāyāmasatisamādhayo gahitā** samādhikkhandhasaṅghato. **Sammādiṭṭhisammāsaṅkappā gahitā** paññākkhandhasaṅghato. **Antadvayavivajjanaṃ gahitaṃ** sarūpenevāti adhippāyo. **Itī**tiādi nigamaṇaṃ.

Samiddhisuttavaṇṇanā niṭṭhitā.

Nandanavaggavaṇṇanā niṭṭhitā.

### 3. Sattivaggo

#### 1.Sattisuttavaṇṇanā

**21. Desanāsī**santi desanāpadesalakkhaṇavacananti adhippāyo. **Omaṭṭhoti** adhomukhaṃ katvā dinnappahāro. Iminā eva pasaṅgena pahāre vibhāgato dassetuṃ “**cattāro hī**”tiādi vuttaṃ. **Upari ṭhatvā**ti hatthiādīnaṃ upari ṭhatvā. **Adhomukhaṃ dinnappahāro**ti khaggakaravālādīnaṃ adhomukhaṃ katvā pahatapahāro. **Ummaṭṭho** vuttavipariyāyena veditabbo. Vividhappahāro **vimaṭṭho**. “**Omaṭṭho gahito**”ti vatvā tasseva gahaṇe kāraṇaṃ dassetuṃ “**so hī**”tiādi vuttaṃ. Duggandhakimiādīnaṃ vasena **antodoso**. **Mañcena saddhiṃ bandhitvā**ti yasmiṃ mañce vaṇikapuggalo nipanno, tattha taṃ subandhaṃ katvā pādaṭṭhānaṃ uddhaṃ karonteḥi sīsaṭṭhānaṃ adho kātabbaṃ. Tenāha “**adhosi**ro **kātabbo**”ti. **Paribbajeti** pavatteyya. Sā pana pavatti bhāvanāvihārena yuttāti āha “**vihareyyā**”ti.

Sallassa ubbahaṇaṃ **sallubbahaṇaṃ**. **Atthaṃ parittakaṃ gahetvā ṭhitā** upamākārassa vikkhambhanappahānassa adhippetattā. Tenāha “**punappuna**”ntiādi. **Anubandhova hoti** sati paccaye uppajjanārahato devatāya kāmarāgappahānassa jotitattā. Nanu bhagavatā anāgāmimaggena desanā niṭṭhāpetabbāti? Na, itarissā ñāṇabalānurūpadesanāya pavattetabbato. Veneyyajjhāsayaṇukulañhi dhammaṃ dhammassāmī desetīti.

Sattisuttavaṇṇanā niṭṭhitā.

#### 2. Phusatisuttavaṇṇanā

**22. Kammaṃ aphasantanti** kammaphassaṃ aphasantaṃ, kammaṃ akarontanti attho. **Vipāko na phusatī**ti vipākaphasso na phusati, vipāko na uppajjateva kāraṇassa abhāvato. Evaṃ byatirekamukhena kammavattena vipākavattam sambandhaṃ katvā atthaṃ vatvā idāni kevalaṃ kammavattavasena atthaṃ vadanto “**kammamevā**”tiādīmāha. Tattha **nākaroto kariyatī**ti kammaṃ akubbato na kayirati, anabhisandhikatakammaṃ nāma natthīti attho. Idāni tamevatthaṃ anvayato dassetuṃ “**phusantañcā**”tiādi vuttaṃ. Tattha **tatoti** phusanahetu. Sesam vuttanayameva. Vuttamevatthaṃ sakāraṇaṃ katvā pariveṭhitavasena vibhūtaṃ katvā dassetuṃ “**tasmā phusanta**”ntiādi vuttaṃ. **Dhammatā**ti kārakasseva kammavipākānubandho, nākārakassāti ayaṃ kammavipākānaṃ sabhāvo.

**Pacceti** upagacchati anubandhati. **Pāpanti** pāpakaṃ kammaṃ phalañca. Ayañca attho araññe luddakassa uyyojanāya sunakhehi parivāriyamānassa bhikkhuno bhayena rukkaṃ āruḷhassa cīvare luddassa upari patite tassa sunakhehi khāditvā mārītavatthunā dīpetabboti.

Phusatisuttavaṇṇanā niṭṭhitā.

### 3. Jaṭāsuttavaṇṇanā

23. Yena atthena taṇhā “jaṭā”ti vuttā, tamevatthaṃ dassetuṃ “**jāliniyā**”ti vuttaṃ. Sā hi aṭṭhasatatanhāvicaritapabhedā attano avayavabhūtā eva jālā etissā atthīti **jālinī**ti vuccati. Idānissā jaṭākārena pavattiṃ dassetuṃ “**sā hī**”tiādi vuttaṃ. Tattha **rūpādīsu ārammaṇesūti** tassā pavattiṭṭhānamāha rūpādichaḷārammaṇavinimuttassa taṇhāvisayassa abhāvato. **Heṭṭhupariyavasenā**ti kadāci rūpārammaṇe kadāci yāva dhammārammaṇā, kadāci dhammārammaṇe kadāci yāva rūpārammaṇāti evaṃ heṭṭhā ca upari ca pavattivasena. Desanākkamena cettha heṭṭhupariyatā veditabbā, kāmarāgādivasenapī ayamattho veditabbo. Saṅkhārānaṃ khaṇikabhāvato aparāparuppatti ettha saṃsibbananti āha “**punappunaṃ uppajjanato saṃsibbanatṭhenā**”ti. Idaṃ yena sambandhena **jaṭā viyāti jaṭāti** jaṭātaṇhānaṃ upamūpameyyatā, taṃdassanaṃ. Ayañhettha attho – yathā jālinī veḷugumbassa sākhā, tāsamaṃ sañcayādayo ca attano avayavehi saṃsibbitā vinaddhā “jaṭā”ti vuccanti, evaṃ taṇhāpi saṃsibbanasabhāvenāti.

Ime sattā “mama ida”nti pariggahitaṃ attanibbisesaṃ maññamānā abbhantarimaṃ karonti. Abbhantaraṭṭho ca anto-saddoti sakaparikkhāresu uppajjanamānāpi taṇhā “antojaṭā”ti vuttā. Pabbajitassa pattādi, gahaṭṭhassa hatthiādi **sakaparikkhāro**. Attāti bhavati ettha abhimānoti **attabhāvo**, upādānakkhandhapañcakamaṃ. Sarīranti keci. “Mama attabhāvo sundaro, asukassa viya mama attabhāvo bhaveyyā”tiādinā sakaattabhāvādīsu taṇhāya uppajjanākāro veditabbo. Attano cakkhādīni **ajjhattikāyatanāni**, attano ca paresaṅca rūpādīni **bāhirāyatanāni**, paresaṃ sabbāni vā. Saparasantatipariyāpannāni vā cakkhādīni **ajjhattikāyatanāni**, tathā rūpādīni **bāhirāyatanāni**. Parittamahaggatabhavesu pavattiyāpi taṇhāya antojaṭābahijaṭābhāvo veditabbo. Kāmahavo hi kassacipi kilesassa avikkhambhitattā katthacipi avimutto ajjhattaggahaṇassa visesapaccayoti “ajjhattaṃ anto”ti ca vuccati, tabbipariyāyato rūpārūpabhavo “bahiddhā bahī”ti ca. Tenāha bhagavā – “ajjhattasamyojano puggalo, bahiddhāsamyojano puggalo”ti (a. ni. 2.37).

Visayabhedena pavattiākārabhedena anekabhedabhinnampi taṇhaṃ jaṭābhāvasāmaññena ekanti gahetvā “**tāya evaṃ uppajjamānāya jaṭāya**”ti vuttaṃ. Sā pana pajāti vuttasattasantānapariyāpannā eva hutvā punappunaṃ taṃ jaṭentī vinandhantī pavattatīti āha “**jaṭāya jaṭitā pajā**”ti. Tathā hi paramatthato yadipi avayavabyatirekena samudāyo natthi, ekadeso pana samudāyo nāma na hotīti avayavato samudāyaṃ bhinnamaṃ katvā upamūpameyyaṃ dassento “**yathā nāma veḷujaṭādīhi...pe... saṃsibbitā**”ti āha. Imaṃ jaṭanti sambandho. Tīsu dhātūsu ekampi asesetvā saṃsibbanena **tedhātukamaṃ jaṭetvā ṭhitamaṃ**. Tenassā mahāvisayataṃ vijaṭanassa ca sudukkarabhāvamāha. **Vijaṭetuṃ ko samatthoti** iminā “vijaṭaye”ti padaṃ sattiatthaṃ, na vidhiatthanti dasseti.

Evaṃ “antojaṭā”tiādinā puṭṭho athassa bhagavā tamatthaṃ vissajjento “**sīle patitṭhāyā**”tiādimāha. Ettha **sīleti** kusalasīle. Taṃ pana pātimokkhasaṃvarādibhededu parisuddhameva icchitabbanti āha “**catupārisuddhisīle**”ti.

Narati netīti **naro**, puriso. Kāmaṃ itthīpi taṇhājaṭāvijaṭane samatthā atthi, padhānameva pana sattaṃ dassento “naro”ti āha yathā “sattā devamanussāna”nti, aṭṭhakathāyaṃ pana avibhāgena puggalapariyāyo ayanti dassetuṃ “**naroti satto**”ti vuttaṃ. Vipākabhūtāya saha paññāya bhavatīti **sapañño**. Tāya hi ādito paṭṭhāya santānavasena bahulaṃ pavattamānāya ayaṃ satto savisesaṃ sapaññoti vattabbaṃ arahati. Vipākapaññāpi hi santānavisesena bhāvanāpaññuppattiyā upanissayapaccayo hoti ahetukadvihetukānaṃ tadabhāvato. **Kammajatihetukapaṭisandhipaññāyāti** kammajāya tihetukapaṭisandhiyaṃ paññāyāti evaṃ tihetukasaddo paṭisandhisaddena sambandhitabbo, na paññāsaddena. Na hi paññā tihetukā atthi. Paṭisandhito pabhuti pavattamānā paññā “paṭisandhiyaṃ paññā”ti vuttā taṃmūlakattā, na paṭisandhikkhaṇe pavattā eva.

Cinteti ārammaṇaṃ upanijjhāyatīti **cittamaṃ**, samādhī. So hi sātisaṃyaṃ upanijjhānakicco. Na hi vitakkādayo vinā samādhinā tamatthaṃ sādheti, samādhī pana tehi vināpi sādhetīti.

Paguṇabalavabhāvāpādanena paccayehi cittaṃ, attasantānaṃ cinotītipi **cittaṃ**, samādhi. Paṭhamajjhānādivasena cittavicittatāya iddhividhādicitakaraṇena ca samādhi cittaṃ vināpi paropadesenassa citta-pariyāyo labbhateva. Aṭṭhakathāyaṃ pana citta-saddo viññāṇe niruḷhoti katvā vuttaṃ “**cittasīsenā hettha aṭṭha samāpattiyo kathitā**”ti. Yathāsabhāvaṃ pakārehi jānātīti **paññā**. Sā yadipi kusalādibhedato bahuvadhā, “bhāvaya”nti pana vacanato bhāvetabbā idhādhippetāti taṃ dassento “**paññānāmena vipassanā kathitā**”ti. Yadi kilesānaṃ pahānaṃ ātāpanaṃ, taṃ sammādiṭṭhiādīnampi attheva, ātappasaddo viya pana ātāpa-saddo vīriye eva niruḷhoti āha “**ātāpīti vīriyavā**”ti. Yathā kammaṭṭhānaṃ tāya paññāya parito harīyati pavattīyati, evaṃ sāpi tadatthaṃ yogināti āha “**pārihāriyapaññā**”ti. Abhikkamādīni sabbakiccāni sātthakasampajaññādivasena paricchijja netīti **sabbakiccapariṇāyikā**.

Yasmā puggalādhiṭṭhānena gāthā bhāsītā, tasmā puggalādhiṭṭhānameva upamaṃ dassento “yathā nāma puriso”tiādīmāha. Tattha **sunisitaṃ** suṭṭhu nisitaṃ, ativiya tikhiṇanti attho. Sattassa nisitatarabhāvakaraṇaṃ nisānasilāyaṃ, bāhubalena cassa ukkhipananti ubhayampetaṃ atthāpanaṃ katvā upamā vuttāti tadubhayaṃ upameyyaṃ dassento “**samādhisilāyaṃ sunisitaṃ...pe... paññāhatthena ukkhipivā**”ti āha. Samādhiguṇena hi paññāya tikkhabhāvo. Yathāha “samāhito yathābhūtaṃ pajānātī”ti (saṃ. ni. 3.5; 4.99; 5.1071). Vīriyañcassā upatthambhakaṃ paggaṇhanato. **Vijaṭeyyāti** vijaṭetuṃ sakkuṇeyya. Vuṭṭhānagāminivipassanāya hi vattamānāya yogāvacarō taṇhājaṭaṃ vijaṭetuṃ samattho nāma. Vijaṭanañcetta samucchadavasena pahānanti āha – “sañchindeyya sampadāleyyā”ti.

Maggakkhaṇe panesa **vijaṭeti** nāma, aggaphalakkhaṇe sabbaso **vijaṭitajaṭo** nāma. Tenāha “idāni”tiādi. Yasmā jaṭāya vijaṭanaṃ ariyamaggena, tañca kho nibbānaṃ āgamma, tasmā taṃ sandhāyāha “**jaṭāya vijaṭanokāsa**”nti. Yattha pana sā vijaṭiyati, taṃ dassetuṃ “**yattha nāmañcā**”tiādi vuttaṃ. “**Paṭighaṃ rūpasāññā cā**”ti gāthāsukhatthaṃ sānūnāsikaṃ katvā niddeśo, “paṭigharūpasāññā”ti vuttaṃ hoti. **Paṭighasaññāvasena kāmabhavo gahito** kāmabhavapariyāpannattā tāya. Pathavīkasiṇādirūpe saññā rūpasāññā. Ubhayatthāpi saññāsīsenā cittuppādasēva gahaṇaṃ. **Bhavasāñkhepenāti** bhavabhāvena sañkhipitabbatāya, bhavalakkhaṇena ekalakkhaṇattāti attho. Rūpe vā virajjanavasena ca vattuṃ sakkuṇeyyā idha **rūpasāññāti** vuttā, evampettha arūpabhavassa ca gahitatā veditabbā. “**Nāmañca rūpañcā**”ti anavasesato nāmarūpaṃ gahitanti arūpabhava-asaññābhavānampettha gahaṇaṃ siddhanti apare. **Pariyādiyanatṭhāneti** pariyādiyanakāraṇe sabbaso khepananimitte nibbāne. Tenāha “**nibbānaṃ...pe... dassito hotī**”ti.

Jaṭasuttavaṇṇanā niṭṭhitā.

#### 4. Manonivāraṇasuttavaṇṇanā

24. **Evampladdhikāti** sabbathāpi cittuppatti sadukkhā, sabbathāpi acittakabhāvo seyyo, tasmā yato kutoci cittaṃ nivāretabbanti evaṃdiṭṭhikā. **Soti** satto. **Aniyyānikakathaṃ katheti** ayoniso cittanivāraṇaṃ vadantī. **Samyatabhāvaṃ āgatanti** rāgavisevanādito sammadeva samyatabhāvaṃ otabhāvaṃ. Dhammacariyāvasena hi pavattamāne citte natthi īsakampi rāgādivisevanaṃ, na tassa sampati āyatiñca koci anattho siyā, tasmā taṃ mano sabbato anavajjavuttito na nivāretabbam. Tenāha “**dānaṃ dassāmi**”tiādi. **Yato yatoti** yato yato sāvajjavuttito ayonisomanasikārato. **Tanti** mano **nivāretabbam** anattāhahattā.

Manonivāraṇasuttavaṇṇanā niṭṭhitā.

#### 5. Arahanasuttavaṇṇanā

25. **Katāvīti** katavā, pariññādīkiccaṃ katvā niṭṭhapetvā ṭhitoti attho. Tenāha “**catūhi maggehi katakicco**”ti. Svāyamattho arahantiādisaddasannidhānato viññāyati. **Evaṃ** “ahaṃ

vadāmī”tiādiākārena **pucchati**.

**Khandhādīsu kusaloti** khandhāyatanādīsu salakkhaṇādīsu ca samūhādivasena pavattiyañca cheko yathābhūtavēdī. **Upaladdhinissitakathanti** attupaladdhinissitakathaṃ hitvā. **Vohārabhedam akaronoti** “ahaṃ paramatthaṃ jānāmī”ti lokavohāraṃ bhindanto avināsento loke lokasamaññaṃ eva nissāya “**ahaṃ, mamā**”ti vadeyya. **Khandhā bhuñjantī**tiādinā vohārabhedam, tattha ca ādīnavam dasseti.

Māno nāma diṭṭhiyā samadhuro. Tathā hi dutiyamaggādīsu sammādiṭṭhiyā pahānābhisamayassa paṭivipaccanīke paṭipattisiddhi. Tenāha “**yadi diṭṭhiyā vasena na vadati, mānavasena nu kho vadatīti cintetvā**”ti. **Vidhūpitāti** santāpitā nānagginā daḍḍhā. Te pana viddhamasitā nāma hontīti āha “**vidhamitā**”ti. Mamañkāradayo mayanti sattasantāne satī pavattanti etenāti mayo, maññanā. Mayo eva mayatāti āha “**mayatanti maññana**”nti.

Arahantasuttavaṇṇanā niṭṭhitā.

## 6. Pajjotasuttavaṇṇanā

**26. Divārattinti** na ādicco viya divā eva, na candimā viya rattim eva, atha kho divā ca rattiñca. **Tattha tathāti** yattha yattha sampajjalito, tattha tattheva padese, na ādicco viya candimā viya sakalaṃ mahādisaṃ disantarālañca. Nāṇānubhāvena uppannāloko **nāṇālokoti** vadanti. “Idaṃ dukkhaṃ ariyasaccanti pubbe me, bhikkhave, ananussutesu dhammesu cakkhuṃ udapādi nāṇaṃ udapādi paññā udapādi vijjā udapādi āloko udapādī”ti (saṃ. ni. 5.1081; mahāva. 15; paṭi. ma. 2.30) pana vacanato maggo **nāṇāloko**. “Tamo vihato, āloko uppanno”ti (ma. ni. 1.386; pārā. 12) vā vacanato vijjattayāloko **nāṇāloko**. Paṭhamābhisambodhiyaṃ viya sañjātapītivipphāro, visesato ratanaghare samantapaṭṭhānavicinane sañjātapītivasena uppannasarīrobhāso vā **pītiāloko**. Tattheva uppannapasādavasena sañjātaālokova **pasādāloko**. Dhammacakkapavattane “aññāsi vata, bho, koṇḍañño”ti uppannapasādālokoti ca vadanti. Sabbattheva satthu dhammadesanā sattānaṃ hadayatamaṃ vidhamantī **dhammakathāāloko**. **Sabbopi buddhānaṃ pātubhāvā uppanno ālokoti** iminā sāvakanānaṃ desanāya sañjātadhammālokopi buddhānubhāvoti dasseti.

Pajjotasuttavaṇṇanā niṭṭhitā.

## 7. Sarasuttavaṇṇanā

**27. Saraṇato avicchedavasena pavattanato** khandhādīnaṃ paṭipāṭi **sarā**. Tenāha “**ime saṃsārasarā**”ti. **Kutoti** kena kāraṇena, kimhi vā? Tenāha “**kiṃ āgammā**”ti? **Na paṭiṭṭhāti** paccayābhāvato. **Āpotiādinā** pāḷiyaṃ catunnaṃ mahābhūtaṃ appatiṭṭhānāpadesena tattha kāmarūpabhavānaṃ abhāvo dassito. Tadubhayābhāvadassanena heṭṭhā vuttanayeneva arūpabhavassapi abhāvo dassitova hoti, yathārutavasena vā ettha attho veditabbo. Yasmā purimā dve gahitā, gahitañca atthaṃ pariggahetvāva pacchimattho pavattoti.

Sarasuttavaṇṇanā niṭṭhitā.

## 8. Mahaddhanasuttavaṇṇanā

**28. Nidhīyatīti nidhānaṃ**. Nidhātābbaṃ gataṃ nihitanti attho. **Muttasārādīti** muttāmaṇiveḷuriyapavāḷarajatajātarūpādi. **Suvaṇṇarajatabhājanādīti ādi**-saddena kahāpaṇa-dhaññakoṭṭhabhaṇḍādiṃ saṅgaṇhāti. Tampi hi niccapariḷḷayavasena bhuñjīyatīti “**bhogo**”ti vuccati. **Aññamaññaṃ abhigijjhantīti** aññamaññaṃ santakaṃ abhigijjhanti. Tenāha “**patthenti**”ti.



**Analaṅkatā**ti na alaṃ pariyattanti evaṃ katacittā, atricchatāmahicchatāhi abhibhūtā. Tenāha “**atittā apariyattajāta**”ti. **Ussukkajātesūti** taṃtaṃkicce sañjātaussukkesu. **Nānākiccajātesūti** nānāvīdhakiccesu, sañjātanānākiccesu vā. Vaṭṭagāmikapasutena **vaṭṭasotaṃ anūsarantesu**. Taṇhānivāsātāya gehantipi agārantipi vuccatīti āha “**mātugāmena saddhiṃ geha**”nti. **Virājiyāti** hetuatthadīpakāṃ padantī āha “**virājetvā**”ti, **tvā-saddopi** cāyaṃ hetuatthoti.

Mahaddhanasuttavaṇṇanā niṭṭhitā.

## 9. Catucakkasuttavaṇṇanā

**29.** Iriyā vuccati kāyena kattabbakiriya, tassā pavattiṭṭhānabhāvato **iriyāpatho**, gamanādi. Taṃ aparāparappavattiyā cakkāṃ. Tenāha “**catucakkanti catuiriyāpatha**”nti. **Navadvāranti** karajakāyo adhippeto. So ca kesādiasuciparipūroti āha “**puṇṇanti asucipūra**”nti. **Taṇhāya saṃyuttanti** taṇhāsahitaṃ. Tena na kevalaṃ sabhāvato **eva**, atha kho nissitadhammo ca asuciṃ dasseti. Mātukucchisaṅkhāte asucipaṅke jātattā **paṅkajātaṃ**, kesādiasucipaṅkajātattā ca **paṅkajātaṃ**. **Yātrāti** apagamo. Tena sabhāvato nissitadhammato ca asucisabhāvato kāyato kathaṃ apagamo siyāti pucchati. Tenāha “**etassā**”tiādi.

Nahanaṭṭhena bandhanaṭṭhena naddhīti upanāho idhādhippetoti āha “**naddhīti upanāha**”nti. So pana ito pubbakāle kodhoti āha “**pubbakāle**”tiādi. **Pāliniddiṭṭheti** upanāhaiccadīke idha pāliyaṃ niddiṭṭhe **kilese ṭhapetvā avasesā** diṭṭhivicikicchādayo satta kilesā dummocayātāya varattā viyāti **varattāti veditabbā**. Ārammaṇaggahaṇasabhāvato **eko** evesa dhammo, pavatti-ākārabhedena pana **icchanaṭṭhena** patthanaṭṭhena **icchā, lubbhanaṭṭhena** gijjhanaṭṭhena **lobhoti** vutto. **Paṭhamuppattikāti** ekasmiṃ ārammaṇe, vāre vā paṭhamaṃ uppannā. **Aparāparuppattikoti** punappunaṃ uppajjamānako. **Aladdhapatthanā** appaṭiladdhavatthumhī āsatti lobho. **Uppāṭetvāti** sasantānato uddharitvā.

Catucakkasuttavaṇṇanā niṭṭhitā.

## 10. Eṇijaṅghasuttavaṇṇanā

**30.** **Eṇimigassa viyāti** eṇimigassa jaṅghā viya. Avayavīsambandhe hi idaṃ sāmivacanaṃ. Piṇḍimaṃsassa parito samasaṅghitattā **suvatṭitajaṅgho**. **Kisanti** thūlabhāvapaṭikkheparājotana, na suṭṭhu kisabhāvādīpanaparāti āha “**athūlaṃ samasarīra**”nti. **Ātapena milātanti** tapasā milātakāyaṃ indriyasantāpanabhāvato. Tenevāha – “**tapo milāta**”ntiādi, tathā cāha pāliyaṃ “**appāhāraṃ alolupa**”nti. Yathā “**vīrassa bhāvo vīriya**”nti vīrabhāvena vīriyaṃ lakkhīyati, evaṃ vīriyasambhavana vīrabhāvoti āha “**vīranti vīriyavanta**”nti. “**Cattāro pañca ālope, abhutvā udakaṃ pive**”ti (theragā. 983; mī. pa. 6.5.10) dhammasenāpativuttaniyāmena parimitabhojitāya appāhāratā **bhojane mattaññutā**. “**Mitāhāra**”nti vatvā puna paricchinnakālabhojitāyapi appāhāratāṃ dassento “**vikāla...pe... parittāhāra**”nti āha. **Catūsu paccayesu loluppavirahitaṃ** bodhimūle **eva** sabbaso loluppassa pahīnattā. “**Catūsu paccayesu**”ti hi imināva sabbattha loluppavigamo dīpitovāti. **Rasataṇhāpaṭikkhepo vā esa** “**appāhāra**”nti vatvā “**alolupa**”nti vuttattā. “**Sīhaṃ vā**”ti ettha ekacarasaddo viya iva-saddo atthato “**nāga**”nti etthāpi ānetvā, sambandhitabboti āha – “**ekacaraṃ sīhaṃ viya, ekacaraṃ nāgaṃ viyā**”ti. **Ekacarā appamattā** ekīkatāya.

**Pañcakāmaguṇavasena rūpaṃ gahitaṃ** tesāṃ rūpasabhāvattā. **Manena nāmaṃ gahitaṃ** manassa nāmasabhāvattā. **Avinibhuttadhammeti** avinābhāvadhamme gahetvā. **Ādi-saddena** āyatanadhātuādayo gahitā. Kāmaguṇaggahaṇena hettha rūpabhāvasāmañña pañca vatthūni gahitāneva honti, manogahaṇena dhammāyatanāṃ, evaṃ dvādasāyatanāni gahitāni honti. Iminā nayena dhātuādīnampi gahitā yojetabbā. Tenāha “**pañcakkhandhādivasenapettha bhummaṃ yojetabba**”nti. **Etthāti** pāliyaṃ. Kāma vatthū **bhummaṃ**.

Enijaṅghasuttavaṇṇanā niṭṭhitā.

Sattivaggavaṇṇanā niṭṭhitā.

#### 4. Satullapakāyikavaggo

##### 1. Sabbhisuttavaṇṇanā

31. Sataṃ sādḥūnaṃ saraṇagamanasīlādibhedassa dhammassa ullapanato, attano vā pubbenivāsānussatiyā tassa dhammassa ullapanato kathanato satullapā, devatā, tāsāṃ kāyo samūho, tattha bhavāti **satullapakāyikā**. Tenāha “**sataṃ dhamma**”ntiādi. **Samādānavasena ullapetvā**, na vaṇṇanākathanamattena **tatrāti** tasmim tāsāṃ devatānaṃ satullapakāyikabhāve. **Idaṃ vatthūti** idaṃ kāraṇaṃ. **Samuddavāṇijāti** saṃyattikā. **Khittasaravegenāti** jiyāmuttasarasadisavegena, sīghaoghenāti attho. Uppatati uppāto. Uppāte bhavaṃ byasanaṃ **uppātikaṃ**. **Patiṭṭhāti** hitapatiṭṭhā. Paraloke hitasukhāvahaṃ **abhayakāraṇaṃ**. **Jaṅghasatanti** manussasataṃ. Jaṅghāsīsena hi manusse vadati sahaāribhāvato. **Aggahesi** pañcasīlāni. Āsannānāsannesu āsannasseva paṭhamaṃ vipaccanato “**āsannakāle gahitasīlaṃ nissāyā**”ti vuttaṃ. **Ghaṭṭavasenāti** samūhavasena.

**Sabbhīti** sādḥūhi. Te hi saparahitasādhanato pāsamsatāya santaguṇatāya ca santoti vuccati. Te pana yasmā paṇḍitalakkhaṇehi samannāgatā honti, tasmā “**paṇḍitehi**”ti āha. **Samāsethāti** saṃvasethāti ayamettha adhippāyoti āha “**sabbairiyāpathe**”tiādi. **Mittasanthavanti** mettisandhānaṃ. Sattānaṃ hitesitālakkhaṇā hi metti, sā ca nīṇasahitā nīṇapubbaṅgamāvāti mittasanthavo asaṃkiliṭṭho, itaro saṃkiliṭṭhoti āha “**na kenaci saddhiṃ kātabbo**”ti. **Saddhammanti** diṭṭhadhammikādihitāvahaṃ sundaradhammaṃ. **Seyyoti** hitavaḍḍhanatādi vuttanti āha “**vaḍḍhi**”ti.

**Sataṃ** sādḥūnaṃ, paṇḍitānanti ayamettha attho. Tappaṭṭiyogavisayattā añña-saddassa vuttaṃ “**aññato andhabālati**”ti. Sokanimittaṃ sokakāraṇaṃ uttarapadalopena idha sokasaddena gahitanti āha “**sokavatthūna**”ntiādi. **Sokavatthūni** nāma corādayo acchindanādivasena paresaṃ sokakaraṇato. **Sokānugatā** sokappattā.

**Therassāti** saṃkiccattherassa. Attano bhaginiyā jeṭṭhattā “**tumhe**”ti āha. Ayaṃ “idha corā paṭipajjimsū”ti amhe tiṇāyapi na maññatīti cintetvā **ekacce** “**mārema na**”nti **āhaṃsu**. Karuṇāya **ekacce** “**vissajjemā**”ti āhaṃsu. **Mantetvāti** bhāsetvā.

**Ahu** ahosi, bhūtapubbanti attho. **Araññasmiṃ brahāvaneti** tādise brahāvane, mahāraññe nivāsīti attho **cetoti** byādho. **Kūṭānīti** vākurādayo. **Oḍḍetvāti** sajjetvā. **Sasakanti** pelakaṃ **ubbiggāti** bhītatasiṭā. **Ekarattinti** ekaratteneva. **Dhanajānīti** paribbayavasena addhikehi laddhabbadhanato hāni, “samaṇampi nāma hanti, kiṃ amhesu lajjissatī”ti addhikānaṃ anāgamanato ekadivasaṃ laddhabbaparibbayampi na labhissantīti adhippāyo.

**Ñātayopi** mātāpitubhātubhaginiādi ke nātake. Te kira adhimuttassa bhaginiyā santikaṃ upagacchantā antarāmagge tena samāgatā, adhimutto saccavācaṃ anurakkhanto corabhayaṃ tesāṃ nārocesi. Tena vuttaṃ “**tesampi**”tiādi. Taṃ nissāya pabbajitattā “**adhimuttasāmaṇerassa santike**”ti vuttaṃ, na upasampadācariyo hutvā. Tenāha “**attano antevāsike katvā**”ti. Saccānurakkhaṇena anuttaraguṇādhiḡamena ca **ñātimajjhe virocati**.

**Sātātanti** satataṃ. Sa-saddassa hi idha sābhāvo yathā “**sārāgo**”tiādīsu. Sātabhāvo vā **sātātanti** āha “**sukhaṃ vā**”ti. **Kāraṇenāti** tena tena kāraṇena. Sabbāsaṃ tāsāṃ vacanaṃ subhāsitaṃ, bhagavato pana ukkaṃsagataṃ subhāsītaṃ. Svāyamattho taṃtaṃgāthāpadeneva viññāyatīti taṃ nīharitvā dassetuṃ “**na kevala**”ntiādi vuttaṃ. Tena sappurisūpasamaṃsevasaddhammābhiyogo yathā sattānaṃ vaḍḍhiyā

paññāpaṭilābhassa ekantikam kāraṇam, evam sokapaccaye sati visokabhāvassa, ñātimajjhe sobhāya, sugatigamanassa, ciraṃ sukhaṭṭhānassa, vaṭṭadukkhamicānassapi aññāsādhāraṇam hotīti vuttamevāti daṭṭhabbam.

Sabbhisuttavaṇṇanā niṭṭhitā.

## 2. Maccharisuttavaṇṇanā

32. Pamajjanākārena pavattā anupaladdhi **pamādo**. Tena ekantato satirahitā hontīti vuttam “**sativippavāsalakkaṇenā**”ti. Diṭṭhivicikicchādayo cettha pamādeneva saṅgahitā. Idāni yathā macchariyanimittaṇca pamādanimittaṇca dānaṃ na dīyati, taṃ dassetuṃ “**ekacco hī**”tiādi vuttam. **Parikkhayam gamissatīti** bhogaparihāniṃ gamissati. **Khiḍḍādīti ādi**-saddena maṇḍanavibhūsanachaṇanakkhattakiccabyasanādīṃ saṅgaṇhāti. **Yasadāyakanti** kittiyasassa parivārayasassa ca dāyakam. **Sirīdāyakanti** sobhaggadāyakam. **Sampattidāyakanti** kulabhogarūpabhogasampadāhi sampattidāyakam. **Puññanti** vā idha puññaphalam daṭṭhabbam “evamidaṃ puññaṃ pavaḍḍhatī”tiādīsu (dī. ni. 3.80) viya. **Atthi dānassa phalanti** ettha deyyadhammassa anavaṭṭhitataṃ bahulasādhāraṇataṃ, taṃ pahāya gamanīyataṃ, tabbisayāya pītiyā sāvajjataṃ, dānadhammassa anaññāsādhāraṇataṃ anugāmikataṃ, tabbisayāya pītiyā anavajjataṃ, lobhādīpāpadhammānaṃ vinodanaṃ, sesapuññaṃ upanissayaṇca jānantenāti vattabbam.

**Tamyeva bālanti** yo maccharī, tameva. Adānasīlā **bālā**. Ekacco dhanassa paribhogaparikkhayabhayena attanāpi na paribhuñjati atilobhaseṭṭhi viyāti āha “**idhalokaparalokesū**”ti.

Yasmā ekacco adānasīlo puriso addhike disvā passantopi na passati, tesam katham suṇantopi na suṇoti, sayam kiñci na katheti, adātukamyatāthambhe baddho hoti, tasmā tattha mataliṅgāni upalabbhantiyevāti āha “**adānasīlatāya maraṇena matesū**”ti. Aṭṭhakathāyaṃ pana dānamattameva gahetvā matenassa samataṃ dassetuṃ “**yathā hī**”tiādi vuttam. Dānasīlassa pana amataliṅgāni vuttavipariyāyato veditabbāni. **Vajanti** puthutte ekavacanaṃ, tasmā vacanavipallāsenā vuttanti āha “**saha vajantā**”ti. Dānasīlādīdhammo purātano, na ajjatanoti sanantano, so etesu atthīti **sanantanā**, paṇḍitā, tesam dhammāti tesam vasenapi dhammo **sanantanoti** āha “**sanantanānaṃ vā paṇḍitānaṃ esa dhammo**”ti. **Appasmimpi deyyadhamme** sati **eke** dānaṃ dadanti, **eke** na dadanti maccharibhāvā. **Sahassadānasadisāti** ekāpi dakkhiṇā pariccāgacetanāya uḷārabhāvato sahasadānasadisā hoti.

**Duranugamanoti** asamaṅginā anugantuṃ dukkaro. Ananugamanañcassa dhammassa apūraṇamevāti āha “**duppūro**”ti. “Dhammaṃ care”ti ayam dhammacariyā gahaṭṭhassa vasena āradhāti āha “**dasakusalakammaphadhammaṃ caratī**”ti. Tenāha “**dāraṇca posa**”nti. **Samuñjakanti** kassakehi attanā kātabbam katvā viṣaṭṭhadhaññakaraṇato khale uñchācariyavasena samuñjaniādinā chaḍḍitadhaññasamharaṇam. Tenāha “**yo api...pe... samuñjakam caratī**”ti. **Etenāti** satahassasahassayāgiggahaṇena dasannampi bhikkhukoṭīnaṃ piṇḍapāto dassito hoti. “Dinno”ti padaṃ ānetvā yojanā. **Dasannaṃ vā kahāpaṇakoṭīnaṃ piṇḍapātoti** dasannaṃ kahāpaṇakoṭīnaṃ viniyuñjanavasena sampāditapiṇḍapāto. Tayidaṃ satahassam sahasayāgīnaṃ dānaṃ ettakam hotīti katvā vuttam. **Samuñjakam carantopīti** samuñjakam caritvāpi, samuñjakacaraṇahetūti attho. Sesapadadvayepi eseva nayo. Dāraṃ posentopi dhammaṃ carati, appakasmim dadantopi dhammaṃ caratīti yojanā. **Tathāvidhassāti** tādisassa tathādhammacārino yā dhammacariyā, tassā kalampi nagghanti **ete sahasayāgino** attano sahasayāgītāya. **Yam tena daliddenāti**di tasevatthassa vivaraṇam. **Sabbesampi tesanti** “sataṃsahassānaṃ sahasayāgīna”nti vuttānaṃ tesam sabbesampi. **Itaresanti** “tathāvidhassā”ti vuttapurisato aññesaṃ. **Dasakoṭīsaḥassadānanti** dasakoṭīsaṅkhātaṃ tato anekasahassabhedatāya sahasadānaṃ.

“Kalam nagghatī”ti idaṃ tesam dānato imassa dānassa uḷāratārabhāvena vipulatarabhāvena

vipulataraphalatāya vuttanti āha “**kathaṃ nu kho etaṃ mahapphalataranti jānanattha**”nti. Paccayavisesena mahattaṃ gatoti **mahaggato**, uḷāroti attho. Tenāha “**vipulassetam vevacana**”nti. **Samenāti** ñāyena, dhammenāti attho. **Visameti** na same macchariyalakkhaṇappatte. **Chetvāti** pīletvā. Taṃ pana pīlanam pothananti dassento “**pothetvā**”ti āha. **Assumukhāti** tintaassumukhasammissā param rodāpetvā. **Mahādānanti** yathāvuttaṃ bahudeyyadhammassa pariccajanena mahantadānaṃ. **Uppattiyā aparisuddhatāyāti** ajjhāsayaassa deyyadhammagavesanāya ca suddhatāya malīnattā. **Itaram** dhammacariyāya nibbattitadānaṃ. **Parittadānanti** parittassa deyyadhammassa vasena parittadānaṃ. **Attano uppattiyā parisuddhatāyāti** ajjhāsayaassa deyyadhammagavesanāya ca visuddhatāya. **Evantiādimāhāti** “evaṃ sahasānaṃ sahasayāgina”nti avoca. Tattha **sahassānanti** satamsahasānaṃ. Gāthābandhasukhatthaṃ sataggaṇaṃ na kataṃ. Sesam vuttanayameva.

Maccharisuttavaṇṇanā niṭṭhitā.

### 3. Sādhusuttavaṇṇanā

**33. Udānaṃ udānesīti** pītivegena uggiritabbaṭṭāya udānaṃ uggiri uccāresi. Tayidaṃ yasmā pītisamuṭṭhāpitaṃ vacanaṃ, tasmā vuttaṃ “**udāhāraṃ udāharī**”ti. Yathā pana taṃ vacanaṃ “udāna”nti vuccati, taṃ dassetuṃ “**yathā hi**”tiādi vuttaṃ. **Saddhāyāti** ettha **ya-kāro** hetuattho. Pariccāgacetaṇāya hi saddhā visesapaccayo assaddhassa tadabhāvato. **Pi-saddo** vuttatthasampiṇḍanatto. “**Sāhū**”ti padaṃ sādhusaddena samānatthaṃ daṭṭhabbaṃ. **Kathanti** dānayuddhānaṃ vipakkhasabhāvāti adhippāyo. **Etaṃ ubhayanti** dānaṃ yuddhanti idaṃ dvayaṃ. **Jīvitabhīrukoti** jīvitavināsabhīruko. **Khayabhīrukoti** bhogakkhayaassa bhīruko. **Vadantoti** jīvite sālayataṃ, tato eva yujjhane asamatthataṃ pavedento. **Chejjanti** hatthapādādichedo. **Ussahantoti** vīriyaṃ karonto. **Evaṃ bhoge rakkhissāmīti** tathā bhoge aparikkhīṇe karissāmīti. **Vadantoti** idha bhogesu lobhaṃ, tato eva dātuṃ asamatthataṃ pavedento. **Evanti** evaṃ jīvitabhoganirapekkhatāya dānaṃca yuddhaṃca samaṃ hoti. **Saddhādisampannoti** saddhādhammajīvitāvīmaṃsāsīlādiguṇasamannāgato. So hi deyyavatthuno parittakattā appakampi dadanto attano pana cittasampattiyā khettsampattiyā ca bahuṃ uḷārapuññaṃ pavaḍḍhento bahuviddhaṃ lobha-dosa-issā-macchariya-diṭṭhivicikicchādibhedam tappaṭipakkham abhibhavati, tato eva ca taṃ mahapphalaṃ hoti mahānisamsaṃ. Aṭṭhakathāyaṃ pana “**maccheram maddati**”cveva vuttaṃ, tassa pana ujuvipaccanīkabhāvato.

**Paratthāti** paraloke. **Ekasātakabrāhmaṇavatthu** anvayavasena, ankuravatthu byatirekavasena vitthāretabbaṃ.

Dhammo laddho etenāti **dhammaladdho**, puggalo. Aggīāhitapadassa viya saddasiddhi daṭṭhabbā. “**Uṭṭhānanti** kāyikaṃ vīriyaṃ, **vīriyanti** cetasika”nti vadanti. **Uṭṭhānanti** bhoguppāde yuttapayuttatā. **Vīriyanti** tajjo ussāho. **Yamassa** āṇāpavattiṭṭhānaṃ. **Vetaraṇimpi** itare niraye ca atikkamma. Te pana abbudādīnaṃ vasena avīciṃ dasadhā katvā avasesamahāniraye sattapi āyuppanābhedenā tayo tayo katvā ekatiṃsāti vadanti. Sañjīvādinirayaṃvattanassa kammassa tikkhamajjhamudubhāvena tassa āyuppanāssa tividdhatā vibhāvetabbā. Apare pana “aṭṭha mahānirayā soḷasa ussanirayā ādīto cattāro sitaniraye ekaṃ katvā satta sitanirayāti evaṃ ekatiṃsa mahānirayā”ti vadanti. Mahānirayaggaṇaṇato ādīto cattāro sitanirayā eko nirayo katoti.

**Tesanti** vicinitvā gahitapaccayānaṃ. **Pañcanavuttipāsaṇḍabhedā** papañcasūdanisaṃvaṇṇanāyaṃ vuttanayena veditabbā. **Tatthāti** tesu dvīsu vicinanesu. **Dakkhiṇāvicinanam āha**, upamānāni hi nāma yāvadeva upameyyatthavibhāvanatthāni. Etena sukhettaggaṇaṇatopi dakkhiṇeyyavicinanam daṭṭhabbaṃ.

**Pānesu saṃyamoti** iminā dasavidhampi kusalakammamapathadhammaṃ dasseti. Yathā hi “pānesu saṃyamo”ti iminā sattānaṃ jīvitāvoropano saṃyamo vutto, evaṃ tesam sāpateyyāvahārato paradārāmasanato viśāmvādanato aññamaññābhedanato pharusavacanaṃ saṅghaṭṭanato niratthakavippalapanato parasantakābhijjhānato ucchedacintanato micchābhīnivesanato ca saṃyamo

hotīti. Tenāha “**sīlānisamsaṃ kathetumāraddhā**”ti. Pharusavacanasamyamo panettha sarūpeneva vutto.

**Parassa upavādabhayenā**ti pāpakiriyahetu parena attano vattabbaupavādabhayena. **Upavādabhayā**ti upavādabhayanimittaṃ. “Kathaṃ nu kho amhe pare na upavadeyyu”nti āsīsantā **pāpaṃ na karonti. Dhammapadamevā**ti asaṅkhatadhammakotṭhāso eva **seyyo** seṭṭho. Yasmā sabbasaṅkhatam aniccaṃ khayadhammaṃ vayadhammaṃ virāgadhammaṃ nirodhadhammaṃ, tasmā tadadhigamāya ussāho karaṇīyoti dasseti. Pubbasaddo kālavisesavisayoti āha “**pubbe ca kassapabuddhādikālepi**”tiādi. Puna akālaviseso apāṭiyekko bhummatthavisayovāti āha “**sabbepi vā**”tiādi. Tatha **sabbepi vā**ti ete sabbepi kassapabuddhādayo lokanāthā **santo nāma** vūpasantasabbakilesasantāpā santasabbhūtaguṇattā.

Sādhusuttavaṇṇanā niṭṭhitā.

#### 4. Nasantisuttavaṇṇanā

**34. Kamanīyānī**ti kantāni. Tato eva etāni **iṭṭhārammaṇāni** sukhārammaṇāni **rūpādīni**, te pana vatthukāmā, tadārammaṇakilesakāmā vā. “**Na santi kāmā manujesū**”ti desanāsīsametaṃ, nicchayena kāmā aniccāyeva. Maccu dhīyati etthāti **maccudheyyaṃ**. Na puna āgacchati ettha taṃ **apunāgamaṇaṃ**. **Apunāgamaṇasaṅkhātaṃ nibbānaṃ** anupagacchanato. **Nibbānaṃ hī**tiādi vuttassevatthassa vivaraṇaṃ. **Baddhoti** paṭibaddhacitto. **Pamattoti** vossaggapamādaṃ āpanno.

**Taṇhāchandato jātaṃ** tassa visesapaccayattā. Icchitaṃ hanatīti **aghaṃ**, dukkhaṃ. Idha pana anavasesapariyādānavasena pañcupādānakkhandhā dukkhanti. **Chandavinayā aghavinayoti** hetunirodhena hi phalanirodho, evaṃ saupādisesanibbānaṃ vatvā **aghavinayā dukkhavinayoti** anupādisesanibbānaṃ vadati.

**Citrānī**ti kilesakāmāpi vedanādiṭṭhisampayogabhedena honti, ākārabhedena ca atthi savighātāvighātāti tato visesetaṃ “**ārammaṇacittāni**”ti vuttaṃ. **Saṅkappitarāgoti** subhādivasena saṅkappitavatthumhi rāgo. **Kilesakāmo kāmoti vutto** tassevidha visesato kāmabhāvasiddhito. **Pasūrasuttena vibhāvetabbo** “na te kāmā”tiādinā tassa vatthumhi āgatattā. Idāni tamatthaṃ saṅkhepeneva vibhāvento “**pasūraparibbājako hī**”tiādimāha. **Na te kāmā yāni citrāni loketi** te ce kāmā na honti, yāni loke citrāni rūpādīārammaṇāni. **Vedesīti** kevalaṃ saṅkapparāgañca kāmaṃ katvā vadesi ce. **Hehintīti** bhaveyyunti attho. Suṇanto saddāni manoramāni, satthāpi te hehiti kāmabhogīti paccakaṃ gāthā, idha pana saṃkhipitvā dassitā. Dhīrā nāma dhitisampannāti āha “**paṇḍitā**”ti.

**Tassāti** yo pahīnakodhamāno sabbaso saṃyojanātigo nāmarūpasmiṃ asajjanto rāgādikiñcanarahito, tassa. **Mogharājā nāma thermo** bāvarībrāhmaṇassa paricārakānaṃ soḷasannaṃ aññataro. **Yathānusandhiṃ** appatto sāvasesa-**attho**, kiñci vattabbaṃ atthīti adhippāyo. Sabbaso vimuttattāva devamanussā namassanti, ye taṃ paṭipajjanti. Tesam kiṃ hoti? Kiñcipi na siyāti ayamettha atthaviseso? **Dasabalaṃ sandhāyevamāha** ukkaṭṭhaniddesena. **Anupaṭipattiyāti** paṭipattiṃ anugantvā paṭipajjanena. **Namassanti** taṃ pūjenti.

**Catusaccadhammaṃ jānitvāti** tena paṭividdhaṃ catusaccadhammaṃ paṭivijjhivā. Tathā ca buddhasubuddhatāya nibbematikā hontīti āha “**vicikicchaṃ pahāyā**”ti. Tato paraṃ pana anukkamena aggamaggādhihamena **saṅgātigāpi** honti. Asekkhadhammapāripūriyā **pasamsiyā** viññūnaṃ pasamsāpi hontīti.

Nasantisuttavaṇṇanā niṭṭhitā.

## 5. Ujjhānasaññīsuttavaṇṇanā

**35.** Ujjhānavasena pavattā saññā etesaṃ atthi, ujjhānavasena vā sañjānantīti **ujjhānasaññī**. **Kārayeti** katānaṃ pariyaṇtaṃ kārayeti attho. **Pariyantakāritanti** paricchinnakāritaṃ parimitavacananti attho. Paṃsukūlādipaṭipakkhanayena **pattuṇṇadukulādi** vuttaṃ. **Nāmaṃ gahitanti** etena “ujjhānasaññikā”ti ettha ka-saddo saññāyanti dasseti.

**Aññenākārena bhūtanti** attanā pavediyamānākārato aññena asuddhena ākārena vijjamānaṃ upalabbhamānaṃ attānaṃ. **Vañceti**vāti palambhetvā. **Tassa** kuhakassa. **Taṃ** catunnaṃ paccayānaṃ paribhuñjanaṃ. **Parijānantīti** tassa paṭipattiṃ paricchijja jānanti. **Kārakoti** sammāpaṭipattiyā kattā, sammāpaṭipajjitāti attho.

**Idanti** liṅgavipallāsesa vuttaṃ, ayanti attho. **Dhammānudhammapaṭipadāti** nibbānadhammassa anucchavikatāya anudhammabhūtā paṭipadā. Paṭipakkhavidhamane asithilatāya **dalhā**. **Bhāsitamattena ca savanamattena cāti** ettha ca-saddo visesanivatti attho. Tena bhāsitassa sutassa ca sammāpaṭipattivisesaṃ nivatteti. **Lokapariyāyanti** lokassa parividhamanaṃ uppādanirodhavasena saṅkhārānaṃ parāvuttiṃ. Tenāha “**saṅkhāralokassa udayabbaya**”nti. Svāyamattho saccapaṭivedheneva hotīti āha “**catusaccadhammañca aññāyā**”ti. **Evaṃ na kubbantīti** attani vijjamānampi guṇaṃ anāvīkaronto “yathā tumhe vadatha, evaṃ na kubbantī”ti avijjamānataṃ byākarotīti attho.

**Akārakamevāti** dosaṃ akārakameva. Accayassa paṭiggaṇhanaṃ nāma adhvāsanāṃ, evaṃ so desakena desiyamāno tato vigato nāma hoti. Tenāha “**paṭiggaṇhātūti khamatū**”ti.

**Sabhāvenāti** sabhāvato. **Ekasadisanti** paresaṃ cittācāraṃ jānantaṃpi ajānantehi saha ekasadisamaṃ karontā. **Paratoti** pacchā. **Kathāya uppannāyāti** “kassaccayā na vijjantī”tiādikathāya pavattamānāya “tathāgatassa buddhassa”tiādinaṃ **buddhabalaṃ** buddhānubhāvaṃ dīpetvā. **Khamissāmīti** accayadesanaṃ paṭiggaṇhissāmi. Tappaṭiggaho hi idha khamananti adhippetāṃ, sathā pana sabbakālaṃ khamo eva.

Kopo antare citte etassāti **kopantaro**. Doso garu garukātabbo assāti **dosagaru**. “Paṭimuccatī”ti vā pāṭho, ayameva attho. **Accāyikakammanti** sahasā anupadhāretvā kiriyā. **No cidhāti** no ce idha. **Idhāti** nipātamattaṃ. **Apagataṃ** apanītaṃ. Doso no ce siyā, tena pariyaṇtaṃ yadi aparādho nāma na bhaveyyāti. **Na sammeyyūṃ** na vūpasameyyūṃ. **Kusaloti** anavajjo.

**Dhīro satoti** padadvayena vaṭṭachindaṃ āha. **Ko niccaveva paṇḍito nāmāti atthoti** “kassaccayā”tiādikāya pucchāgāthāya attho. Dīghamajjhimasamvaṇṇanāsu tathāgata-saddo vitthārato samvaṇṇitoti āha “**evamādīhi kāraṇehi tathāgatassa**”ti. **Buddhattādīhīti ādi**-saddena “bodhetā pajāyā”tiādinaṃ (mahāni. 192; cūḷani. pārāyanatthutīgāthānidessa 97) niddese āgatakāraṇāni saṅgayhanti. **Vimokkhaṃ** vuccati ariyamaggo, tassa **anto** aggaphalaṃ, tattha bhavā **paṇṇatti**, tassā vasena. Evaṃ buddhabalaṃ dīpeti. Idāni khittaṃ saṅkhepena saṃharāpitaṃ hotīti dasseti.

Ujjhānasaññīsuttavaṇṇanā niṭṭhitā.

## 6. Saddhāsuttavaṇṇanā

**36.** **Tatvassāti** o-kārassa va-kārādesaṃ a-kārassa ca lopamaṃ katvā niddesoti āha “**tato assā**”ti. “Tatassā”ti vā pāṭho, **tatoti** ca saddhāhetūti attho. **Nānupatantīti** na vattanti. **Pamādaṃ karontīti** pamajjanti, micchā paṭipajjantīti attho. **Lakkhaṇānīti** aniccādilakkhaṇāni. **Upanijjhāyatīti** upecca ṇāṇacakkhunā pekkhati, anupassatīti attho. **Āgatakiccanti** āhatakiccaṃ, ayameva vā pāṭho. **Sādhetīti**

asammohapaṭivedhavasena nipphādeti, tathalakkhaṇaṃ nirodhasaccaṃ upanijjhāyatīti ayamattho maggepi vattabbo tena vinā asammohapaṭivedhassa asambhavato. **Kasiṇārammaṇassāti** idaṃ lakkhaṇavacanāṃ. Akasiṇārammaṇasamāpattiyopi hi santīti. Yathā ca kasiṇārammaṇāni aṭṭhannaṃ samāpattīnaṃ avasesānañca tadārammaṇānaṃ paccavekkhaṇavasena cittānaṃ, evaṃ tena tāni ārammaṇāni gahitānīti “kasiṇārammaṇassa” icceva vuttaṃ. Paramaṃ uttamaṃ sukhanti vattabbato **paramasukhaṃ arahattaṃ**.

Saddhāsuttavaṇṇanā niṭṭhitā.

## 7. Samayasuttavaṇṇanā

**37. Udānaṃ paṭiccāti** ukkākaraññā jātisambhedaparihāranimittaṃ attano vaṃsaparissuddhaṃ nissāya vuttaṃ pītiudāhāraṃ paṭicca gottavasena “**sakkā” ti laddhanāmānaṃ**. Yadi ekopi janapado, kathaṃ bahuvacananti āha “**ruḷhīsaddenā”**ti. Akkharacintikā hi īdisesu ṭhānesu yutte viya salīngavacanāni icchanti, ayamettha ruḷhī yathā “avantī kurū”ti, tabbisesane pana janapadasadde jātisaddatāya ekavacanameva. **Aropimeti** kenaci na ropime.

**Āvaraṇenāti** setunā. **Bandhāpetvāti** paṇḍupalāsapāsāṇamattikakhaṇḍādīhi āliṃ thiraṃ kārāpetvā. **Sassāni kārentīti** jeṭṭhamāse kira ghammassa balavabhāvena himavante himaṃ vilīyitvā sanditvā anukkamena rohiṇiṃ nadiṃ pavisati, taṃ bandhitvā sassāni kārenti. “**Jātiṃ ghaṭṭetvā kalahaṃ vaḍḍhayimsū”**ti saṅkhepena vuttamatthaṃ pākaṭataraṃ kātuṃ “**koliyakammakarā vadantī”**ti āha. **Niyuttaamaccānanti** tasmīṃ sassaparipālanakamme niyojitamahāmattānaṃ.

**Tīṇi jātakānīti** “kuṭṭhārihattho puriso”tiādīnā **phandanajātakaṃ** (jā. 1.13.14 ādayo) “duddubhāyati bhaddante”tiādīnā **duddubhajātakaṃ**, (jā. 1.4.85 ādayo) “vandāmi taṃ kuṇṇjarā”tiādīnā **laṭukikajātakaṃ** (jā. 1.5.39 ādayo) imāni tīṇi jātakāni. **Dve jātakānīti** –

“Sādhu sambahulā ñātī, api rukkhā araññajā;  
Vāto vahati ekaṭṭhaṃ, brahantampi vanappatī”nti. –

Ādinā **rukkhadhammajātakaṃ** (jā. 1.1.74).

“Sammodamānā gacchanti, jālamādāya pakkhino;  
Yadā te vivadissanti, tadā ehinti me vasa”nti. (jā. 1.1.33) –

Ādinā **sammodamānajātakaṃ** imāni dve jātakāni.

“Attadaṇḍā bhayaṃ jātaṃ, janaṃ passatha medhaṃ;  
Saṃvegaṃ kittayissāmi, yathā saṃvijitaṃ mayā”ti. (su. ni. 941) –

Ādinā **attadaṇḍasuttaṃ**.

**Tenāti** bhagavatā. **Kalahakaraṇabhāvoti** kalahakaraṇassa atthibhāvo. Mahāpathaviyā mahagghe khattiye kasmā nāsethāti dassetvā kalahaṃ vūpasametukāmo bhagavā pathaviṃ nidassanabhāvena gaṇhīti dassento “**pathavī nāma kiṃ agghatī”**tiādīmāha. **Aṭṭhāneti** akāraṇe. **Veram katvāti** virodhaṃ uppādetvā. Taṃtaṃpalobhanakiriyaṃ parakkamantiyo “**ukkaṇṭhantū”**ti sāsanaṃ pesenti. **Kuṇāladaheti** kuṇāladahatīre patiṭṭhāya. **Pucchitaṃ kathesi** anukkamena kuṇālasakuṇarājassa pucchāpasāṅgena **kuṇārajātakaṃ** (jā. 2.21.kuṇārajātaka) kathessāmīti. **Anabhiratiṃ vinodesi** itthīnaṃ dosadassanamukhena kāmānaṃ ādīnavokārasaṃkilesavibhāvanavasena. **Purisapurisehīti** kosajjaṃ viddhaṃsetvā purisathāmabrūhanena uttamapurisehi no bhavituṃ vaṭṭatīti uppannacittā.

**Avissatthasamaṇakammantā** apariccattakammaṭṭhānābhīyogāti attho. **Nisīditum vaṭṭatīti** bhagavā cintesīti yojanā.

**Paduminiyanti** padumavane. **Vikaṣiṃsu** guṇagaṇavibodhena. **Ayaṃ imassa...pe... na kathesīti** iminā sabbepi te bhikkhū tāvadeva paṭipāṭiyā āgatattā aññamaññassa lajjamānā attanā paṭiladdhavesesaṃ bhagavato nārocesunti dasseti. **Khīṇāsavānanti**ādinā tattha kāraṇamāha.

**Osaṭamatteti** bhagavato santikaṃ upagatamatte. **Ariyamaṇḍaleti** ariyapuggalasamūhe. **Pācīnayugandharaparikkhepatoti** yugandharapabbatassa pācīnaparikkhepato, na bāhirakehi vuccamānaudayapabbatato. **Rāmaṇeyyakadassanattanti** buddhuppādapaṭimaṇḍitattā visesato ramaṇīyassa lokassa ramaṇīyabhāvadassanattam. **Ullaṅghitvāti** uṭṭhahitvā. **Evarūpe khaṇe laye muhutteti** yathāvutte candamaṇḍalassa uṭṭhitakkhaṇe uṭṭhitavelāyaṃ uṭṭhitamuhutteti uparūparikālassa vaḍḍhitabhāvadassanattam vuttam.

Tesaṃ bhikkhūnaṃ jātiādivasena bhagavato anurūparivārabhāvaṃ dassento “**tatthā**”tiādimāha. **Mahāsammattassa vaṃse uppannoti**ādi kulavaṃsasuddhidassanaṃ. **Khattiyagabbhe jātoti** idaṃ satipi jātivisuddhiyaṃ mātāpitūnaṃ vasena avisuddhatā siyāti tesampi “avisuddhatā natthi imesa”nti visuddhidassanattam vuttam. Satipi ca gabbhavisuddhiyaṃ katadosena missakattā arajjārahātāpi siyāti “tampi natthi imesa”nti dassanattam “**rājapabbajitā**”tiādi vuttam.

**Sāmantāti** samīpe. **Calīṃsūti** uṭṭhahiṃsu. Kosamattam ṭhānaṃ **saddantaram**, “saddasavanaṭṭhānameva saddantara”nti apare. **Tikkhattum tesatthiyā nagarasahassesūti** jambudīpe kira ādito mahantāni tesatthi nagarasahassāni uppannāni, tathā dutiyaṃ, tathā tatiyaṃ. Tam sandhāyāha “tikkhattum tesatthiyā nagarasahassesū”ti. Tāni pana sampiṇḍetvā satasahassato paraṃ navasahassādhikāni asītisahassāni. **Navanavutiyā doṇamukhasatasahassesūti** navasatasahassādhikesu navutisatasahassesu doṇamukhesu. **Doṇamukhanti** ca mahānagarassa āyuppattiṭṭhānabhūtam pādanagaraṃ vuccati. **Chanavutiyā paṭṭanakoṭisatasahassesūti** chakoṭisatasahassaadhikesu navutikoṭisatasahassapaṭṭanesu. Tambapaṇṇidīpādicapaṇṇāsāya **ratanākaresu**. Evaṃ pana nagara-doṇamukhapāṭṭana-ratanākaraḍḍibhāvena kathanam taṃtaṃmadhivatthāya vasantīnaṃ tāsam devatānaṃ bahubhāvadassanattam. Yadi dasasahassacakkavālesu devatā sannipatitā. Atha kasmā pāliyaṃ “dasahi ca lokadhātūhī”ti? Vuttanti āha “**dasasahassa...pe... adhippeta**”nti. Tena sahassilokadhātu idha “ekā lokadhātū”ti veditabbā.

**Lohapāsādeti** sabbapaṭhamakate lohapāsāde. **Brahmaloketi** heṭṭhime brahmaloke. Yadi tā devatā evaṃ nirantarā hutvā sannipatitā, pacchā āgatānaṃ okāso eva na bhavyeyyāti codanaṃ sandhāyāha “**yathā kho panā**”tiādi.

Suddhāvāsakāye uppannā **suddhāvāsakāyikā**. Tāsam pana yasmā suddhāvāsabhūmi nivāsaṭṭhānaṃ, tasmā vuttam “**suddhāvāsavāsīna**”nti. **Āvāsāti** āvāsaṭṭhānabhūtā. Devatā pana orambhāgiyānaṃ itaresaṅca saṃyojanānaṃ samucchinnatthēna suddho āvāso vihāro etesanti **suddhāvāsā**. **Mahāsamāgamam** ṇatvāti mahāsamāgamam gatāti ṇatvā.

**Puratthimacakkavālamukhavaṭṭiyaṃ otari** aññattha okāsam alabhamāno. Evaṃ sesāpi. **Maṇivammanti** indanīlamaṇimayaṃ kavacaṃ. Buddhānaṃ abhimukhabhāgo **buddhavīthi**, sā yāva cakkavālā **uttaritam** na sakkā. **Mahatīyā buddhavīthiyāvāti** buddhānaṃ santikaṃ upasaṅkamantehi tehi devabrahmehi valañjītabuddhavīthiyāva.

Samiti saṅgati sannipāto samayo, mahanto samayo **mahāsamayoti** āha “**mahāsamūho**”ti. Pavaddham vanaṃ **pavananti** āha “**vanasaṅḍo**”ti. **Devaghaṭāti** devasamūhā. **Samādahaṃsūti** samāhitam lokuttarasamādhim suṭṭhu appitam akaṃsu. Tathā samāhitam pana samādhinā niyojitaṃ nāma hotīti vuttam “**samādhinā yojesu**”nti. Sabbesaṃ gomuttavankādīnaṃ dūrasamussāritattā



**attano...pe... akariṃsu.** Vinayati asse etehīti **nettāni**, yottāni. Avīthipaṭipannānaṃ assānaṃ vīthipaṭipādanaṃ rasmiggahaṇena hotīti “**yottāni gahetvā acodento**”ti vatvā taṃ pana acodanaṃ avāraṇamevāti āha “**acodento avārento**”ti.

Yathā khīlaṃ bhittiyam, bhūmiyam vā ākoṭitaṃ dunnīharaṇam, yathā ca paligham nagarappavesanivāraṇam, yathā ca indakhīlaṃ gambhīranemi sunikhātaṃ dunnīharaṇam, evaṃ rāgādayo sattasantānato dunnīharaṇā nibbānanagarappavesanivāraṇā cāti te “**khīlam paligham indakhīla**”nti ca vuttā. **Ūhaccāti** uddharitvā. Taṇhāejāya abhāvena **anejā**. Paramasantuṭṭhabhāvena cātuddisattā **appaṭihatacārikam caranti**. Buddhacakkhu-dhammacakkhu-dibbacakkhu-samantacakkhu-pakaticakkhūnaṃ vasena **pañcahi cakkhūhi**. Sudantā kutoti āha “**cakkhutopi**”ti. **Chandādīhīti** chandādīnaṃ vasena **na gacchanti** na vattanti. **Na āgacchanti** anuppādanaṃ. **Āgunti** aparādham.

**Sabbasaṃyogāti** vibhattilopena niddeso, sabbe saṃyogeti attho. **Visajjāti** visajjitvā. **Evampīti** imāyapi gāthāya vasena “āgum na karotī”ti pade.

**Gatāseti** gatā eva. **Na gamissanti** pariniṭṭhitasaraṇagamanattā. Lokuttarasaraṇagamaṇāhettha adhippetam. Tenāha “**nibbematikasaraṇagamaṇena gatā**”ti. Te hi niyamaṇa apāyam na gamissanti, devakāyaṇca paripūressanti. Ye pana lokiyena saraṇagamaṇena buddham saraṇam gatā, na te gamissanti apāyam, sati ca paccayantarasaṃvāye pahāya mānaṃ deham devakāyam paripūressantīti. Tenāha so brahmā “**ye keci buddham...pe... paripūressantī**”ti.

Samayasuttavaṇṇanā niṭṭhitā.

## 8. Sakalikasuttavaṇṇanā

**38. Tanti** uyyānaṃ saṅkham gatanti sambandho. Dhanunā sarena gahanti pothayanti bādhentīti **dhanuggahā**. **Taṃ sampaṭicchīti** tassā silāya heṭṭhābhāgena uggantvā sampaṭicchī. Satthu puññānubhāvena upahattā sayampi paripatantī vātaṃ upatthambheti. **Abhihani** satthārā anāvajjitattā. Taṇca kho kammaphalavaseṇāti daṭṭhabbam. Tato eva **tato paṭṭhāya bhagavato aphāsu jātanti** etenapi upādiṇṇakasarīre nāma aniṭṭhāpi samphassakā patanti eva tathārūpena kammunā katokāseti dasseti. **Ayam vihāroti** gijjhakūṭavihāro. **Ujjaṅgalo** na kattabbaparo. **Visamoti** bhūmibhāgavasena visamo. Sivikāreṇa sajjito maṅco eva **maṅcasivikā**.

**Bhusāti** dalhā. **Dukkhāti** dukkhamā duttitikkhā. **Kharāti** kakkasā. **Kaṭukāti** aniṭṭhā. **Asātāti** na sātā appiyā. **Na appetīti** na upeti. **Na appāyantīti** na khamanti. Vedanādhivāsanakhantiyā satisampajaññayuttattā sabbasattaṭṭhitāhārasamudayavattujātassa ādīnavanissaraṇānaṃ pageva suppaṭividitattā yathā samudācāro cittaṃ nābhībhavati, evaṃ sammadeva upaṭṭhāpitasatisampajaññattā vuttam “**vedanādhivāsana...pe... hutvā**”ti. **Apīḷiyamānoti** abādhiyamāno. Kāmaṃ aniṭṭhāya vedanāya phuṭṭho tāya apīḷiyamāno nāma natthi, pariññātavatthukattā pana tassā vase avattamāno “**avihaññamāno**”ti vutto. Tenāha “**samparivattasāyitāya vedanānaṃ vasaṃ agacchanto**”ti.

**Sīhaseyyanti** ettha sayanaṃ seyyā, sīhassa viya seyyā sīhaseyyā, taṃ sīhaseyyam. Atha vā **sīhaseyyanti** seṭṭhaseyyam uttamaseyyam. Svāyamattho aṭṭhakathāyameva āgamissati. “**Vāmena passena senti**”ti evaṃ vuttā **kāmabhogiseyyā**. **Dakkhiṇapassena sayāno nāma natthi** dakkhiṇahattassa sarīraggaṇādiyogakkhamato. Purisavasena cetam vuttam. **Ekena passena sayitum na sakkonti** dukkhuṇṇatito. **Ayam sīhaseyyāti** ayam yathāvuttā sīhaseyyā. **Tejussadattāti** iminā sīhassa abhītabhāvaṃ dasseti. Bhīrukajātikā hi sesamigā attano āsayam pavisitvā utrāsabahulā santāsapubbakam yathā tathā sayanti, sīho pana abhirukabhāvato satokārī bhikkhu viya satim upaṭṭhapetvāva sayati. Tenāha “**dve purimāpāde**”tiādi. **Purimāpādeti** dakkhiṇapurimāpāde vāmassa purimāpādassa ṭhapanavasena dve purimāpāde ekasmiṃ ṭhāne ṭhāpetvā. **Pacchimāpādeti** dve pacchimāpāde. Vuttanayeneva idhāpi ekasmiṃ ṭhāne ṭhapanam vedittabbam. **Ṭhitokāsasallakkhaṇam**

abhīrukabhāveneṇa. **Sīsam pana ukkhipitvā**tiādina vuttasīhakiriyā anutrāsapabujjhanam viya abhīrukabhāvasiddhā dhammatāvasenevāti veditabbā. **Sihavijambhitavijambhanam** ativelam ekākārena ṭhapitānam sarīrāvayavānam gamanādikiriyāsu yoggabhāvāpādanattham. **Tikkhattum sihanādanadanam** appesakkhamigajātapariharaṇattham.

Seti abyāvaṭabhāvena pavattati etthāti seyyā, catutthajjhānameva seyyā **catutthajjhānaseyyā**. Kim panettha taṃ catutthajjhānanti? Ānāpānacatutthajjhānam. Tato hi vuṭṭahitvā vipassanam vaḍḍhetvā anukkamena aggamaggaṃ adhigantvā tathāgato jātoti. “Tayidaṃ padaṭṭhānam nāma, na seyyā, tathāpi yasmā ‘catutthajjhānā vuṭṭahitvā samanantaram bhagavā parinibbāyī’ ti **mahāparinibbāne** (dī. ni. 2.219) āgataṃ. Tasmā lokiyacatutthajjhānasamāpatti eva **tathāgataseyyā**”ti keci. Evaṃ sati parinibbānakālikāva tathāgataseyyāti āpajjati; na ca tathāgato lokiyacatutthajjhānasamāpajjanabhulo vihāsi. Aggaphalavasena pavattaṃ panettha catutthajjhānam veditabbam. Tattha yathā sattānam niddupagamalakkhaṇā seyyā bhavaṅgacittavasena hoti, sā ca nesam paṭhamam jātisamanvayā yebhuyyavuttikā, evaṃ bhagavato ariyājātisamanvayam yebhuyyavuttikam aggaphalabhūtam catutthajjhānam **tathāgataseyyāti** veditabbā. **Sihaseyyā** nāma seṭṭhaseyyāti āha “**uttamaseyyā**”ti.

“Kālaparicchedaṃ katvā yathāparicchedaṃ uṭṭahissāmī”ti evaṃ tadā manasikārassa akatattā pāliyam “uṭṭhānasaññaṃ manasikarivā”ti na vuttanti āha “**uṭṭhānasaññanti panettha na vutta**”nti. Tattha kāraṇamāha “**gilānaseyyā hesā**”ti. Sā hi cirakālapavattikā hoti.

Visuṃ visuṃ rāsivasena anāgantvā ekajjham puñjivasena āgatattā vuttaṃ “**sabbāpi tā**”ti. Tenāha “**sattasatā**”ti. **Vikāramattampī**ti vedanāya asahanavasena pavattanākāramattampi. **Susammaṭṭhakañcanaṃ viyāti** sammaṭṭhasusajjitasuvaṇṇam viya.

**Dhammālanananti** asaṅkhārikasamuppannasabhāvālananam. Samullapitañhi ākārasamānavacanametam. Nāgo viya vāti pavattatīti nāgavo. Tassa bhāvo **nāgavatā**. Vibhattilopena hesa niddeso, mahānāgahatthisadisatāyāti attho. **Byattuparicaraanatthenāti** byattaṃ uparūpari attano kiriyācaraṇena. **Ājānīyoti** sammāpatitam **dukkham** sahanto attanā kātābbakiriyam dhīro hutvā nitthārako. Kāraṇākāraṇajānanenāti niyyānikāniyyānikakaraṇañātātāya. **Tenevatthenāti** appaṭisamaṭṭheneva. “Mutto moceyya”ntiādi **dhuravāhaṭṭhena**. **Nibbisevanatthenāti** rāgādivisavigatabhāvena.

**Aniyamitāṇattīti** anuddesikaṃ āṇāpanam. Sāmaññakatopi samādhisaddo pakaraṇato idha viṣesatthoti āha “**samādhinti arahattaphalasangāhī**”nti. Paṭippassaddhivasena sabbakilesehi suṭṭhu vimuttanti **suvimuttam**. **Abhinatam nāma** ārammaṇe abhimukhabhāvena pavattiyā. **Apanatam** apagamavasena pavattiyā, vimukhatāyāti attho. Lokiyajjhānacittam viya vipassanā viya ca asaṅkhārena sappayogena tadaṅgappahānavikkhambhanapahānavasena ca vikkhambhetvā na adhigataṃ na ṭhapitam, kiñcarahi kilesānam sabbaso chinatāyāti āha “**chinnattā vatam phalasangāhīnā sangāhī**”nti. **Atikkamittabanti** ācārātikkamavasena laṅghitabbam. Sā pana laṅghanā āsādanā ghaṭṭanāti āha “**ghaṭṭetabba**”nti.

Pañcavedā nāma – iruvedo, yajurvedo, sāmavedo, āthabbaṇavedo, itihāso cāti evaṃ itihāsapañcamānam vedānam. “Cara”nti vacanavipallāsena vuttanti āha “**carantā**”ti, tapantāti attho. **Hīnattarūpāti** hīnādhimuttikatāya nihīnacittasabhāvā. Vimuttikatāya abhāvato **nibbānaṅgamā na honti**. Arahattādhigamakammassa abhabbatāya **parihīnatthā**. **Ajjhotthaṭṭāti** abhibhūtā. **Tādiseheva silehīti** gosilādīhi. **Baddhāti** samādapetvā pavattanavasena anubaddhā. **Lūkham tapanti** attakilamathānuyogaṃ. Tam pana ekadesena dassento “**pañcātapatāpana**”ntiādimāha. “Evaṃ paṭipannassa mokkho natthi, evaṃ paṭipannassa vaṭṭato mutti atthi”ti vadantī sā attato sāsanaṃ niyyānabhāvo kathito nāma hotīti āha “**sāsanaṃ niyyānikabhāvaṃ kathenti**”ti. **Ādinti** gāthādvayam.

Sakalikasuttavaṇṇanā niṭṭhitā.

## 9. Paṭhamapajjunnadhītusuttavaṇṇanā

**39. Cātumahārājikassāti** cātumahārājikakāyikassa. **Dhammo anubuddhoti** catusaccadhammo pariññeyyādibhāvassa anurūpato buddho. **Paccakkhamevāti** parapattiyā ahutvā attapaccakkhameva katvā jānāmi. Dhammaṃ garahantā nāma saddadosavasena vā atthadosavasena vā garaheyyunti taṃ dassento “**hīnakkhara...pe... kotivā**”ti āha. Sā pana “tesaṃ vigarahā dummedhatāya mahānatthāvahāvā”ti dassentī devatā āha “**dummedhā upenti roruva**”nti. **Visuṃ hotīti** avīcimahānirayato visuṃ eva hoti. **Khantiyāti** ñāṇakhantiyā. **Upasamenāti** rāgādīnaṃ sabbaso vūpasamena. Tenāha “**ruccitvā**”tiādi.

Paṭhamapajjunnadhītusuttavaṇṇanā niṭṭhitā.

## 10. Dutiyapajjunnadhītusuttavaṇṇanā

**40. Buddhañca dhammañca namassamānāti** buddhasubuddhataṃ dhammasudhammatañca ñatvā tadubhayaṃ namassamānā. Yasmā buddhe ca dhamme ca pasanno saṅghe ca pasanno eva hoti tassa suppaṭipattiyā vijānanato, tasmā so attho gāthāya ca-saddasaṅgahitoti dassento “**ca-saddena saṅghañcā**”ti āha **atthavatiyoti** lokiyalokuttaraatthasaṅgahitā lokiyakusalalokuttaramaggasaṅgaṇhanato. **Yaṃ dhammaṃ sā abhāsīti** yaṃ tumhākaṃ dhammaṃ paṭivijjhivā ṭhitā, sā mahākokanadā attano balānurūpaṃ abhāsī. **Bahunāti** nānappakārena. **Pariyāyenāti** kāraṇena. **Tādisoti** tathārūpo tathāpaṭividdhasacco atthadhammādīsu kusalo ekekaṃ padampi udāharaṇahetunigamanāni nīharanto ācikkhati deseti paññapeti paṭhapeti vivarati vibhajati uttānīkaroti. Tenāha “**ayaṃ bhagavā**”tiādi. Etena ativiya vitthārakkhamo sugatadhammoti dasseti. **Pariyāpuṭanti** parivattitaṃ. Evaṃ vitthārakkhamaṃ dhammaṃ yasmā devadhīta “saṃkhittamatthaṃ lapayissāmi”ti avoca, tasmā vuttaṃ “**tassattha**”ntiādi.

Dutiyapajjunnadhītusuttavaṇṇanā niṭṭhitā.

Satullapakāyikavaggavaṇṇanā niṭṭhitā.

## 5. Ādittavaggo

### 1. Ādittasuttavaṇṇanā

**41. Sīsanti** desanāpadeso, desanāya aññesupi vattabbesu kassacideva sīsabhāgena apadisaṃ. Tenāha “**rāgādihī**”tiādi. **Dānenāti** attano santakassa paresaṃ pariccajanena. Taṃ pana pariccajanaṃ cetanāya hotīti āha “**dānacetanāyā**”ti **dānapuññacetanāti** dānamayā puññacetanā **dāyakkasseva hoti** taṃsantatipariyāpannattā. **Nīhatabhaṇḍakanti** ādittagehato bahi nikkhāmitaṃ bhaṇḍakaṃ. **Etanti** “dinnaṃ hoti”tiādivacanaṃ. **Adinneti** dānamukhe aniyuñjite bhoge. “Antenā”ti jīvitassa anto adhippetoti āha “**marañenā**”ti. Mamāti pariggahitattā **pariggahā**, bhogā. Tepi kenaci ākārena vināsaṃ anupagatā marañena pahīyanti nāmāti vuttaṃ “**corādīnaṃ vasena avinatṭhabhoge**”ti. Sobhanā aggabhūtā rūpādayo etthāti saggo, taṃ **saggaṃ**.

Ādittasuttavaṇṇanā niṭṭhitā.

### 2. Kiṃdadasuttavaṇṇanā

**42. Dve tīpi bhattāni abhutvāti** dve tayo vāre bhattāni abhuñjitvā. **Uṭṭhātuṃ na sakkotīti** uṭṭhātumpi na sakkotī, pageva aññaṃ sarīrena kātābbakiccaṃ dubbalabhāvato. **Dubbalopi hutvāti** bhuñjanato pubbe dubbalo hutvā balasampanno hoti. Evaṃ byatirekato anvayato ca āhārassa sarīre

balavatam āha. Yasmā annado dāyako paṭiggāhakassa balado hoti, tasmā so āyatim attano sarīre balado avināsavasena balassa rakkhako ca hoti. Tenāha bhagavā – “balaṃ kho pana datvā balassa bhāgi hotī”ti (a. ni. 5.37) sesapadesupi eseva nayo. **Surūpopīti** abhirūpopi. **Virūpo hotīti** bībhaccharūpo kopīnassa acchannattā. **Idaṅca yānanti** sāmāññato vuttam. **Upāhanāti** sarūpato dasseti. Adukkhappatto hutvā yāti vattati etenāti **yānanti** chattādīnampi yānabhāvo vutto. Tenāha “**yānado sukhado hotī**”ti. **Cakkhudo nāma** hoti cakkhunā kātabbaticce sahakārikāraṇabhāvato dīpassa.

“**Sabbesaṃyeva balādīnaṃ dāyako hotī**”ti sankhepato vuttam attham vitthārato dassetuṃ “**dve tayo gāme**”tiādi vuttam. Nisajjādivasena patissayitabbato **patissayo**, vihāro. **Pakkhittam viya hoti** parissamassa vinoditattā. **Bahi vicarantassāti** patissayam alabhitvā bahi vivaṭaṅgaṇe vicarantassa. **Jhāyatīti** jhāyantaṃ hoti, kilamatīti attho. Sītuṇhādivirodhapaccayavasena sasantāne **visabhāgasantati**, tabbipariyāyato **sabhāgasantati** veditabbā. Sukham nāma dukkhapaccayaparihārato sukhapaccayuppanato ca hoti, tadubhayaṃ patissayavasena labhatīti dassento “**bahi vicarantassa pāde**”tiādimāha. **Dhammapītisukhanti** dhammapaccavekkhaṇena uppannapītisukham. **Upasamasukhanti** kilesānaṃ vūpasamena pavattasukham. Nivātaṃ pihitavātapānaṃ patissayam pavisitvā dvāraṃ pidhāya ṭhitassa andhakāro hotīti vuttam “**kūpe otiṇṇo viya hotī**”ti. Tenāha “**mañcapīṭhādīni na paññāyanti**”ti. Tayidaṃ bahisamāpannaparissamadoseṇa, na ca patissayadoseṇa. Tenāha “**muhutta**”ntiādi.

Na marati etenāti **amaraṇam**, nibbānādhiḡamādayo. Tassa dānaṃ dhammūpadeso, taṃ deti. Tenāha “**yo dhammaṃ anusāsati**”ti. Tayidaṃ dhammānusāsaṇaṃ kathaṃ hotīti āha “**aṭṭhakatha**”ntiādi. **Aṭṭhakathaṃ kathetīti** avivaṭapāṭhassa pāliyā atthasaṃvaṇṇanaṃ karotīti attho. Anadhītino pana **pāliṃ vāceti**. Tattha tattha gataṭṭhāne **pucchitapañhaṃ vissajjeti**, ayaṃ tāva ganthadhuro, paṭipattivāsadhure pana **kammaṭṭhānaṃ ācikkhati**, ubhayesampi **dhammassavanaṃ karoti**. **Sabbadānanti** yathāvuttaāmisadānaṃ abhayadānaṃ. **Dhammadānanti** dhammadesanā. **Dhammaratīti** samathavipassanādhamme abhirati. **Dhammarasoti** saddhammasannissayaṃ pītipāmojjaṃ.

Kimḡadasuttavaṇṇanā niṭṭhitā.

### 3. Annasuttavaṇṇanā

**43. Patthentīti** pihenti. Yatthassa upagamaṇaṃ loke pākaṭataraṃ ahosi, te udāharaṇavasena dassento “**cittagahapatisivalittherādike viyā**”ti āha. **Annanti** annasaññito catubbidhopi paccayo. Sabbepi dāyake ekajjhaṃ gahetvā sāmāññato ekavasena “**dāyakamevā**”ti vuttam, yathā cāha “**ko nāma so yakkho, yaṃ annaṃ nābhinandati**”ti? Tattha **yakkhoti** satto. Sāmāññajotanaṃ ca nāma yasmā puthuatthavisayā, tasmā “**ye naṃ dadanti saddhāya, vipasannena cetasā. Tameva annaṃ bhajati**”ti vuttam. Tattha **ma**-kāro padasandhikaro, te evāti attho. **Dāyakaṃ** apariccajanameva **anugacchati** cakkam viya kubbaraṃ.

Annasuttavaṇṇanā niṭṭhitā.

### 4. Ekamūlasuttavaṇṇanā

**44. Patiṭṭhaṭṭhena** avijjāsankhātaṃ ekaṃ mūlaṃ etissāti ekamūlā. Taṃ **ekamūlaṃ**. Yathā saṃyojanīyesu assādānupassanāvasena taṇhāsamuppādo, evaṃ taṇhābhibhavavasena anavabodhoti **avijjā taṇhāya mūlaṃ, taṇhā ca avijjāya mūlaṃ**. Ayañhi nayo upanissayatāvasena vutto, sahaṅgātasena cāyaṃ aññamaññaṃ mūlabhāvo pākaṭoyeva. **Idha pana** imissaṃ gāthāyaṃ **adhippetā** “ekamūla”nti sā taṇhā. Tattha yā bhavataṇhā, sā sassatadiṭṭhivasena āvaṭṭati parivattati, vibhavataṇhā ucchedadiṭṭhivasena, evaṃ **dvirāvaṭṭam**. **Sahajātaakoṭiyāti** sahaṅgātaakoṭiyāpi, pageva sammuyhaṃ āpanassa pana vattamānāya taṇhāya balavabhāvena malīnatā siyā. **Upanissayakoṭiyāti**

upanissayakoṭṭiyāva sahaṅgākoṭṭiyā asamhāvato. **Pattharaṅgaṭṭhānā**ti vitthata hutvā pavattiṭṭhānabhūmi. Tenāha “**tesu sā pattharati**”ti. Samuddanaṭṭhena **samuddo**. Uttaritum asakkuṇeyyatāya patāya alaṃ pariyattoti pātālo, ayaṃ pana pātālo viyāti **pātālo**. Tenāha “**appaṭṭhaṭṭhenā**”ti. Agādhagambhīratāyāti attho.

Ekamūlasuttavaṅṅanā niṭṭhitā.

## 5. Anomasuttavaṅṅanā

**45. Anomanā**manti anūnanāmaṃ. Guṇanemittikāni eva hi bhagavato nāmāni. Guṇānañcassa paripuṇṇatāya anūnanāmanti āha “**sabbaguṇasamannāgatattā**”tiādi. Apica tathā tevijjo, chaḷabhiññotiādīni nāmāni anomanāmāni na honti paricchinnavisayattā, bhagavato pana satthā, sabbaññū, sammāsambuddhotiādīni nāmāni anomanāmāni nāma mahāvisayattā anūnabhāvato. Tenāha “**avekallanāma**”nti. **Khandhantarādayoti** khandhavisēsādike. Nāṇena yāthāvato araṇiyatṭhena **atthe**. **Anvayapaññādhi**gamāyāti lokuttarapaññāpaṭilābhāya. **Paṭipadanti** samathavipassanāpaṭipadaṃ. Kilesakāmānaṃ vasena allīyitabbaṭṭhena kāmā eva **ālayo**. Atitakāleyeva kamanataṃ gahetvā vuttaṃ “**kamamāna**”nti. Na etarahi tadabhāvato āha “**atītaṃ pana upādāya idaṃ vutta**”nti. Mahānubhāvātādīnā **mahantānaṃ**.

Anomasuttavaṅṅanā niṭṭhitā.

## 6. Accharāsuttavaṅṅanā

**46.** “Accharāgaṇasaṅghuṭṭha”nti gāthā devaputtēna yenādhippāyena gāyitā, so anupubbikathāya vinā na paññāyatīti taṃ āgamanato paṭṭhāya kathento “**ayaṃ kira devaputto**”tiādimāha. Tattha **sāsaneti** imasseva satthūsāsane. **Kammākammanti** kammavinicchayaṃ. Atthapurekkhāratāya appakiccatāya ca **sallahukavuttiko**. **Sayanassa koṭṭhāsoti** divasaṃ purimayāmañca bhāvanānuyogavasena kilantakāyassa samassāsanatthaṃ seyyāya upagamanabhāgo anuññāto.

**Abbhantareti** kucchiyaṃ bhattassa parittatāya **satthakavātā**ti tikkhabhāvena satthakā viya kantanakā vātā. **Dhurasmimye**vāti kilesamārena yuddhe eva. Vimuttāyatanasīse ṭhatvā **dhammaṃ desento vā**. **Upanissayamandatāya** aparipakkaññatāya āsavakkhayaṃ appatto kālaṃ katvāti yojanā. **Upari ṭhitanti** parikkhārabhāvena dibbadussūpari ṭhitaṃ. **Tatheva aṭṭhāsīti** tāhi tathā vuttepi yathā tato pubbe, tatheva aṭṭhāsī. **Suvaṅṅapaṭṭanti** nibbuddhe paṭijinitvā laddhabbasuvaṅṅapaṭṭaṃ. Vītikkamassa akatattā **asambhinneneva sīlena**. Yasmā tasmim satthu santikaṃ āgacchante tāpi tena saddhim āgamaṃsu tasmā “**accharāsāṅghaparivuto**”ti vuttaṃ.

**Saṅghositanti** saṅgama ghoṣitaṃ, tattha tattha accharānaṃ gītasaddavasena ghoṣitaṃ. **Pisācagaṇaṃ katvā vadati** acchandarāgatāya. **Niyāmacittatāyāti** sammattaniyāme ninnacittatāya. **Garubhāvenāti** tāsāṃ vase avattanato garuṭṭhānabhāvena. **Yātrāti** nibbānaṃ pati yātrā. Taṃ pana vaṭṭato niggamaṃ hotīti āha “**kathaṃ niggamaṃ bhavissati**”ti.

**Atisallekhatevāti** ativiya kilesānaṃ sallekhitavuttiko. **Akatābhinivesassāti** bhāvanāmanānuyuttassa anāraddhavipassakassa. **Kārakassāti** sugatovādakārakassa sammāpaṭipajjato. **Suññatāvipassananti** suññatādīpanaṃ vipassanaṃ duccharitatanhāya dūrīkaraṇena ekavīhāritāya. **Eko maggo assāti** lokuttaramaggo eva assa anāgato, pubbhāgamaggo pana kataparicayoti attho.

**Kāyavaṅkā**dīnanti kāyaduccharitādīnaṃ abhāvato samucchindanaṃ anupalabbhanaṃ. Natthi ettha bhayaṃ, asmim vā adhigate puggalassa natthi bhayanti **abhayaṃ nāma**. Saṃsāraṅgānaṃ atikkamitvā nibbānasāṅkhātaṃ khemaṃ amataṭṭhānaṃ gamane sugatasārathinā susajjitayānabhāvato **ratho**

**akūjanoti aṭṭhaṅgiko maggova adhippeto.** Dhammato anapetatāya aparāparuppattiyā ca dhammacakkehi.

**Ottappampi gahitameva** avinābhāvā. **Apālamboti** avassayo. **Parivāroti** parikkhāro abhisāṅkharānato. Maggassa karaṇaṭṭhāne dhammo tappariyāpannā **sammādiṭṭhi**. **Aniccādivasenāti** aniccānupassanādivasena. **Sodhitesu** vajjhamānesu. **Bhūmiladdhavaṭṭanti** bhūmiladdhasāṅkhātaṃ vaṭṭaṃ. Tattha vipassanāya pavattiṭṭhānabhāvato pañcakkhandhā bhūmi nāma, vaṭṭamayakammabhāvato tattha uppajjanārahaṃ kilesajātaṃ bhūmiladdhavaṭṭaṃ. **Parijānamānāti** paricchindanavasena samatikkamavasena jānamānā paṭivijjhantī.

Kasmā devaputto sotāpatti-phaleyyeva paṭiṭṭhāsi, nanu ca sā desanā bhagavatā catumaggappadhānabhāvena pavattitāti āha “**yathā hī**”tiādi.

Accharāsuttavaṇṇanā niṭṭhitā.

## 7. Vanaropasuttavaṇṇanā

47. **Kesanti** sāmivasena vuttakasaddo “dhammaṭṭhā sīlasampannā”ti ettha paccatabhuvacanavasena pariṇāmetabbo. Atthavasena hi vibhattivipariṇāmo. **Ke janāti** ettha vā vuttakesaddo sīhavi lokananayena ānetvā yojetabboti āha “**ke dhammaṭṭhā, ke sīlasampannā**”ti? **Pucchati** iminā tattha kāraṇamāha. Phalādisampattiyā āramanti ettha sattāti ārāmo. Ārāme ropenti nipphādentīti **ārāmaropā**. Vanīyati chāyāsampattiyā bhajīyatīti **vanam**. Tattha yaṃ upavanalakkhaṇaṃ vanam, taṃ ārāmaggaṇeṇeva gahitanti tapovanalakkhaṇaṃ, taṃ dassento “**sīmam parikkhipivā**”tiādimāha. **Visameti** udakacikkhallena visame padese. Pānīyaṃ pivanti etthāti papā, taṃ **papaṃ**. Udaṃ pīyati etthāti vā papā. **Talākādīti ādi**-saddena mātikaṃ saṅgaṇhāti.

**Imamatthaṃ sandhāyāti** iminā kammappathappattaṃ paṭikkhipati. Attanā katañhi puññaṃ anussarato taṃ ārabba bahuṃ puññaṃ pasavati, na pana yathā kataṃ puññaṃ sayameva pavaḍḍhati. **Tasmiṃ dhamme ʘhitattāti** tasmiṃ ārāmaropanādīdhamme paṭiṭṭhitattā. **Tenapi sīlena sampannattāti** tena yathāvuttadhamme katasīle ʘhatvā ciṇṇena tadaññenapi kāyavācasikaṃ varalakkhaṇena sīlena samannāgatattā. **Dasa kusalā dhammā pūrenti** duccharitaparivajjanato. Sesam vuttanayameva.

Vanaropasuttavaṇṇanā niṭṭhitā.

## 8. Jetavanasuttavaṇṇanā

48. Esitaguṇattā esiyamānaguṇattā ca isī, asekkhā sekkhakalyāṇaputhujjanā ca. Isīnaṃ saṅgho **isisaṅgho**. Isisaṅghena nisevitaṃ. Tenāha “**bhikkhusaṅghanisevita**”nti.

Taṃ kārentassa gandhakuṭipāsādakūṭāgārādivasena siniddhasandacchāyarukkhalatāvasena bhūmibhāgasampattiyā ca anaññasādhāraṇaṃ atiramaṇīyaṃ taṃ jetavanaṃ cittaṃ toseti, tathā ariyānaṃ nivāsabhāvenapīti āha “**evaṃ paṭhamagāthāya jetavanassa vaṇṇaṃ kathetvā**”ti. Tenāha bhagavā – “yathā arahanto viharanti, taṃ bhūmirāmaṇeyyaka”nti (dha. pa. 98; theragā. 991). Apacayagāmicetanā sattānaṃ visuddhiṃ āvahati kammakkhayāya saṃvattanatotī āha “**kammanti maggacetanā**”ti. Catunnaṃ ariyasaccānaṃ viditakaraṇaṭṭhena kilesānaṃ vijjhanaṭṭhena ca **vijjā**. Maggapaññā sammādiṭṭhīti āha “**vijjāti maggapaññā**”ti. **Samādhipakkhikā dhammā** sammāvāyāmasatisamādhayo. Yathā hi vijjāpi vijjābhāgiyā, evaṃ samādhipi samādhipakkhiko. Sīlaṃ etassa atthīti **sīlanti** āha “**sīle paṭiṭṭhitassa jīvitam uttama**”nti. **Diṭṭhisāṅkappāti** sammādiṭṭhisāṅkappā. Tattha sammāsaṅkappassa sammādiṭṭhiyā upakārabhāvena vijjābhāvo vutto. Tathā hi so paññākkhandhasaṅgahitoti vuccati. Yathā ca sammāsaṅkappādayo paññākkhandhasaṅgahitā,

evaṃ vāyāmasatiyo samādhikkhandhasaṅgahitāti āha “**vāyāmasatisamādhayo**”ti. Dhammoti hi idha samādhi adhippeto “evaṃdhammā te bhagavanto ahesu”ntiādīsu (dī. ni. 2.13; ma. ni. 3.197; saṃ. ni. 5.378) viya. **Vācākammantājīvāti** sammāvācākammantājīvā. Maggapariyāpannā eva hete saṅgahitā. Tenāha “**etena aṭṭhaṅgikamaggenā**”ti.

Upāyena vidhinā ariyamaggo bhāvetabbo. Tenāha “**samādhipakkhiyadhamma**”nti. Sammāsamādhipakkhiyaṃ vipassanādhammañceva maggadhammañca. “Ariyaṃ vo, bhikkhave, sammāsamādhiṃ desessāmi saupanisaṃ sapaṛikkhāra”nti (ma. ni. 3.136) hi vacanato sammāditṭhiādayo maggadhammā sammāsamādhiparikkhārā. **Vicineyyāti** vīmaṃseyya, bhāveyyāti attho. **Tatthāti** hetumhi bhummavacanāṃ. Ariyamaggahetukā hi sattānaṃ visuddhi. Tenāha “**tasmiṃ ariyamagge visujjhatī**”ti. **Pañcakkhandhadhammaṃ vicineyyāti** paccuppanne pañcakkhandhe vipasseyya. Tesu vipassiyamānesu vipassanāya ukkaṃsagatāya yadaggena dukkhasaccaṃ pariññāpaṭivedhena paṭivijjhīyati, tadaggena samudayasaccaṃ pahānapaṭivedhena paṭivijjhīyati, nirodhasaccaṃ sacchikiriyāpaṭivedhena, maggasaccaṃ bhāvanāpaṭivedhena paṭivijjhīyati evaṃ tesu catūsu saccesu visujjhatīti imasmīṃ pakkhe nimittatthe eva bhummaṃ, tesu saccesu paṭivijjhīyamānesūti attho.

**Avadhāraṇavacananti** vavatthāpanavacanāṃ, avadhāraṇanti attho. “Sāriputtovā”ti ca avadhāraṇaṃ sāvakesu **sāriputtova seyyoti** imamattaṃ dīpeti tassevukkaṃsabhāvato. **Kilesaupasamenāti** iminā mahātherassa tādiso kilesavūpasamoti dasseti. Tassa sāvakaṃvisaye paññāya pāramippatti ahoṣi. Yadi evaṃ “yopi pāraṅgato bhikkhu, etāvaparamo siyā”ti idaṃ tesāṃ buddhānaṃ ṇāṇavisaye paññāpāramippattānaṃ vaseneva vuttanti daṭṭhabbaṃ. Avadhāraṇampi vimuttiyā nānattā tīhi vimuttīhi pāraṅgate sandhāyetaṃ vuttaṃ. Tenāha – “**pāraṃ gatoti nibbānaṃ gato**”tiādi. **Na therena uttaritaro nāma atthi** labbhati, labbhati ce, evameva labbheyyāti adhippāyo.

Jetavanasuttavaṇṇanā niṭṭhitā.

## 9. Maccharisuttavaṇṇanā

**49. Maccharinoti** maccheravanto maccherasamaṅginoti āha “**maccherena samannāgatā**”ti. Maccheraṃ macchariyanti atthato ekaṃ. **Na vandatīti** vandanamattampi na karoti, kuto dānanti adhippāyo. **Upaṭṭhānaṃ kātunti** madhuraṇāpāṇisaṅgānaṃ karotīti yojanā. **Idaṃ tāva mudumacchariyaṃ** na hadayaṃ viya attānaṃ dassentassa macchariyanti katvā. **Kim tuyhaṃ pādā rujjanti** nanu tuyhaṃyeva āgatagamanesu pādā rujjanti, kinte ime chindantīti adhippāyo. **Sāmicimpi na karoti** kuto dānanti adhippāyo. Yathākammaṃ taṃtaṃgatiyo aranti upagacchantīti ariyā, sattā. Ime pana kucchitā ariyāti **kadariyā**, thaddhammaccharino. Macchariyasadiṣāhi kucchitaṃ sabbahīnaṃ natthi sabbaguṇābhībhūtattā bhogasampattīdisabbasampattīnaṃ mūlabhūtassa dānassa nisedhato. **Itiādīhi** vacanehi. **Attano upaghātakoti** macchariyānuyogena kusaladhammānaṃ gatisampattiyā ca vināsako.

Puññapāpavasena samparetabbato upagantabbato **samparāyo**, paraloko. **Kāmaguṇaratīti** kāmaguṇasannissayo assādo. **Khiddāti** kāyikakhiḍḍā vācasikakhiḍḍā cetasikakhiḍḍāti evaṃ tividhā. **Esa vipākoti** coḷādīnaṃ kicchālābhoti esa evarūpo vipāko. **Yamalokanti** paralokaṃ. **Upapajjareti** ettha **iti-saddo** pakārattho. Tena pāḷiyaṃ vuttaṃ nirayaṃ tiracchānayoṇiṃca saṅgaṇhāti.

**Yācanti** nāma ariyayācanāya. Vuttañhetāṃ “uddissa ariyā tiṭṭhanti, esā ariyāna yācanā”ti (jā. 1.7.59). Ye saṃvibhajanti, te **vadaññū** nāma ñatvā kattabbakaraṇato. **Vimānappabhāyāti** nidassanamattaṃ, uyyānakapparukkappabhāhi devatānaṃ vatthābharaṇasarīrappabhāhipi sagge pakāsentiyeva. **Pakāsantīti** vā pākātā hontī, na apāyaloke viya apākātāti attho. **Parasambhatesūti** sayāṃ sambhataṃ anāpajjitvā pareheva sambharitesu sukhūpakaraṇesu. Tenāha pāḷiyaṃ “**vasavattīva modare**”ti, paranimitabhogesu vasavattī devaputtā viya sukhasamaṅgitāya modantīti attho. **Evaṃ vuttasamparāyoti** ete saggāti evaṃ heṭṭhā vuttasamparāyo. **Ubhinnanti** etesaṃ yathāvuttānaṃ ubhinnaṃ dukkaṭasukaṭakammakārīnaṃ. **Tato cavitvā** tato nirayasaggādīto cavitvā manussesu

nibbattati. Tesu yo maccharī manussesu nibbatto, so daliddo hutvā pubbacariyavasena maccharīyeva honto dārādibharaṇatthaṃ macchakacchapādīni hantvā punapi niraye nibbatto. Itaro suddhāsayo samiddho hutvā pubbacariyāvasena punapi puññāni katvā sagge nibbatteyya. Tenāha “**puna samparāyepi duggatisugatiyeva hotī**”ti.

Maccharisuttavaṇṇanā niṭṭhitā.

## 10. Ghaṭikārasuttavaṇṇanā

50. “Upapannāse”ti se-kārāgamam katvā niddeso, “upapannā”icceva atthoti āha “**nibbattivasena upagatā**”ti. Attano sampattito avihānato avihā, tesam brahmaloko **avihābrahmaloko**, tasmim. **Upapattisamanantaramevā**ti paṭhamakoṭṭhāse eva. **Arahattaphalavimuttiyā**ti asekkhvimuttiyā. Sekkhvimuttiyā pana avihūpapattito pageva vimuttā. Mānusaṃ dehaṃ samatikkamanti cittupakkilesapahānavasenāti phalena hetudassanamidanti āha “**mānusaṃ dehanti idha...pe... vuttāni**”ti. Divi bhavaṃ dibbaṃ, brahmattabhāvasaññitaṃ khandhapañcakaṃ. Tattha saṃyojanakoti vuttaṃ “**dibbaṃ yoganti pañca uddhambhāgiyasaṃyojanāni**”ti. **Imassā**ti devaputtassa. “**Hitvā mānusaṃ dehaṃ, dibbayogaṃ upaccagu**”nti tesam tvaṃ kusalaṃ sabbāvajjappahānena anavajjataṃ bhāsātīti kusalī vadesi. Atthena saddassa abhedopacāraṃ katvā gambhīravacanaṃ vuttanti āha “**gambhīrattha**”nti atthasseva gambhīrato, na saddassa. Samucchinnakāmarāgatāya sabbaso kāmavisayappahānena **nirāmisabrahmacārī nāma anāgāmī**. Nivāsanaṭṭhānabhūto samāno eko gāmo etassāti āha “**ekagāmavāsī**”ti.

Ghaṭikārasuttavaṇṇanā niṭṭhitā.

Ādittavaggavaṇṇanā niṭṭhitā.

## 6. Jarāvaggo

### 1. Jarāsuttavaṇṇanā

51. Hitassa sādhanato **sādhu**, yaṃ kiñci atthajātaṃ. Taṃ pana atthakāmena labhitabbato upasevitabbato laddhakaṃ, kalyāṇaṭṭhena bhaddakanti vuccatīti āha “**sādhūti laddhakaṃ bhaddaka**”nti. “**Sīlaṃ yāva jarā sādhu**”ti vuttamatthaṃ byatirekato vibhāvetuṃ “**iminā idaṃ dasseti**”ti vuttaṃ. **Idanti** idaṃ atthajātaṃ.

**Patiṭṭhitā**ti cittasantāne laddhapatiṭṭhā, kenaci asaṃhāriyā. Tenāha “**maggena āgatā**”ti. **Cittikataṭṭhādīhī**ti pūjanīyabhāvādīhi. **Vuttaṃ hetam** porāṇaṭṭhakathāyaṃ. **Cittikatanti ratananti** idaṃ ratanaṃ nāma loke cittikataṃ vatthūnaṃ saḥassagghanatādivasena. **Yepi loke cittikatā** khattiyapaṇḍita-catumahārāja-sakka-suyāma-mahābrahmādayo, **tesam cittikato** tehi saraṇanti upagantabbatādivasena. **Ratikananti** pītisukhāvahaṃ. **Jhānaratisukhenā**ti duvidhenapi jhānaratisukhena. **Tuletunti** paricchindituṃ. **Guṇapāraminti** guṇānaṃ ukkaṃsapāramiṃ. **Dullabho** anekāni asaṅkhyeyyāni atidhāvitvāpi laddhuṃ asakkuṇeyyattā. **Anomoti** anūno paripuṇṇo. Tattha visesato anomasattaparibhogato tehi “**sammāsambuddho bhagavā**”ti anussaritabbatoti āha “**bhagavā anomo sīlenā**”tiādi.

Ariyamaggapaññāyeva idha adhippetāti “**idha pana dullabhapātubhāvaṭṭhena paññā** **‘ratana’nti vutta**”nti āha. Pujjaphalanibbattanato, attano santānaṃ punātīti ca puññacetanā **puññaṃ**, sā pana yassa uppannā, tasseva āveṇikatāya anaññasādhāraṇattā kenacipi anāhaṭā, aṭṭhakathāyaṃ pana “**arūpattā**”ti vuttaṃ.



Jarāsuttavaṇṇanā niṭṭhitā.

## 2. Ajarasāsuttavaṇṇanā

52. **Ajīraṇenā**ti jīṇṇabhāvānāpajjanena. Lakkhaṇavacanañcetam avināsappattiyā. Tenāha “**avipattiyāti attho**”ti. **Niddhamitabboti** nīharitabbo.

Ajarasāsuttavaṇṇanā niṭṭhitā.

## 3. Mittasuttavaṇṇanā

53. Saha atthena vattatīti **sattho**, bhaṇḍamūlaṃ gahetvā vāṇijjivasena desantarādīsu vicaraṇakajanasamūho. Tenāha “**saddhimcaro**”ti, saha caraṇakoti attho. **Mittanti** sinehayogena mittakiccayuttaṃ. Idhādhippetappakāraṃ dassetaṃ “**roge uppanne**”tiādi vuttaṃ. **Tathārūpeti** jigucchaniye, duttikicche vā. Yathā asaṅṅhitānaṃ saṅṅhāpanavasena pavasato purisassa bhogabyasane nāthatā, evaṃ puttasiñehavasena puttassa mātuyā antogehe nāthatāti vuttaṃ “**mātā mittam sake ghare**”ti. **Atthajātassāti** upaṭṭhitapayojanassāti atthoti āha “**uppannakiccassā**”ti. **Samparāyahitanti** samparāye hitāvahaṃ.

Mittasuttavaṇṇanā niṭṭhitā.

## 4. Vatthusuttavaṇṇanā

54. **Paṭiṭṭhāti** avassayo. **Guyhassāti** guhitabbassa rahassassa. **Paramo sakhā nāma** atipiyaṭṭhānatāya.

Vatthusuttavaṇṇanā niṭṭhitā.

## 5. Paṭhamajanasuttavaṇṇanā

55. **Vidhāvati**ti vividhaṃ rūpaṃ padhāvati, yathākāmaṃ pavattatīti attho.

Paṭhamajanasuttavaṇṇanā niṭṭhitā.

## 6. Dutiyajanasuttavaṇṇanā

56. **Vaṭṭadukkhato**ti saṃsāradukkhato. Saṃsāro hi kilesakammavipākānaṃ aparāparuppattitāya vidhāvati. Tañca dukkhaṃ dukkhamattāya nānāvidhadukkarāsibhāvato.

Dutiyajanasuttavaṇṇanā niṭṭhitā.

## 7. Tatiyajanasuttavaṇṇanā

57. **Nipphattīti** itṭhāniṭṭhavipākānaṃ nippahjanato nipphatti. Tato eva **avassayo**, nipphattitavipākassa avassayo adhiṭṭhānaṃ kāraṇanti attho.

Tatiyajanasuttavaṇṇanā niṭṭhitā.

## 8. Uppathasuttavaṇṇanā

**58. Amaggoti** na maggo anupāyo. **Rattindivakkhayoti** tatha vayakkhaṇassa pākaṭabhāvato. Vuttakkhaṇopi hi sayam khīyateva. **Sesaṃ bāhiramaḷaṃ** vatthasarīradibhūtaṃ. Tathā hi “**bhasmakhārādīhi dhovivā sakkā sodhetu**”nti vuttaṃ. **Duṭṭhoti** dūsito sattasantāno **na sakkā suddho nāma kātuṃ** abhantaramalīnabhāvāpādanato. **Itthiyanti** brahmacariyassa antarāyakarāyapi. **Pajāti** sattakāyo **sajjati** saṅgaṃ karoti yāthāvato ādīnavaṃ apassanto. Indriyasamvarādi kilesānaṃ tāpanato **tapo**, tenāha “**sabbāpī**”tiādi.

Uppathasuttavaṇṇanā niṭṭhitā.

## 9. Dutiyasuttavaṇṇanā

**59. Kissāti** bhummattthe sāmivacananti āha “**kismiṃ abhirato**”ti. Saddhā nāma anavajjasabhāvā, tasmā lokiyalokuttarahitasukhāvahāti āha “**sugatiñceva nibbānañca gacchantassa dutiyikā**”ti. **Anusāsati** hitacariyāya pariṇāyikabhāvato.

Dutiyasuttavaṇṇanā niṭṭhitā.

## 10. Kavisuttavaṇṇanā

**60. Gāyattīdikoti** chabbīsatiyā chandesu gāyattīdikoti ukkatipariyosāno **chando gāthānaṃ nidānaṃ** samuṭṭhānaṃ “**samuṭṭhahati etenā**”ti katvā. Tehi pana anuṭṭhubhādiko hotīti āha “**chando gāthānaṃ nidāna**”nti. **Pubbapaṭṭhāpanagāthā**ti dhammakathāya ādito ārocanabhāvajānanatthaṃ satijānaṃ viya pavattitagāthā. **Akkharañhi padaṃ janetīti** yasmā akkharasamudāyo padaṃ, padasamudāyo gāthā, samudāyo ca samudāyīhi byañjīyati taṃpavattanato, tasmā byañjanabhāve ṭhitaṃ akkharaṃ, taṃsamudāyo padaṃ, padaṃ taṃ viyañjetā janetā viya hotīti “**akkharañhi padaṃ janetī**”ti vuttaṃ. Akkharaṃ hi uccāritaviddhamṣitāya taṃtaṃkhaṇamattāvattāyīpi parato pavattiyā manoviññānavīthiyā saṅkalanavasena ekajjhaṃ katvā padabhāvena gayhamānaṃ yathāsaṅketamatthaṃ byañjeti. **Padam gātham janetīti** ethāpi eseva nayo. **Gāthā atthaṃ pakāsetīti** gāthāsaññito padasamudāyo kiriyākārasambandhavasena sambandhito kattuadhippāyānurūpaṃ ālocitavilocitaṃ saṃhitam atthaṃ vibhāveti. **Samuddātipaṇṇattinissitā** vohārasannissayeneva pavattatīti katvā. Tenāha “**gāthā ārabhanto**”tiādi. **Āsayoti** avassayoti āha “**patiṭṭhā**”ti **kavitoti** vicittakathāditto.

Kavisuttavaṇṇanā niṭṭhitā.

Jarāvaggavaṇṇanā niṭṭhitā.

## 7. Addhavaggo

### 1. Nāmasuttavaṇṇanā

**61. Nāmanti** sāmāññanāmādibhedam nāmaṃ. **Sabbanti** sabbaṃ paññattipathaṃ sabbaṃ ñeyyapavattipathaṃ. **Addhabhavīti** kāmaṃ pāliyaṃ atītakālaniddeso kato, taṃ pana lakkhaṇamattaṃ. **Abhibhavati anupatatīti** etena abhibhavo anupataṇaṃ pavatti evāti dasseti. Taṃ panassa abhibhavanam appavisaye anāmasitvā mahāvisayānaṃ vasena dassento “**opapātikena vā**”tiādimāha. **Tassa nāmaṃ hotīti** tassa rukkhapāsāññādikassa anāmakoicceva sāmāññā hoti, tathā naṃ sañjānantīti attho.

Nāmasuttavaṇṇanā niṭṭhitā.

### 2. Cittasuttavaṇṇanā

**62. Ye cittassa vasam gacchantī** ti ye apariññātavatthukā, tesamyeva. **Anavasesapariyādānanti** anavasesaggahaṇaṃ. Na hi pariññātakkhandhā pahīnakilesā cittassa vasam gacchanti, taṃ attano vase vattenti.

Cittasuttavaṇṇanā niṭṭhitā.

### 3. Taṇhāsuttavaṇṇanā

**63. Tatiye “sabbeva vasamanvagū”** ti ye taṇhāya vasam gacchanti, tesam eva anavasesapariyādānanti imamattaṃ **“eseva nayo”** ti iminā atidissati.

Taṇhāsuttavaṇṇanā niṭṭhitā.

### 4. Saṃyojanasuttavaṇṇanā

**64. Kiṃ su saṃyojanoti sūti** nipātamattanti āha **“kiṃ-saṃyojano”** ti? Vicaranti etehīti **vicāraṇā**, pādā. Bahuvacane hi vattabbe ekavacanaṃ kataṃ. **Tassāti** lokassa.

Saṃyojanasuttavaṇṇanā niṭṭhitā.

### 5. Bandhanasuttavaṇṇanā

**65. Catutthe āgataattho eva anantarepi vutto**, byañjanaṃ nānanti āha **“pañcamepi eseva nayo”** ti.

Bandhanasuttavaṇṇanā niṭṭhitā.

### 6. Attahatasuttavaṇṇanā

**66. “Kenassubbhāhato”** ti pāṭhoti adhippāyena **“su-kāro nipātamatta”** nti āha, “kenassabbhāhato” ti pana pāṭhe u-kāralopena padasandhi. **Icchādhūpāyitoti** asampattavisayicchālakkhaṇāya taṇhāya santāpito daḍḍho. Tenāha **“icchāya āditto”** ti.

Attahatasuttavaṇṇanā niṭṭhitā.

### 7. Uḍḍitasuttavaṇṇanā

**67. Ullaṅghitoti ubbandhivā laṅghito. Saddādīsūti** saddādināgadantesu **sotādīni** uḍḍitāni **taṇhārajjunā** dalhabandhanena baddhattā tadanativattanato. **Lokoti** āyatanaloko. Tathā atthayojanāya katattā khandhādīlokavasena yojanā kātabbā. Na **dūraṃ** anantarabhavakattā. Cuticittaantaritattā ekacittantarabhavassa kammaṃ abujjhaṇaṃ, evaṃ sante kasmā sattā na bujjhantīti āha **“balavatiyā”** tiādi.

Uḍḍitasuttavaṇṇanā niṭṭhitā.

### 8. Pihitasuttavaṇṇanā

**68. Pañhoti** nātuṃ icchito attho. **Pucchitoti** sattamasutte gāthāya purimaddhaṃ pacchimaddhaṃ, pacchimaṃ purimaṃ katvā aṭṭhamasutte devatāya pucchitattā vuttaṃ **“heṭṭhupariyāyavasena pucchito”** ti. Pucchānurūpaṃ vissajjananti avuttampi siddhametanti anāhaṭaṃ.

Pihitasuttavaṇṇanā niṭṭhitā.

## 9. Icchāsuttavaṇṇanā

69. Navame **vinayāyāti** vinayena. Karaṇatthe hi idaṃ sampadānavacanaṃ. **Kissassūti** kissa, **su-**kāro nipātamattaṃ. **Sabbaṃ chindati bandhananti** sabbaṃ dasavidhampi saṃyojanaṃ samucchindati. Na hi taṃ kiñci kilesabandhanaṃ atthi, yaṃ asamucchinnaṃ hutvā ṭhitaṃ assā taṇhāya samucchinnāya. Svāyamattho suviññeyyoti āha “**sabbaṃ uttānamevā**”ti.

Icchāsuttavaṇṇanā niṭṭhitā.

## 10. Lokasuttavaṇṇanā

70. **Kisminti** kismiṃ sati? Tassa pana santabhāvo uppattivasevāti āha “**kismiṃ uppanne**”ti? **Loko uppannoti vuccati** anupādānattā lokasamaññāya. **Chasūti** etthāpi eseva nayo **santhavanti** adhikasinehaṃ **karoti** adhikasinehavatthubhāvato ajjhakkāyatanānaṃ. **Upādāyāti** pubbakālakiriyaṃ aparakālakiriyaṃ apekkhatīti vacanasesavasena kiriyaṃ gahitaṃ “**pavattati**”ti. Kim pana pavattati? Loko, lokasamaññāti attho. **Chasūti** idaṃ nimittatthe bhummaṃ. Chaḷāyatananimittaṃhi sabbadukkhaṃ. **Ayanti** sattaloko. **Uppanno nāma hoti** chaḷāyatanānaṃ nāma mūlaṃ sabbadukkhaṇanti katvā. **Bāhiresu** āyatanesu **santhavaṃ karoti** visesato rūpādānaṃ taṇhāvattukattā. Yasmā cakkhādānaṃ santappanavasena rūpādānaṃ pariggahitattā lokassa nisevitāya saṃvattati, tasmā vuttaṃ “**channaṃ...pe... vihaññati**”ti.

Lokasuttavaṇṇanā niṭṭhitā.

Addhavaggavaṇṇanā niṭṭhitā.

## 8. Chetvāvaggo

### 1. Chetvāsuttavaṇṇanā

71. **Vadhivāti** hantvā vināsetvā. **Aparidayhamānattāti** apīyamānattā. **Vinaṭṭhadomanassattā na socati** cetodukkhadukkhabhāvato. Visaṃ nāma dukkhaṃ aniṭṭhabhāvato, tassa mūlakāraṇaṃ kodho aniṭṭhaphalattāti āha “**visamūlassāti dukkhavipākassā**”ti. **Akkuṭṭhassāti** akkosāparādhassa. Akkosapahāratthasambandhena hi “**kuddhassā**”ti upayogatthe sampadānavacanaṃ. **Sukhaṃ uppajjati** kodhaṃ nassati. Sukhuppattiṃ sandhāya esa kodho “**madhuraggo**”ti **vutto**, sukhāvasānoti attho.

Chetvāsuttavaṇṇanā niṭṭhitā.

### 2. Rathasuttavaṇṇanā

72. **Paññānanti** lakkhaṇaṃ sallakkhaṇūpāyo. **Disvāti** dassanaṃ. “**Coḷarañño raṭṭhaṃ coḷaraṭṭha**”nti evaṃ **raṭṭhaṃ raññā paññāyati**.

Rathasuttavaṇṇanā niṭṭhitā.

### 3. Vittasuttavaṇṇanā

73. **Saddhāyāti** saddhāhetu. **Kulasampadāti** khattiyādisampattiyo. Sabbalokiyalokuttaravittapaṭilābhahetuto **saddhāvittameva**. Heṭṭhā tiṇṇaṃ dvārānaṃ vasena

uppannakassa sabbassapi anavajjadhammassa saṅgaṅhanato “**dhammoti dasakusalakammapatho**”ti vuttaṃ. **Asaṃkiliṭṭhasukhanti**. Nirāmisam sukham. Tameva sāmisaṃ upanidhāya sambhāvento āha “**asaṃkiliṭṭha**”nti. Asecanakabhāvena abhirucijananato piyākickhakarānato bahum sucirampi kālam āsevanta adosāvahato **saccameva madhurataram**. Na hi tam pivitabbato sādītabbato anubhavitabbato rasoti vattabbatam arahati. Idāni tassa kiccasampattiatthehipi mahārahataṃ dassetum “**saccasimhi**”tiādi vuttaṃ. Tattha nadīnivattanam **mahākappinavatthuādīhi** (dha. pa. aṭṭha. 1.mahākappinattheravatthu; a. ni. aṭṭha. 1.1.231; theragā. aṭṭha. 2.mahākappinattheragāthāvaṇṇanā) dīpetabbam, itarāni **kaṇhadīpāyanajātaka-** (jā. 1.10.62 ādayo) **sutasoma-** (jā. 2.21.371 ādayo) **macchajātakehi** (jā. 1.1.34, 75; 1.2.131 ādayo) dīpetabbāni. **Nimmaddenti** abhibhavanti. **Madhurataranti** sundarataram seṭṭhesūti attho. **Paññājīvīti** paññāya jīvanasīloti paññājīvī, paññāpubbaṅgamacariyoti attho. **Paññājīvīti** ca paññāvasena iriyati vattati jīvītam pavatteti atthoti dassento “**yo paññājīvī**”tiādimāha. “Jīvata”nti keci paṭhanti, jīvantānam paññājīvīṃ seṭṭhamāhūti attho.

Vittasuttavaṇṇanā niṭṭhitā.

#### 4. Vuṭṭhisuttavaṇṇanā

74. **Uppatantānanti** pathaviṃ bhindivā utṭhahantānam. “Seṭṭha”nti vuccamānattā “**sattavidha**”nti vuttaṃ, itaresam vā tadanulomato. **Khemo hoti** dubbhikkhupaddavābhāvato. Tenāha “**subhikkho**”ti. **Nipatantānanti** adhomukham pavattantānam. **Pavajamānānanti** vajanasīlānam. Te pana yasmā jaṅgamā nāma honti, na rukkhādayo viya thāvarā, tasmā āha “**jaṅgamāna**”nti. **Gāvoti** dhenuyo. Tena mahiṃsādīkānampi saṅgaho daṭṭhabbo. **Vadantānanti** uppannam attham vadantānam.

**Attano khantiyāti** attano khantiyā ruciya gahitabhāvena. **Itarā devatā** tassā vissajjane aparitussamānā āha. **Yāva padhamṣīti** guṇadhamṣī sathhudesanāya laddhabbaguṇānāsanato. **Pagabbāti** pāgabbīyena samannāgatā, yathā vacīpāgabbīyena akharā, tathā vācāya bhavitabbam. **Mukharāti** mukhakarā. **Dasabalam pucchi** saṅham sukhumam ratanattayasamhitam attham sotukāmā. **Assā** devatāya **vissajjento** ajjhāsayanurūpam. **Uppatamānāti** uppatantī **samugghāṭeti** odhiso. **Vaṭṭamūlakamahāvijjāti** tassā ādīnavadassanattam bhūtakathanavisesanam. **Osīdantānanti** paṭipakkhavasena adho sīdantānam, ussādayamānānanti attho. **Puññakkhettabhūtoti** idam “padasā caramānāna”nti padassa atthavivaraṇavasena bhūtakathanavisesanam. **Yādiso putto vā hotūti** idam purimapade devatāya puttagahaṇassa katattā vuttaṃ.

Vuṭṭhisuttavaṇṇanā niṭṭhitā.

#### 5. Bhītāsuttavaṇṇanā

75. **Kim sūdhā bhītāti** ettha **su-idhāti** nipātamattanti āha “**kim bhītā**”ti? **Maggo ca nekāyatanappavuttoti** anekakāraṇam nānāvīdhādīgamokāsam katvā pavutto kathito. Tenāha “**aṭṭhatimsārammaṇavasenā**”tiādi. **Evaṃ santeti** evaṃ sabbasādhāraṇānekāyatanehi nibbānagāmmaggassa tumhehi paveditattā labbamāne khome magge kim bhītāyam janatā uppathabhūtā viparītadīṭṭhito gaṇhīti attho? Evaṃ devatā yathicchāya purimaddhena attanā yathācintitamattam satthu paveditā, pacchimaddhena attano saṃsayam pucchati. **Bahupaññāti** puthupañña. **Ussannapaññāti** adhikapañña. **Ṭhapetvāti** saṃyametvā. **Samvibhāgīti** āhāraparibhoge sammadeva vibhajanāsīlo. Tenāha “**accharāyā**”tiādi. **Vuttatthameva** heṭṭhā.

**Manenāti** manogahaṇena. **Pubbasuddhiānganti** pubbabhāgasuddhibhūtam āngam. **Catūsūti** vuttaṅgapariyāpannam. **Yaññaupakkharoti** dānassa sādhanam. **Etesu dhammesūti** etesu saddhādiguṇesu. Yathā hi saddho paccayam paccupaṭṭhapetvā vatthupariccāgassa visesapaccayo kammaphalassa paralokassa ca paccakkhato viya pattiyāyanato, evaṃ muduhadayo. Muduhadayo hi

anudayaṃ patvā yaṃ kiñci attano santakaṃ paresaṃ deti. Yo ca saṃvibhāgasīlo, so appakasmimpi attano santake parehi sādhaṇabhogī hoti. Vadaññū vadānīyatāya yāginova yuttaṃ yuttakālaṃ ñatvā atthikānaṃ manorathaṃ pūretīti vuttaṃ “**iti...pe... catūsūti āhā**”ti.

**Vācantiādīni tīni aṅgāni** tividhasīlasampattidīpanato. Sampannasīlo hi paralokaṃ na bhāseyya. **Saddho ekaṃ aṅgaṃ** payogāsayasuddhidīpanato. Suddhāsayaassa sammāpayoge ñhitassa kathaṃ paralokato bhayanti. Dukavasena caturāṅgayojanā **dukanayo. Etesu catūsu dhammesu ñhitoti** etesu yathāvuttadukasaṅghesu catūsu guṇesu paṭiṭṭhito.

Bhītāsuttavaṇṇanā niṭṭhitā.

## 6. Najīratisuttavaṇṇanā

76. **Nāmagottanti** tisso kassapo gotamoti evarūpaṃ nāmañca gottañca. Nidassanamattametam, tasmā sabbassa paññattiyā lakkhaṇavacananti daṭṭhabbaṃ. **Na jīratīti** asabhāvadhammattā uppādavayābhāvato jaraṃ na pāpuṇāti. Tenāha “**jīraṇasabhāvo na hotī**”ti. Yasmā samaññābhāvato kālantarepi taṃ samaññāyateva, tasmā “**atītabuddhānaṃ...pe... na jīratīti vuccatī**”ti āha.

**Ālasiyanti** alasabhāvo daḥkosajjaṃ. Tenāha “**yenā**”tiādi. **Ñhitinti** byāpāraṃ. **Niddāvasena pamajjanaṃ** kattabbassa akaraṇaṃ. **Kilesavasena pamajjanaṃ** akattabbassa karaṇampi. **Kammasamayeti** kammaṃ kātuṃ yuttakāle. **Kammakaraṇavīriyābhāvoti** taṃkammakiriyasamuṭṭhāpakavīriyābhāvo. So pana atthato vīriyapaṭipakkho akusalacittuppādo, na vīriyassa abhāvamattaṃ. **Sīlasaññamābhāvo** dussīlyaṃ. **Vissaṭṭhācāratā** nāma anācāro. **Soppabahulatāti** niddālutā. Yato gahaṇahatthopi na kilāsupi puriso niddāya abhibhuyyati. Tenāha “**tāyā**”tiādi. **Aticchātādīnīti ādi**-saddena abhibhuyyatādīṃ saṅgaṇhāti. **Āgantukālasīyaṃ** na pubbe vuttaālasyaṃ viya pakatisiddhaṃ. “Te chidde”ti pāliyaṃ līngavipallāsena vuttanti āha “**tāni cha chiddāni**”ti. Kusalacittappavattiyā anokāsabhāvato **chiddāni**. Tenāha bhagavā – “**yattha vittaṃ na tiṭṭhatī**”ti. **Sabbākārena** lesamattaṃ asesetvāti adhippāyo.

Najīratisuttavaṇṇanā niṭṭhitā.

## 7. Issariyasuttavaṇṇanā

77. Satthassa malanti **satthamalaṃ**, yena satthaṃ malīnaṃ hoti, satthamalaggahaṇena cettha malīnaṃ satthameva gahitanti āha “**malaggahitasattha**”nti. **Āṇāpavattananti** appake vā mahante vā yattha katthaci attano āṇāya pavattanavasena vasanaṃ issariyattamicchanti. Mañiratanampi vissajjanīyapakkhikattā uttamaṃ bhaṇḍaṃ nāma na hoti, itthī pana pariccattakulācārithikāyapi anissajjanīyatāya uttamabhaṇḍaṃ nāma. Tenāha “**itthī bhaṇḍānamuttama**”nti. Tesam tesañhi purisājānīyānaṃ uppattiṭṭhānatāya uttamaratanākarattā itthī bhaṇḍānamuttamaṃ. **Malaggahitasatthasadiso** avabodhakiccavibandhanato. Satthamalaṃ viya satthassa paññāsathassa guṇābhāvakaraṇato **paññāsathamalaṃ**. Abbu vuccatī upaddavaṃ, taṃ detīti **abbudaṃ**, vināsakāraṇaṃ. Nanu haraṇaṃ samaṇassa ayuttanti? Yuttaṃ. Tassa anvayato byatirekato ca yuttataṃ dassento “**salākabhattādīnī**”tiādīmāha.

Issariyasuttavaṇṇanā niṭṭhitā.

## 8. Kāmasuttavaṇṇanā

78. “Attakāmo”ti pāliyaṃ vuttattā āha “**ñhapetvā sabbabodhisatte**”ti. Te hi sabbaso paratthāya eva paṭipajjamānā mahākāruṇikā paratthakāmā, atthakāmā nāma na hontī, yā ca tesam attatthāvahā

paṭipatti, sāpi yāvadeva paratthā evāti. **Vuttam** porāṇaṭṭhakathāyaṃ. Yasmā bodhisattā parahitapaṭipattiyā pāramiyo pūrentā tathārūpaṃ kāraṇaṃ patvā attānaṃ paresaṃ pariccajanti paññāpāramiyā paripūraṇato, tasmā idhāpi “**sabbabodhisatte ṭhapetvāyevāti vutta**”nti āha. **Kalyāṇanti** bhaddakaṃ. Vācāya adhippetattā āha “**saṅhaṃ muduka**”nti. **Pāpikanti** lāmakam nihīnaṃ. Tam pana **pharusam vācanti** sarūpato dasseti.

Kāmasuttavaṇṇanā niṭṭhitā.

## 9. Pātheyyasuttavaṇṇanā

**79. Saddhā bandhati pātheyyanti** saddhā nāma sattassa maraṇavasena mahāpathaṃ saṃvajato mahākantāraṃ paṭipajjato mahāviduggaṃ pakkhandato pātheyyapuṇaṃ bandhati sambalaṃ sajjeti. Kathanti āha “**saddhaṃ uppādetvā**”tiādi. **Etam vuttanti** “saddhā bandhati pātheyya”nti etam gāthāpadaṃ vuttam bhagavatā. **Sirīti** katapuññehi sevīyati tehi paṭilabhīyatīti sirī. **Issariyaṃ** vibhavo. Āsayitabbato āsayo, **vasanaṭṭhānaṃ** niketanti attho. **Parikaḍḍhatīti** icchāvasikaṃ puggalaṃ tattha tattha upakaḍḍhati.

Pātheyyasuttavaṇṇanā niṭṭhitā.

## 10. Pajjotasuttavaṇṇanā

**80.** Tam tam samavisamaṃ pajjotatīti **pajjoto**. Padīpo andhakāraṃ vidhamitvā paccakkhato rūpagataṃ dasseti, evaṃ paññāpajjoto avijjandhakāraṃ vidhamitvā dhammānaṃ paramatthabhūtaṃ rūpaṃ dasseti. **Jāgarabrāhmaṇo viyāti** jāgarakhīṇāsavabrāhmaṇo viya. So hi satipaññāvepullappattiyā sabbadāpi jāgaro hoti. **Gāvoti** gojātiyo. Idam gunnaṃ goṇānaṃca sāmāññato gahaṇaṃ. **Kammeti** karaṇatthe bhumavacanaṃ. Jīvanaṃ jīvo, saha jīvenāti **sajjīvino**. Tenāha “**kammena saha jīvantāna**”nti, kasivāññijjādikammaṃ katvā jīvantānanti attho. **Gomaṇḍalehi saddhinti** gogaṇena saha. Na tena vinā kasikammādīni uppajjanti, gorasasiddhiyā ceva kasanabhāravahanasiddhiyā ca kasikammaekaccavāññijjakammādīni ijjhanti. **Sattakāyassāti** āhārupajjīvino sattakāyassa kasito aññathā jīvikam kappentassapi kasijjīvitavuttiyā mūlakāraṇaṃ phalanipphattinimittattā tassa. **Iriyāpatho** ca iriyanakiriyānaṃ pavattanupāyo. “**Sītanti** naṅgalasītakamma”nti vadanti.

Pajjotasuttavaṇṇanā niṭṭhitā.

## 11. Araṇasuttavaṇṇanā

**81.** Raṇanti kandanti etehīti raṇā, rāgādayo. Tehi abhibhūtatāya hi sattā nānappakāraṃ kandanti paridevanti. Te pana sabbaso natthi etesaṃ raṇāti **araṇā**. **Nikkilesā** khīṇāsavā. **Vusitavāsoti** vusitabrahmacariyavāso. **Bhojissiyanti** bhujissabhāvo. Tenāha “**adāsabhāvo**”ti. **Samaṇāti** samitapāpasamaṇāti āha “**khīṇāsavasamaṇā**”ti. Puthujjanakalyāṇakāle lokiyapariññāya, **sekkhā** pubbhāge lokiyapariññāya, paccavekkhaṇe **lokiyalokuttarāya pariññāya** pariññeyyaṃ tebhūmakam khandhapañcakaṃ **parijānanti** paricchijjanti. Khīṇāsavā pana pariññātapariññeyyā honti. Tathā hi te sāmī hutvā paribhuñjanti. **Vandanti nam patiṭṭhitanti** vuttam, vandanīyabhāvo ca sīlasampannatāyāti āha “**patiṭṭhitanti sīle patiṭṭhita**”nti. **Idhāti** imasmim loke. **Khattiyāti** lakkhaṇavacanaṃ āha “**na kevalam khattiyāvā**”tiādi.

Araṇasuttavaṇṇanā niṭṭhitā.

Chetvāvaggavaṇṇanā niṭṭhitā.

Sāratthappakāsiniyā saṃyuttanikāya-aṭṭhakathāya  
Devatāsaṃyuttavaṇṇanāya līnatthappakāsanā samattā.

## 2. Devaputtasaṃyuttam

### 1. Paṭhamavaggo

#### 1. Paṭhamakassapasuttavaṇṇanā

82. Devassa putto **devaputto**. Devānaṃ janakajanetabbasambandhābhāvato kathamayaṃ devaputtoti vuccatīti āha “**devānaṃ hī**”tiādi. “Apākaṭo aññataroti vuccatī”ti idaṃ yebhuyyavasena vuttam. Pākaṭopi hi katthaci “aññataro”ti vuccati. Heṭṭhā devatāsaṃyutte “apākaṭā aññatarā devatā”ti vatvā idha “pākaṭo devaputto”ti vuttam. Tathā hissa **kassapoti** gottanāmaṃ gahitaṃ, tañca kho purimajātisiddhasamaññāvasena. Anusānaṃ anusāso, taṃ **anusāsaṃ**. **Bhikkhuniddesanti** bhikkhusaddassa niddesaṃ. **Bhikkhuovādanti** bhikkhubhāvāvahaṃ ovādaṃ. Yadi pana na assosi, kathamayaṃ pañhaṃ kathesīti? Aññato sutam nissāya pañhaṃ kathesi, na pana bhagavato sammukhā sutabhāvena.

**Tesanti** yathāvuttānaṃ tiṇṇaṃ puggalānaṃ. “**Kathetukāmo cevā**”tiādinā hi catutthaṃ idha uddhaṭam. Tattha ādito tiṇṇaṃ bhagavā pañhaṃ bhāraṃ na karoti ekekaṅgavekallato ceva aṅgadvayavekallato ca, catutthassa pana ubhayaṅgapāripūrattā bhāraṃ karotīti āha “**ayaṃ panā**”tiādi.

Gāthāyaṃ “**subhāsitaṃ**”ti upayogathe sāmivacananti āha “**subhāsitaṃ sikkheyyā**”ti. Catusaccādinissitaṃ buddhavaṇṇanaṃ sikkhanto catubbidhaṃ vacīsucaritaṃ sikkhati nāmāti āha “**catusaccanissitaṃ...pe... sikkheyyā**”ti. Avadhāraṇena tappaṭipakkhaṃ paṭinivatteti. **Upāsitaṃ** āsevitabbaṃ bhāvetabbaṃ bahulīkātabbaṃ. **Aṭṭhatimsabhedam kammaṭṭhānanti** idaṃ tassa vipassanāpadaṭṭhānataṃ hadaye ṭhapetvā vuttam. Tathā hi vuttam “**dutiyaṃ padena adhipaññāsikkhā kathitā**”ti. Ye pana “dutiyaṃ padena adhicittasikkhā cittaṃ vūpasameṇa adhipaññāsikkhā”ti paṭhanti, tesam padena aṭṭhatimsappabhedakammaṭṭhānaṃ suddhasamathakammaṭṭhānasseva gahaṇaṃ daṭṭhabbaṃ. Yadi evaṃ “aṭṭhasamāpattivasenā”ti idaṃ kathanti? “Taṃ vipassanādhīṭṭhānānaṃ samāpattīnaṃ vasena kathita”nti vadanti. Evañca katvā “dutiyaṃ padena adhipaññāsikkhā”ti idaṃ vacanaṃ samatthitaṃ hoti. Sikkhanaṃ nāma āsevananti āha “**bhāveyyāti attho**”ti. **Upāsanaṃ** payirupāsanaṃ. Tañca kho assutapariyāpuṇanakammaṭṭhānuggahādivasena dassento “**tampi**”tiādimāha. **Adhisīlasikkhā kathitā** lakkhaṇahāranayena. Vacīsucaritassa hi sīlasabhāvattā taggaṇeṇeva tadekalakkhaṇaṃ kāyasucaritampi itarampi gahitamevāti. Ettha ca adhisīlasikkhāya cittaṃ viveko, adhipaññāsikkhāya upadhiviveko, adhicittasikkhāya kāyaviveko kathito, kāyaviveko pana sarūpeneva pāliyaṃ gahitoti tividhassapi vivekassa pakāsītattam daṭṭhabbaṃ. Sesam suviññeyyameva.

Paṭhamakassapasuttavaṇṇanā niṭṭhitā.

#### 2. Dutiyaṃ kassapasuttavaṇṇanā

83. **Dvīhi jhānehīti** ārammaṇalakkhaṇūpaniṭṭhānalakkhaṇehi dvīhi jhānehi. **Kammaṭṭhānavimuttiyāti** kammaṭṭhānānuyogaladdhāya vimuttiyā. Tena tadanāgavikkhambhanavimuttiyo vadati. Sattusāsanassa hadayattā abhantarattā **hadayassa** mānasassa, **anupattiṃ** paṭilābhamānasam. Taṃ pana atthato aññā evāti āha “**arahatta**”nti. Taṃ pattukāmena ekantato vajjetabbataṇhādīṭṭhānaṃ bhāve tassa anijjhanato, tadabhāve ijjhanato ca te uppādanavasena yadaggena nissito, tadaggena paṇāyampi tehi nissito nāma hotīti āha “**anissito**”tiādi. Arahattaṃ ānisaṃsitabbaṭṭhena ānisaṃsam etassāti **arahattānisamso**. Arahattaṃ pattukāmassa



pubbabhāgapaṭipadā icchitabbā. Tattha ca sabbapaṭhamo kammaṭṭhānaattānuyogo, so idha na gahitoti āha “**tantidhammo pubbabhāgo**”ti. Tattha **tantidhammoti** pariyattidhammo.

Dutiyakassapasuttavaṇṇanā niṭṭhitā.

### 3. Maghasuttavaṇṇanā

**84. Maghoti** sakkassetam nāmaṃ purimajātianugataṃ. **Svevāti** sakko eva. **Vatenāti** mātāpituupattṭhānādicārittadhammena. **Aññeti** upadhivepakkapāpadhamme abhibhavivā. **Asuranti** indasattubhūtaṃ asuraṃ.

Maghasuttavaṇṇanā niṭṭhitā.

### 4. Māgadhasuttavaṇṇanā

**85. Catutthasuttaṃ vuttatthamevāti** devatāsaṃyutte saṃvaṇṇitattameva, tasmā idha na vattabbo atthoti adhippāyo.

Māgadhasuttavaṇṇanā niṭṭhitā

### 5. Dāmalisuttavaṇṇanā

**86. Tena kāraṇenāti** tena padhānena kāraṇabhūtena, padhānakaraṇanimittanti attho. **Yaṃ kiñci** khuddakampi mahantampi hīnampi paṇītampi **bhavaṃ. Āyatapaggahoti** dīgharattassa vīriyārambho. **Kiccavosānanti** kiccaniṭṭhānaṃ. **Tathevāti** yathā arahattupattito pubbe, tato pacchāpi tatheva “buddhipaggaho”ti vīriyaṃ daḷhaṃ karotūti kuppadhammaṃ viya maññamāno vadati. **Diṭṭhadhammasukhavihārādiatthaṃ** pana vīriyakaraṇaṃ icchitabbameva.

**Asamkiṇṇāti** avomissā evaṃ aññattha anāgatattā. Tenāha “**bhagavatā hī**”tiādi. Yadi evaṃ idheva kasmā etaṃ vuttanti āha “**idha panā**”tiādi. **Patiṭṭhanti** nadī nāma anavaṭṭhitatīrā, tattha patiṭṭhātabbaṭṭhānaṃ.

Dāmalisuttavaṇṇanā niṭṭhitā.

### 6. Kāmadasuttavaṇṇanā

**87. Pubbayogāvacaroti** pubbe yogāvacaro purimattabhāve bhāvanamanuyutto. Ayaṃ kira kassapassa bhagavato sāsane pabbajitvāva bahūni vassasahassāni samaṇadhammaṃ akāsi, na pana visesaṃ nibbatesi. Tamatthaṃ kāraṇena saddhiṃ dassetaṃ “**bahalakilesatāyā**”tiādi vuttaṃ. **Ekantaparissuddhassāti** yathā visesāvaho hoti, evaṃ ekantena parisuddhassa sabbaso anupakkiliṭṭhassa. **Sīlena samāhitāti** yathā sīlaṃ uparūpari visesāvahaṃ nibbedhabhāgiyañca hoti, evaṃ sammadeva āhitacittā suṭṭhu sampannacittā. Tathābhūtā tena samannāgatā hontīti āha “**samupetā**”ti. **Patiṭṭhitasabhāvāti** sekkhattā eva yathādhighatadhammena niccalabhāvena adhiṭṭhitasabhāvā. Mayā tuṭṭhiyā gahitāya devaputto “dullabhā tuṭṭhī”ti vakkhatīti bhagavā “tuṭṭhi hoti sukhāvahā”ti avocāti āha “**upari pañhasamuṭṭhāpanattha**”nti. Pabbajito rukkhāmūliko abbhokāsiko vā anagāriyupeto nāma hoti, senāsane pana vasanto kathanti āha “**sattabhūmike**”tiādi. **Catupaccayasantosoti** bhāvanābhīyogasiddho catūsu paccayesu santoso. Tena cittavūpasamena tuṭṭhi laddhāti dasseti. **Cittavūpasamabhāvanāyāti** cittakilesānaṃ vūpasamakarahāvanāya, manacchatṭhānaṃ indriyānaṃ nibbisevanabhāvakaraṇena savisesaṃ cittassa vūpasamakarahāvanāya rato manoti yojanā.

Ettha ca indriyūpasamena cittasamādhānaṃ paripuṇṇaṃ hoti indriyabhāvanāya cittasamādhānassa akārakānaṃ dūrīkaraṇato. Adhiccittasamādhānena catupaccayasantoso savisesaṃ parisuddho paripuṇṇo ca hoti paccayānaṃ alābhalābhesu pariccāgasabhāvato. Vuttanayena pana santuṭṭhassa yathāsamādinnaṃ sīlaṃ visujjhati pāripūriṇca upagacchati, tathābhūto catusaccakammaṭṭhāne yutto maggaṭṭipāṭiyā sabbaso kilese samucchindanto nibbānadiṭṭho hotīti imamatthaṃ dasseti “**ye rattindiva**”ntiadinā. **Kim na gacchissanti?** Gamissantevāti ariyamaggabhāvanaṃ pahāya sammāṭṭipattiyā dukkarabhāvaṃ sandhāya sāsāṅkaṃ vadati. Tenāha “**ayaṃ pana duggamo bhagavā visamo maggo**”ti.

Tattha keci “ayaṃ panāti devaputto. So hi bhagavato ‘ariyā gacchantī’ti vacanaṃ sutvā ‘duggamo bhagavā’tiadinā”ti vadanti, taṃ na yujjati. Yasmā “saccameta”nti evamādiṭṭhi tasseva vevacanaṃ katvā dassitaṃ, tasmā “yena maggena ariyā gacchantī”ti tumhehi vuttaṃ, ayaṃ pana “duggamo bhagavā visamo maggo”ti āha devaputto. Ariyamaggo kāmaṃ kadāci atidukkhā ṭṭipadāṭṭipī vuccati, taṅca kho pubbabhāgaṭṭipadāvasena, ayaṃ pana atīva sugamo sabbakilesaduggavivajjanato kāyaduccarītādivisamassa rāgādivisamassa ca dūrīkaraṇato na visamo. Tenāha “**pubbabhāgaṭṭipadāyā**”tiadi. **Assāti** ariyamaggassa. Ariyamaggassa hi adhisīlasikkhādīnaṃ paribundhitabbabhāgena bahū parissayā hotīti. **Evaṃ vuttoti** “duggamo visamo”ti ca evaṃ vutto.

**Avamsirāti** anuṭṭhahanena adhobhūtauttamaṅgā. Kusalaṅgesu hi sammādiṭṭhi uttamaṅgā sabbasetṭhātā, taṅca anariyā patanti na uṭṭhahanti micchāṭṭipajjanato. Tenāha “**ñāṇasirenā**”tiadi. **Anariyamaggeti** micchāmagge. Tenāha “**visame magge**”ti. Taṃ magganato anariyā ariyānaṃ maggato apāpuṇaṇena pariccattā hutvā apāye sakalavaṭṭadukkhe ca patanti. **Snevāti** svāyaṃ anariyehi kadāciṭṭhi gantuṃ asakkuṇeyyo maggo ariyānaṃ visuddhasattānaṃ sabbaso samadhigamena **samo hoti**. Kāyavisamādihi samannāgatattā **visame sattakāye** tesam sabbasova pahānena sabbattha **samāyeva**.

Kāmadassuttavaṇṇanā niṭṭhitā.

## 7. Pañcālacaṇḍasuttavaṇṇanā

**88. Sambādheti** sampīṭitatanhākilesādinā sauppīṭatāya paramasambādhe. Ativiya saṅkāraṭṭhānabhūto hi nīvaraṇasambādho adhippeto. So hi duggahano tasmiṃ asati kāmaguṇasambādho anavasaro eva seyyathāpi mahākassapādīnaṃ. **Okāsanti jhānassetam nāmaṃ** nīvaraṇasambādhabhāvato. Asambādhabhāvena hi jhānaṃ idha “okāso”ti vuttaṃ, taṅca kho accantāsambādhaṭṭhānatāya vipassanāpādakatāya. Tathā hi pāṭiyam “avindī”tiadi vuttaṃ. Tattha **avindīti** vindi ṭṭipalabhi. **Bhūrimedhasoti** mahāpaṇṇo, sapaṇṇoti attho. **Abujjhīti** bujjhi ṭṭipavijjhi. ṭṭipilīno hutvā seṭṭho, ṭṭipilīnaṃ vā seṭṭhoti **ṭṭipilīnasetṭho**. Mānussayavasena unnatabhāvato **ṭṭipilīno nāma pahīnamāno**. **ṭṭipilābhimsūti** kāmaguṇasambādhepi “ime kāmaguṇā mādisānaṃ kim karissanti”ti? Te abhibhuyya nibbānappattiyā sammāsatiṃ ṭṭipilābhimsu. Tena sampayuttana lokuttarasamādhināpi suṭṭhu samāhitā.

Ayaṃ kira devaputto ito purimavāre attabhāve paṭṭhamajjhānalābhī hutvā tato cavitvā brahmakāyikāsu nibbattivā tattha jhānasukhaṃ anubhavitvā tato cuto idāni kāmabhāve nibbatta, tasmā taṃ jhānaṃ sambhāvento “tādisassa nāma jhānasukhassa lābhī bhagavā”ti tena guṇena bhagavantaṃ abhithhavanto “**sambādhe vatā**”ti gāthaṃ abhāsī. Athassa bhagavā yathā nāma aṭṭhasaṭṭhiyojanasatasahassubbedhasinerupabbatarājaṃ upādāya sāsapo na kiṅci hoti, evaṃ anantāparimeyyabuddhaguṇe upādāya rūpāvacarapaṭṭhamajjhānaṃ na kiṅci hotīti dassento “**ye sati**”ntiadinā anuttaraguṇādhigamaṃ pavedesi. Tattha **sati**ti vipassanāsatiyā saddhiṃ ariyamaggasatiṃ. **Susamāhitāti** lokiyasamādhinā ceva lokuttarasamādhinā ca suṭṭhu samāhitā. Te hi accantaṃ susamāhitā, na jhānamattalābhino akuppadhamattā. Keci “kammante susamāhitā”ti paṭṭhaṃ vatvā “maggasamāhitā”ti atthaṃ vadanti.

Pañcālacaṇḍasuttavaṇṇanā niṭṭhitā.

### 8. Tāyanasuttavaṇṇanā

89. Atītajātiyaṃ sayamkāravasena tāya diṭṭhiyā uppāditattā **pubbe titthakaro**. Tenāha “**diṭṭhi uppādetvā**”ti. Apare āhu “ayaṃ me satthāti gahaṇavasena titthakaro assa atthīti **pubbe titthakaro**, atītattabhāve titthakarasāvako”ti. Te “**diṭṭhiṃ uppādetvāti** tassa satthuno diṭṭhiṃ ādāya gahetvāti attho”ti vadanti. **Tittham nāma dvāsaṭṭhi diṭṭhiyo** tabbinimuttassa micchāvādassa abhāvato. Titthe niyuttāti titthikā, te eva **titthiyāti** vuttā ka-kārassa ya-kāraṃ katvā. **Tassāti** yathāvuttassa kalyāṇakammassa. **Nissandenāti** phalabhāvena. **Vīriyappaṭisaṃyuttāti** vīriyadīpanāti attho.

**Aniyamitaṇṇattīti** aniyamavidhānaṃ aniyamavasena vidhivacanaṃ. **Taṇhāsotanti** taṇhāppabandhanaṃ. **Nīharāti** samehi pajaha. **Ekattanti** ekaggaṃ. Tenāha “**jhāna**”nti. **Upapajjatīti** na uppajjati na pāpuṇātīti āha “**na paṭilabhati**”ti. **Na osakkeyyāti** na saṅkocaṃ āpajjeyya. Gharāvāsato paribbajanaṃ parito apagamoti **paribbajo**. Pabbajitavatasamādānassa adalhatāya ca tattha ca asakkaccakiriyāya **sithilagahitā**. **Atirekanti** pabbajjāya purimakālatopi adhikaṃ. **Uparīti** uparūpari. **Dukkaṭaṃ akatameva seyyoti** duccharitaṃ nāma sabbena sabbaṃ akatameva hitāvahaṃ.

**Yaṃ kiñcīti** yaṃ kiñci kammaṃ. **Sithilaṃ katanti** asakkaccakāritāya sithilaṃ katvā pavattitaṃ. **Evarūpamevāti** evarūpaṃ parāmaṭṭhasāmaññasadisameva pacchānutāpacariyādīpaṭibhāgato. **Samkiliṭṭhameva** taṇhāsamkilesaupakkiliṭṭhattā. **Āsaṅkitaparisaṅkitanti**ādito samantatopi parehi saṅkitaṃ. Brahmācariyassa ādi ādibrahmācariyaṃ, tattha niyuttāti **ādibrahmācariyikā**, maggabrahmācariyassa pubbabhāgapaṭipadāti attho. Tenāha “**maggabrahmācariyassa ādibhūtā**”ti. **Pubbapadhānabhūtāti** paṭhamārambhābhūtā.

Tāyanasuttavaṇṇanā niṭṭhitā.

### 9. Candimasuttavaṇṇanā

90. Vimāne gahite taṃnivāsīpi gahito hotīti vuttaṃ “**candavimānavāsī devaputto**”ti. **Sabbadhīti** sabbasmā duggaṭṭhānā **vippamuttosi** bhagavā tvaṃ, tasmā mayhampi ito sambādhaṭṭhānato vippamokkhaṃ karohīti adhippāyo. Tenāha “**tassa me saraṇaṃ bhavā**”ti. **Lokānukampakāti** sabbassa lokassa anuggahā, tasmā tuyhampi etassapi candassa. **Tādisā evāti** samānā eva. Pamañcasīti pamañcittha. Tenāha “**atītatthe vattamānavacana**”nti.

Candimasuttavaṇṇanā niṭṭhitā.

### 10. Sūriyasuttavaṇṇanā

91. **Andhabhāvakarāṇeti** lokassa andhakarāṇetipi apare. Tenāha “**tamasī**”ti. **Virocatīti** vijjotati. Kāmaṃ devaputtavasena paṭhamaṃ devatā uddhaṭā, rāhuno pana payogo tassa vimāneti āha “**maṇḍalīti maṇḍalasaṇṭhāno**”ti. **Vadati** tadā mukhena gahitattā. Mukhena gahaṇaṇcetttha “gīlī”ti adhippettaṃ, na ca ajjhoharaṇanti āha “**gīlīti vadati**”ti. Idāni tassa mukhena gahaṇasamatthataṃ dassetuṃ “**rāhussa hī**”tiādi vuttaṃ. **Sotiādi** tassa candimasūriyānaṃ gahaṇakāraṇadassanaṃ. **Adhivatthā devatāti** candimasūriyānaṃ paricārakadevatā. **Veganti** javaṃ. So hi kenaci abhimukhaṃ atidunnivāro kammaniyaṃasiddho. **Matthakanti** kaṇṭhassa uparimadesaṃ. Keci “sīsamatthakamevā”ti vadanti. **Nikkhameyya** vegassa tikkhasīgathāmbhāvato. **Ākaḍḍhitvāti** attano gamanadisābhimukhaṃ ākaḍḍhitvā. **Nanti** rāhuṃ. Uddhaṃ ullaṅghetukāmampi **onameyya**. Padadvayenapi so mahāsārīro mahābalo, candimasūriyānaṃ pana gamanavego tena sabbathāpi dunnivāriyovāti dasseti. **Vimānenāti** candaggahe candavimānena, sūriyaggahe sūriyavimānena ubhinnaṃpi vimānena saheva. Amāvāsīyañhi

dve vimānāni yojanamattantaritāni hutvā saheva pavattanti. Yadi dvepi devaputtā sotāpatti-phalaṃ pattā, atha kasmā sūriyasutte eva “pajaṃ mama”nti vuttaṃ, na candasutteti? “So ca kira na cirasseva tato cavitvā aññattha nibbato, aññā eva ca devatā tattha vasi, yasmim candaggahe bhagavā taṃ gāthaṃ abhāsi, na tathā sūriyo, aparabhāge pana tatthapi kālena kālaṃ rāhuggaho hotī”ti vadanti.

Sūriyasuttavaṇṇanā niṭṭhitā.

Paṭhamavaggavaṇṇanā niṭṭhitā.

## 2. Anāthapiṇḍikavaggo

### 1. Candimasasuttavaṇṇanā

92. Pabbataṭṭhā sandamāno tathārūpo nadīnivattanapadesopi sambādhaṭṭhānatāya kaccho viyāti āha “**pabbatakacchepī**”ti. Paṭipakkhadūrībhāvena seṭṭhaṭṭhena ca eko udetīti ekodi, ekaggatā. Tasmim yogato ekaggacittā idha **ekodī**. Paṭipakkhato attānaṃ nipayanti visodhentīti **nipakā**, paññavanto. Tenāha “**ekaggacittā cevā**”tiādi. Kāyādibhedam ārammaṇam sātisayāya satiyā sarantīti **satā**. Tenāha “**satimanto**”ti. **Sotthim gamissantīti** yathāvuttapadese magā sotthimanupaddavena vattissanti, evaṃ jhānalābhino sotthim kilesehi anupaddutā vattissanti. Ayaṃ kira devaputto brahmaloke nibbānasaññī, tasmā evamāha. Bhagavā “ayaṃ devaputto anibbānagāmī samāno nibbānagāmisaññī, handassa nibbānagāmino dassemi”ti dutiyaṃ gāthamāha. Catunnaṃ oghānaṃ, saṃsāramahoghasseva vā paratīrabhāvato paratīranti **nibbānaṃ**. Ambuni jāto **ambujo**, maccho. Suttajālam chinditvā macchā viya kilesajālam bhinditvā gamissantīti.

Candimasasuttavaṇṇanā niṭṭhitā.

### 2. Veṇḍusuttavaṇṇanā

93. **Payirupāsīyāti** payirupāsahetu. **Sikkhantīti** tissopi sikkhā sikkhanti. **Siṭṭhipadeti** kilesānaṃ sāsanato vaṭṭadukkharittāsanato ca siṭṭhisāññite yathānusiṭṭhaṃ paṭipajjitabbato pade, saddhammeti attho. Tenāha “**anusīṭṭhipade**”ti. Tattha **anusīṭṭhīti** saddhammo. **Kāleti** yuttapattakāle. **Appamādonāma** samathavipassanābhāvanā.

Veṇḍusuttavaṇṇanā niṭṭhitā.

### 3. Dīghalaṭṭhisuttavaṇṇanā

94. **Tatheva paññāyīti** dīghalaṭṭhitveva paññāyī, tathāsamaññā eva ahosi.

Dīghalaṭṭhisuttavaṇṇanā niṭṭhitā.

### 4. Nandanasuttavaṇṇanā

95. Natthi etassa āvaṭṭam āvaraṇanti **anāvaṭṭam**. **Rukkho vā pabbato vāti** sattānaṃ pakaticakkhussa āvaraṇabhūto rukkho viya pabbato viya ca abhibhavitum samattho ñeyyāvaraṇo natthi. **Kathaṃvidhanti** kathaṃsaṅghitaṃ, kathaṃpakāraṃ vā. **Dukkhamti** vaṭṭadukkham.

Nandanasuttavaṇṇanā niṭṭhitā.

### 5. Candanasuttavaṇṇanā

**96. Heṭṭhā**ti kāmabhava. Tattha hi paribbhamantassa patiṭṭhā dullabhā yebhuyyena tattha sattā nimuggā eva honti, tasmā heṭṭhā appatiṭṭho saṃsāro. **Uparī**ti mahaggatabhava. Tattha hi nibbattassa nibbānaṃ āruhituṃ ālambanā dullabhā, jhānābhiratīyā tattheva nikanti tesam balavatī hoti, tasmā upari anālambano saṃsāro. **Pesitattoti** nibbānaṃ pati pesitacitto. **Tayo kammābhisaṅkhārā**ti puññābhisaṅkhārādayo tayo abhisaṅkhārā. Tena “nandīpubbako kammabhavo”ti vatvā “nandim janetvā”ti vutto. Kāmasaññāsīsenā kāmaccchandassa gahaṇaṃ, kāmaccchandapamukhāni ca orambhāgiyaṣaṃyojanāni gahitānīti āha “**kāmasaññāgahaṇena pañcorambhāgiyaṣaṃyojanāni**”ti. Rūpabhavo rūpaṃ bhavapadalopena. Rūpabhavaggahaṇena cettha sesabhavassapi gahaṇaṃ. Tassa saṃyojanaggahaṇena pañca uddhambhāgiyaṣaṃyojanāni gahitāni. **Mahogheti** saṃsāramahoghe. **Tesanti** kāmabhavādīnaṃ **gahaṇena** bhavabhāvena tadekalakkhaṇatāya. **Arūpabhavo gahito** lakkhaṇahāranayena. Sesam suviññeyyameva.

Candanasuttavaṇṇanā niṭṭhitā.

### 6. Vāsudattasuttavaṇṇanā

**97. Chaṭṭhaṃ** heṭṭhā devatāsaṃyuttavaṇṇanāyaṃ **vuttatthameva**.

Vāsudattasuttavaṇṇanā niṭṭhitā.

### 7. Subrahmasuttavaṇṇanā

**98. Subrahmā**ti tassa devaputtassa nāmaṃ. Tassa satthu santikūpasāṅkamanassa kāraṇaṃ dassento “**so kirā**”tiādīmāha. Tadeva sokaṃ tassa devaputtassa aṭṭhuppatti. **Accharāsaṅghaparivutoti** sahasamattena accharāsaṅghena parivuto. **Nandanakīlikanti** nandanavanakīlikam. **Hatthaṃ āgacchatī**ti hatthagayhupago hoti. **Ganthenti** ettha mālāveṭhanampi khiḍḍāpasutatāyāti daṭṭhabbaṃ. Aññathā pupphāniyeva tāya tāya cittassa vasena mālābhāvena hatthaṃ upagacchantīti. **Upachedakakammavasenā**ti tasmim devaloke āyusese sati eva tassa pana upaghātakassa laddhokāsassa pāpakammaṣa vasena. “Pahāro”ti divasassa tatiyo bhāgo vuccati, tasmā **ekappahārenevā**ti ekavelāyamevāti attho.

**Piyavatthukasokenā**ti piyavatthunimittakena sokena. **Ruppamānoti** pīliyamāno. **Sattame divaseti** manussagaṇanāya sattame divase. **Tatthevā**ti tasmimyeva nīraye **nibbattitabbaṃ** iminā tāhi ca saheva pubbe tassa pāpakammaṣa katattā. **Ruppī**ti cittasantāsaṃ āpajji. **Niddhamitunti** nīharitūṃ apanetūṃ. **Satthu santikaṃ gantvā**ti tāhi pañcasatāhi accharāhi saddhim bhagavato santikaṃ gantvā.

**Idanti attano cittaṃ dasseti** āsannapaccakkhabhāvato. **Niccanti** sadā. Svāyaṃ niccatto adhippāyavasena gahetabboti tattha pahātabbaṃ gahetabbañca dassento “**devaloke**”tiādīmāha. **Na gahetabbo** hetupavattito pubbe tassa utrāsassa abhāvato. **Tesū**ti dukkhesu. Tāni hi hetupaccayehi kattabbato gāthāyaṃ “**kicchesū**”ti vuttāni. **Kicchesū**ti vā kicchanimittaṃ. Yāsañhi payogavipattīnaṃ vasenassa tāni dukkhāni uppajjeyyūṃ, taṇnimittanti attho. Tā hi assa payogavipattīyo gatīvipattīyo satthu santikaṃ upagamanena hāyeyyūṃ. **Nibbattānaṃ diṭṭhānī**ti nibbattānaṃ vasena diṭṭhāni dukkhāni. **Tesu** ca dukkhesu. Sabbattha nimittatthe bhuttaṃ. **Dayhamāno viya** cittasantāpena.

Cattāripi saccāni bujjhati paṭivijjhatīti bodhi, satiādiddhammasāmaggī, tasmā **bojjhā** bodhito. Sā pana bodhi bhāvanākāreneva pavattati, aññatrasaddayogena ca “**bojjhā**”ti nissakkavacananti tadatthaṃ dassento muñcitvāpadaṃ apekkhitvā “**bojjhaṅgabhāvana**”nti āha. **Tapogūṇanti** dhutadhammāha. So hi taṇhālolluppassa tapanato **tapo**, sayam guṇasabhāvattā guṇasannissayato ca **gūṇanti**. Tenāha “**dhutaṅgasaṅkhātaṃ tapogūṇa**”nti. Sabbe saṅkhāragatā nissajjīyanti etthāti **sabbanissaggo**, asaṅkhatadhātūti āha “**sabbanissaggāti nibbānato**”ti.

**Indriyaṣaṃvaro va paṭhamam veditaḅbo** paṭipattikkamavasena tasṣeva paṭhamattā. Taṃ pana paṭipattikkamaṃ dasṣeṭṭuṃ “**indriyaṣaṃvare hi**”tiādimāha. Nippariyāyato maggapariyāpannā eva bojḅhaṅgāti āha “**sahavipassanāya bojḅhaṅge**”ti. **Tassāti** tathābhāvena tassa yogino. Yasmā devaputtassa sathā taṃ gāthaṃ vatvā upari ca saccāni pakāsesi, tasmā vuttaṃ “**bhagavā catusaccavasena desanaṃ vinivattesi**”ti. **Devaputto sotāpattiphale paṭiṭṭhahīti** kāmam tasṣeva visesādhigamo idhāgato, pañcasatamattāhi pana accharāhi saddhiṃ sotāpattiphale paṭiṭṭhahīti veditaḅbam. Tenāha **mahāsatipaṭṭhānasuttavaṇṇanāyaṃ** (dī. ni. aṭṭha. 2.373; ma. ni. aṭṭha. 1.106) “so desanāpariyosāne pañcahi accharāsatehi saddhiṃ sotāpattiphale paṭiṭṭhāya taṃ sampattiṃ thāvaram katvā devalokameva agamāsī”ti.

Subrahmasuttavaṇṇanā niṭṭhitā.

## 8. Kakudhasuttavaṇṇanā

99. “Nandāmi”ti vutte nandī nāma pabbajitassa malanti codetukāmo devaputto “**nandasī**”ti pucchi. Athassa bhagavā taṃ paṭikkhipanto “**kiṃ laddhā**”ti? Āha. Tena “tayā mama adhippetanandiyā idha paccayo eva natthi, kuto sā nandī”ti dasṣeti. Tenāha “**tuṭṭhi nāmā**”tiādi. Atha devaputto nandiyā asati sokena bhavitabbaṃ, soko ca pabbajitassa malanti codento āha “**tena hi, samaṇa, socasī**”ti. Bhagavā tampi paṭikkhipanto “**kiṃ jīyitthā**”tiādimāha. Kiṃ maṃ jinātīti attho?

Yadi te nandisokā na santi hāsavatthuno lābhassa jāniyā ca abhāvato, ekavihārino pana aratiyā bhavitabbanti āha – “**kacci taṃ ekamāsīnam, aratī nābhikīratī**”ti. Tasmimpi bhagavatā paṭikkhitte atha nesampi nandisokāratīnam abhāve kāraṇam pucchanto “**katham tva**”nti gāthamāha? Athassa bhagavā taṃ kāraṇam pavedento “**aghajātassā**”ti gāthamāha. Tattha **aghajātassāti** aghe jātassa. Tenāha “**vaṭṭadukkhe ṭhitassā**”ti. **Jātataṇhassa** appahīnataṇhassa **vaṭṭadukkham āgatameva** kāraṇassa appahīnattā. Tasṣeva hi kāraṇassa appahīnataṃ dassento “**dukkhī sukham patthayātīti hi vutta**”nti āha. Dukkappavattiyā sāpi taṇhāppavatti tena dassitā. **Itīti**ādinā vuttamevatthaṃ nigamanavasena dasṣeti.

Kakudhasuttavaṇṇanā niṭṭhitā.

## 9. Uttarasuttavaṇṇanā

100. **Navamanti** uttarasuttaṃ heṭṭhā devatāsaṃyuttavaṇṇanāyaṃ vuttatthameva.

Uttarasuttavaṇṇanā niṭṭhitā.

## 10. Anāthapiṇḅikasuttavaṇṇanā

101. Dasame kāmam devatāsaṃyuttepi “idaṃ hi taṃ jetavana”ntiādinā imā eva gāthā āgatā. Tattha “aṅṅatarā devatā”ti nidānam āropitaṃ. Heṭṭhā āgatanayattā eva hi potthakesu na likhitaṃ, idha pana devaputtasaṃyutte “**anāthapiṇḅiko devaputto**”ti nidāne nigame ca āgataṃ, tattha devaputtena satthu vuttappakāraguṇapavedanavasena vuttaṃ. Sathā pana bhikkhūnam tamatthaṃ pavedento “**aṅṅataro devaputto**”ti āha. Tathā pavedane pana kāraṇam dassento “**ānandattherassā**”tiādimāha. **Anumānabuddhiyāti** anumānañāṇassa. **Ānubhāvappakāsanatthanti** baladīpanatthaṃ.

Anāthapiṇḅikasuttavaṇṇanā niṭṭhitā.

Dutiyavaggavaṇṇanā niṭṭhitā.

### 3. Nānātitthiyavaggo

#### 1. Sivasuttavaṇṇanā

**102. Tatiyavaggassa paṭhamanti** tatiyavagge paṭhamasuttaṃ. **Vuttatthameva** heṭṭhā satullapakāyikavagge paṭhamasutte.

Sivasuttavaṇṇanā niṭṭhitā.

#### 2. Khemasuttavaṇṇanā

**103. Paṭhamamyevāti** jarāmaraṇādibhāvato pageva. **Balavacintanaṃ cintetīti** yathā sākaṭiko ajānitvā visame magge sakaṭaṃ pājento akkhe chinne patikātuṃ avisahanto dukkhī dummano balavacintanaṃ cintetī, mahantaṃ cittasantāpaṃ pāpuṇāti, evaṃ adhammavādī maccumukhaṃ patto balavacittasantāpaṃ pāpuṇāti, tasmā dhammacariyāya nappamajjitabbanti.

Khemasuttavaṇṇanā niṭṭhitā.

#### 3. Serīsuttavaṇṇanā

**104. Yaṃ dānaṃ demīti** yaṃ deyyadhammaṃ parassa demi. **Tassa pati hutvāti** tabbisayaṃ lobhaṃ suṭṭhu abhibhavanto tassa adhipati hutvā demi tena anākaḍḍhanīyattā. “**Na dāso na sahāyo**”ti vatvā tadubhayaṃ anvayato byatirekato dassetuṃ “**yo hī**”tiādi vuttaṃ. **Dāso hutvā deti** taṇhāya dāsabyassa upagatattā. **Sahāyo hutvā deti** tassa piyabhāvāvissajjanato. **Sāmī hutvā deti** taṇhādāsabyato attānaṃ mocetvā abhibhuyya pavattanato. Sāniparibhogasadisā hetassāyaṃ pavattatīti.

Atha vā yo dānasīlatāya dāyako puggalo, so dāne pavattibhedena dānadāso dānasahāyo dānapatīti tippakāro hotīti dasseti. Tadassa tippakāratam vibhajitvā dassetuṃ “**yo hī**”tiādi vuttaṃ. Dātabbaṭṭhena **dānaṃ**, annapānādi. Tattha yaṃ attanā paribhuñjati taṇhādhipannatāya, tassa vase vattanato dāso viya hoti. Yaṃ paresaṃ dīyati, tatthapi annapānasāmaññaena idaṃ vuttaṃ “**dānasāṅkhātassa deyyadhammassa dāso hutvā deti**”ti. **Sahāyo hutvā deti** attanā paribhuñjitabbassa paresaṃ dātabbassa ca samasamaṭṭhapanena. **Pati hutvā deti** sayam deyyadhammassa vase avattitvā tassa attano vase vattāpanato.

Aparo nayo – yo attanā paṇītaṃ paribhuñjitvā paresaṃ nihīnaṃ deti, so **dānadāso** nāma tannimittanihīnabhāvāpattito. Yo yādisaṃ attanā paribhuñjati, tādisameva paresaṃ deti, so **dānasahāyo** nāma tannimittanihīnādihikabhāvāvissajjanena sadisabhāvāpattito. Yo attanā nihīnaṃ paribhuñjitvā paresaṃ paṇītaṃ deti, so **dānapati** nāma tannimittasetṭhabhāvāpattito. Kammasarikkhako hi vipāko, tasmā devaputto “**dānapatī**”ti vadanto “**ahaṃ tādiso ahosi**”nti dasseti.

“Catūsu dvāresu dānaṃ dīyitthā”ti pāliyaṃ saṅkhepato vuttamatthaṃ vitthāretvā dassetuṃ “**tassa kirā**”tiādi vuttaṃ. **Dānanti** yiṭṭhaṃ, tañca kho sabbasādhāraṇavasena katanti āha “**samaṇa ...pe... yācakāna**”nti. **Pabbajjūpagatāti** yaṃ kiñci pabbajjaṃ upagatā. **Bhovādinoti** jātimattabrāhmaṇe vadati. **Nālattha** buddhasuññattā tadā lokassa. **Duggatāti** dukkhajīvikakappakā kasiravuttikā. Tenāha “**daliddamanussā**”ti. Kasivāṇijjādijīvikam anuṭṭhātuṃ asamatthā idha “kapaṇā”ti adhippetāti āha “**kāṇakuṇiādayo**”ti. **Pathāvinoti** addhikā. **Vanibbakāti** dāyakānaṃ guṇakittanakamaphalakittanavasena yācakā seyyathāpi naggādayo. Tenāha “**iṭṭhaṃ dinna**”ntiādi. **Pasatamattanti** vīhitaṇḍulādivasena vuttaṃ. **Sarāvamattanti** yāgubhattādivasena. Yathā gāmalābho gāme uppajjanako āyalābho, evaṃ tattha dvāralābhoti āha “**tattha uppajjanakasatasahassee**”ti. **Mahantataram dānaṃ adamsu** aññassapi dhanassa viniyogaṃ gatattā. **Taṃ sandhāyāti** taṃ

mahantataraṃ dānaṃ kataṃ sandhāya. Rañño hi tattha dānaṃ itthāgārassa dānena mahatā abhibhūtaṃ viya paṭinivattaṃ hotīti āha “**paṭinivatti**”ti. **Kocīti** bhummatthe paccattavacanaṃ. Tenāha “**katthaci**”ti. Anekavassasahassāyukakāle tassa uppannattā **asītivassasahassāni** so rājā dānamadāsīti.

Serīsuttavaṇṇanā niṭṭhitā.

#### 4. Ghaṭṭikārasuttavaṇṇanā

**105. Catutthaṃ** heṭṭhā devatāsamaṃyuttavaṇṇanāyaṃ **vuttatthameva**.

Ghaṭṭikārasuttavaṇṇanā niṭṭhitā.

#### 5. Jantusuttavaṇṇanā

**106.** Ye vinaye apakataññoṇo saṃkilesikesu vodānīyesu dhammesu na kusalā yaṃ kiñci na kāriṇo vipaṭṭisārabahulā. Tesam anuppannañca uddhaccaṃ uppajjati, uppannañca bhīyyobhāvaṃ vepullaṃ āpajjati āha “**akappiye kappiyasaññitāya...pe... uddhaccapakatikā**”ti. Sārābhāvena tucchattā ca naḷo viyāti naḷo, mānoti āha “**unnaḷāti uggatanaḷā**”ti. Tenāha “**uṭṭhitatucchamānā**”ti. Māno hi seyyassa seyyoti sadisoti ca pavattiyā visesato **tuccho. Cāpallenāti** capalabhāvena, taṇhāloluppenāti attho. **Mukhakarāti** mukhena pharusā, pharusavādinoti attho. **Vikiṇṇavācāti** viṣāvacanā, samphappalāpatāya aparīyantavacanā. Tenāha “**asamaṃyavacanā**”tiādi. **Caṇḍasote baddhanāvāsadisāti** etena anavaṭṭhitakiriyataṃ dasseti. Yena samannāgatā sattā ekasmiṃ ṭhāne ṭhātuṃ vā nisīdituṃ vā na sakkonti, ito cito ca vicaranti. **Anavaṭṭhitacittāti** ekasmiṃ ārammaṇe na avatṭhitacittā. **Vivaṭṭāndriyāti** asaṃvutacakkhādiindriyā.

Guṇakathāya saddhiṃ kathiyamāno nigguṇassa aguṇo pākāto hoti jātimaṇisamīpe ṭhitassa viya kācamaṇiṇo doso. **Sukhajīvinoti** sukhe ṭhitā. Yathā dāyakanāṃ subharaṃ hoti, evaṃ sukkena akicchena pavattajīvikā. Tenāha “**pubbe bhikkhū**”tiādi.

Attano rucivasena gāmakiccaṃ netīti gāmaṇi, te pana hīlento vadati “**gāmaṇikā**”ti. **Vissajjetvāti** sativossaggavasena vissajjetvā **kilesamucchāyāti** mahicchāsaṅkhātāya taṇhāmucchāya. Sīlavantānaṃyeva hi duppaṭipattim sandhāya devaputto vadati. **Vatṭabbayuttakeyevāti** ovādena mayā anuggahetabbameva. **Chaḍḍitakāti** pariccattā ācariyupajjhāyādīhi. Tato eva **anāthā appatiṭṭhā. Petāti** vigatajīvitā matā. Yathā petā, **tatheva honti** attahitāsamatthātāya viññūnaṃ jigucchitabbatāya ca.

Jantusuttavaṇṇanā niṭṭhitā.

#### 6. Rohitassasuttavaṇṇanā

**107. Ekokāseti** cakkavāḷassa pariyaṇasaññite ekasmiṃ okāse. **Bhumanti** “yatthā”ti idaṃ bhummavacanaṃ, sāmāññato vuttampi “so lokassa anto”ti vacanato viṣiṭṭhavisayameva hoti. “Na jāyati na mīyati”ti vatvā puna “na cavati na upapajjati”ti kasmā vuttanti āha “**idaṃ aparāparaṃ... pe... gahita**”nti. **Padagamānenāti** padaṣā gamānena. **Saṅkhāralokassa antaṃ sandhāya vadati** upari saccāni pakāsetukāmo. Saṅkhāralokassa hi anto nibbānaṃ.

Daḷhaṃ thiraṃ dhanu etassāti daḷhadhanvā. So eva **daḷhadhammoti** vutto. Tenāha “**daḷhadhanū**”ti. **Uttamappamāṇenāti** saḥassathāmapamāṇena. Dhanusippasikkhitatāya dhanuggaho, na dhanuggahamattenāti āha “**dhanuggahoti dhanuācariyo**”ti. “Dhanuggaho”ti vatvā “sikkhito”ti vutte dhanusikkhāya sikkhitoti viññāyati, sikkhā ca ettake kāle samatthassa ukkaṃsagato hotīti āha “**dasa dvādasa vassāni dhanusippaṃ sikkhito**”ti. **Usabhappamāṇepīti** vīsatiyaṭṭhiyo



usabham, tasmim usabhappamāṇe padese. **Vālagganti** vālakotiṃ. **Katahatthoti** paricitahattho. **Katasarakkhepoti** vivaṭasarakkhepapadesadassanavasena sarakkhepakatāvī. Tenāha “**dassitasippo**”ti. “**Katasippo**”ti keci. Asanti etenāti **asanaṃ**, kaṇḍo. **Tālacchāyanti** tālacchādiṃ, sā pana ratanamattā, vidatthacaturāṅgulā vā.

**Puratthimasamuddāti** ekasmim cakkavāle puratthimasamuddā. Samuddasīsena puratthimacakkavālamukhavaṭṭim vadati. **Pacchimasamuddoti** etthāpi eseva nayo. **Nippapañcatanti** adandhakāritam. **Sampatteti** tādīsena javena gacchantena sampatte. **Anotatteti** etthāpi “sampatte”ti padaṃ ānetvā sambandho, tathā “nāgalatādantakaṭṭham khādītvā”ti etthāpi. **Tadāti** yadā so lokantagavesako ahosi, tadā. **Dīghāyukakālōti** anekavassasahassāyukakālo. **Cakkavāḷalokassāti** sāmāññavasena ekavacanam, cakkavāḷalokanti attho. **Imasmimyeva cakkavāle nibbatti** pubbapariyāyasiddhāya nikantiyā. **Sasaññimhi samanaketi** na rūpadhammamattake, atha kho pañcakkhandhasamudāyeti dasseti. **Samitapāpoti** samucchinnasamkilesadhammo.

Rohitassasuttavaṇṇanā niṭṭhitā.

### 7-8. Nandasuttanandivīsālasuttavaṇṇanā

**108-109.** Nandasuttavisālasuttāni **sattamaaṭṭhamāni** heṭṭhā samvaṇṇitarūpattā **vuttatthāneva**.

Nandasuttanandivīsālasuttavaṇṇanā niṭṭhitā.

### 9. Susimasuttavaṇṇanā

**110. Tuyhampi noti** tuyhampi nu, nu-saddo pucchāyam, tasmā vaṇṇam kathetukāmo pucchātī adhippāyo. **Na vaṭṭatīti** na yujjati, **kathitoti** kathetum āraddho, tenāha “**matthakam na pāpuṇātī**”ti. Tameva matthakāpapaṇanam dassetum “**so hī**”tiādi vuttam. Satisampajaññāyogato gorūpasīlo, mūlho khalitapañño, gorūpassa viya sīlam etassāti hi **gorūpasīlo**. **Sabhāgo** ekarūpacittatāya. Ariyānam sabhāgatā nāma guṇavantavasenāti āha “**aññamaññassa guṇesu pasīditvā**”ti. **Soḷasavidham paññanti** mahāpaññādikā cha, nava anupubbavīhārasamāpattipaññā, āsavakkhayapaññāti imaṃ soḷasavidham paññam. Tesatṭhi sāvakasādhāraṇaṇānīpi ettheva saṅgaham samosaraṇam gacchanti.

**Ānandāti** theram āha. **Ācāroti** cārittasīlamāha. **Gocaroti** gocarasampatti. **Vihāroti** samāpattivihāro. **Abhikkamoti**ādinā iriyāpathavīhāram. **Tuyhampīti** pi-saddena bhagavatā attānam ādiṃ katvā tadaññesam viññūnam sabbesam therassa ruccanasabhāvo dīpitoti dassento “**mayham rucati**”tiādimāha. Tattha satipi ānandattherassapi asītiyā mahātherānam antogadhabhāve “asītiyā mahātherānam rucati”ti vatvā “tuyhampi rucati”ti vacanam tena dhammasenāpatino vaṇṇam kathāpetukāmatāyāti daṭṭhabbam.

**Sātakantareti** nivatthavatthantare. **Laddhokāsoti** nibbuddham karonto sātakantare laddham gahetum laddhāvasaro. **Labhissāminoti** labhissāmi vata. **Dīpadhajabhūtanti** satayojanavithiṇṇam jambudīpassa dhajabhūtam. **Puggalapaḷāpeti** antosārābhāvato palāpabhūte puggale haranto. **Bālatāyāti** rucikhantiādiabhāvatāya. **Dosatāyāti** dussakabhāvena. **Mohenāti** mahāmūlhatāya. Keci pana “**bālo bālatāyāti** mūlhatāya pakatibālabhāvena na jānāti. **Mūlho mohēnāti** sayam abālo samānopi yadā mohena pariyutṭhito hoti, tadā mohena na jānāti, ayam padadvayassa viseso”ti vadanti. **Vipallatthacittoti** yakkhummādena pittummādena vā viparītacitto.

“**Catūsu kosallesū**”ti vuttam catubbidham kosallam pāḷiyā eva dassetum “**vuttam heta**”ntiādi vuttam. Tattha yo aṭṭhārasa dhātuyo samudayato atthaṅgamato assādato ādīnavato nissaraṇato ca yathābhūtam pajānāti, ayam **dhātukusalo**. Vuttanayena āyatanesu kusalo **āyatanakusalo**. Avijjādīsu

dvādasapaṭiccasamuppādaṅgesu kusalo **paṭiccasamuppādakusalo**. “Idaṃ imassa phalassa ṭhānaṃ kāraṇaṃ, idaṃ aṭṭhānaṃ akāraṇaṃ”nti evaṃ ṭhānañca ṭhānato, aṭṭhānañca aṭṭhānato yathābhūtaṃ pajānato **ṭhānāṭṭhānakusalo**. Yo pana imesu dhātuādīsu pariññābhīsamayaḍivasena nissāṅgatiyā paṇḍāti laddhanāmena ñāṇena ito gato pavatto, ayaṃ **paṇḍito** nāma.

Mahantānaṃ atthānaṃ pariḅgaṇhanato mahatī paññā etassāti **mahāpañño**. Sesapadesupi eseva nayoti āha “**mahāpaññādīhi samannāgatoti attho**”ti. **Nānattanti** yāhi mahāpaññādīhi samannāgatattā thero “mahāpañño”tiadinā kittito, tāsāṃ mahāpaññādīnaṃ idaṃ nānattaṃ ayaṃ vemattatā. Yassa kassaci visesato arūpadhammassa mahattaṃ nāma kiccāsiddhiyā vedittabanti tadassa kiccāsiddhiyā dassento “**mahante sīlakkhandhe pariggaṇhātī**”tiadināma. Tattha hetumahantatāya paccayamahantatāya nissayamahantatāya pabbhedamahantatāya kiccamahantatāya phalamahantatāya ānisāmsamahantatāya ca sīlakkhandhassa mahantabhāvo vedittabbo. Tattha **hetū** alobhādayo. **Paccayā** hirottappasaddhāsativīriyādayo. **Nissayā** sāvaka bodhipacceka bodhisammāsambodhiniyatatā, taṃsamaṅgino ca purisavisesā. **Pabbhedo** cārittādivibhāgo. **Kiccaṃ** tadanāḅdivasena paṭipakkhassa vidhamaṇaṃ. **Phalaṃ** saggasampadā nibbānasampadā ca. **Ānisāmsa** piyamaṇapatādī. Ayametha saṅkhepo, vitthāro pana **visuddhimagge** (visuddhi. 1.8-9) **ākāṅkheyyasuttā**diṃsu (ma. ni. 1.64 ādayo) ca āgatanayena vedittabbo. Iminā nayena **samādhikkhandhā**diṇampi mahantatā yathārahaṃ niddhāretvā vedittabbā. **Ṭhānāṭṭhānā**diṇaṃ pana mahantabhāvo mahāvisayatāya vedittabbo. Tattha ṭhānāṭṭhānānaṃ mahāvisayatā bahudhātukasuttādiṃsu āgatanayena, **viḅārasamāpattīnaṃ** samādhikkhandhe niddhāritanayena vedittabbā. **Ariyasaccānaṃ** sakalasāsanaṅgaṇhanato saccavibhaṅge (vibha. 189 ādayo) taṃsaṃvaṇṇanāsu (vibha. aṭṭha. 189 ādayo) āgatanayena; **satipaṭṭhānā**diṇaṃ satipaṭṭhānavibhaṅgādiṃsu (vibha. 355 ādayo) taṃsaṃvaṇṇanādiṃsu (vibha. aṭṭha. 355 ādayo) ca āgatanayena; **sāmaññaphalānaṃ** mahato hitassa mahato sukhasa mahato atthassa mahato yogakkhemassa nipphattibhāvato santapaṇṅitanipuṇaatakkāvacarapaṇḍitavedanīyabhāvato ca; **abhiññānaṃ** mahāsambhārato mahāvisayatato mahākiccato mahānubhāvato mahānipphattito ca; **nibbānassa** madanimmadanādimahatthasiddhito mahantatā vedittabbā. **Pariggaṇhātī**ti sabhāvādito paricchijja gaṇhāti jānāti paṭivijjhatīti attho. **Sā** panāti mahāpaññatā.

**Puthupaññāti** ettha **nānākkhandhesu ñāṇaṃ pavattatī**ti ayaṃ rūpakkhandho nāma...pe... ayaṃ viññāṅakkhandho nāmāti evaṃ pañcannaṃ khandhānaṃ nānākaraṇaṃ paṭicca ñāṇaṃ pavattati. Tesu ekavidhena rūpakkhandho, ekādasavidhena rūpakkhandho, ekavidhena vedanākkhandho, bahuvividhena vedanākkhandho, ekavidhena saññākkhandho, saṅkhārakkhandho, viññāṅakkhandhoti evaṃ ekekassa khandhassa ekavidhādivasena atītādivasena paṭicca ñāṇaṃ pavattati. Tathā idaṃ cakkhāyatanaṃ nāma...pe... idaṃ dhammāyatanaṃ nāmaṃ. Tattha dasāyatanaṃ kāmāvacarā, dve catubhūmakāti evaṃ āyatanaṇaṃ nānākaraṇaṃ paṭicca ñāṇaṃ pavattati. **Nānādhātūsūti** ayaṃ cakkhūdhātu nāma...pe... ayaṃ manoviññādhātu nāma. Tattha soḷasa dhātuyo kāmāvacarā, dve catubhūmakāti evaṃ dhātunānākaraṇaṃ paṭicca ñāṇaṃ pavattati, taṃ upādiṇṅadhātūvasena vuttanti vedittabbaṃ paccakabuddhānañhi dvinnaṃ aggasāvakaṇaṇca upādiṇṅadhātūsū eva nānākaraṇaṃ paṭicca ñāṇaṃ pavattati. Tañca kho ekadesamattato, na nippadesato, anupādiṇṅakadhātūnaṃ pana nānākaraṇaṃ na jānanti eva. Itarasāvakesu vattabbameva natthi, sabbaññubuddhānaṃyeva pana imāya nāma dhātuyā ussannattāva imassa rukkhassa khandho seto hoti, imassa kāḷo, imassa maṭṭho, imassa bahalattaco, imassa tanuttaco, imassa pattaṃ vaṇṇasaṭṭhānādivasena evarūpaṃ; imassa pupphaṃ nīlaṃ pītakaṃ lohitaṃ odātaṃ, sugandhaṃ duggandhaṃ; phalaṃ khuddakaṃ mahantaṃ dīghaṃ vaṭṭaṃ susaṅṭhānaṃ maṭṭhaṃ pharusāṃ sugandhaṃ madhuraṃ tittakaṃ ambilaṃ kaṭukaṃ kasāvaṃ; kaṇṭako tikhiṇo atikhiṇo ujuko kuṭilo tambo lohito odāto hotīti dhātunānattaṃ paṭicca ñāṇaṃ pavattati.

**Atthesūti** rūpādīsu ārammaṇesu. **Nānāpaṭiccasamuppādesūti** ajjhatabhiddhābhedaṃ ca saṅṭhānābhedaṃ ca nānappabbhedesu paṭiccasamuppādaṅgesu. Avijjādiṅgānañhi paccakaṃ paṭiccasamuppādasāññitāti. Tenāha saṅkhārapiṭake “dvādasapaṭiccasamuppādaṅgesu. **Nānāsuññatamanupalabbhesūti** nānāsabhāvesu nissāṅgādivirahato suññāsabhāvesu, tato eva itthipurisaattaṅgādivasena anupalabbhesu sabhāvesu. Ma-kāro hettha padasandhikaro.

**Nānāatthesūti** atthapaṭisambhidāvisayesu paccayuppannādibhedesu nānāvidhesu atthesu. **Dhammesūti** dhammapaṭisambhidāvisayesu paccayādinānādhammesu. **Niruttisūti** tesamyeva atthadhammānaṃ niddhāraṇavacanasāṅkhātāsu niruttisu. **Paṭibhānesūti** atthapaṭisambhidādīsu visayabhūtesu “imāni idamatthajotakāni”ti tathā tathā paṭibhānato paṭiṭṭhānato paṭibhānānīti laddhanāmesu ñāṇesu. **Puthu nānāsīlakkhandhesūti**ādīsu sīlassa puthuttaṃ nānattañca vuttameva. Itaresaṃ pana vuttanāyānusārena suviññeyyattā pākaṭameva. Yaṃ pana abhinnaṃ ekameva nibbānaṃ, tatha upacāravasena puthuttaṃ gahetabbanti āha “**puthu janasādhāraṇe dhamme samatikkammā**”ti. Tenassa idha madanimadanādīpariyāyena puthuttaṃ dīpitaṃ hoti.

Evaṃ visayavasena paññāya mahattaṃ puthuttañca dassetvā idāni sampayuttadhammavasena hāsabhāvaṃ, pavattiākāravasena javanabhāvaṃ, kiccavasena tikkhādibhāvañca dassetuṃ “**katamā hāsapaññā**”tiādi vuttaṃ. Tatha **hāsabahuloti** pītibahulo. Sesapadāni tassa vevacanāni. **Sīlaṃ paripūretīti** haṭṭhapahaṭṭho udaggudaggo hutvā pītisahagatāya paññāya pātīmokkhasīlaṃ ṭhapetvā hāsanīyatarasseva visuṃ gahitattā itaraṃ tividhaṃ sīlaṃ paripūreti. Pītisomanassasahagatā hi paññā abhirativasena tadārammaṇe phullitā vikasitā viya vattati, na upekkhāsahagatā. **Sīlakkhandhaṃ samādhikkhandhanti**ādīsipi eseva nayo. **Theroti**ādīnā abhinīhārasiddhā therassa hāsapaññatāti dasseti.

**Sabbaṃ rūpaṃ aniccalakkhaṇato khippaṃ javatīti** rūpakkhandhaṃ aniccanti sīghavegena pavattiyā paṭipakkhadūrībhāvena pubbābhisāṅkhārassa sātisayattā indena visaṭṭhavajiraṃ viya lakkhaṇaṃ paṭivijjhantī adandhāyantī rūpakkhandhe aniccalakkhaṇaṃ vegena paṭivijjhanti, tasmā sā **javanapaññā** nāmāti attho. Sesapadesupi eseva nayo. Evaṃ lakkhaṇārammaṇīkavipassanāvasena javanapaññaṃ dassetvā balavavipassanāvasena dassetuṃ “**rūpa**”ntiādi vuttaṃ. Tatha **khayaṭṭhenāti** yattha yattha uppajjati, tatha tattheva khaṇeneva bhijjanato khayasabhāvato. **Bhayaṭṭhenāti** bhayānakato. **Asārakaṭṭhenāti** attasāravirahato nicasārādivirahato ca. **Tulayitvāti** tulābhūtāya vipassanāya tulayitvā. **Tīrayitvāti** tāya eva tīraṇabhūtāya tīretvā. **Vibhāvayitvāti** yāthāvato pakāsetvā pañcakkhandhaṃ **vibhūtaṃ katvā** pākaṭaṃ katvā. **Rūpanirodheti** rūpakkhandhassa nirodhabhūte nibbāne ninnapaṇapabbhārahābhāvena. Idāni sikhāppattavipassanāvasena javanapaññaṃ dassetuṃ puna “**rūpa**”ntiādi vuttaṃ. “Vuttānagāminivipassanāvasenā”ti keci.

Ñānatikkhabhāvo nāma savisesaṃ paṭipakkhasamucchindane vedītabboti “**khippaṃ kilese chindatīti tikkhapañño**”ti vatvā te pana kilese vibhāgena dassento “**uppannaṃ kāmavitakka**”ntiādimāha. Tikkhapañño khippābhiñño hoti, paṭipadā cassa na calatīti āha “**ekasmiṃ āsane cattāro ca ariyamaggā adhigatā honti**”tiādi. **Thero** cātiādinā dhammasenāpatino tikkhapaññatāti dasseti.

“Sabbe saṅkhārā aniccā dukkhā vipariṇāmadhammā saṅkhatā paṭiccasamuppannā khayadhammā vayadhammā virāgadhammā nirodhadhammā”ti yāthāvato dassanena saccasampañivedho ijjhanti, na aññathāti kāraṇamukhena nibbedhikapaññaṃ dassetuṃ “**sabbasaṅkhāresu ubbegabahulo hoti**”tiādi vuttaṃ. Tatha **ubbegabahuloti** vuttanāyena sabbasaṅkhāresu abhinīhappavattasaṃvego. **Uttāsabahuloti** ñāṇuttāsavasena sabbasaṅkhāresu bahuso utrastamānaso. Tena ādināvanupassanamāha. **Ukkaṇṭhanabahuloti** iminā pana nibbidānupassanamāha, **aratibahuloti**ādīnā tassā eva aparāparuppattim. **Bahimukho** sabbasaṅkhārato bahibhūtaṃ nibbānaṃ uddissa pavattañānamukho, tathā vā pavattitavimokkhamukho. Nibbijhanaṃ nibbedho, so etissā atthi, nibbijjhantīti vā nibbedhā, sā eva paññā **nibbedhikā**. Yaṃ panettha atthato na vibhattaṃ, taṃ heṭṭhā vuttanāyattā suviññeyyameva.

**Appicchoti santagaṇaniguhanaṭātī** attani vijjamānānaṃ bāhusaccadhutadhammasīlādiguṇānañceva paṭivedhaguṇassa ca niguhanaṃ, **paṭiggahaṇe ca mattaṇṇutātī** eteneva pariyesanaparibhogamattaṇṇutāpi vuttā hoti. Tīhi **santosehīti** catūsu paccayesu paccakaṃ tīhi santosehi, sabbe pana dvādasa. Paṭisallīnena **vivekaṭṭhakāyānaṃ** na saṅgaṇīkāramānaṃ. **Nekkhammābhiratānanti** pabbajjaṃ upagatānaṃ. **Parisuddhacittānaṃ** vigatacittasaṃkilesānaṃ. **Paramavodānappattānaṃ** aṭṭhasamāpattisamadhigamena ativiya vodānaṃ visuddhiṃ pattānaṃ.

Kilesupadhiādīnaṃ abhāvato **nirupadhīnaṃ**. Phalasaṃpattivasena sabbasaṅkhāraviniṣṣaṭṭā **visaṅkhāraṃ** nibbānaṃ. **Upagatānaṃ, imesaṃ tiṇṇaṃ vivekānaṃ lābhī** pavivitto “pakārehi vivitto”ti katvā. Saṃsajjanaṃ parisinehuppādo saṃsaggo, savanavasena uppajjanakasasaggo **savanasasaggo**. Esa nayo sesesupī. **Samullapanaṃ** ālāpasallapanaṃ. Saṃsaggavatthunā iminā tassa paribhogo **paribhogasasaggo**.

**Āraddhavīriyoti** ettha vīriyārambho nāma vīriyassa paggaṇhanaṃ paripuṇṇakaraṇaṃ. Taṃ pana sabbaso kilesānaṃ niggaṇhananti dassento “**tatthā**”tiādīmāha. **Odhunavattā**ti kilesānaṃ yassa kassaci sāvajjassa odhunanavasena vattā. Tenāha “**bhikkhūna**”ntiādi. **Otiṇṇaṃ** nāma vajjaṃ ajjhācaritanti ārocitaṃ. **Anotiṇṇaṃ** anārocitaṃ. **Tantivasenā**ti pāliddhamavasena, yuttasaddassa vasenāti attho. Pāpe lāmake puggale dhamme ca garahati jigucchati **pāpagarahī**. Tenāha “**pāpappuggale**”tiādi. **Ekadassī**ti ekabhavadassī, idhalokamatadassī diṭṭhadhammikasukhamattāpekkihī. **Samantā**ti samantato, parito me katthaci mā ahūti yojanā.

**Soḷasahi padehī**ti soḷasahi koṭṭhāsehi. **Akuppanti** kenaci akopaniyaṃ. Ayaṃ dhammasenāpatino guṇakathā satthu vacanānusārena dasasahassacakkavāḷabyāpinī ahoṣi, taṃ dassetuṃ “**eva**”ntiādi vuttaṃ. **Catubbidhā vaṇṇanibhā pātubhavi** ulārapītisomanassasamuṭṭhānattā. Suṭṭhu obhāsati **subho**. Obhāsasampattiyā maṇino bhaddakatāti āha “**subhoti sundaro**”ti. **Jātimā** parisuddhaākaraṣamuttā. Kuruvindajātiādi jātivisesopi maṇi ākaraparissuddhamūlako evāti āha “**jātisampanno**”ti. **Dhovanādiparikamma**nti catūsu pāsāṇesu dhovanadosanīharaṇatāpanasaṅhakarāṇādiparikamma. Rattakambalassa vasena sabhāvavaṇṇasiddhiyā veḷuriyamaṇi ativiya sobhatīti āha “**paṇḍukambale nikkhitto**”ti. **Nikkhanti** bhaṇḍamāha. Tañca appakena suvaṇṇena kataṃ bhaṇḍaṃ na sobhati sobhāvīpulenāti āha “**atirekapañcasuvaṇṇena katapiḷandhana**”nti. **Suvaṇṇanti** pañcadharaṇassa samaññā, tasmā pañcavīsatisuvaṇṇasāriyā vicittaābharaṇaṃ idha “**nikkha**”nti adhippettaṃ. Tañhi vipulaṃ na parittakaṃ. **Mahājambusākhāya pavattanadiyanti** mahājambusākhāya heṭṭhā sañjātanadiyaṃ. Taṃ kira ratanaṃ rattaṃ. **Sukusalena... pe... sampahaṭṭhanti** suṭṭhu kusalena suvaṇṇakārena ukkāya tāpetvā sammā pahaṭṭhaṃ majjanādivasena sukataparikkammaṃ. **Dhātuvibhaṅgeti** dhātuvibhaṅgasutte. **Katabhaṇḍanti** ābharaṇabhāvena kataṃ bhaṇḍaṃ.

Nātiucco nātinīco **taruṇasūriyo** nāma. **Satthārā ābhatavaṇṇo** ubbhataguṇoti attho. Neva **maraṇaṃ abhinandatī**ti attanopi maraṇaṃ neva abhinandati attavinipātassa sāvajjabhāvato. Bodhisatto pana paresaṃ atthāya attano attabhāvaṃ pariccejati karuṇāvasena, evaṃ vosajjanaṃ paramatthapāramīpāripūriṃ gacchatīti sāvakā na tathā kātuṃ sakkā sikkhāpadato. **Na jivitaṃ pattheti** jivitasāya samucchinnattā. **Divasasaṅkhepanti** ajja tvaṃ idaṃ nāma kammaṃ karohi, idaṃ te vetananti divasabhāgena paricchinnaṃ vetanaṃ. Tādiso hi bhatako divasakkhayameva udikkhati, na kammaniṭṭhānaṃ. Nibbisamaṃ **bhatako yathā**ti vetanaṃ bhatim icchanto kālakkhayaṃ udikkhanto bhatakapuriso viya.

Susimasuttavaṇṇanā niṭṭhitā.

## 10. Nānātitthiyasāvakaṃsuttavaṇṇanā

**111. Nānātitthiyasāvakā**ti puthutitthiyānaṃ sāvakā. **Chinditeti** hatthacchedādivasena chede. **Māriteti** māraṇe. **Na pāpaṃ samanupassatī**ti kiñci pāpaṃ atthīti na passati, paresaṃca tathā pavedeti. **Vissāsanti** vissatthabhāvaṃ. “Katakammānampi vipāko natthī”ti vadanto katapāpānaṃ akatapūññānaṃca vissatthataṃ nirāsaṅkataṃ janeti.

**Tapojigucchāyā**ti tapasā acelavatādīnā pāpato jigucchana, “pāpaṃ virājayāmā”ti acelavatādīsamādānenāti attho. Tasmīhi samādāne ṭhitena saṃvarena saṃvutacitto samannāgato pihito ca nāma hotīti “**susaṃvutatto**”tiādi vuttaṃ. Cattāro yāmā bhāgā catuyāmā, catuyāmā eva **cātuyāmā**.

Bhāgattho hi idha yāma-saddo yathā “rattiyam paṭhamo yāmo”ti. So panettha bhāgo samvaralakkhaṇoti āha “**cātuyāmena susaṃvuto**”ti, catukotthāsenā samvarena sutṭhu saṃvutoti attho. **Paṭikkhittasabbasītodakoti** paṭikkhittasabbasītudakaparibhogo. **Sabbena pāpavāraṇena yuttoti** sabbappakārena samvaralakkhaṇena pāpavāraṇena samannāgato. **Dhutapāpoti** sabbena nijjaralakkhaṇena pāpavāraṇenapi dhutapāpo. **Phuṭṭhoti** aṭṭhannampi kammānaṃ khepanena vikkhepappattiyā kammakkhayalakkhaṇena sabbena pāpavāraṇena phuṭṭho, taṃ phusitvā ṭhito. **Na niguhantoti** na niguhanahetu diṭṭhasute tatheva kathento.

**Nānātitthiyānaṃyeva upaṭṭhākoti** paravādīnaṃ sabbesaṃyeva titthiyānaṃ upaṭṭhāko, tesu sādharmaṇavasena abhippasanno. **Koṭippattāti** mokkhādhigamena samaṇadhamme pattabbamariyādappattā.

**Sahacaritamattenāti** sīhanādena saha vassakaraṇamattena. Sīhena sīhanādaṃ nadantena saheva siṅgālena attano siṅgālaravakaraṇamattena. **Kotthukoti** khuddakakotthu. **Āsaṅkitasamācāroti** attanā ca parehi ca āsaṅkitabbasamācāro. **Sappurisānanti** buddhādīnaṃ.

**Tassāti** vegabbharissa devaputtassa. **Sarīre anuāvisīti** sarīre anupavisitvā viya āvisi. **Adhimuccīti** yathā gahitassa vasena cittaṃ na vattati, attano eva vase vattati, evaṃ adhiṭṭhahi. **Āyuttāti** dassanena saṃyuttā. **Pavivekiyanti** kappakavatthabhuñjanasenāsanehi pavivittabhāvaṃ. Tenāha “**te kirā**”tiādi. **Rūpe nivīṭṭhāti** cakkhurūpadhamme abhinivīṭṭhā. Tenāha “**taṇhādiṭṭhīhi patīṭṭhitā**”ti. **Devalokapatthanakāmāti** devalokasseva abhipatthanakāmā. Maraṇadhammatāya **mātiyā**. Tenāha “**mātiyāti maccā**”ti. **Paralokatthāyāti** parasampattibhāvāya lokassa atthāya.

**Pabhāsavaṇṇāti** pabhāya samānavaṇṇā. Kesam pabhāyāti āha “**candobhāsā**”tiādi. Sajjhārāgapabhāsavaṇṇā indadhanupabhāsavaṇṇāti paccekaṃ yojanā. Āmo āmagandho etassa atthīti **āmisam**. **Vadhāyāti** viddhamsituṃ. **Rūpāti** rūpāyatanādīrūpidhammā.

Rājagahasamīpappavattīnaṃ **rājagahiyānaṃ**. “Seto”ti kelāsakūṭo adhippetoti āha “**setoti kelāso**”ti. Kenaci na ghaṭṭetīti **agham**, antalikkhanti āha “**aghagāmīnanti ākāsagāmīna**”nti. Udamā dhīyati etthāti **udadhi**, mahodadhi. **Vipuloti** vepullapabbato. **Himavantapabbatānanti** himavantapabbatabhāgānaṃ. **Buddho seṭṭho** sīlasamādhipaññāvimuttivimuttīñānadassanādīhi sabbaguṇehi.

Nānātitthiyasāvakasuttavaṇṇanā niṭṭhitā.

Tatīyavaggavaṇṇanā niṭṭhitā.

Sāratthappakāsiniyā saṃyuttanikāya-aṭṭhakathāya

Devaputtasaṃyuttavaṇṇanāya līnatthappakāsanaṃ samattā.

### 3. Kosalasaṃyuttaṃ

#### 1. Paṭhamavaggo

#### 1. Daharasuttavaṇṇanā

**112. Bhagavatā saddhiṃ sammodīti** bhagavato guṇe ajānanto kosalarājā attano khattiyamānena kevalam bhagavatā saddhiṃ sammodi. Paṭhamāgate hi satthari tassa sammoditākāraṃ dassetuṃ “**yathā**”tiādi vuttaṃ. **Yathā khamanīyādīni pucchantoti** yathā bhagavā “kacci te, mahārāja,

khamanīyaṃ, kacci yāpanīya’ntiādinā tena raññā saddhiṃ paṭhamam pavattamodo ahosi pubbhāsītāya, tadanukaraṇena evaṃ sopi rājā bhagavatā saddhiṃ samappavattamodo ahosīti yojanā. Taṃ pana samappavattamodanam upamāya dassetuṃ “**sītodakam viyā**”tiādi vuttaṃ. Tattha **sammoditanti** saṃsanditaṃ **ekībhāvanti** sammodanakiriyāya samānataṃ ekarūpataṃ, **khamanīyanti** “idaṃ catucakkaṃ navadvāraṃ sarīrayantaṃ dukkhabahulatāya sabhāvato dussahaṃ, kacci khamituṃ sakkuṇeyya’nti pucchati. **Yāpanīyanti** paccayāyattavuttikaṃ cirapabandhasaṅkhātāya yāpanāya kacci yāpetuṃ sakkuṇeyyaṃ. Sīsarogādiābhādhābhāvena **kacci appābādham**. Dukkhañjivikābhāvena **kacci appātaṅkam**. Taṃtaṃkiccakaraṇe uṭṭhānasukhatāya **kacci lahuṭṭhānam**. Tadanurūpabalayogato **kacci balaṃ**. Sukhavihārasambhavana **kacci phāsuvihāro atthīti** tattha tattha kacci-saddaṃ yojetvā attho veditabbo. Balavappattā pīti **pītiyeva**. Taruṇapīti **pāmojjam**. Sammodanam janeti karotīti **sammodanīyam**. Sammoditabbato **sammodanīyanti** imaṃ pana attham dassento “**sammodituṃ yuttabhāvato**”ti āha. **Saritabbabhāvato**ti anussaritabbabhāvato. “Saraṇīya’nti vattabbe dīgham katvā “**sāraṇīya**”nti vuttaṃ.

**Suyyamānasukhatoti** āpāthamadhurataṃ āha, **anussariyamānasukhatoti** vimaddaramaṇīyataṃ. **Byañjanaparisuddhatāyāti** sabhāvaniruttibhāvena tassā kathāya vacanacāturiyamāha, **atthaparisuddhatāyāti** atthassa nirupakkilesataṃ. **Anekehi pariyāyehīti** anekehi kāraṇehi. **Adiṭṭhattāti** upasaṅkamanavasena adiṭṭhattā. **Guṇāguṇavasenāti** guṇavasena gambhīrabhāvaṃ vā aguṇavasena uttānabhāvaṃ vā. **Ovaṭṭikasāram katvāti** ovaṭṭikāya gahetabbasāravatthum katvā. **Lokanissaraṇabhavokkanti pañhanti** lokato nissaṭṭabhāvapañhañceva ādito bhavokkamanapañhañca. Satthu sammāsambuddhataṃ pucchanto hi “kiṃ bhavaṃ gotamo sabbalokato nissaṭṭo, sabbasattehi ca jeṭṭho”ti? Pucchati nāma. Yathā hi satthu sammāsambuddhatāya lokato nissaṭṭatā viññāyati, evaṃ sabbasattehi jeṭṭhabhāvato seṭṭhabhāvato. Svāyamattho **aggapasādasuttādīhi** (itivu. 90; a. ni. 4.34) vibhāvetabbo. Kathaṃ pana sambuddhatā viññāyatīti? Aviparītadhammadesanato. Ayamettha saṅkhepo, vitthāro pana **visuddhimaggasaṃvaṇṇanādīsu** (visuddhi. mahāṭī. 1.124) vuttanayena veditabbo.

Rājā satthu aviparītadhammadesanaṃ ajānanto tato evassa sammāsambodhiṃ asaddahanto “vuḍḍhataresupi cirapabbajitesu sammāsambuddhabhāve alabbhamāne tabbiparīte kathaṃ labbheyyā”ti maññamāno “kiṃ pana bhavaṃ gotamo”tiādiṃ vakkhati. **Rājā attano laddhiyā na pucchati** attano sammukhā tehi asammāsambuddhabhāvasseva paṭiññātattā. Yasmā te musāvādītāya attano upaṭṭhākādīnaṃ “buddhā maya’nti paṭijānimsu, tasmā vuttaṃ “**loke mahājanena gahitapaṭiññāvasena pucchati**”ti. Svāyamattho āgamissati. **Buddhasīhanādanti** buddhānaṃ eva āveṇikaṃ sīhanādaṃ. Kāmaṃ maggañānapadaṭṭhānaṃ sabbaññutaññānaṃ, sambodhiññāṇe pana gahite taṃ atthato gahitameva hotīti vuttaṃ “**sabbaññutaññānaṃ saṅkhātāṃ sammāsambodhi**”nti.

**Pabbajjūpagamanenāti** yāya kāyaci pabbajjāya upagamanamattena samaṇā, na samitapāpatāya. **Jātivasenāti** jātimattena brāhmaṇā, na bāhitapāpatāya. **Pabbajitasamūhasaṅkhāto saṅghoti** pabbajitasamūhatāmattena saṅgho, na niyyānikadiṭṭhivisuddhasīlasāmaññavasena saṃhatattāti adhippāyo. **Etesaṃ atthīti** etesaṃ sabbaññupaṭiññātānaṃ parivārabhūto atthi. **Svevāti** pabbajitasamūhasaṅkhāto eva. Keci pana “pabbajitasamūhavasena. Saṅghino, gahaṭṭhasamūhavasena gaṇino”ti vadanti, taṃ tesam matimattaṃ gaṇe eva loke saṅghasaddassa nirulhattā. **Ācārasikkhāpanavasenāti** acelakavatacarīyādi-ācārasikkhāpanavasena. **Pākaṭāti** saṅghādiabhāvena pakāsītā. “**Appicchā**”ti vatvā tattha labbhamānaṃ appicchataṃ dassetuṃ “**apicchātāya vatthampi na nivāsentī**”ti vuttaṃ. Na hi tesu sāsānikesu viya santagaṇaniguhanaṃ appicchā labbhātīti. **Yasoti** kittisaddo. Taranti etena saṃsāroghanti evaṃ sammatattā titthaṃ vuccati laddhīti āha “**titthakarāti laddhikarā**”ti. **Sādhusammattāti** “sādhū”ti sammatā, na sādhūhi sammatāti āha “**santo...pe... puthujjanassā**”ti.

**Kappakolāhalanti** kappato kolāhalaṃ, “kappuṭṭhānaṃ bhavissati”ti devaputtehi ugghositamahāsaddo. **Imeti** pūraṇādayo. **Buddhakolāhalanti** devatāhi ghoṣitaṃ buddhakolāhalaṃ. **Payirupāsivāti** purisasutiparamparāya sutvā. **Cintāmaṇivijjā** nāma paracittajānāpanavijjā. Sā

**kevaṭṭasutte** “maṇikā”ti āgatā, **ādi**-saddena gandhārisambhavavijjādiṃ saṅgaṇhāti. Tattha gandhāriyā vikubbanam dasseti. **Attabhāveti** sarīre. **Rājusmāti** rājatejo.

**Sukkadhammoti** anavajjadhammo nikkilesatā. **Idam gahetvāti** idam parammukhā “mayam buddhā”ti vatvā attano sammukhā “na mayam buddhā”ti tehi vuttavacanam gahetvā. **Evamāhāti** “yepi te, bho gotama...pe... navo ca pabbajjāyā”ti evam avoca. **Attano paṭiññam gahetvāti** “na mayam buddhā”ti tesam attano purato pavattitam paṭiññam gahetvā. Īdise ṭhāne kiṃ-saddo paṭisedhavācako hotīti vuttaṃ “**kinti paṭikkhepavacana**”nti, kasmā paṭijānātīti attho?

**Na uññātabbāti** na garahitabbā. Garahattho hi ayam u-saddo. “Daharo”ti adhikatattā vakkhamānattā ca “**khattiyoti rājakumāro**”ti vuttaṃ. Urasā gacchatīti **urago**, yo koci sappo, idha pana adhippetam dassetum “**āsiviso**”ti āha. **Silavantam pabbajitam dasseti** sāmāññato “bhikkhū”ti vadanto. Idha pana yasmā “bhavampi no gotamo”tiādinā bhagavantam uddissa katham samuṭṭhāpesi, tasmā bhagavā attānam abhantaram akāsi. Yadipi viseso sāmāññajotanāya vibhāvito hoti, saṃsayuppattidīpakam noti vuttaggahaṇam pana tam paricchijjatīti. Tenāha “**desanākusalatāyā**”tiādi. Idāni avaññāparibhave payogato vibhāvetum “**ettha cā**”tiādi vuttaṃ. Tattha acittikatākāravasena avaññāya pākaṭabhāvo, vambhanavasena paribhavassāti adhippāyena kāyapayogavasena avaññā dassitā, vacīpayogavasena paribhavo, ubhayam pana ubhayatthāpi pabhedato gahitam, avaññāparibhavānam dvinnampi ubhayattha pariggaho. **Tam sabbampīti** tam avaññādi sabbampi. Catūsupi tam **na kātabbameva** sampati āyatiñca anattāhāvattā.

**Tadatthadīpanāti** tassa ādito vuttassa atthassa dīpanā. **Visatthadīpanāti** tato visiṭṭhatthadīpanā. Khettānam adhipatīti **khattiyoti** niruttinayena saddasiddhi veditabbā. Khettato vivādā satte tāyatīti **khattiyoti** lokiyā kathayanti. “Mahāsammato, khattiyō, rājā”ti evamāgatesu imesu **dutiyaṃ**. **Akkharanti** samaññā. Sā hi udayabbayābhāvato “na kadāci kharatīti akkhara”nti vuttā. Tenāha “**nāmagottaṃ na jīratī**”ti. **Jātisampannanti** sampannajātīm ativisuddhajātīm. **Tīṇi kulānīti** brāhmaṇavessasuddakulāni. **Atikkamītvāti** attano jātisampattiyā abhibhavivā.

Kevalam nāmapadam vuttaṃ ākhyātapadam apekkhatevāti āha “**ṭhānam hīti kāraṇam vijjatī**”ti. **Uddhaṭadaṇḍenāti** samantato ubbhatena daṇḍena sāsanena, **balavam upakkamaṃ** garukam rājānampi. **Tam khattiyam parivajjeyyāti** khattiyam avaññāparibhavakaraṇato vajjeyya. Tenāha “**na ghaṭṭeyyā**”ti.

Uragassa ca nānāvidhavaṇṇaggahaṇe kāraṇam vadati “**yena yena hī**”tiādinā. **Bahubhakkhanti** mahābhakkham sabbabhakkhakhādakam. **Pāvakaṃ** sodhanatthena asuddhassapi dahanena. **Soti** maggo. Kaṇho vattanī imassāti **kaṇhavattanī**. **Mahanto** aggikkhandho hutvā. **Yāvabrahmalokappamāṇoti** kappavutṭhānakāle araññe agginā gahite kālantare eva kaṭṭhatiṇarukkādīsambhavoti dassetum “jāyanti tattha pārohā”ti pāliyam vuttanti dassento “**tatthā**”tiādimāha.

**Dahitum na sakkoti** paccakkosanādinā. **Vinassanti** samaṇatejasā vināsittatā. “Na tassā”ti ettha na-kāram “vindare”ti ettha ānetvā sambandhitabbanti āha “**na vindantī**”ti. **Vatthumattāvasiṭṭhoti** ṭhānameva nesaṃ avasissati, sayam pana sabbaso saha dhanena vinassantīti attho.

“Sammadeva samācare”ti ettha yathā rājādīsū sammā samācareyya, tam vibhāgena dassento “**khattiyam tāvā**”tiādimāha. Tam suviññeyyameva. **Tisso kulasampattiyoti** khattiya-brāhmaṇagahapati-mahāsālakulāni vadati. Pañca rūpibrahmaloke, cattāro arūpībrahmaloketi evam **nava brahmaloke** kammabhavavibhāgena, sesānam gaṇanānam upapattibhavavibhāgena.

**Abhikkantanti** ativiya kamanīyam. Sā panassā kantatā ativiya iṭṭhatāya manavaḍḍhanatāya sobhanatāyāti āha “**atiṭṭham atimanāpaṃ atisundaranti attho**”ti. “Abhikkanta”nti vacanam apekkhitvā napuṃsakaniddeso, vacanam pana bhagavato dhammadesanāti tathā vuttaṃ.

Atthamattadassanaṃ vā etaṃ, tasmā atthavasena liṅgavibhattivipariṇāmo veditabbo. Dutiyapadepi eseva nayo.

**Adhomukhaṭṭhapitanti** kenaci adhomukhaṃ ṭṭhapitaṃ. **Heṭṭhāmukhajātanti** sabhāveneva heṭṭhāmukhaṃ jātaṃ. **Ugghāṭeyyāti** vivaṭaṃ kareyya. **Hatthe gahetvāti** “puratthābhimukho uttarābhimukho vā gacchā”tiādīni avatvā hatthe gahetvā nissandehaṃ katvā “esa maggo”ti evaṃ vatvā “gacchā”ti vadeyya. **Kālapakkhacātuddasīti** kālapakkhe cātuddasī. **Nikkujjitaṃ ukkujjeyyāti** ādheyyassa anādhārabhūtaṃ bhājanaṃ tassa ādhārabhāvāpādanavasena ukkujjeyya. Aññāṇassa abhimukhattā heṭṭhāmukhajātātāya **saddhammavimukhaṃ**, tato eva adhomukhabhāvena **asaddhamme patitanti** evaṃ padadvayaṃ yathārahaṃ yojetabbaṃ, na yathāsaṅkhayaṃ. Kāmaṃ kāmacchandādayopi paṭicchādakā, micchādītṭhi pana savisesaṃ paṭicchādikāti āha “**micchādītṭhigahanapaṭicchanna**”nti. Tenāha bhagavā – “micchādītṭhiparamāhaṃ, bhikkhave, vajjaṃ vadāmī”ti (a. ni. 1.310). Sabbāpāyagāmimaggo **kummaggo** “kucchito maggo”ti katvā. Sammādītṭhiādīnaṃ ujupaṭipakkhatāya micchādītṭhiādāyo aṭṭha micchattadhammā **micchāmaggo**. Teneva hi tadubhayapaṭipakkhataṃ sandhāya “**saggamokkhamaggaṃ āvikarontenā**”ti vuttaṃ. Sappiādisannissayo padīpo na tathā ujjalo, yathā telasannissayoti **telapajjotaggaṇaṃ**. **Etehi pariyāyehīti** etehi nikkujjitukkujjanapaṭicchannavivaraṇādiupamopamitabbapakārehi.

**Pasannākāranti** pasannehi kātabbaṃ sakkāraṃ. **Saraṇanti** paṭisaraṇaṃ parāyaṇaṃ. **Ajātāti ajjāti** padassa vaḍḍhanamattaṃ hettha **tā**-saddo yathā “devatā”ti. **Pāṇehi upetanti** pāṇehi saha saraṇaṃ upetaṃ. “Yāva me pāṇā dharanti, tāva saraṇaṃ gatameva maṃ dhāretū”ti āpāṇakoṭikaṃ attano saraṇagamaṇaṃ pavedeti. Tenāha “**yāva me**”tiādi. Yaṃ panettha atthato avibhattaṃ, taṃ suviññeyyameva.

Daharasuttavaṇṇanā niṭṭhitā.

## 2. Purisasuttavaṇṇanā

**113. Purimasutteti** purimasuttadesanāyaṃ. Tattha hi upasaṅkamantavelāya satthu guṇe ajānanto kevalaṃ sammodanaṃ karoti. Desanaṃ sutvā pana satthu guṇe ñatvā saraṇaṅgatattā **idha** imasmiṃ samāgame **abhivādesi** pañcapaṭiṭṭhitena vandi. Attānaṃ adhi **ajjhattaṃ**, avijahena attānaṃ adhikicca uddissa pavattadhammā ajjhattaṃ ekajjhaṃ gahaṇavasena, bhummatthe cetāṃ paccattavacanaṃ. Kāmañcāyaṃ ajjhattasaddo gocarajjhattavisayajjhattaajjhattajjhatesu pavattati. Te panettha na yujjantīti vuttaṃ “**niyakajjhatta**”nti, niyakasaṅkhātaajjhattadhammesūti attho. Tenāha “**attano santāne**”ti. **Lubbanalakkhaṇoti** gijjhanalakkhaṇo, ārammaṇe daḷhaggahaṇasabhāvoti attho. **Dussanalakkhaṇoti** kujjhanalakkhaṇo, byāpajjanasabhāvoti attho. **Muyhanalakkhaṇoti** aññāṇalakkhaṇo, ārammaṇe sabhāvasammohabhāvoti attho. **Vihetṭenti** atthanāsanaanattuppādanehi vibādhenti. Tato eva yathā saggamaggesu na dissati, evaṃ karontīti āha “**nāsenti vināsenti**”ti. **Attani sambhūtāti** santāne nibbattā.

Purisasuttavaṇṇanā niṭṭhitā.

## 3. Jarāmarāṇasuttavaṇṇanā

**114. Aññatra jarāmarāṇāti** jarāmarāṇena vinā. Jarāmarāṇavirahito jāto nāma atthi nu khoti pucchati. Pāliyaṃ **jātassāti** paccatte sāmivacanaṃ. **Mahāsālāti** iminā **ra**-kāraṇa **la**-kāraṇa katvā “mahāsālā”ti vuttanti dasseti yathā “puratthiyoti pulatthiyoti”ti. **Mahāsārappattāti** mahantaṃ vibhavasāraṃ pattā. **Koṭisatāṃ** dhaṇaṃ, ayameva vā pāṭho. “Kumbhaṃ nāma dasa ambaṇāni”ti vadanti. **Issarāti** vibhavissariyena issarā. **Suvaṇṇarajatabhājanādīnanti ādi**-saddena vatthaseyyāvasathādiṃ saṅgaṇhāti. Asādhāraṇadhaṇānaṃ nidhānagatattā “**anidhānagatassā**”ti vuttaṃ. **Tuṭṭhikaraṇassāti** pāsādasivikādisukhasādhanaṃ.



**Ārakā kilesehīti** niruttinayena saddasiddhimāha. **Ārakāti** ca sabbaso samucchinnattā tehi dūreti attho. Rāgādīnaṃ hatattā, pāpakaraṇe rahābhāvato, anuttaradakkhiṇeyyatādīpaccaṃ ca **arahaṃ**. Kāmañcāyaṃ saṃyuttavaṇṇanā, abhidhammanayo eva pana nippariyāyoti āha “**cattāro āsavā**”ti **brahmacariyavāsanti** maggabrahmacariyavāsaṃ. **Vuṭṭhāti** vuṭṭhavanto. **Catūhi maggehi karaṇīyanti** paccekāṃ catūhi maggehi kattabbāṃ pariññāpahānasacchikiriya bhāvanābhisaṃmayāṃ. Evaṃ gatāṃ soḷasa vidhāṃ hoti. Osīdāpanatṭhena bhārā viyāti **bhārā**. Tenāha “**bhārā have pañcakkhandhā**”tiādi (saṃ. ni. 3.22). Attapaṭibaddhatāya attano avijahanato paramatthadesanāya ca paramattho arahattaṃ. Kāmañcāyamatto sabbasamiddhisasantatipariyāpanno anavajjadhammo sambhavati akuppasabhāvā, aparihānadhammesu pana aggabhūte arahatte sātīsayo, na itaresūti “**arahattasañkhāto**”tiādi vuttaṃ. Orambhāgiyuddhambhāgiyavibhāgaṃ **dasavidhampi** bhavesu saṃyojanaṃ kilesakammavipākavattapaccayo hutvā nissarituṃ appadānavasena bandhatīti **bhavasamyojanaṃ**. Satipi hi aññesaṃ tappakkhiyabhāvena vinā saṃyojanāni tesāṃ tappaccayabhāvo atthi, bhavaniyāmo orambhāgiyuddhambhāgiyasaṅgahitoti taṃtaṃbhavanibbattakakammaniyaṃ ca hoti, na ca upacchinnasaṃyojanassa katānīpi kammāni bhavaṃ nibbattenti tesāṃyeva saṃyojanaṃtaṃ daṭṭhabbo. **Sammā karaṇehi jānitvāti** ñāyena dukkhādīsu so yathā jānitabbo; tathā jānitvā, pubbakālakiriya vimuttā hi aparakālakiriya ca yathā sambhavati, taṃ dassetuṃ “**maggapaññāyā**”tiādi vuttaṃ.

**Bhijjanasabhāvo** khaṇāyattattā. **Nikkhipitabbasabhāvo** maraṇadhammattā. Ayaṃ kāyo usmāyuvīññāpagaṃ chaḍḍanīyadhammo, yasmīṃ yaṃ paṭiṭṭhitāṃ, taṃ tassa santānagatavippayuttanti katvā vattabbatāṃ arahatīti āha “**khīṇāsavassa hi ajīraṇadhammopi atthi**”tiādi. Tenāha bhagavā “imasmiṃyeva byāmaṃte kaḷevare sasaññimhi samanake lokañca paññāpemi lokasamudayañca lokanirodhañcā”tiādi (saṃ. ni. 1.107; a. ni. 4.45). **Assa khīṇāsavassa**, “jīraṇadhamma”nti yathāvuttaṃ ajīraṇadhammaṃ ṭhapetvā jīraṇadhammaṃ dassento “**tesampāyaṃ kāyo bhedanadhammo**”ti evamāha. Jaraṃ pattasseva hissa bhedanikkhipitabbatāniyate atthe suttadesanā pavattā. Atthassa uppatti aṭṭhuppatti, sā etassa atthīti **aṭṭhuppattiko**. **Kira**-saddo anussavatto, tena anussavāgatoyamattho, na aṭṭhakathāgatoti dīpeti. Tenāha “**vadanti**”ti. Yenāyaṃ attho hetunā aṭṭhuppattiko, taṃ dassetuṃ “**sivikasālāyaṃ nisīditvā kathita**”nti vuttaṃ. “Viharati jetavane”ti nidānavacanena yathā na virujjhati, tathā vedittabbāṃ. Nanu imassa suttassa pucchāvasiko nikkhepoti? Saccametāṃ, suttekadesaṃ pana sandhāya aṭṭhuppattikatāvacaṃ. Keci pana “yānaṃ āruhitvā rājā āgato, rañño ārohanīyaraṭhaṃ dassetvā vutta”ntipi vadanti.

**Sarīre** pheṇapiṇḍasame **kiṃ vattabbāṃ? Sabbhi saddhinti** sādhuhi saha pavedayanti. Na hi kadāci sādhuṇaṃ sādhuhi saha kattabbā honti, tasmā sīdanasabhāvānaṃ kilesānaṃ bhijjanappattattā nibbānaṃ sabbhīti vuccati. **Purimapaḍassāti** “satañca dhammo na jaraṃ upeti”ti padassa. **Kāraṇaṃ dassento** byatirekavasena. **Sataṃ dhammo** nibbānaṃ kilesehi saṃsīdanabhijjanasabhāvo na hoti, tasmā taṃ āgamma **jaraṃ na upeti**. Kilesā pana tannimittakā, evamayaṃ vuttakāraṇato jaraṃ na upeti. Tenāha “**ida**”ntiādi. **Sundarādhivacaṃ vā etaṃ “sabbhī”**ti padaṃ apāpatādīpanato, sabbhidhammabhūtanti attho. Tenāha “virāgo tesāṃ aggamaṃkhaṇāyati (itīvu. 90; a. ni. 4.34), na tena dhammena samatthi kiñci”ti (khu. pā. 6.4; su. ni. 227) ca.

Jarāmarāṇasuttavaṇṇanā niṭṭhitā.

#### 4. Piyasuttavaṇṇanā

**115. Rahasi gatassāti** janasaṃbādhatō apakkantassa. **Nilīnassa** teneva janavivekena ekamantaṃ nisajjāya ekībhāvena paṭisaṃlīnassa viya. Tenāha “**ekībhūtassā**”ti. **Sabbaññubhāsitaṃ karonto āha** tassa vacanaṃ “evameta”nti sampaṭicchitvā tassa vacanaṃ tathāpaccanubhāsanto. Antakenādhīpanattā eva khettavattuhiraññasuvaṇṇādi **mānusaṃ bhavaṃ jahato**. **Anuganti** anugataṃ, tameva anugāmīti attho. **Nicayanti** uparūpari vaḍḍhiyā nicitabhūtaṃ. **Samparāyikanti** samparāya hitaṃ.

Piyasuttavaṇṇanā niṭṭhitā.

### 5. Attarakkhitasuttavaṇṇanā

**116. Pīdahananti** saṃyamanam. **Kammapathabhedam appattassāti** supinakālo viya pavattimattatāya kammapathavisesam agatassa. **Kammassāti** akusalakammassa. **Samvaranti** samvarabhāvam dasseti, itarassa pana samvarabhāvo purimehi tīhi padehi dassitovāti. **Ottappampi gahitameva** tadavinābhāvato. Na hi pāpajigucchanam pāpautrāsarahitam, utrāso vā pāpajigucchanarahito atthīti.

Attarakkhitasuttavaṇṇanā niṭṭhitā.

### 6. Appakasuttavaṇṇanā

**117. Uḷārasaddo** seṭṭhe bahuke ca dissatīti āha “**paṇīte ca bahuke cā**”ti. **Mānamajjanenāti** mānavasena madappattiyā. **Atikkamanti** sādhumariyādavītikkamalakkhaṇam dosam. **Kūḷo** pāso.

Appakasuttavaṇṇanā niṭṭhitā.

### 7. Aḍḍakaraṇasuttavaṇṇanā

**118. Yasmā** kāmanimittam satto sampajānamusā bhāsati, tasmā kāmā tassa patiṭṭhā paccayo kāraṇanti āha “**kāmahetū**”tiādi. **Bhadramukhasīsenā viṭaṭubham** bhadropacārena upacarātīti attho, vinicchayo karīyati etthāti **aḍḍakaraṇam**, vinicchayaṭṭhānam. **Khippanti** kūṭam, macchakhippantipi vaṭṭati. **Oḍḍitanti** oḍḍanavasena phalam pāpitaṃ.

Aḍḍakaraṇasuttavaṇṇanā niṭṭhitā.

### 8. Mallikāsuttavaṇṇanā

**119. “Kasmā pucchati”**ti? Pucchākāraṇam codetvā samudayato paṭṭhāya dassetum “**ayam kira mallikā**”tiādi vuttaṃ. **Mālārāmaṃ gantvāti** attano pitu mālārāmaṃ rakkhaṇatthañceva avasesapupphaggahaṇatthañca gantvā. **Kāsigāmeti** kāsiraṭṭhassa gāme. So kira gāmo mahākosalarājena attano dhītuyā patigharam gacchantiyā pupphamūlatthāya dinno, taṃnimittam. **Bhāgineyyena** ajātasattunā. **Tassāti** rañño pasenadissa. **Sāti** mallikā. **Nivattitunti** tassā dhammatāya nivattitum tassā vacanam paṭikkhipitum. **Nevajjhagāti** vattamānatthe atītavacananti āha “**nādhigacchati**”ti. **Puthu attāti** tesam sattānam attā.

Mallikāsuttavaṇṇanā niṭṭhitā.

### 9. Yaññasuttavaṇṇanā

**120. Thūnanti** yaññūpatthambham. **Upanītāni** yaññaṃ yajitum ārambhāya. **Ettāvatāti** “idha, bhante...pe... rudamānā parikammāni karontī”ti ettakena pāṭhena. **Sanniṭṭhānanti** “naṃ itthim labhissāmi nu kho, na nu kho labhissāmi”ti nicchayaṃ avindanto na ñāyanto. **Phenuddhakanti** yathā yattha kuthite pheṇam uddehati na upadhīyati, evaṃ anekavāram pheṇam uṭṭhāpetvā. **Tam divasanti** tasmim raññā niddam alabhitvā dukkhaseyyadivase. **Ālokaṃ oloketvāti** lohakumbhimukhavatṭisise patte tattha mahantaṃ ālokaṃ oloketvā. Attāno vacanam rañño pavattiñāpanattham. **Mahāsaddo udapādi** “evarūpaṃ yaññaṃ rājā kārāpetī”ti. **Vattukāmo ahoṣi**, vattuṅca pana avisahanto “sa” iti vatvā lohakumbhiyaṃ nimuggo. Imaṃ gātham vattukāmo ahoṣīti ayaṃ panettha sambandho. Esa nayo

sesapadadvayepi. **Dhammabheriṃ carāpesuṃ** “koci kañci pāṇaṃ mā hanatū”ti. **So itthisāmiko puriso sotāpattiḥale patitṭhahi** attano upanissayasampattiyā sattu ca desanāvilāsasampattiyā, rājā pana mahābodhinirujjhanasabhāvattā kiñci visesaṃ nādhigacchi.

**Saṅgahavattḥūnī**ti lokassa saṅgahakāraṇāni. Nipphanasassato navabhāge kassakassa datvā raññaṃ ekabhāgaggahaṇaṃ **dasamabhāgaggahaṇaṃ**. Evaṃ kassakā haṭṭhatuṭṭhā sassāni sampādentīti āha “**sassasampādane medhāvitāti attho**”ti. Tato orabhāge kira chabhāgaggahaṇaṃ jātaṃ. **Chamāsikanti** channaṃ channaṃ māsānaṃ pahonakaṃ. **Pāsetīti** pāsagate viya karotī. Vācāya piyassa piyakarassa kammaṃ **vācāpeyyaṃ**. Sabbaso raṭṭhassa iddhādibhāvato **khemāṃ. Nirabbudaṃ** coriyābhāvato. Idañhi raṭṭhaṃ acoriyaṃ **niraggaḷanti vuccati** apārutagharabhāvato.

**Uddhammūlakaṃ katvāti** ummūlaṃ katvā. **Dvīhi pariyaññehīti** mahāyaññassa pubbabhāge pacchā ca pavattetabbehi dvīhi parivārayaññehi. **Sattavīsati...pe... nassāti** sattavīsādhikānaṃ tiṇṇaṃ pasusatānaṃ dvāvīsatiyā assādīhi ca saṭṭhiadhikadvisataāraññakapasūhi ca saddhiṃ sampiṇḍitānaṃ pana navādhikachasatapasūnaṃ māraṇena bheravassa pāpabhīrukānaṃ bhayāvahassa. Tathā hi vadanti –

“Chasatāni niyujjanti, pasūnaṃ majjhime hani,  
Assamedhassa yaññassa, adhikāni navāpi cā”ti.

**Sammanti** yugacchidde pakkipitabbaṇḍakaṃ. **Pāsentīti** khipanti. **Samhārimehīti** sakaṭehi vahitabbehi yūpehi. Pubbe kira eko rājā sammāpāsaṃ yajanto sarassatinadīre pathaviyā vivare dinne nimuggoyeva ahoṣi. Andhabālabrahmaṇā gatānugatigatā “ayaṃ tassa saggagamanamaggo”ti saññāya tattha sammāpāsayaññaṃ paṭṭhapenti. Tena vuttaṃ “**nimuggokāsato pabhuṭī**”ti. Ayūpo appakadivaso **yāgo**, sayūpo bahudivasāṃ sādheyyo **satrayāgo**. Mantapadābhisaṅkhatānaṃ sappimadhūnaṃ **vājamiti** samañña, hiraññasuvaṇṇagomahiṃ sādīsattarasakadakkhiṇassa. Sāragabbhakoṭṭhāgārādīsu natthettha aggaḷanti **niraggaḷo**. Tattha kira yaññe attano sāpateyyaṃ anavasesato anigūhitvā niyyātiyati. **Mahārambhāti** bahupasughātakammā. Aṭṭhakathāyaṃ pana “vividhā yattha haññare”ti vakkhamānattā “mahākiṅkā”ti attho vutto, idha “mahārambhāti papañcavasena ajeḷakā”tiādi vuttanti “bahupasughātakammā”ti attho vutto. **Nirārambhāti** etthāpi vuttanayena attho veditabbo. Anugataṃ kulanti **anukulaṃ**, kulānugatanti attho veditabbo. Tenāha “**yaṃ niccabhattādi...pe... attho**”ti.

Yaññasuttavaṇṇanā niṭṭhitā.

## 10. Bandhanasuttavaṇṇanā

**121. Idanti** “idha, bhante”tiādikaṃ vacanaṃ. Te bhikkhū ārocesunti sambandho. **Tesūti** tesu rañña bandhāpitamanussesu. **Sukatakāraṇanti** sukāraṇakiriyaṃ ārocesuṃ, na kevalaṃ tesāṃ manussānaṃ bandhāpitabhāvaṃ. Idāni tamatthaṃ vitthārato dassetuṃ “**rañño kirā**”tiādi vuttaṃ. **Aṭṭhavaṅkoti** aṭṭhaṃso. **Antogharacārinoti** antepuravāsino.

**Ukkaṭṭheti** yuddhe. **Mantīsūti** guttamantīsu. **Akutūhalanti** saññataṃ. **Piyanti** piyāyitabbaṃ. **Annapānamhi** madhure abhutte uppanne. **Attheti** atthe kicce jāte **thiranti na kathenti** kāyabalamattena apanetuṃ sakkuṇeyyattā. **Suṭṭhu rattarattāti** ativiya rattā eva hutvā rattā. **Sārattenāti** sārabhāvena sārabhāvasaññāya. **Ohārinanti** heṭṭhā haraṇasīlanti āha “**catūsu apāyesu ākaḍḍhanaka**”nti. **Sithilanti** sithilākāraṃ, na pana sithilaṃ. Tenāha bhagavā “**duppamuñca**”nti.

Bandhanasuttavaṇṇanā niṭṭhitā.

Paṭṭhamavaggavaṇṇanā niṭṭhitā.

## 2. Dutiyavaggo

### 1. Sattajaṭilasuttavaṇṇanā

**122. Pubbārāmasaṅkhāte**ti sāvattinagarassa pubbadisāya katattā pubbārāmeti saṅkhaṃ gate. **Tatrā**ti “migāramātuyā pāsāde”ti tasmim̄ saṅkhittavacane. **Ayaṃ** idāni vuccamānā **anupubbikathā** ādito paṭṭhāya anukkamakathā. **Patthanaṃ akāsi** tassa bhagavato aggupaṭṭhāyikaṃ ekaṃ upāsikaṃ disvā taṃ ṭhānantaraṃ ākaṅkhaṅti. **Meṇḍakaputtassā**ti meṇḍakaseṭṭhiputtassa. **Mātiṭṭhāne ṭhapesi** tassā upakāraṃ garubhāvaṅca disvā. **Tāya kārite pāsādeti** tāya mahāupāsikāya mahālatāpasādhanam̄ vissajjetvā navahi koṭṭhi karīsamatte bhūmibhāge kārite sahasagabbhapaṭimaṇḍite pāsāde.

**Parūlhakacchā**ti parūlhakacchalomā. Kamaṇḍalughaṭikādiṃ **pabbajitaparikkhāraṃ**. **Naggabhogganissirikānanti** naggānaṅceva bhoggānaṅca nissirikānaṅca. Te hi anivattavattatāya naggā ceva, acelakavatādinā bhoggasarīratāya bhoggā, sobhārahitatāya nissirikā ca. **Attanā diṭṭhasutaṃ paṭicchādetvā na katheyanti** akāraṇametam̄ tesam̄ raññā payuttacarapurisabhāvato. **Evam̄ kate pana** te “aññepi pabbajitā atthīti ayaṃ jānātī”ti maññeyyanti kohaññacitto evam̄ akāsīti sakkā viññātuṃ. Tathā hi tenatthena aparitosamāno “**apicā**”tiādimāha.

**Kāsikacandananti** ujjalacandanaṃ. Tam̄ kira vaṇṇavasena samujjalam̄ hoti pabhassaraṃ, tadatthameva nam̄ saṅhataṃ karonti. Tenāha “**kāsikacandananti saṅhacandana**”nti. **Vaṇṇagandhatthāyā**ti vaṇṇasobhatthaṅceva sugandhabhāvattahaṅca. **Vaṇṇagandhatthāyā**ti chavirāgakarāṇattahaṅceva sugandhatthāya ca. “Gihinā”tiādīhi padehi evam̄ pamādavihārinā tayā arahanto duviññeyyāti dasseti.

Samvāso nāma idha kālena upasaṅkamananti dassento “**upasaṅkamantenā**”ti āha. Kāyavācāhi asaṃyatenapi **saṃyatākāro, asaṃvutindriyenapi saṃvutindriyākāro. Pariggahessāmī**ti vīmaṃsissāmi “parisuddham̄ nu kho, no”ti. **Sappaññenā**ti sīlpariggaṇhanapaññāya sappaññena. **Jānitum̄ na sakkoti** sabhāvassa sato sīlassa anupadhāraṇato.

**Kathanenā**ti aparāparaṃ kathanena. Tathā hi vakkhati “**ekaccassa hī**”tiādi. **Ariyavohāro**ti diṭṭhādilakkhaṇena voharito “diṭṭham̄ adiṭṭha”ntiādinā pavuttasaddavohāro. Tassa pana kāraṇameva gaṇhanto “**ettha cetanā**”ti āha. Esa nayo **anariyavohārepi**. Paramatthato hi saccavācādayo musāvādādayo cetanālakkaṇāti. **Paññattivohāro** tathā tathā voharitabbato **evamāha** “saṃvohārena kho, mahārāja, soceyyam̄ veditabba”nti.

**Ñānathāmoti** ñāṇaṅuṇabalaṃ, yena ṭhānuppattikapaṭibhānādinā accāyikakiccakaraṇīyāni niṭṭhāpeti. **Samkathāyā**ti atthavīmaṃsanavasena pavattāya sammākathāya. **Uppilavati** lahukabhāvato. **Heṭṭhācarakā**ti avacarakā. Ye anupavisitvā paresam̄ rahassavīmaṃsanavasena pavattā, tesu ocarakavohāroti vuttam̄ “**carā hī**”tiādi.

**Vaṇṇasaṅṭhānenā**ti vaṇṇena vā saṅṭhānenena vā vaṇṇapokkharatāya vā saṅṭhānasampattiyā vā. Sujāno pesalo vissaseti yojanā. **Lahukadassanenā**ti parittadassanena vijjukena viya. **Parikkhārabhaṇḍakenā**ti pabbajitaparikkhārabhūtena bhaṇḍakena. **Lohaddhamāsoti** lohamayo upaḍḍhagghanakamāso.

Sattajaṭilasuttavaṇṇanā niṭṭhitā.

### 2. Pañcarājasuttavaṇṇanā

**123. Rūpā**ti rūpasaṅkhātā kāmagaṇā. Te pana nīlādivasena anekabhedabhinnāpi rūpāyanattā

cakkhuvīñṇeyyatam nātivattantī āha “**nilapītādibhedam rūpārammaṇa**”nti. To-saddopi dā-saddo viya kālatho hotīti āha “**yatoti yadā**”ti. Manaṃ āpayati vadḍhetīti **manāpaṃ**, manoramam. **Manāpanipphattitanti** tassa puggalassa manasā piyāyitam, tassa aggabhāvena pariyaṅgam paramam koṭiṃ katvā pavattitanti attho. **Puggalamanāpanti** ārammaṇasabhāvam acintetvā puggalassa vasena manāpabhāveneva iṭṭhatāya iṭṭhanti. **Sammutīti** samaññā. **Puggalamanāpaṃ nāma** saññāvipallāsavasena viparītampi gaṇhāti itarasabhāvatoti āha “**yaṃ ekassa...pe... iṭṭham kanta**”nti. Idāni taṃ jivhāvīñṇeyyasena yojetvā dassento “**paccantavāsīna**”ntiādimāha. **Idam puggalamanāpanti** idam yathāvuttam jivhāvīñṇeyyam viya aññampi evaṃjātikam tena tena puggalena manāpanti gahetabbārammaṇam puggalamanāpaṃ nāma.

**Loke paṭivibhattam natthi**, vibhajitvā dassanena lokena madhurajātenapi paṭivibhattam katvā gahetum na sakkuṇeyyāti adhippāyo. Tenāha “**vibhajitvā pana dassetabba**”nti. **Dibbakappampīti** devalokapariyāpannasadisampi **amanāpaṃ upaṭṭhāti** ulārapaṇītārammaṇaparicayato. **Majjhimanam pana...pe... vibhajitabbaṃ** tesam manāpassa manāpato, amanāpassa amanāpato upaṭṭhānato. Tatthapi iṭṭhāniṭṭhāparicchedo nippariyāyato evaṃ veditabboti dassento āha “**tañca paneta**”ntiādi. **Tañca panetaṃ** iṭṭhāniṭṭhābhūtam **ārammaṇam** kāmāvacarajavanesu akusalassa vasena yebhuyyena pavattatīti katvā tattha “**rajjati dussati**”ti akusalasseva pavatti dassitā. Sesakāmāvacarassapi vasena pavatti labbhateva. Tathā hi taṃ appaṭikūlepi paṭikūlākārato, paṭikūlepi appaṭikūlākārato pavattatīti. **Vipākacittam iṭṭhāniṭṭham paricchindati**, na sakkā vipākam vañcetunti. Kusalakammaṃ hi ekantato iṭṭhameva, akusalakammañca aniṭṭhameva, tasmā tattha uppajjamānam vipākacittam yathāsabhāvato pavattatīti.

Yaṃ pana **sammohavinodaniyam** “**kusalakammajam aniṭṭham nāma natthi**”ti ettakameva vuttam, taṃ pana nidassanamattam daṭṭhabbam. Tena sobhanam akusalakammajampi ekaccānam sattānam iṭṭhanti anuññātam siyā. Kusalakammajam pana sabbesam iṭṭhamevāti vadanti. Tiracchānagatānam kesañci manussarūpaṃ amanāpaṃ, yato te disvāva palāyanti. Manussā ca devatānam rūpaṃ disvā bhāyanti, tesampi vipākaviññānam taṃ rūpaṃ ārabha kusalavipākameva uppajjati, tādissassa pana puññassa abhāvā na tesam tattha abhirati hotīti daṭṭhabbam. Kusalakammajassa pana aniṭṭhassa abhāvo viya akusalakammajassa sobhanassa iṭṭhassa abhāvo vattabbo. Hatthiādīnampi hi akusalakammajam manussānam akusalavipākasseva ārammaṇam, kusalakammajam pana pavatte samuṭṭhitam kusalavipākassa, iṭṭhārammaṇena vomissakattā appakam akusalakammajam bahulam akusalavipākupattiyā kāraṇam na bhavissatīti sakkā vuttum. Idāni tameva vipākavasena iṭṭhāniṭṭhārammaṇavavathānam vibhāvetum “**kiñcāpi hī**”tiādi vuttam. Tayidam sammutimanāpasamvibhāgattham vuttam, idha pana na tathā vibhattanti āha “**bhagavā panā**”tiādi.

So upāsako candanaṅgalagāme jātattā “**candanaṅgaliko**”ti paññāyati, “**candanaṅgaliko**”ti keci. Tassa upāsakassa paṭibhānam udapādīti yojanā. Te rājāno hatappabhe hatasobhe disvāti sambandho. **Udakābhisitteti** udakena abhisiñcite. **Āngāre viyāti** āngārakkhaṇe viya.

**Kālassevāti** pageva. **Avigatagandham** taṅkhaṇavikasitatāya. **Īdisam vacananti** “**acchādesī**”ti evarūpaṃ vacananti.

Pañcarājasuttavaṇṇanā niṭṭhitā.

### 3. Doṇapākasuttavaṇṇanā

124. “**Doṇapākakura**”nti ettha vibhattilopaṃ katvā niddesoti āha “**doṇapākam kura**”nti. **Doṇassāti** catunnam ālhakānam, soḷasanāḷīnanti attho. **Tadupiyanti** tadanurūpaṃ, tassa vuttaparimāṇassa anucchavikanti attho. **Pubbeti** taṃdivasato purimataradivasesu. **Balavāti** mahā. **Bhattapariḷāhoti** bhattasammadahetuko. **Assa** rañño **ubhosu passesu** gahitātālavaṇṭā **bījanti yamakātālavaṇṭehi**. **Phāsuvihāranti** bhojane mattaññūtāya laddhabbasukhavihāram. Bhojanamattaññū

hi sukhavīhāro hoti. Tenāha “**tanukassa bhavanti vedanā, saṅikam jīrati āyu pālaya**”nti.

**Tanukassā**ti tanukā assa puggalassa, bhuttapaccayā visabhāgavedanā na hontīti attho. **Saṅikanti** mandam mudukam, aparissayamevāti attho. **Jīratīti** paribhuttāhāro paccati. **Āyupālayanti** nirodho avedanō jīvitam rakkhanto. Atha vā **saṅikam jīratīti** so bhōjane mattaññū puggalo parimitāhāratāya saṅikam cirena jīrati jaram paṇuṇāti jīvitam pāleno.

**Pariyāpuṇivā**ti ettha yathā sabbam so pariyaṇuṇi, tato parañca yathā paṭipajji, tam dassetum “**raññā saddhi**”ntiādi vuttam. **Tāvatake taṇḍule hāreyyāsi** tadupiyañca byañjananti ānetvā sambandho.

**Purisabhāgo esā**ti majjhimena purisena bhuñjitabbabhāgo eso, yadidaṃ nālikodanamattam. **Sallikhitasarīratā**ti bhamaṃ āropetvā ullikhitassa viya sabbapariḷāhavūpasamassa puthulatāpagatasarīrassa. **Silam samparāyikattho**ti vuttam, kuto panettha silanti āha “**bhōjane**”tiādi. **Sīlaṅgam nāma hotī**ti catupārisuddhisīlassa avayavo eko bhāgo hoti.

Doṇapākasuttavaṇṇanā niṭṭhitā.

#### 4. Paṭhamasaṅgāmasuttavaṇṇanā

**125.** Vedena ñāṇena ṭhati iriyatīti **vedehī**, kosalarājabhaginī ajātasattuno mātā, sā kira sampajaññajātikā. Tenāha “**paṇḍitādhivacana**”nti, cattāri aṅgāni etissanti **caturaṅginī**. **Dvinnam rajjānanti** kāsikarajjamagadharajjānam antare, so pana gāmo kāsikarajjo.

**Pāpā**ti lāmakā nihīnācārā. Mejjati siniyhatīti metti, sā etesu atthīti **mittā**. Saha ayanti pavattantīti **sahāyā**. **Sampavaṅkanti** suṭṭhu onatam. **Jayakāraṇam disvā āha**, tathā hi “ajja imam rattim dukkham seti”ti kālaparicchedavasena vuttam. Verighāto nāma veripuggale satīti āha “**veripuggalam labhati**”ti.

Paṭhamasaṅgāmasuttavaṇṇanā niṭṭhitā.

#### 5. Dutiyasaṅgāmasuttavaṇṇanā

**126.** **Suṇāthā**ti “vatvā”ti vacanaseso. **Upakappatīti** sambhavati. **Sayham hotīti** kātuṃ sakkā hoti. “Yadā caññe”ti ca-kāro nipātamattanti āha “**yadā aññe**”ti. **Vilumpantīti** vināsam acchindanam karontī. **Vilumpiyatīti** viluttaparasantakassa asakattā puggalo diṭṭhadhammikaṃ kammaphalam paṭisamvedento viya sayampi parena vilumpiyati, dhanajānim paṇuṇāti. “**Kāraṇa**”nti hi maññatīti pāpakiriyaṃ attano hitāvahaṃ kāraṇam katvā maññati. **Jayanto puggalo** “idaṃ nāma jināmī”ti maññamāno sayampi tato parājayaṃ paṇuṇāti. **Ghaṭṭetaranti** pāpakammavipākaṃ. **Kammavivaṭṭenā**ti kammassa vivaṭṭanena, paccayalābhena laddhāvasarena vivaṭṭetvā vigamitena kammēti attho.

Dutiyasaṅgāmasuttavaṇṇanā niṭṭhitā.

#### 6. Mallikāsuttavaṇṇanā

**127.** **Ekaccā**ti paṇḍitā sapaññā. **Seyyā**ti varā. Gāthāsukhattham sasurasaddalopam katvā “**sassudevā**”ti vuttanti āha “**sassusasuradevatā**”ti. **Disajetthakā**ti catūsūpi disāsu jetthakasīsenā hi lokam vadati. **Tādisāyā**ti tathārūpāya medhāvitādiguṇavuttiyā. **Subhariyāyā**ti sukhettabhūtāya sundaritthiyāti attho.

Mallikāsuttavaṇṇanā niṭṭhitā.

## 7. Appamādasuttavaṇṇanā

**128. Samadhigayhāti** sammā ativiya gahetvā, nāyena visesato gaṇhitvā. **Kārāpakaappamādoti** tiṇṇaṃ puññakiriyavatthūnaṃ pavattakaappamādo. **Samavadhānanti** samavarodhaṃ antogadhaṃ. **Upakkhepanti** bahi ahutvā pakkhipitabbataṃ. **Sesapadaajātāni viya ava...pe... dhammā** sappadesattā. **Appamāde samodhānaṃ gacchanti** tassa nippadesattā. **Aggaṃ seṭṭhaṃ** mahantaṃ **sesadhammānaṃ appamādo. Paṭilābhakaṭṭhenāti** adhigamahetutāya. **Lokiyopi samānoti** kāmāvacaropi samāno. Mahaggatānuttarānaṃ pubbhāge pavattaappamādo hi idhāhippeto.

Pasaṃsanti paṇḍitāti yojanā. Appamādassa pāsaṃsabhāve ekantato kattabbatāya pana “**etāni**”tiadinā kāraṇaṃ āha. Imissā yojanāya “puññakiriyāsū”ti padassa “appamatto”ti iminā sambandho. Yasmā paṇḍitā appamādaṃ pasaṃsanti, yasmā ca puññakiriyāsu appamatto ubho atthe adhiggaṇhāti, tasmā āyuādīni patthayantena appamādova kātabboti. Dutiyayojanāya pana paṇḍitā appamādaṃ pasaṃsanti. Kattha? Puññakiriyāsu. Kasmāti ce? Appamattotiādi. Tenāha “**yasmā...pe... attho**”ti. **Atthapaṭilābhāti** diṭṭhadhammikādihitapaṭilābhā.

Appamādasuttavaṇṇanā niṭṭhitā.

## 8. Kalyāṇamittasuttavaṇṇanā

**129. Silādiguṇasamannāgato** kalyāṇo bhaddako mitto etassāti kalyāṇamitto, tassa dhammo **kalyāṇamittasseva svākhāto nāma hoti** sutvā kattabbakiccassa sādhanato. Tenāha “**atthaṃ pūreti**”ti. **Itarassāti** pāpamittassa. **Tenāti** atthapūraṇena. **Etanti** “so ca kho kalyāṇamittassā”ti etaṃ vacanaṃ. **Desanādhammoti** pariyattidhammo. So hi kalyāṇamittato paccakkhato laddhabbo, itare tadupanissayā paccattapurisakārehi, tena laddhabbo kalyāṇamittoti evamattho gahetabbo. Sāvakabodhisattavasena hesā desanā āgatā. Na hi sesabodhisattānaṃ paropadesena payojanaṃ atthi.

**Upaḍḍhaṃ kalyāṇamittatoti** brahmacariyaṃ carantassa upaḍḍhaguṇo kalyāṇamittato laddhabbo. **Upaḍḍhaṃ paccattapurisakāratoti** itaraṃ upaḍḍhaṃ nānaṃ paṭipajjantassa attano purisakārato. Lokepi pākaṭoyamattho “ācariyato upaḍḍhaṃ, paccattapurisakārato upaḍḍhaṃ laddhabbā tevijjajā”ti, tasmā thero tathā cintesi. **Nippadesanti** anavasesato. **Tatoti** kalyāṇamittato. **Upaḍḍhaṃ āgacchatīti** upaḍḍhaguṇo paṭipajjantaṃ upagacchati. **Bahūhi** purisehi. **Vinibbhogo** vivecanaṃ **natthi** ekajjhaṃ atthassa vivecetum asakkuṇeyyattā. **Esāti** paratoghosa paccattapurisakārato ca sijjhamāno attho. **Ettakanti** ettako bhāgo. Yadi na sakkā laddhum, atha kasmā upaḍḍhanti vuttanti āha “**kalyāṇamittatāyā**”tiādi. Sammādiṭṭhiādīsu **na sakkā laddhum**. Asakkuṇeyye sakalampi na sambhavati paratoghosamattena tesam asijjhanato, padhānahetubhāvadīpanatthaṃ pana “**sakalamevā**”ti vuttaṃ. **Pubbabhāgapāṭilābhāṅanti** pubbhāge paṭiladdhabbakāraṇaṃ kalyāṇamittassa upadesena vinā tena uttari visesato aladdhabbato. **Atthatoti** paramatthato. “**Kalyāṇamittam...pe... cattāro khandhā**”ti vatvā sutvāti attho. Te pana silādayo saṅkhārakkhandhāpariyāpannāti āha “**saṅkhārakkhandhotipi vadantiyevā**”ti.

**Māhevanti** mā aha evanti chedo, **ahāti** nipātamattaṃ, māti paṭisedhe nipāto. Tenāha “**mā evaṃ abhaṇī**”ti. “Māhevaṃ ānandā”ti vadato bhagavato imasmiṃ ṭhāne tādissassa nāma te, ānanda, kalyāṇamittaguṇe sevato vattum yuttaṃ ayāthāvatoti dhammabhaṇḍāgārikassa yathābhūtaguṇakittanamukhena paṭikkhepo yuttoti dassento “**bahussuto**”tiādimāha. **Idanti** idaṃ vacanaṃ bhagavā āhāti sambandho. **Sakalameva hīti** ettha **hi-saddo** hetuattho. Tena “māheva”nti tassa paṭikkhepassa kāraṇaṃ jotitaṃ, na sarūpato vuttaṃ. “Kalyāṇamittasseta”ntiadinā pana taṃ sarūpato dassitanti āha “**idāni...pe... ādimāhā**”ti. **Pāṭikaṅkhitabbanti** icchanaṭṭhena pāṭikaṅkhitabbaṃ, na pāṭikaṅkhānimittenāti āha “**avassaṃbhāvīti attho**”ti.

**Idhāti** antogadhāvadhāraṇapadaṃ, idhevāti attho. Imasmiṃyeva hi sāsane ariyamaggabhāvanā, na

aññattha. **Ādipadānaṃyevā**ti tasmim̐ tasmim̐ vākye ādito eva vuttasammādiṭṭhiādipadānaṃyeva. **Sammādassanalakkhaṇā**ti catunnaṃ ariyasaccānaṃ pariññābhisamayādivasena sammadeva dassanasabhāvā. **Sammābhiropanalakkhaṇoti** nibbānasaṅkhāte ārammaṇe sampayuttadhamme sammadeva āropanasabhāvo. **Sammāpariggahaṇalakkhaṇā**ti musāvādādīnaṃ viṣaṃvādanādikiccatāya lūkhānaṃ apariggāhakānaṃ paṭipakkhabhāvato pariggāhakasabhāvā sammāvācā siniddhabhāvena sampayuttadhamme sammāvācāpaccayaṃ subhāsitasotāraṇca puggalaṃ pariggaṇhātīti **sammāpariggahaṇalakkhaṇā**. Yathā kāyikakiriyaṃ kiñci kattabbaṃ samuṭṭhāpeti, sayaṇca samuṭṭhahanaṃ ghaṭanaṃ hoti, tathā **sammākammanta** saṅkhātā viratipīti **samuṭṭhāpanalakkhaṇā** daṭṭhabbā, sampayuttadhammānaṃ vā ukkhipanaṃ **samuṭṭhāpanaṃ** kāyikakiriyaṃ bhārukkhipanaṃ viya. Jīvamānassa sattassa, sampayuttadhammānaṃ vā, jīvitappavattiyā ājīvasseva vā suddhi vodānaṃ. Yathā uppānuppānānaṃ vajjānaṃ dhammena pahānānuppādaatthalābhādiṭṭhiādivasena sampayuttānaṃ paggahaṇasabhāvoti **sammāpaggahalakkhaṇo sammāvāyāmo**. Kāyavedanācittadhammesu subhasukhaniccaatagāhānaṇca vidhamanavasena sammāpaṭiṭṭhānasabhāvāti **sammāupaṭṭhānalakkhaṇā sammāsati**. Sampayuttadhammānaṃ sammā samādahanaṃ ekaggaṭākaraṇaṃ sabhāvo etassāti **sammāsamādhānalakkhaṇo sammāsamādhi**. **Tīṇi kiccāni honti** paṭipakkhadhammesu, ārammaṇadhammesu, sampayuttadhammesu ca ekasmiṃyeva khaṇe pavattivisesabhūtāni. Idāni tāni sarūpato dassetuṃ “**seyyathida**”ntiādi vuttaṃ. **Saddhinti** iminā “**aññehi**”ti vuttakilesā micchādiṭṭhiyā saha ekaṭṭhā vā anekaṭṭhā vāti dasseti. **Pajahati** pahāya naṃ paṭivijjhati. **Nirodhanti** nibbānaṃ **ārammaṇaṃ karoti** sacchikiriyāpaṭivedhena paṭivijjhati.

Na kevalaṃ maggadhammā vuttanayeneva, atha kho aparenapi nayena veditabbāti dassento “**apicā**”tiādimāha. **Nānākhaṇā** punappunaṃ uppajjanato. **Nānārammaṇā** aniccānupassanādibhāvato. **Ekakkhaṇā** sakideva uppajjanato. **Ekārammaṇā** nibbānavisayattā. **Cattāri nāmāni labhati** pariññābhisamayādivasena pavattiyā. **Tīṇi nāmāni labhati** kāmasaṅkappādīnaṃ pahānavasena pavattiyā. Paṭipakkhapahānavasena hissa nāmattayalābho. Esa nayo sesesupi. **Viratīyopi honti cetanāyopi** pubbhāgepi vikkhambhanavasena pavattanato. **Maggakkhaṇe pana viratīyova** paṭipakkhasamucchindanassa maggakiccattā. Na hi cetanā maggasabhāvā. **Sammappadhānasatipaṭṭhānavasenā**ti catubbidhasammappadhānacatubbidhasatipaṭṭhānavasena **cattāri nāmāni labhati** anuppānākusalanuppādanādīnaṃ kusalanāṇca vaḍḍhanato. **Pubbabhāgepi maggakkhaṇepīti** yathā pubbhāge paṭhamajjhānādivasena nānā. Evaṃ maggakkhaṇepi. Na hi ekopi ca maggasamādhi paṭhamajjhānasamādhiādināmāni labhati sammādiṭṭhiādināṃ viya kiccavasena bhedaḥbhāvato. Tenāha “**maggakkhaṇepi sammāsamādhiyevā**”ti.

Ñatvā ñātābbāti sambandho. Vuddhi nāma vepullaṃ bhīyyobhāvo punappunaṃ uppādo evāti āha “**punappunaṃ janeti**”ti. **Abhinibbatteti** abhivaḍḍhaṃ pāpento nibbatteti. **Vivittatāti** vivittabhāvo. So hi vivecanīyato viviccati, yaṃ viviccitvā ṭhitam, tadubhayampi idha vivittabhāvasāmaññaṇa “**vivittatā**”ti vuttaṃ. Tesu purimo vivecanīyato viviccamānatāya viviccanakiriyaṃ samaṅgī dhammasamūho tāya eva viviccanakiriyaṃ vasena vivekoti gahito. Itaro sabbaso tato vivittasabhāvātāya. Tatha yasmim̐ dhammapuñje sammādiṭṭhi pavattati, taṃ yathāvuttāya viviccamānatāya vivekasāṅkhātāṃ nissāyeva pavattati, itaraṃ pana taṃninnatātaṃārammaṇatāhīti vuttaṃ “**vivekaṃ nissitaṃ, viveke vā nissita**”nti.

Yathā vā vivekavasena pavattaṃ jhānaṃ “**vivekaja**”nti vuttaṃ, evaṃ vivekavasena pavattā sammādiṭṭhi “**vivekanissitā**”ti daṭṭhabbā. Nissayo ca vipassanāmaggānaṃ vasena maggaphalānaṃ veditabbo. Asatipi tāsāṃ pubbāparabhāve “**paṭiccasamuppādo**”ti ettha paccayānaṃ samuppādanāṃ viya abhinnadhammādhārā nissayabhāvanā sambhavanti. Tassa tadanāga-samucchedanissaraṇavivekanissitāṃ vatvā paṭippassaddhivivekanissitāya avacanaṃ ariyamaggabhāvanāya vuccamānattā. Bhāvitamaggassa hi ye sacchikātabbā dhammā. Tesāṃ kiccaṃ paṭippassaddhiviveko. **Ajjhāsayatoti** “**nibbānaṃ sacchikarissāmi**”ti mahantaajjhāsayatō. Yadihi hi vipassanākkhaṇe saṅkhārārammaṇaṃ cittaṃ, saṅkhāresu pana ādinavaṃ suṭṭhu, disvā tappaṭipakkhe nibbāne ninnatāya ajjhāsayatō nissaraṇavivekanissito hoti, uñhābhībhūtassa puggalassa sītaninnacittatā



viya. Keci pana “yathā sabhāvato, yathā ajjhāsayato nissaraṇavivekanissitatā, evaṃ paṭippassaddhivivekanissitatāpi siyā” ti vadanti. Yadaggena hi nibbānaninnatā siyā, tadaggena phalaninnatāpi siyā “kudāssu nāmāhaṃ tadāyatanam upasampajja vihareyya” nti ajjhāsayasampattiyā bhāvato. Yasmā pahānavinayo viya rāganirodhopi idhādhippetavivekena atthato nibbisiṭṭho, tasmā vuttam **esa nayo virāganissitādīsūti**. Tenāha “vivekatthā eva hi virāgādayo” ti.

Vossaggasaddo pariccāgattho pakkhandanattho cāti vossaggassa duvidhatā vuttā. Vossajjanañhi pahānam, vissanābhāvena nirāsaṅkapavatti ca, tasmā vipassanākkhaṇe tadaṅgavasena, maggakkhaṇe samucchavedavasena paṭipakkhassa pahānam vossaggo, tathā vipassanākkhaṇe taṃninnabhāvena, maggakkhaṇe ārammaṇakaraṇena vissanābhāvatā vossaggoti veditabbaṃ. Tenevāha “**tattha pariccāgavossaggo**” tiādi. **Ayam sammādiṭṭhi**ti ayam missakavasena vuttā sammādiṭṭhi. **Yathāvuttena pakārenāti** tadaṅgappahānasamucchadappahānapakārena taṃninnatadārammaṇakaraṇappakārena ca.

Pubbe vossaggavacanasseva atthassa vuttattā āha “**sakalena vacanenā**” ti. **Pariṇamantaṃ** vipassanākkhaṇe, **pariṇataṃ** maggakkhaṇe. Pariṇāmo nāma idha paripākoti āha “**paripaccantaṃ paripakkañcā**” ti. Paripāko ca āsevanalābhena laddhasāmatthiyassa kilese pariccajitum nibbānam pakkhanditum tikkhavisadabhāvo. Tenāha “**aya**” ntiādi. **Esa nayoti** yvāyam nayo “vivekanissita” ntiādinā sammādiṭṭhiyam vutto, sesesu sammāsaṅkappādīsūpi eseva nayo, evaṃ tattha netabbanti attho. **Paṭiccāti** nissāya. **Jātisabhāvāti** jāyanasabhāvā. **Sakaloti** anavaseso, sabboti attho. Na koci maggo sāvaseso hutvā sambhavati. Heṭṭhime magge uppanne uparimo uppanno eva nāma anantarāyena uppajjanato. **Vavassaggattheti** vacasāyatthe. **Vaṇṇayantīti** guṇavaṇṇanasena vitthārenti.

Kalyāṇamittasuttavaṇṇanā niṭṭhitā.

## 9. Paṭhamaaputtakasuttavaṇṇanā

**130.** Diva-saddo divā-saddo viya divasapariyāyo, tasmā visesanabhāvena vuccamāno divasaddo atthavisesaṃ dīpetīti āha “**divasassa divā**” tiādi. Saṃ vuccati dhanam, tassa paṭīti sampati, dhanasāmiko, tassa hitāvahattā **sāpateyyanti** āha “**sāpateyyanti dhana**” nti. Tassa gehe katākatabhaṇḍassa atibahubhāvato vimhayappatto rājā “**ko pana vādo**” ti āha. **Kāḷalohaṃ** nāma ayophalam. Kacchapādirūpehipi sovaṇṇādīni ṭhapenti. **Sakuṇḍakabhattanti** sakuṇḍehi vā sathusehi vā pakkabhataṃ. Bilaṅgam vuccati dhaññabilaṅgam, āranālantipi vuccati, taṃ dutiyam assāti **bilaṅgadutiyam**. Tañhi kañjito nibbattattā **kañjikam** nāma. Tīhi pakkhehi vatthakhaṇḍehi katanivāsanaṃ **tipakkhavasanaṃ**. Tenāha “**tīni...pe... nivāsana**” nti.

Asanto nīco purisoti **asappurisoti** āha “**lāmakapuriso**” ti. Kammaṃsa nibbattabhāvena otaraṇatāya phalam aggaṃ nāma, uparibhūmigatattā uddham aggaṃ assāti **uddhaggikam**. **Dakkhiṇanti** dānamāha. Saggo nāma kāmabhavūpapattibhavo, tassa nibbattanato “**saggassa hitā**” ti vuttam. **Tatrupapattijananatoti** tatra upapattiyā jananato, uppādanatoti attho.

Setam udakaṃ etissāti **setodakā**. So yena bhāvena yattha pākāṭataro hutvā dissati, taṃ dassetum “**vicīnam bhinnatṭhāne**” ti āha. Sukhotaraṇatṭhānatāya kaddamādidosavirahato ca **sundaratitthā**. **Tam apeyyamānanti** taṃ udakaṃ kenaci aparibhuñjijyamānam. **Attanā kattabbakiccakaroti** attanā kātābbakammasaṅkhātākkiccaro, paribhogavasena ceva saṅghetabbasaṅgaṇhanavasena ca niyojakoti attho. **Kusalakiccakaroti** attanā kātābbapuññakaro.

Paṭhamaaputtakasuttavaṇṇanā niṭṭhitā.

## 10. Dutiyaaputtakasuttavaṇṇanā

**131. Piṇḍapātenā**ti sahayoge karaṇavacanam. Paṭipādanam tena saha yojananti āha “**piṇḍapātena saddhiṃ saṃyojesi, piṇḍapātam adāsīti attho**”ti. “Paṇītabhojanam bhuñjitvā”ti vuttam, pāliyam pana “kaṇājakam bhuñjati bilaṅgadutiya”nti. Tam tam pavattitam yebhuyyavasena vuttanti daṭṭhabbam. Idāni “imassa seṭṭhissa kassaci samaṇassa vā brāhmaṇassa vā dethā”ti vacanam na sutapubbam, yasmā paccakabuddhā nāma attano guṇānubhāvehi loke pākāṭā sañjātā eva honti, tasmā seṭṭhibhariyāya “na yassa vā tassa vā”tiādi cintitam. Tathā hi tesam dentāpi sakkaccam yebhuyyena paṇītameva denti. **Nāsāpuṭam pahari** attano ānubhāvena. **So** luddhatāya “bahu vata dhañṇam mamassā”ti **cittam saṃyametuṃ sandhāretuṃ asakkonto**.

Vippaṭisāruppanākāram dassetuṃ “**varameta**”ntiādi vuttam. “Imassa samaṇassa piṇḍapātam dehi”ti vadato na ekāya eva javanavīthiyā vasena atthasiddhi. Atha kho tattha ādito pavattajavanavāropi atthi majjhe pavattajavanavāropi, tam sandhāyāha “**pubbapacchimacetanāvasenā**”ti. **Ekā cetanā dve paṭisandhiyo na detīti** ettha sāketapañhavasena nicchayo veditabbo. Cuddasannam cetanānam pubbe puretaram katattā **purāṇam**.

Parigayhatīti **pariggahoti** āha “**pariggahitam vatthu**”nti. Anvāya upanissāya jīvanatīti **anujīvino**. **Sabbametanti** dhanadhañṇādisabbam etam yathāvuttapariggahavatthum. **Nikkhippagāminanti** nikkhipitabbatāgāminam. Nikkhipitabbasabhāvam hotīti āha “**nikkhippasabhāva**”nti. Pahāya gamanīyanti ayamettha atthoti āha “**pariccajitabbasabhāvamevā**”ti.

Dutiyaaputtakasuttavaṇṇanā niṭṭhitā.

Dutiyavaggavaṇṇanā niṭṭhitā.

### 3. Tatiyavaggo

#### 1. Puggalasuttavaṇṇanā

**132.** “Nīce kule paccājāto”tiādi appakāsanabhāvena tamatīti **tamo**, tena tamena yuttoti **tamo** puggalo vuccati, tamyogato puggalassa tabbohāro yathā “maccherayogato macchero”ti. Tasmā **tamoti** appakāsanabhāvena tamo tamabhūto andhakāro viya jāto, andhakāratam vā pattoti attho. Vuttalakkhaṇam tamameva paramparato ayanam gati niṭṭhā etassāti **tamaparāyaṇo**, tamaparāyaṇatam vā pattoti attho. Nāyenapi tamaggahaṇena khandhatamova kathito, na andhakāratamo. Khandhatamoti ca sampattirahitā khandhapavattiyeva daṭṭhabbā. “Ucce kule paccājāto”tiādi pakāsanabhāvena jotetīti **joti**, tena jotinā yuttotiādi sabbam tame vuttanayeneva veditabbam. **Itare dveti** jotitamaparāyaṇo jotijotiparāyaṇoti itare dve puggale.

Veṇuvettādikehi peḷādikārakā **vilīvakārakā**. Migamacchādīnam nisādanato **nesādā**, māgavikamacchabandhādayo. Rathesu cammena hananakaraṇato **rathakārā** cammakārā vuttā. “Pu” iti karīsassa nāmam, tam kusenti apanentīti **pukkusā**, pupphachaddakā. **Dubbaṇṇoti** virūpo. **Okotimako**ti ārohābhāvena heṭṭhimakoṭiko, rassakāyoti attho. Tenāha “**lakuṇḍako**”ti. Laku viya ghaṭikā viya ḍeti pavattatīti hi **lakuṇḍako**, rasso. Kaṇati nimīlatīti **kāṇo**. Tam panassa nimīlanam ekena akkhinā dvīhipi vāti āha “**ekakkhikāṇo vā ubhayakkhikāṇo vā**”ti. Kuṇanam kuṇo, hatthavekallam, so etassa atthīti **kuṇī**. **Khaṅjo** vuccati pādavikalo. Heṭṭhimakāyasankhāto sarīrassa pakkho padeso hatto assāti **pakkhahato**. Tenāha “**pīṭhasampī**”ti. Padīpe padīpane etabbam netabbanti **padīpeyyam**, telakapallādiupakaraṇam. **Vuttanti** aṭṭhakathāyam vuttam.

Āgamanavipattīti āgamanatṭhānavasena vipatti āgamo etthāti katvā.

**Pubbuppannapaccayavipattīti** paṭhamuppannapaccayavasena vipatti. Caṇḍālādisabhāvā hissa mātāpitāro paṭhamuppannapaccayā, paṭhamupattiyā vā paccayā, tehevassa vipatti eva, na sampatti. **Pavattapaccayavipattīti** pavatte sukhapaccayavipatti. Tādise nihīnakule uppannopi koci

vibhavasampanno siyā, ayaṃ pana duggato durūpo hoti. **Ājīvupāyavipattī** ājīvanupāyavasena vipattī. Sukhena hi jīvikam pavattetuṃ upāyabhūtā hatthisippādayo imassa natthi, pupphachaḍḍakasilākoṭṭanādikammaṃ pana katvā jīvikam pavatteti. Tenāha “**kasiravuttike**”ti. **Attabhāvavipattī** upadhīvipattī. **Dukkhakāraṇasamāyogoti** kāyikacetasikadukkhuppattiyā paccayasamodhānaṃ. **Sukhakāraṇavipattī** sukhapaccayaparihāni. **Upabhogavipattī** upabhogasukhassa vināso anupaladdhi. Joti ceva jotiparāyaṇabhāvo ca **sukkapakkho**.

**Dasahi akkosavattūhī**ti lakkhaṇavacanam etaṃ yathā “yadi me byādhitā honti, dātabbamidamosadha”nti, tasmā dasahi akkosavattūhī, tattha vā yena kenaci paribhāsati attho. **Ekaggacittoti** dānaṃ dātuṃ apekkhitatāya samāhitacitto.

Puggalasuttavaṇṇanā niṭṭhitā.

## 2. Ayyikāsuttavaṇṇanā

**133. Jarājiṇṇāti** jarāya jiṇṇā. Tena pākaṭajarāya matthakappattimāha. **Vayovuḍḍhāti** vayasā vuḍḍhā. Tena pacchimavayassa osakkasampavattiṃ vadati. **Jātimahallikāti** jātimahattagatā. **Cirakālam atikkantāti** dve tayo rājaparivatte vītivattā. Vayo-saddo sādharāṇavacanopi jiṇṇasaddasannidhānato osānavayaṃ eva vadatīti āha “**pacchimavayaṃ sampattā**”ti. **Ayyikāti** mātāmahiṃ sandhāya vadati. Hatthī eva ratanabhūto **hatthiratananti** āha “satasahassagghanakenā”tiādi. **Sabbāni tānīti** kumbhakārabhājanāni, tehi saddhiṃ sattasantānassa pamāṇaṃ dassento “**tesu hī**”tiādimāha, taṃ suviññeyyameva.

Ayyikāsuttavaṇṇanā niṭṭhitā.

## 4. Issattasuttavaṇṇanā

**135. Aṭṭhuppattikoti** ettha kā assa aṭṭhuppatti? Titthiyānaṃ bhagavato bhikkhusaṅghassa ca alābhāya ayasāya parisakkaṇaṃ. Taṃ vitthārato dassetuṃ “**bhagavato kirā**”tiādi vuttaṃ. Yathā taṃ sabbadisāsu yamakamahāmegho uṭṭhahitvā mahāoghaṃ viya sabbā pāramiyo “imasmiṃyeva attabhāve vipākaṃ dassāmā”ti sampiṇḍitā viya lābhasakkāramahoghaṃ nibbattayimsu. Tato tato annapānāyānavatthamālāgandhavilepanādīhatthā khattiyabrāhmaṇādayo āgantvā – “kahaṃ bhagavā, kahaṃ devadevo narāsabho lokanātho”ti bhagavantaṃ pariyesanti, sakaṭasatehipi paccaye āharitvā okāsaṃ alabhamānā samantā gāvutappamāṇampi sakaṭadhurena sakaṭadhuraṃ āhacca tiṭṭhanti ceva anuvattanti ca andhakavindabrāhmaṇādayo viya. Sabbam **khandhake** (mahāva. 282) tesu tesu suttesu ca āgatanayena vedittabbaṃ. Yathā ca bhagavato, evaṃ bhikkhusaṅghassapi. Vuttampi – “tena kho pana samayena bhagavā sakkato hoti garukato mānito pūjito apacito lābhī cīvara...pe... parikkhāraṇaṃ, bhikkhusaṅghopi kho”tiādi (udā. 38), tathā “yāvātā kho, cunda, etarahi saṅgho vā gaṇo vā loke uppanno, nāhaṃ, cunda, aññaṃ ekaṃ saṅghampi ekaṃ gaṇampi samanupassāmi evaṃ lābhaggayasaggappattaṃ, yatharivāyaṃ, cunda, bhikkhusaṅgho”ti (dī. ni. 3.176). **Evanti** idāni vuccamānākārena. **Nijjhantinti** saññattiṃ. **Nanti** kathaṃ.

**Evaṃ pucchituṃ ayuttaṃ** titthiyānaṃ kathā mahājanasannipāte niyyātītā hotīti. **Tasmiṃ dātabbaṃ**, cittappasādamattena dentepi hi puññaṃ pavaḍḍhati. **Ārocitaṃ** attanoti adhippāyo. **Bhagavāti** satthu āmantanaṃ. **Cittaṃ nāma** yathāpaccayaṃ pavattamānaṃ **nigaṇṭhā...pe... pasīdati** pasannassāti adhippāyo. Pubbe avisesato deyyadhammassa dātabbaṭṭhānaṃ nāma pucchitaṃ, idāni tassa mahapphalabhāvakaro dakkhiṇeyyavisesoti āha “**aññaṃ tayā paṭhamam pucchitaṃ, aññaṃ pacchā**”ti. **Sallakkhehi etaṃ**. Pacchimaṃ purimena saddhiṃ ānehīti adhippāyo. Pucchitassa nāma pañhassa kathanam mayhameva bhāro. **Samupabyūḷhoti** ekato senāya rāsivasena sampiṇḍitoti attho. Tenāha “**rāsibhūto**”ti. **Asikkhitoti** sattaṭṭhasaṃvaccharāni dhanusippena sikkhito. Dhanusippaṃ sikkhitvāpi koci katahattho na hoti, ayaṃ pana asikkhito na katahattho, poṅkhānupoṅkhabhāvoyeva

byāmamutt̥hibandho. **Tiṇapuñjamattikāpuñjādīsūti ādi-saddena pamsupuñjavālukaapuñjasārāphalakaayoghanādike** saṅgaṇhāti. **Akataparicayoti** tesam̐ santikā vijjhanat̥ṭhena akataparicayo. Rājarājamahāmat̥tādike upecca asanaṃ upāsanaṃ, na kataṃ upāsanaṃ etenāti **akatūpāsano**. Asikkhitatādina bhīrubhāvena vā kāyassa chambhanaṃ saṅkampaṇaṃ uttāso etassa atthīti chambhīti āha “**pavedhitakāyo**”ti.

Dakkhiṇeyyatāya adhippetattā “**arahattamaggena kāmacchando pahīno hoti**”ti āha. Accantappahānassa icchitattā **tatiyeneva kukkuccaṃ pahīnaṃ hoti** paṭighasampayogaṃ. Asekkhassa ayanti **asekkhaṃ**, sīlakkhandho. Tayidaṃ na aggaphalaṃ sīlameva adhippetam̐, atha kho yaṃ kiñci asekkhasantāne pavattaṃ sīlaṃ, lokuttaro eva na adhippeto sikkhāya jātattā, evaṃ vimuttikkhandhopīti. Sekkhassa esoti vā, apariyositasikkhattā sayameva sikkhatīti vā sekkho, catūsu maggesu hetthimesu ca tīsu phalesu sīlakkhandho. Upari sikkhitabbābhāvato **asekkho**. Vuḍḍhippatto sekkhoti **asekkho**. Aggaphalabhūto sīlakkhandho vucceyya, aṭṭhakathāyaṃ pana vipassakassa sīlassa adhippetattā tathā attho vutto. **Sabbatthāti “asekkhenā”**tiādīsu. Ettha ca yathā sīlasamādhīpaññākkhandhā missakā adhippetā, evaṃ vimuttikkhandhāpīti tadan̐gavimuttīdayopi veditabbā, na paṭippassaddhivimutti eva.

Yena sippena issāso hoti, taṃ **issattanti** āha “**ususippa**”nti. Yassā vāyodhātuyā vasena sarīraṃ sañjātathāmaṃ hoti, taṃ balapaccayaṃ sandhāyāha “**balam̐ nāma vāyodhātū**”ti. Samappavattito hi visamappavattinivārakadhātu balaṃ nāma, tena tato aññaṃ balarūpaṃ nāma natthi.

Yasmā arahā eva ekantato sorato, tassa bhāvo **soraccanti** āha “**soraccanti arahatta**”nti. **Ete dveti** khanti soraccanti ete dve dhammā. Pānīyaṃ pivanti etthāti **papā**, yo koci jalāsayo yaṃ kiñci pānīyat̥ṭhānanti āha “**caturassapokkharāṇīādīni**”ti. Udakavikūlādīsu kamanti atikkamanti etehīti **saṅkamanāni**, setuādīni. Setukaraṇayuttaṭṭhāne setuṃ, caṅkamanakaraṇayuttaṭṭhāne caṅkamaṇaṃ, maggākaraṇayuttaṭṭhāne maggaṃ kareyyāti ayamettha adhippāyo. Tenāha “**paṇṇāsā**”tiādī.

**Bhikkhācāravattanti** ariyānaṃ hitaṃ vattapaṭipattiṃ. **Dentopīti pi-saddena** akhīṇāsavassa dentopīti imamatthaṃ dasseti yassa kassacipi dentenapi kammaphalaṃ saddahitvā vipasannacitteneva dātābhattā. **Thanayanti** idaṃ tassa mahāmeghabhāvadassanaṃ, yo hi mahāvassaṃ vassati, so gajjanto vijjummālaṃ vissajjento pavassati. **Abhisāṅkharitvā samodhānetvāti** khādanīyassa vividhajātiyāni sampiṇḍetvā. Tenāha “**rāsīm katvā**”ti.

**Pakiraṇaṃ** nāma vikiraṇampi hoti anekathattā dhātūnanti āha “**vikirati**”ti. **Pakiranto viya vā dānaṃ detīti** iminā guṇakhetameva apariyesitvā karuṇākhettepi mahādānaṃ pavattetīti dasseti. Tena “pakireti”ti vadantena bhagavatā aṭṭhuppattiyam̐ āgatattitthiyavādena appaṭisedhitatāpi dīpitā hoti. **Puññadhārāti** puññamayadhārā puññābhisandā. **Sinehayantīti** thūladhārenapi sinehena siniddhaṃ karontī. **Kiledayantīti** allabhāvaṃ pāpayantī. Yathāyaṃ puññadhārā dātāraṃ anto sineheti pūreti abhisandeti, evaṃ paṭiggāhakānampi anto sineheti pūreti abhisandeti. Tenevāha “dadaṃ piyo hoti bhajanti naṃ bahū”tiādī (a. ni. 5.34) evaṃ santepi “dātāraṃ abhivassatī”ti vuttattā aṭṭhakathāyaṃ dāyakavaseneva “**sineheti**”ti vuttaṃ, yasmā vā paṭiggāhakassa sinehuppatti āmisaniṣṣitāti dāyakavaseneva vuttaṃ.

Issattasuttavaṇṇanā niṭṭhitā.

## 5. Pabbatūpamasuttavaṇṇanā

**136. Khattiyāti** abhisekappattā. Issariyamado **kāmagedho**. Pathavimaṇḍalassa mahantatā taṃnivāsinaṃ anuyantatāti sabbamidaṃ yathicchitassa rājakiccassa sukkena samijjhanassa kāraṇakittanaṃ. Yādise rājakicce ussukkaṃ āpanno, taṃ vitthārato dassetuṃ “**esa kirā**”tiādī vuttaṃ. **Antaragamanānīti** tiṇṇaṃ nirantragamaṇaṃ antarantarā gamaṇāni. **Corā cintayimsūti** eko antarabhogiko rājāparādhiko pañcasatamanussaparivāro coriyaṃ karonto vicarati, te sandhāya vuttaṃ.

“Ayuttam te kata”nti sacāham vakkhāmīti yojanā. **Dhuravihāreti** rathassa dhuram viya nagarassa dhurabhūte vihāre. **Santhambhitunti** vissāsabhāvena upatthātum. **Saddhāyikoti** saddhāya ayitabbo, saddheyoti attho. Tenāha “**saddhātabbo**”ti. **Paccayikoti** pattiyāyitabbo. **Abbasamam** puthulabhāvena. **Nippothenoti** nimmaddento. **Sañhakarāṇiyam** atisaṇham **pisanto** nisadapoto viya pisanto.

**Dhammacariyā**tiādittampi sīsam celañca ajjupekkhitvā sammāpaṭipatti eva kātabbā tassā eva paraloke paṭiṭṭhābhāvato. **Ācikkhāmīti** kathemi, kathento ca yathā tamattham sammadeva rājā jānāti, evam jānāpemi. **Nippatti** yuddhena kātabbaatthasiddhi. Visinoti bandhati yathādhippetam cittaṃ etenāti **visayo**, samatthabhāvo. **Mantasampannā**ti sampannarājamantā. **Mahāamaccā**ti mahosadhādisadisā nītisatthachekā amaccapurisā. **Upalāpetunti** paresam antare virodhattham saṅgaṇhitum.

**Dveyeva pabbatā**ti pabbatasadisā dveyeva gahitā. **Rājovādeti** rājovādasutte. **Āgatāva** tattantiyā anurūpattham. **Vilumpamānā**ti iti-saddo ādiattho. **Vipattīti** bhogaparihānādivināso. **Hatthiyuddhā**ti **jarāmarāṇam jinitum na sakkā** sattassa avisayabhāvato. Yena pana jinitum sakkā, tam dassento bhagavā “**buddhe...pe... nivesaye**”ti āha. Ratanattaye hi saddhā niviṭṭhā mūlajātā paṭiṭṭhitā ekantato jarāmarāṇavijayāya hoti. Tenāha “**tasmā saddha**”nti.

Pabbatūpamasuttavaṇṇanā niṭṭhitā.

Tatīyavaggavaṇṇanā niṭṭhitā.

Sārathhappakāsiniyā saṃyuttanikāya-aṭṭhakathāya

Kosalasaṃyuttavaṇṇanāya līnatthappakāsanā samattā.

## 4. Mārasaṃyuttam

### 1. Paṭhamavaggo

#### 1. Tapokammasuttavaṇṇanā

**137.** Uruvelāya samīpe gāmo uruvelagāmo, tam **uruvelagāmam** abhimukhabhāvena sammadeva sabbadhamme bujjhatīti abhisambodhi, sabbaññutaññāṇam, tena samannāgatattā ca bhagavā **abhisambuddhoti** vuccati. Tassa pañcacattālīsāya vassesu ādito pannarasa vassāni paṭhamabodhi, idha pana sattāhabbhantarameva adhippetanti āha “**abhisambuddho hutvā antosattāhasmiṃ yevā**”ti. Asukhabhāvena aññehi kātum asakkuṇeyyattā dukkaram karotīti dukkarakāro, so eva ithilīngavasena **dukkarakārikā**. Tāya mutto vatamhīti cintesi. Yadi evam kasmā tam lokanātho chabbassāni samanuyuñjati? Kammapīlītasena. Vuttañhetam **apadāne** (apa. therā 1.39.92-94) –

“Avacāham jotipālo, sugatam kassapam tadā;  
Kuto nu bodhi muṇḍassa, bodhi paramadullabhā.

“Tena kammavipākena, acarim dukkaram bahum;  
Chabbassānurūvelāyam, tato bodhimapāpuṇim.

“Nāham etena maggena, pāpuṇim bodhimuttamam;  
Kummaggena gavesissam, pubbakammena vārito”ti.

**Māretīti** vibādheti. Vipattiādisaṃyojanañhi sādḥūnaṃ paramatthato maraṇaṃ saccapaṭivedhamāraṇattā, pāpatarattā pāpatamoti **pāpimā**. Sā cassa pāpatamatā pāpavuttitāyāti āha “**pāpe niyutto**”ti. **Adhipatīti** kāmādhipati. Appahīnakāmarāge attano vase vatteṭīti **vasavattī**. Tesasaṃyeva kusalakammānaṃ antaṃ karotīti **antako**. Vaṭṭadukkhato aparimuttapaccayattā **namuci**. Mattānaṃ pamattānaṃ bandhūti **pamattabandhu**.

**Tapokammāti** attakilamathānuyogato. **Aparaddhoti** virajjhasi. “Aparādho”tipi atthi, soyeva attho. Kāyakilamathaṃ anuyuñjanto yebhuyyena amarattḥāya anuyuñjati, so ca kammavādīhi anuyuñjīyamāno devattḥāya siyāti āha “**amarabhāvattḥāyā**”ti. **Sabbaṃ tapanti** sabbaṃ attaparitāpanaṃ. **Atthāvahaṃ na bhavati** bodhiyā anupāyattā. **Kiñcassāti** kiñci siyāti attho. **Phiyārittaṃva dhammanīti** dhammaṃ vuccati vaṇṇu, so idha “dhamma”nti vutto, dhammani vaṇṇupadeseti attho. Tenāha “araññe”ti. Ubhosu passesu phiyāhi **ākaddḥeyya ceva** arittehi **uppīleyya ca**.

**Sammāvācākammantājīvā gahitā** maggasīlassa adhippetattā. Samādhino hi gahaṇena **sammāvāyāmasatisamādhayo gahitā** upakārabhāvato. **Paññāyāti** etthāpi eseva nayo. Bujjhati etenaṃ **bodho**. Maggoti āha “**bodhāyāti maggatthāyā**”ti. Kathaṃ pana maggaṃ maggatthāya bhāvetīti āha “**yathā hī**”tiādi. Tena yathā yāgupacanaṃāmbho yāvadeva yāguattho, evaṃ maggabhāvanāmbho maggādhigamattḥāyāti dasseti. Ārambhoti ca ariyamaggabhāvanāya bandhāpanaṃ daṭṭhabbaṃ. Keci pana “magganti ariyamaggaṃ, bodhāyāti arahattasambodhāya, evaṃ katvā ‘pattosmi paramasuddhi’nti idampi vacanaṃ samatthita”nti vadanti, apare pana “sabbaññūtaññānasambodhāyāti. So hi sabbasmāpi bodhito uttaritaro”ti. **Nihato** nibbisevanabhāvaṃ pāpito. Tenāha “**parājito**”ti.

Tapokammasuttavaṇṇanā niṭṭhitā.

## 2. Hatthirājavaṇṇasuttavaṇṇanā

**138. Andhabhāvakāraketi** pacurajanassa cakkhuvīññāṇupattinivāraṇena andhabhāvakārake. **Mahātameti** mahati tamasi. **Pāsāṇaphalake mahācīvaraṃ sīse ṭhapetvāti** etena taṃ phalakaṃ apassāya nisinnoti dasseti. **Padhānanti** bhāvanaṃ. **Pariggaṇhamānoti** sabbaso gaṇhanto avissajjento, bhāvanaṃ anuyuñjanto anupubbasaṃpattiyo phalasaṃpattiñca manasikarontoti attho. Tenāha “**nanu cā**”tiādi. **Ariṭṭhakoti** ariṭṭhakavaṇṇo. Tenāha “**kāḷako**”ti.

**Dīghamaddhānanti** cirataraṃ kālaṃ. **Saṃsaranti** āsādanādhīppāyena sañcaranto, alaṃ tuyhaṃ etena nippayojananti adhippāyo. Na hi tena mārasa kāci atthasiddhīti.

Hatthirājavaṇṇasuttavaṇṇanā niṭṭhitā.

## 3. Subhasuttavaṇṇanā

**139. Susaṃvutāti** maggasamvarena suṭṭhu saṃvutā. **Supihitāti** suṭṭhu pihitā. **Vasānugāti** kāyādidvārasānugā vasavattino na honti. **Baddhacarāti** paṭibaddhacariyāti.

Subhasuttavaṇṇanā niṭṭhitā.

## 4. Paṭhamamārapāsasuttavaṇṇanā

**140. Upāyamanasikārenāti** aniccādīsu aniccādito manasikaraṇena. **Upāyavīriyenāti** anuppannākusalānaṃ anuppādanāya vidhinā pavattavīriyena. **Kāraṇavīriyenāti** anuppannānuppādanādiatthassa kāraṇabhūtena vīriyena. Anuppannapāpakānuppādanādiatthāni hi

vīriyāni yadattham honti, tam attham sādheṭṭhiyevāti etassa atthassa dīpako **sammā-saddo**. Yonisosammāsaddena hi upāyakāraṇatthadīpakatam sandhāya “**upāyavīriyena kāraṇavīriyenā**”ti vuttam. **Arahattaphalavimutti** ukkaṭṭhaniddesena. Mārena “mayham kho, bhikkhave”tiādikaṃ bhagavato vacanam sutvā vuttam “**arahattam patvāpi na tussatī**”tiādi.

**Kilesapāsenā**ti kilesamārassa upāyabhūtena. Kilesamāro hi satte kāmaguṇapāsehi nibandhati, na pana sayameva. Tenāha “**ye dibbā kāmaguṇasaṅkhātā**”tiādi. **Mārabandhaneti** kilesamārassa bandhanaṭṭhāne, bhavacāraṅketi attho. **Na me samaṇa mokkhasī**ti idam māro “anuttarā vimutti anuppattā, vimuttā sabbapāsehi”ti ca bhagavato vacanam asaddahanto vadati saddahantopi vā “evamayam paresam sattānam mokkhāya ussāham na kareyyā”ti attano kohaṅṅhe ṭhatvā vadati.

Paṭhamamārapāsasuttavaṇṇanā niṭṭhitā.

## 5. Dutiyamārapāsasuttavaṇṇanā

**141. Anupubbagamācārikanti** gāmanigamarājadhānīsu anukkamena gamanasāṅkhātam cārikaṃ. **Evam hi gatesūti** evam tumhesu bahūsu ekajjham gatesu.

Ādimhi kalyāṇam etassāti **ādikalyāṇam**, tathā sesesu. **Sāsanassa ādi sīlam** mūlakattā. Tassa **samathādayo majjham** sāsanasampattiyā vemajjhabhāvato. **Phalanibbānāni pariyoṣānam** tadadhigamato uttari karaṇīyābhāvato. Sāsane sammāpaṭipatti nāma paññāya hoti, tassā ca sīlam samādhi ca mūlanti āha “**sīlasamādhayo vā ādī**”ti. Yasmā paññā anubodhapaṭivedhavasena duvidhā, tasmā tadubhayaṃ gaṇhanto “**vipassanāmaggā majjha**”nti āha. Paññānipphatti phalakkiccam, nibbānasacchikiriyā pana sammāpaṭipattiyā pariyoṣānam tato param kattabbābhāvato āha “**phalanibbānāni pariyoṣāna**”nti. Phalaggahaṇena hi saupādisesanibbānam gayhati, itarena itaram, tadubhayaṃ paṭipattiyā osānanti āha “**phalanibbānāni pariyoṣāna**”nti. “Tasmātiha tvam, bhikkhu, ādimeva visodhehi kusalesu dhammesu. Ko cādi kusalanam dhammanam? Sīlaṅca suvisuddham, diṭṭhi ca ujukā”ti (sam. ni. 5.369) vacanato sīladiṭṭhujukatāya matthakabhūtā vipassanā, tadadhiṭṭhānā sīlasamādhīti ime tassa sāsanassa mūlanti āha “**sīlasamādhivipassanā vā ādī**”ti. Sesam vuttanayameva.

Kiñcāpi avayavavinimutto samudāyo natthi, yesu pana avayavesu samudāyarūpena apekkhitesu gāthāti samaññā, tam tato bhinnam viya katvā dassento “**catuppādikagāthāya tāva paṭhamapādo**”tiādimāha. Pañcapadachappādānam gāthānam ādipariyoṣānaggahaṇena itare dutiyādayo tayo cattāro vā majjhanti avuttasiddhamevāti na vuttam. **Ekānusandhikasuttassāti** idam bahuvibhāgam yathānusandhinā ekānusandhikaṃ suttam sandhāya vuttam, itarassa pana teyeva desetabbadhammavibhāgena ādimajjhāpariyoṣānabhāgā labbhanti. **Nidānanti** kāladesakaparīsādi-apidisanalakkhaṇādiko attho. **Idamavocāti iti-saddo** ādiattho. Tena tadavasesanigamanapāḷim saṅgaṇhāti. **Anekānusandhikassa** saha nidānena paṭhamo anusandhi ādi. Saha nigamanena pacchimo pariyoṣānam, itarena majjhimantiādimajjhāpariyoṣānāni vedittabbāni.

**Sāttakanti** atthasampattiyā sāttakam katvā. **Sabyañjananti** byañjanasampattiyā sabyañjanam. Sampatti ca nāma paripuṇṇabyañjanatāti āha “**byañjanehi...pe... desetā**”ti. **Sakalaparipuṇṇanti** sabbaso paripuṇṇam sīlādipañcadhammakhandhapāripūriyā. **Nirupakkilesam** diṭṭhimānādiupakkilesābhāvato. Avisesato tisso sikkhā sakale sāsane bhavanti. **Dhammoti** pana brahmacariyam vā sandhāya vuttam “katamesānam kho, bhante, buddhānam bhagavantānam brahmacariyam ciraṭṭhitikam ahoṣī”tiādīsu (pārā. 18) viya. **Dukūlasāṇiyā paṭicchannā viya**, na tu pākāraselādiṭṭhānā viya. Tena dhammaniruttiyā sakalākilesānam pahānānubhāvam vadati. **Alābhāparihāniyā**, na laddhāparihāniyā. **Adḍhuddhānīti** pañcasatādhikāni tīṇi pāṭihāriyasahassāni. **Sātanti** sukham.

Dutiyamārapāsasuttavaṇṇanā niṭṭhitā.

## 6. Sappasuttavaṇṇanā

**142. Surākārakānanti** piṭṭhasurāyojanakānaṃ. Kosalānaṃ issaroti kosalo, kosalarājassa ayanti **kosalikā. Paribhogapātī**ti bhattaparibhojanatthāya pāti paribhogapāti. **Kammāruddhanapaṇāḷiyā**ti kammāruddhanapaṇāḷimukhe. **Dhamamānāyā**ti dhamiyamānāya. Taṃ pana yasmā bhastavātehi pūritaṃ nāma hoti, tasmā “**bhastavātena pūriyamānāyā**”ti vuttaṃ. **Niyāmbhūmiyanti** bhagavato paṭisallānaṭṭhāne **sañcarantaṃ** māraṃ maṃsacakkhunāva **disvā**. Tenāha “vijjulatālokenā”ti.

**Seyyatthāyā**ti seyyānisamsāya. Tenāha “**ṭhassāmī**”tiādi. **Attasaññatoti** attabhāvena saṃyato. Tenāha “**saṃyatattabhāvo**”ti. **Taṃsaṅghitassāti** tasmim̐ hatthapādakukkucarahite buddhamunismim̐ avaṭṭhitassa. **Vossajja careyya tattha soti** iminā bhagavā taṃ byākaramāno vibhimsitā buddhānaṃ kiṃ karissati bhayābhāvato? Kevalaṃ pana anaṭṭhavalikaṃ uppīlento viya tvameva āyāsaṃ āpajjissasīti māraṃ santajjeti.

**Bheravā**ti avītarāgānaṃ bhayajanakā. **Tatthāti** taṃnimittaṃ. **Phaleyyā**ti bhijjeyya. **Sattisallanti** sattisankhātāṃ puthusallaṃ. **Urasmim̐ cārayeyyunti** phāsuṃ vijjhitaṃ ṭhapeyyuṃ uggireyyuṃ. **Khandhupadhīsūti** khandhasankhātesu upadhīsu. **Tānaṃ karonti nāmāti** tato bhayanimitato attano tānaṃ karonti nāma.

Sappasuttavaṇṇanā niṭṭhitā.

## 7. Supatisuttavaṇṇanā

**143. Utugāhāpanatthaṃ dhovivā**, na rajojallavikkhālanatthaṃ. Tenāha “**buddhānaṃ panā**”tiādi. **Dhotapādake geheti** dhotapādehi akkamitabbake. **Vattabhedo nāma natthi** dhammassāmibhāvato. **Vattasīse ṭhatvā dhovanti** aññesaṃ diṭṭhānugatiāpajjanatthaṃ. **Soppapariggāhakenāti** ettha **soppaṃ** nāma niddāya antarantarā pavattakiriyamayacittappavattirahitā nirantarabhavaṅgasantatīti taṃ sabhāvato payojanato kālaparicchedato pariggāhakaṃ upariniddesatisampajaññaṃ sandhāya vuttaṃ “**soppapariggāhakena satisampajaññenā**”ti. Keci pana “niddāsoppaṇā”ti vadanti, taṃ bhagavato soppaṃ hīlento vadati.

**Kim̐ nūti** etthaṃ kinti hetunissakke paccattavaacananti āha “**kasmā nu supasī**”ti? **Dubbhago** vuccati nissiriko bhinnabhago, so pana matasadiso visaññisadiso ca hotīti āha “**mato viya visaññī viya cā**”ti.

**Ādināti ādi**-saddena “bāhirassa upādāya aṭṭhārasā”tiādinā (vibha. 842) āgataṃ taṇhākoṭṭhāsaṃ saṅgaṇhāti. **Tattha tattha visattatāyāti** tammim̐ tasmim̐ ārammaṇe visesato āsattabhāvena. Visassa dukkhanibbattakakammassa hetubhāvato **visamūlatā** visaṃ vā dukkhadukkhādibhūtavedanā mūlaṃ etassāti **visamūlā**, taṇhā. Tassa rūpādikassa dukkhassa paribhogo, na amatassāti **visaparibhogatā**. **Katthaci netunti** katthaci bhava sabbathā netuṃ? **Parikkhayāti** sabbaso khīṇattā. **Tuyhaṃ kiṃ etthāti** sabbupadhiparikkhayā suddhassa mama paṭipattiyāṃ tuyhaṃ kiṃ ujjhāyanaṃ? Kevalaṃ vighātoyeva teti dasseti.

Supatisuttavaṇṇanā niṭṭhitā.

## 8. Nandatisuttavaṇṇanā

**144. Aṭṭhamaṃ uttānatthameva.**



Nandatisuttavaṇṇanā niṭṭhitā.

## 9. Paṭhamaāyusuttavaṇṇanā

**145. Paṇṇāsaṃ vā vassāni jīvati** vassasatato upari seyyathāpi thero anuruddho. **Satṭhi vā vassāni** seyyathāpi thero bākulo. Paṭiharitvā paccanīkabhāve sātamaṃ sukhaṃ etassāti paccanīkasāto, tabbhāvo **paccanīkasātata**, tāya. **Abhibhavitvā abhāsi** paṭivacanaṃ jānamānova.

Na **hīleyya** na jiguccheyya. **Evanti** so dārako viya kiñci acintento sappuriso careyya, evaṃ hissa cittadukkhaṃ na hotīti adhippāyo. **Pajjalitasīso viya careyyāti** yathā pajjalitasīso puriso aññaṃ kiñci akatvā tasseva vūpasamāya vāyameyya, evaṃ sappuriso āyuraṃ parittanti ñatvā teneva nayena sabbasaṅkhāragataṃ aniccaṃ, aniccattā eva dukkhaṃ, anattāti vipassanampi otarivā taṃ ussukkāpentopi saṅkhāravigamāya careyya paṭipajjeyya.

Paṭhamaāyusuttavaṇṇanā niṭṭhitā.

## 10. Dutiyaāyusuttavaṇṇanā

**146. Nemīvāti** nemisīsenā cakkamaṃ vadati. **Kubbaram anupariyāyatīti** kubbaram anuparivattati. Tathābhūto pana so taṃ ajahantovāti āha “**na vijahatī**”ti. **Āyu anupariyāyatīti** maccānaṃ āyu gatampi paccāgacchatīti bhagavato paṭāṇi hutvā vadati, bhagavā pana taṃ abhibhavitvā “accayanti ahorattā”tiādinā āyuno accayagamanamaraṇatamaṃyeva pavedesi.

Dutiyaāyusuttavaṇṇanā niṭṭhitā.

Paṭhamavaggavaṇṇanā niṭṭhitā.

## 2. Dutiyavaggo

### 1. Pāsānasuttavaṇṇanā

**147. Pavijjhīti** pabbataṃ sabbato pavattento tato tato nissajji. **Sakalanti** sabbabhāgavantaṃ, nissesanti attho.

Pāsānasuttavaṇṇanā niṭṭhitā.

### 2. Kimnusīhasuttavaṇṇanā

**148. Vicakkhukammāyāti** vicakkhubhāvakāmatāya. Yathā sā bhagavato desiyamānaṃ dhammaṃ attano paññācakkhunā na passituṃ sakkoti, evaṃ kātuṃ kāmatāya. Tenāha “**parisāyā**”tiādi. **Vināsetuṃ na sakkoti** bheravārammaṇe bhāyanasseva abhāvato. **Dasabalappattāti** dasahi balehi samannāgatā.

Kimnusīhasuttavaṇṇanā niṭṭhitā.

### 3. Sakalikasuttavaṇṇanā

**149. Mandabhāvenāti** jaḷabhāvena **momūhabhāvenāti** mahāmūḷhatāya. **Kabbakaraṇena mattoti** kabbakiriyaṃpasutatādivasena matto kabbamaṃ katvā. **Kimidaṃ soppasevāti** idaṃ tava soppamaṃ kimatthamaṃ, purisena nāma purisattakarena bhavitabbaṃ, na soppatiyeva. **Atthamaṃ samāgantvāti** paramatthamaṃ

nibbānaṃ sammā āgantvā adhigantvā. **Asaṅga...pe... natthi** sabbaso siddhatthabhāvato. **Jaggantoti** jāgaranto puriso viya, **na bhāyāmi** bhayahetūnaṃ abhāvā. **Nānutapanti** sabbattha sabbadāpi vissaṭṭhabhāvato, **māmanti** mamaṃ. Gāthāsukhatthañhi dīghaṃ katvā vuttaṃ. **Ṭhitattāti** uddesaparipucchāya paricchijjattā. **Hāninti** kassaci jāniṃ.

Sakalikasuttavaṇṇanā niṭṭhitā.

#### 4. Patirūpasuttavaṇṇanā

**150.** Anurujjhati etenāti anurodho, rāgo. Virujjhati etenāti virodho, paṭigho. Tesu **anurodhavirodhesu** tannimittaṃ **sajjati nāma** saṅgaṃ karoti nāma, anurodhavirodhuppādanameva cettha sajjanaṃ. **Yadaññamanusāsātī** yaṃ aññesaṃ anusāsanaṃ, taṃ tesam hitesanaṃ anukampanaṃ, tasmā anukampake hitesake sammāsambuddhe anurodhavirodhe āropetvā vikampanatthaṃ micchā vadasīti.

Patirūpasuttavaṇṇanā niṭṭhitā.

#### 5. Mānasasuttavaṇṇanā

**151.** **Ākāse caranteti** pañcābhiññe sandhāya vadati. Antalikkhe carantepi kiccasādhanato **antalikkhacaro**. Manasi jātoti **mānaso**. Taṃ pana manasantānasampayuttatāyāti āha “**manasampayutto**”ti.

Mānasasuttavaṇṇanā niṭṭhitā.

#### 6. Pattasuttavaṇṇanā

**152.** Pañcannaṃ upādānakkhandhānaṃ lakkhaṇādīni ceva samudayañca assādādīnavanissaraṇāni ca gahetvā sammā tesam lakkhaṇādīnaṃ gahaṇaṃ hotīti āha “**pañca upādānakkhandhe ādiyivā**”ti. Rupanavediyanaśāñjānanaabhisāṅkharāṇavijānaṇāni **khandhānaṃ sabhāvalakkhaṇāni**. **Ādi**-saddena rasapaccupaṭṭhānapadaṭṭhānāni ceva samudayādīni ca saṅgaṇhāti. **Dassetī** paccakkhato dasseti, hatthāmalakaṃ viya pākaṭe vibhūte katvā vibhāveti. **Gaṇhāpetī** te dhamme manasā anupekkhite diṭṭhiyā suppaṭividdhe karonto uggaṇhāpeti. **Samādānamhī** tattha atthassa sammadeva ādiyane khandhānañca sammāsanavasena aññadhamavasena samādiyane. **Paṭividdhaguṇenāti** tāya desanāya, taṃ nissāya paccattapurisakārena ca tesam paṭividdhaguṇena. **Jotāpetī** tesam cittasantānaṃ assaddhiyādikilesamalavidhamanena pabhassaraṃ karoti. **Aṭṭhiṃ katvāti** tāya desanāya pāpetabbaṃ atthaṃ payojanaṃ daḷhaṃ katvā. Tenāha “**ayaṃ no**”tiādi. **Kammakārakacittaṃ** nāma otaraṇacittaṃ. “Yonisomanasikārapubbakaṃ vipassanācitta”nti keci. **Ohitasotāti** anaññavihitatāya dhammassavanāya appitasotā, tato eva tadatthaṃ **ṭhapitasotā**.

**Ete rūpādayo khandhe yañca saṅkhatam** samiddhapaccayehi kataṃ, tañca “eso ahaṃ na homi, etaṃ mayhaṃ na hotī”ti passantoti yojanā. Khemo attāti khemattā, taṃ **khemattam**. Tenāha “**khemibhūtam attabhāva**”nti. **Pariyesamānā** mārasenā.

Pattasuttavaṇṇanā niṭṭhitā.

#### 7. Chaphassāyatanasuttavaṇṇanā

**153.** Sañjāyati etasmāti sañjāti, so eva sampayuttadhammo samosarati etthāti samosaraṇaṃ, so eva attho, tena **sañjātisamosaraṇaṭṭhena**. **Bhayabheravaṃ saddanti** bhāyati etasmāti **bhayaṃ**, tadeva

yassa kassaci bheravāvahattā **bheravaṃ**, devādisaddanti attho. Vigatavalāhake deve uppātavasena uppajjanakasaddo **devadundubhi**. Asanipātādisaddo **asanipātasaddo**. **Undriyatīti** viparivattati. **Loko adhimucchitoti** atithaddhakāyo viya mucchaṃ āpanno. **Mārassāti** kilesamārassa. **Ṭhānabhūtanti** pavattiṭṭhānabhūtaṃ.

Chaphassāyatanaṣuttavaṇṇanā niṭṭhitā.

## 8. Piṇḍasuttavaṇṇanā

**154. Tattha tathāti** tasmim tasmim ñātimittakule. **Pāhunakānīti** pahitabbapaṇṇākārāni. **Āgantukapaṇṇākārānīti** āgantukānaṃ upagatānaṃ dātabbapaṇṇākārāni. **Sayaṃcaradivaseti** kumārakānañca kumārikānañca sayam attanā caritabbachāṇadivase. Idāni tamatthaṃ vitthārato dassento “**samavayajātigottā**” tiādīmāha. Samavayasamañjātikasamagottāti paccekaṃ sama-saddo yojetabbo. Gottasamatā ca āvāhavivāhayogyatāvasena daṭṭhabbā, na ekagottatāvasena. **Tato tato** gāmato. **Aññasmiṃ** dātabbe asati. Chāṇavasena paṇiṇiṭṭam sampāditaṃ pūvaṃ **chāṇapūvaṃ**. **Tāsaṃ sampattiyāti** tāsaṃ dānaṃ dhammassavanañcāti tassā duvidhāyapi sampattiyā.

Ñāṇaṃ nāma āvajjanapubbakaṃ, tasmā ajānaṇassa “anāvajjanatāyā” ti kāraṇaṃ vatvā sesakāraṇaṃ vadanto “**buddhāna**” tiādīmāha. **Upacārabhedanti** buddhaṃ disvā manussehi katabbaupacārassa bhindanaṃ. **Bhinditunti** vidhamiṭṭam.

**Bhagavā panāti panasaddo** visesatthajotako. Tena na kevalaṃ bhagavā uppaṇḍanaṃ pariharanto taṃ gāmaṃ na puna pāvisi, atha kho māraṃ anukampantoti idaṃ visesaṃ joteti.

**Janesīti** apuññaṃ janesi, janento ca yathā tato āyatim thiratarāṃ mahantaṃ dukkhaṃ nipphajjissati, evaṃ nipphādesi. **Āsajjananti** ettha **nanti** nipātamaṭṭam. Kiñcati maddati abhibhavatīti kiñcananti āha “**maddituṃ samattha**” ti.

Piṇḍasuttavaṇṇanā niṭṭhitā.

## 9. Kassakasuttavaṇṇanā

**155. Nibbānaṃ apadisitvāti** nibbānaṃ nissāya nibbānaguṇe ārabbhāti attho. **Haṭṭhaṭṭakesoti** ito cito ca vikiṇṇattā ākulākulakeso. **Cakkhusamphassaviññāṇāyatanaṃ** ettha yathā cakkhuggahaṇena phasso visesito, tena eva viññāṇāyatanaṃ. Tathā sati cakkhuvīññāṇassa ca gahaṇaṃ āpajjeyyāti. Nanu cettha cakkhuggahaṇena visesitattā cakkhudvārikānaṃ sabbesaṃ viññāṇānaṃ gahaṇanti? Saccametam, tañca kho paṭṭhamena cakkhuggahaṇenāti nāyaṃ doso. **Bhavaṅgacittanti** āvajjanāya anantarapaccayabhūtameva adhippetanti niyametvā dassetuṃ “**sāvajjanaka**” ti vuttaṃ, tasmā **tadārammaṇampīti** javanacittena saha tadārammaṇacittampi. “Viññāṇāyatana” ti ca vutte nimmalameva.

“**Cakkhū**” ti avisesato vuttattā pana māraṇassa ayampi attho āpannoti dassetuṃ “**yam loke**” tiādi vuttaṃ. **Upakkavipakkanti** cakkhupākarogena upari heṭṭhā ca sabbaso pakkam kuthitaṃ. **Eseva nayoti** iminā yaṃ loke kuṭṭhakilāsagaṇḍakacchuādīhi upaddutaṃ vaṇapīlakādivasena paggharantaṃ asuciṃ antamaso paramajeccharūpampi, sabbam taṃ taveva hotūti evamādiṃ apadisati.

**Yaṃ bhaṇḍakanti** hiraññasuvaṇṇādikhettavatthādiupakaraṇaṃ gahaṭṭhā, pabbajitā ca yaṃ pattacīvarādiṃ “mama ida” ti abhinivisantaṃ vadanti, **etesu** pariggahatthesu ca tesam pariggāhakupuggalesu ca te **cittam yadi atthi**, tāni ārabbhā tava cittaṃ yadi bhavati, evaṃ tvam tattha baddho eva hosīti attho. Tenāha “**na me samaṇa mokkhasi**” ti.

**Yaṃ bhaṇḍakam vadantīti** yathāvuttaṃ upakaraṇaṃ loke bahujaṇā “mama ida”nti vadanti. **Na taṃ mayhanti** taṃ mayhaṃ na hoti, na tattha mama taṇhāvasena mamanti natthi. **Na te ahanti** ye puggalā ettha baddhā, tepi ahaṃ na homi, tattha me diṭṭhibaddho natthi. **Na me maggampi dakkhasīti** evaṃ sabbaso baddhābhāvena muttassa me gatamaggampi māra tvaṃ na dakkhasi na passissasi, ye bhavādayo tuyhaṃ visayā, tesu bhavayonigatiādīsu mayhaṃ gatamaggaṃ na passissasi bhavanissaṭṭhattāti.

Kassakasuttavaṇṇanā niṭṭhitā.

## 10. Rajjasuttavaṇṇanā

**156. Ahananti** karaṇe paccattavacananti āha “**ahanantenā**”ti, paccatte eva vā paccattavacanaṃ, “ahananto hutvā”ti vacanasesena bhavitabbanti adhippāyo. Sesapadesupi eseva nayo. **Ajinanti** antogadhahetuattaṃ vadatīti āha “**parassa dhanajāniṃ akarontenā**”ti. **Akārāpentenāti** parassa dhanajāniṃ akārentena. **Asocantenāti** bhogabyasanādivasena paraṃ asocantena. Kasmā bhagavā evaṃ cintesīti tattha karaṇamāha “**itī**”tiadinā. **Rajje vijite daṇḍakarapīliteti** dhanadaṇḍādidaṇḍena ceva balinā ca bādHITE.

**Ijghanakakoṭṭhāsāti** cetovasibhāvādikassa sādhanakakoṭṭhāsā. **Vaḍḍhitāti** bhāvanāpāripūrivasena anubrūhitā. **Punappunaṃ katāti** bhāvanāya bahulīkaraṇena aparāparaṃ pavattitā. **Yuttayānanti** yathā yuttānaṃ ājaññarathānaṃ sārathinā adhiṭṭhitam yathāruci pavattati, evaṃ yathārucipavattitaṃ gamitā. **Patiṭṭhatṭhenāti** adhiṭṭhānaṭṭhena. **Vatthukatāti** sabbaso upakkilesasodhanena iddhivisayatāya patiṭṭhānabhāvato suvisodhitaparissayavatthu viya katā. **Avijahitāti** paṭipakkhadūrībhāvato subhāvitabhāvena taṃtaṃadhiṭṭhānayaogyatāya na jahāpitā. **Niccānubaddhāti** tato eva niccaṃ anubaddhā viya katā. **Suparicitāti** suṭṭhu sabbabhāgena bhāvanānupacayaṃ gamitā. **Avirādhitavedhihattho viyāti** avirajghanabhāvena virajghanahattho viya. **Suṭṭhu samāraddhāti** bhāvanāuppattiyā sammadeva sampādītā. **Cinteyyāti** atthuddhārasena cinteyya.

**Pabbatassāti** pabbato assa. Pabbato assāti **pabbato bhaveyya** kīdisassāti āha “**suaṇṇassā**”tiādi. **Jātarūpassāti** ātaparūpasampanna. **Dvikkhattumpi tāva mahantoti** yattako so pabbato hoti, dvikkhattuṃ tattako. **Ekassāti** ekassapi puggalassa **nālaṃ na pariyaṭṭo** taṇhāya duppūraṇabhāvā. **Evaṃ jānantoti** evaṃ taṇhāya duppūraṇabhāvādinavataṃ jānanto. **Samaṃ careyyāti** paravatthuparāmāsādiṃ vihāya kāyādīhi samameva paṭipajjeyya.

Dukkhaṃ taṇhānidānaṃ, taṇhā kāmagaṇanidānā, tasmā dukkhassa taṇhāpaccaya kāmagaṇanidānattaṃ vuttaṃ. **Tanti dukkhaṃ. Yatonidānaṃ hotīti** yaṃnidānaṃ yaṃkāraṇaṃ taṃ pavattati. **Evaṃ yo adakkhīti** yo pariññātavatthuko evaṃ dukkhaṃ tassa nidānabhūte kāmagaṇe ca tathato paññācakkhunā passi. **Kena karaṇena nameyya?** Taṃ karaṇaṃ natthīti attho. **Kāmagaṇaupadhinti** kāmagaṇasaṅkhātaṃ upadhiṃ. Sajjati etthāti **saṅgo eso, lagganametanti evaṃ viditvā**. Tameva kāmābhūto nappaṭiseveyya na laggeyyāti evaṃ vinayāya vūpasamāya sikkheyyāti.

Rajjasuttavaṇṇanā niṭṭhitā.

Dutiyavaggavaṇṇanā niṭṭhitā.

## 3. Tatiyavaggo

### 1. Sambahulasuttavaṇṇanā

**157. Jaṭācumbaṭakenāti** sīse paṭimukkena jaṭākalāpena. Apariggahabrāhmaṇapabbajitā hi jaṭāya

uñchācariyaṃ caranti. **Udumbaraḍaṇḍa**ñhi attaguttatthāya gahitaṃ tesāṃ appicchabhāvappakāsaṇaṃ. Tenāha “**appicchabhāvappakāsaṇattha**”nti. **Sīsaṃ okampetvā**ti ettha ativiya sīsaṃ okampitabhāvaṃ dassetuṃ “**hanukena uraṃ paharanto adhonataṃ katvā**”ti vuttaṃ. **Jivhaṃ nīharitvā**ti lambanacālanavasena mukhato nikkhāmetvā. Tenāha “**uddha**”ntiādi. **Tisākhanti** tibhaṅgabhakuṭi viya nalāṭe jātattā **nalāṭikaṃ**. Tenāha “**nalāṭe uṭṭhitaṃ valittaya**”nti, tibhaṅgavalikaṃ nalāṭe katvāti attho. **Attanova teleti** attanova pāpakammaṇibbattake tele, pacitabbaṭṭhānageheti adhippāyo.

Sambahulasuttavaṇṇanā niṭṭhitā.

## 2. Samiddhisuttavaṇṇanā

**158. Mayhaṃ lābhā**ti evarūpassa nāma sammāsambuddhassa satthussa paṭilābho, evarūpassa ca nāma niyyānikassa saddhammassa paṭilābho, evarūpānaṅca suppaṭipannānaṃ sabrahmacārīnaṃ paṭilābho, ete mayhaṃ suladdhalābhā. **Mayhaṃ suladdhanti** yañcetaṃ mama niyyānikasāsane pabbajjā upasampadā, tasmīṅca abhiratīti sabbañcetaṃ mayā suladdhaṃ. Yathā panassa evaṃ cetaso parivitaṅko uppanno, taṃ dassetuṃ “**so kirā**”tiādi vuttaṃ. Caritānurūpavasena gahitaṃ **mūlakammaṭṭhānaṃ**. **Pāsādikanti** pasādāvahaṃ. **Evamahosīti** “**lābhā vata me**”tiādinā evaṃ parivitaṅko ahosi. **Nisinnasadiṣoti** nisinna viya. **Tasmiṃyeva ṭhāneti** yasmiṃ ṭhāne nisinnaṃ māro upasaṅkama, tasmiṃyeva ṭhāne. **Tassāti** samiddhittherassa. **Kammaṭṭhānaṃ sappāyanti** kammaṭṭhānabhāvanāya anuyuñjanaṃ sappāyaṃ upakāravahaṃ bhavissati.

**Mayhanti** mayā. Sati ca paññā ca **satipaññā**, tā ariyamaggena jānanaṃ samatthanabhāvena avabuddhā. Thero kira tadā vipassanaṃ ussukkāpesi. **Kāmaṅti** yathārucci. Keci “**kāmaṃ karassūti** āyasmato ‘**kāmā**’ti māraṃ ālapana”nti vadanti. **Vibhiṃsakārahānti** bhayaṅkārāhāni. **Rūpānti** vippakārāni. Vippakāratthopi hi rūpasaddo “**rūpaṃ dasseti anappaka**”ntiādisu viya. **Na kampaṣasīti** samaṇadhammakaraṇato na calissasi.

Samiddhisuttavaṇṇanā niṭṭhitā.

## 3. Godhikasuttavaṇṇanā

**159. Pabbatassa passeti** pabbatapāde upaccakāyaṃ. Samaye samaye laddhattā **sāmayikaṃ**. Tenāha “**appitappitakkhaṇe paccanīkadhammehi vimuccatī**”ti. Lokiyavimutti hi anaccantapahāyitāya samayavimutti nāma, lokuttaravimutti accantapahāyitāya asamayavimutti. Tāhi samannāgatā “**samayavimuttā, asamayavimuttā**”ti ca vuccanti. **Yāva** paṭhamajjhānanibbattaṇaṃ, tāva **kasmā parihāyīti** attho? **Sābādhattāti** sarogattā. **Vātapittasemhavasena**ti kadāci vātapittavasena, kadāci vātasemhavasena, ubhinnaṃpi sannipātavasena. **Anusāyikoti** kāyaṃ anugantvā sayito, yāpyāmayabhāvena ṭhitoti attho. **Samādhissāti** samādhībhāvanāya. **Upakāradhamme** utubhojanādike. **Pūretunti** samodhānetuṃ. **Parihāyīti** sarīraṃ akallabhāvato.

**Āhareyyanti** jīvitaharaṇatthāya upaneyyaṃ. **Nibaddhā gati hoti** kevalaṃ brahmalokūpapattito, na sotāpannādīnaṃ viya paricchinnabhāvena. Tenāha “**brahmaloke nibbattatī**”ti.

**Jalamānā**ti samuṭṭhitanīyataiddhiyā anaññasādhāraṇaparivārasampattiyā ca sadevake loke jalamānā. Maṃsacakkhu dibbacakkhu dhammacakkhu paññācakkhu samantacakkhūti pañcahi cakkhūhi **cakkhumā**. **Ānubhāvadhārā**ti acinteyyāparimeyyabuddhānubhāvavasampannā. **Ānubhāvapariyāyopi** hi juti-saddo hoti “**iddhijutibalavīriyūpapattī**”tiādisu (jā. 2.22.1589, 1595) viya. Anavasesato mānaṃ siyati samucchindatīti aggamaggo **mānasam**. Tannibbattaṇā pana arahattassa mānasatā daṭṭhabbā. **Sīlādīnī**ti anuttarasīlādīni. **Sikkhamānoti** sikkhāni bhāvento attano santāne uppādentō. Na cittabhāvanā. Tenāha “**sakaraṇīyo**”ti. **Janeti** sattassa kāye, sadevake loketi attho. **Vissutā**ti anaññasādhāraṇehi sīlādiguṇehi

vissutā.

**Vedanam vikkhambhetvā** uppannam dukkhavedanam paṭicca uppannaattakilamatham anuppādanavasena vikkhambhetvā **taṃyeva vedanam pariggahetvā** pavattavipassanā vīthimeva otaratīti katvā **mūlakammaṭṭhānanti** vuttam. “**Samasīsī hutvā parinibbāyī**”ti vatvā tassa pabhedam vibhajitvā idhādhippetam dassetum “**samasīsī nāma tividho hotī**”tiādimāha. Iriyāpathavasena samasīsī **iriyāpathasamasīsī**. Esa nayo sesadvayepi.

**Iriyāpathakopanañcā**ti iriyāpathehi asamāyogo. **Ekappahārenevā**ti ekavelāyameva. **Parinibbānavasenā**ti anupādisesaparinibbānavasena, na kilesakkhayamattena. **Etthā**ti etesu dvīsu navesu. Evaṃ sati teneva iriyāpathena vipassanam paṭṭhapetvā teneva iriyāpathena, ekasmiṃ antorogeyeva vipassanam paṭṭhapetvā arahattam patvā teneva rogena parinibbāyantā khīṇāsavā bahavopi samasīsino eva sambhaveyyum. Tasmā vuttanayeneva attho vedītabbo.

Sīsañcetha terasa – palibodhasīsam taṇhā, bandhanasīsam māno, parāmāsasīsam diṭṭhi, vikkhepasīsam uddhaccam, kilesasīsam avijjā, adhimokkhasīsam saddhā, paggahasīsam vīriyam, upaṭṭhānasīsam sati, avikkhepasīsam samādhi, dassanasīsam paññā, pavattisīsam jīvitindriyam, gocarasīsam vimokkho, saṅkhārasīsam nirodhoti. Imesu terasasu sīsesu palibodhasīsādīni pavattisīsañca pariyādiyitabbāni, adhimokkhasīsādīni pariyādāyakāni, pariyādāyakaphalam gocarasīsam. Tañhi visayajjhataṃ phalam vimokkho, pariyādāyakassa maggassa phalassa ca ārammaṇam saṅkhārasīsam saṅkhāravivekabhūto nirodhoti pariyādiyitabbānam pariyādāyakaphalārammaṇānam saha viya saṃsiddham dassanena samasīsibhāvam dassetum paṭisambhidāyam terasa sīsāni vuttāni. Idha pana “apubbam acarimam āsavapariyādānañca hoti jīvitapariyādānañcā”ti (pu. pa. 16) vacanato tesu kilesapavattasīsānameva vasena yojanam karonto “**ettha ca pavattisīsa**”ntiādimāha.

Tattha pavattisīsam pavattato vuṭṭhahanto maggo cutito uddham appavattikaraṇavasena yadipi pariyādīyati, yāva pana cuti, tāva pavattisabbhāvato “**pavattisīsam jīvitindriyam cuticittam khepetī**”ti āha. Kilesapariyādānena pana maggacittena attano anantaram viya nipphādetabbā paccavekkhaṇavārā ca kilesapariyādānasseva vārāti vattabbataṃ arahanti. “Vimuttasmiṃ vimuttamiti ñānam hotī”ti (ma. ni. 1.78; saṃ. ni. 3.12) vacanato paccavekkhaṇaparisaṃpanena kilesapariyādānam samāpītam nāma hoti, tam pana parisamāpanam yadī cuticittena hoti, teneva jīvitaparisaṃpanaṃ hotīti imāya vāracutisamatāya kilesapariyādānajīvitapariyādānānam apubbācarimatā vedītabbāti dassento “**dvinnam cittānam ekato uppādo natthī**”tiādimāha. **Dvinnam cittānanti** cuticittamaggacittānam. **Tanti** paccavekkhaṇam paripuṇṇajavanacittānam sattakkhattum pavattiyā, aparipuṇṇānam vā pañcakkhattum pavattiyā. Kiñcāpi “**eko vā dve vā**”ti vuttam yathā “ekam vā dve vā tadārammaṇacittānī”ti, heṭṭhimantena pana dve pavattanti.

**Uppāṭetvā**ti uddharitvāti attho. **Anupādisesenā**ti anupādisesanibbānena.

**Dhūmayitattanti** dhūmassa viya ayitabhāvam pavattiākāram. Dhūmasadisā valāhakā **dhūmavalāhakā**, timiravalāhakā, ye mahikā “timira”nti vuccanti. **Appaṭiṭṭhitenā**ti paṭiṭṭham alabhantena. Itthambhūtalakkhaṇe etaṃ karaṇavacanam, anuppattidhammenāti attho. Sati hi uppāde paṭiṭṭhitam nāma siyā, aṭṭhakathāyam pana yadeva tassa viññāssa appaṭiṭṭhānakāraṇam, tadeva parinibbānakāraṇanti vuttam “**appaṭiṭṭhitakāraṇā**”ti.

**Sokena phuṭṭhassā**ti “aphalo vata me vāyāmo jāto”ti sokena abhibhūtassa. **Abhassathā**ti balavasokābhītunnassa satisammosā sithilam gahitā bhassi patitā sā kacchā.

Godhikasuttavaṇṇanā niṭṭhitā.

#### 4. Sattavassānubandhasuttavaṇṇanā



diguṇitā diyaḍḍhakilesasahasam dasādhikam hoti; taṃ appakam pana ūnamadhikam vā gaṇanupagam na hotīti “diyaḍḍhakilesasahassa”nti vuttam. Itaresam atītādibhāvāmasanato aggahaṇam pahānassa adhippetattā. Ayamettha saṅkhepo, vitthāro pana **abhidhammaṭṭikāyam** (dha. sa. anuṭī. nidānakathāvaṇṇanā) vuttanayena veditabbo. **Paṭhamapadenāti** “na kuppātī”ti iminā padena. **Dutiyaenāti** “na saratī”ti padena. **Tatiyaenāti** “na thino”ti padena. **Nīvaraṇappahānena khīṇāsavataṃ dasseti**, anavasesato nīvaraṇānam accantappahānam adhippetam.

**Pañcadvārikakilesogham tiṇṇoti** channaṃ dvārānam vasena pavattanakilesogham taritvā ṭhito. Kāmoghadiṭṭhohabbhavoghaṭṭhakilesabhāvato “**pañcoghaggahaṇena vā pañcorambhāgiyāni saṃyojanāni veditabbāni**”ti āha. Rūparāgādayo visesato na pañcadvārikāti vuttam “**chaṭṭhaggahaṇena pañcuddhambhāgiyāni veditabbāni**”ti.

**Maccurājassāti** sambandhe sāmivacananti dassento “**maccurājassa hatthato**”ti āha. **Nayamānānanti** anādare sāmivacananti katvā vuttam “**nayamānesū**”ti.

**Ūhaccāti** buddham nissāya. “**Idamavocā**”ti **desanam niṭṭhāpetvāti** etena saṃyuttesu ayam nigamanapāli, heṭṭhā anāgatanayattā pana kesuci potthakesu na likhīyatīti dasseti. **Daddallamānāti** jajjakārassa hi daddakāram katvā niddeso. Tenāha “**atviya jalamānā**”ti. **Nīharīti** tāsam kāyavacīvikāram na manasikaronto tiṇṇayapi amaññamānova anapekkheneva nīhari. **Phalato bhaṭṭhanti** phalasipāṭikato bhaṭṭham. Kuṇḍatiṇḍigacchatūlam **poṭakitūlam**.

Māradhītusuttavaṇṇanā niṭṭhitā.

Tatiyavaggavaṇṇanā niṭṭhitā.

Sāratthappakāsiniyā saṃyuttanikāya-aṭṭhakathāya

Mārasaṃyuttavaṇṇanāya līnatthappakāsanaṃ samattā.

## 5. Bhikkhunīsamyuttam

### 1. Ālavikāsuttavaṇṇanā

**162. Ālaviyam jātāti** ālaviyam vijāyivā saṃvaḍḍhamānā. Tenāha “**āḷavinagaratoyeva ca nikkhamma pabbajitā**”ti. **Dhanam samādapetvāti** cetiyassa rājā ekaṃ mukham, rājaputto ekaṃ, amaccānam jeṭṭhako hutvā senāpati ekaṃ, janapadānam jeṭṭhako hutvā seṭṭhi ekanti evaṃ catūsu mukhesu navakamme kayiramāne seṭṭhinā gahitamukhe kamme olīyamāne eko upāsako ariyasāvako pañca sakatasatāni yojāpetvā janapadam gantvā “yo yaṃ dātuṃ ussahati hiraññaṃ vā suvaṇṇam vā sattavidharatanam vā haritālam vā manosilam vā, so dhanam detū”ti samādapetvā yathāḷaddham paṭhamam kammaṭṭhānam pesetvā “navakammaṃ niṭṭhita”nti sutvā ekakaṃ āgacchantam antarāmagge corā palibundhitvā tato kiṅcīpi dhanam alabhantā “sace naṃ muñcissāma, anattam no kareyyā”ti jīvitā voropesuṃ. Anaparādhe ariyasāvake aparādhakā te corā andhā jātā, tasmā taṃ ṭhānam “**andhavana**”nti paññāyitthāti aṭṭhakathāyam vuttam. Khīṇāsavaṇam yasmā yattha katthaci cittaviveko hotiyeva upadhivivekassa siddhattā. Tasmā “**kāyavivekatthinī**”ti vuttam.

**Nissaraṇanti** nibbānam sabbasaṅkhatassa nissatattā. **Paccavekkhaṇañāṇenāti** paccavekkhaṇañāṇena, pageva maggaphalañāṇehīti adhippāyo. **Nibbānapadanti** nibbānasāṅkhātam dhammakotṭhāsam. **Vinivijjhanatṭhenāti** hadayam vinividdhena hadayamhi vijjhitvā dukkhuppādanena khandhānam ete pañca kāmā sattisūlasadisā. **Adhikuṭṭanabhaṇḍikāti** āghātanaghaṭikā.



Ālavikāsuttavaṇṇanā niṭṭhitā.

## 2. Somāsuttavaṇṇanā

**163. Thānanti** issariyaṭṭhānaṃ visayaṃjhattaṃ. **Duppasahaṃ** akampiyabhāvattā. **Dvaṅgulapaññāyāti** ettha itthiyo hi daharakumārikākālato paṭṭhāya odanapacanavidhiṃ anutiṭṭhantiyo ukkhaliyaṃ udakaṃ tāpetvā taṇḍule pakkhipitvā attano buddhiyā tesam pākakālappamaṇaṃ paricchindituṃ tāni dabbiyā uddharitvāpi vaṇṇasaṅṭhānaggahaṇamattena pakkāpakkabhāvaṃ jānituṃ na sakkonti, kevalaṃ pana dvīhi aṅgulīhi uppīlitakāle eva jānanti, tasmā dvīhaṅgulikehi dubbalapaññattā “**dvaṅgulapaññā**”ti vuccanti. Phalasaṃpattiñāṇappavattikittanena catūsu saccesu asammoḥavihāro dīpito hoṭīti āha “**ñāṇamhi vattamānamhīti phalasaṃpattiñāṇe pavattamāne**”ti. **Vipassantassāti** asammoḥapaṭivedhato viśesena passantassa khandhapañcakameva saccābhisamayato pubbhāge vipassantassa. **Aññaṃ vāti** itthipurisato aññaṃ vā kiñci vatthuṃ. “Ahaṃ asmī”ti mānadiṭṭhigāhataṇhāgāhavasena gahitavattusmiṃ yevāti āha “**ahaṃ asmīti taṇhāmānadiṭṭhivasenā**”ti.

Somāsuttavaṇṇanā niṭṭhitā.

## 3. Kisāgotamīsuttavaṇṇanā

**164.** “Kisāgotamī”ti ettha kā paṇāyaṃ kisāgotamī, kissa ayaṃ bhikkhunī hutvā samaṇadhammaṃ matthakaṃ pāpesīti tamatthaṃ vibhāvetuṃ “**pubbe kirā**”tiādimāraddhaṃ. **Aṅgārāvāti** addāriṭṭhakavaṇṇaṅgārā eva jātā. **Dārusākanti** addhamāsakena dāruṃ sākañca āharissāmīti antarāpaṇe antaravīthiṃ gatā.

**Siddhatthakanti** sāsapaṃ. **Sālāyanti** anāthasālāyaṃ. **Khuraggeyevāti** khurasikke eva, kesorohanakkhaṇe evāti attho.

**Ekamāsīti** ettha **ma-kāro** padasandhikaro. Saṃhitāvasena ca purimapade vā rassattaṃ. Parapade vā dīghattanti āha “**ekā āsī**”ti. **Bhāvanapumsakametam** “ekamantaṃ nisīdī”tiādisu viya. **Puttamaraṇaṃ antaṃ atītaṃ** idāni puttamaraṇassa abhāvato. Tenevāha “**puttamaraṇaṃ nāma natthī**”ti. **Purisaṃ gavesitunti** yathā mayhaṃ purisagavesanā nāma sabbaso natthi, tathā eva puttāgavesanāpi natthi, tasmā me puttamaraṇaṃ etadantaṃ, sabbesu khandhādisu bhavādisu ca taṇhānandiyā abhāvakathanena sabbasattesu taṇhā sabbaso visositā, tassāyeva kārakaavijjakkhandho padālītoti attano nikkilesataṃ pavedentī therī sīhanādaṃ nadīti.

Kisāgotamīsuttavaṇṇanā niṭṭhitā.

## 4. Vijayāsuttavaṇṇanā

**165.** Pañca aṅgāni etassāti pañcaṅgaṃ, pañcaṅgameva pañcaṅgikaṃ, tena **pañcaṅgikena**. **Ātatantiādisu ātataṃ** nāma cammapariyonaddhesu bheriādisu ekatalaṃ tūriyaṃ. **Vitataṃ** nāma ubhayatalaṃ. **Ātatavitataṃ** nāma tantibaddhavīṇādi. **Susiraṃ** vaṃsādi. **Ghanaṃ** sammādi. Tataādivisesopi ātatamevāti “cammapariyonaddhesu”ti viśesanaṃ. Ekatalaṃ kumbhathūṇadaddarādi. Ubhayatalaṃ bherimudīṅgādi. Cammapariyonaddhaṃ sesaṃ tantibaddhaṃ sabbam ātatavitataṃ nāma, gomukhīādīnampi ettheva saṅgaho daṭṭhabbo. **Vaṃsādīti ādisaddena** saṅkhasīṅgānampi saṅgaho. Sammatāḷa-kamsatāḷa-silātāḷa-salākātāḷādi sammādi nāma. Tattha **sammataḷaṃ** nāma daṇḍamayatāḷaṃ, kaṃsamayatāḷaṃ **kaṃsatāḷaṃ**, silāyaṃ ayopattena ca tāḷanātāḷaṃ. **Sabbe** kāmaguṇe. **Uggharitaṃ paggharitaṭṭhenāti** upari gharaṇena ca vissandanena ca. **Evanti** “iminā pūtikāyenā”ti. **Arūpaṭṭhāyīnoti** sattādhīṭṭhānenāyaṃ dhammadesanāti āha “**sabbatthāti sabbesu**

**rūpārūpabhavesū**’ti. **Tesaṃ dvinnaṃ rūpārūpabhavānaṃ gahitattā.** Bhavabhāvasāmaññato, tadadhiṭṭhānato **gahite kāmabhava.** **Avijjātamo vihato** aggamaggena samugghātittā.

Vijayāsuttavaṇṇanā niṭṭhitā.

### 5. Uppalavaṇṇāsuttavaṇṇanā

**166. Aggato paṭṭhāyāti** sabbaaggato pabhuti yāva mūlā antarāyuttaṃ sammadeva pupphitaṃ sālārukkhaṃ. Vaṇṇadhātusīsena vaṇṇadhātusampannaṃ dutiyaṃ bhikkhuniṃ vadatīti āha **“tayā sadisā aññā bhikkhunī natthī”**ti. Pakhumaśīsena akkhibhaṇḍaṃ vuccatīti āha **“pakhumantarikāyanti dvinnaṃ akkhīnaṃ majjhe”**ti. **Nāsavaṃseti** nāsavaṃsamūle. **“Na passasī”**ti vatvā adassane kāraṇaṃ āha **“vasībhūtamhī”**ti.

Uppalavaṇṇāsuttavaṇṇanā niṭṭhitā.

### 6. Cālāsuttavaṇṇanā

**167. Idanti** idaṃ dassanaṃ. **Gāhāpesīti** samādāpesi **“jātiṃ mā rocā”**ti. **Aññanti** bandhavadhato aññaṃ chedanādiṃ. **Nivesesīti** pavisāpesi.

Cālāsuttavaṇṇanā niṭṭhitā.

### 7. Upacālāsuttavaṇṇanā

**168. Punappunaṃ...pe... āgacchanti** kāraṇassa asamūhatattā. **Santāpito** kilesasantāpehi. **Agatīti** avisayo.

Upacālāsuttavaṇṇanā niṭṭhitā.

### 8. Sīsupacālāsuttavaṇṇanā

**169. Samaṇisadisāti** samaṇaliṅgassa dhāraṇena samaṇisadisā, kassacipi pāsaṇḍassa aruccanato monamaggassa appaṭipajjanato tava samaṇibhāvaṃ nānupassāmīti adhippāyo. **Pāsaṃ dentīti** pāsaṃ sajjenti, yathā tattha diṭṭhipāse sattānaṃ cittaṃ paṭimukkaṃ hoti, evaṃ sajjentīti attho. Tathābhūtā ca te sattānaṃ citte khittā viya hontīti āha **“cittesu diṭṭhipāsaṃ khipantīti attho”**ti. **Pāse mocetīti** diṭṭhipāse sattānaṃ cittasantānato nīharati dhammasudhammatāya. **Tasmāti** pāsamocanato pāsaṇḍoti na vuccati. **“Ito bahiddhāyeva pāsaṇḍā hontī”**ti vuttassa atthassa nigamaṇaṃ. Evañca katvā sabbepi bāhirakasamaye sandhāya **cūlasīhanādasutte** “channavutī pāsaṇḍā”ti vuttaṃ. **Pasīdantīti** diṭṭhipaṅke saṃsārapaṅke ca pakārehi agādhā osīdanti.

**Abhibhavitvāti** sabbasaṃkilesappahānena abhibhuyya atikkamitvā. **Ajitoti** ajini avijayattā. Sabbāni akusalakammāni kusalakammāni ca khīṇāni etthāti **sabbakammakkhayo**, arahattaṃ. Upadhayo sammadeva khīyanti etthāti **upadhisaṅkhayo**, nibbānaṃ.

Sīsupacālāsuttavaṇṇanā niṭṭhitā.

### 9. Selāsuttavaṇṇanā

**170. Kenidaṃ pakataṃ bimbanti** idaṃ attabhāvasaññitaṃ bimbaṃ brahmā-visaṇupurisa-pajāpatiādīsū kena kataṃ nimmitaṃ nibbattitanti kattabbamohaṃ nāma kātukāmo pucchati. **Aghanti**

aghavatthu. Tenāha “**dukkhapatiṭṭhānattā**”ti. **Hetunirodhenā**ti taṅhāsaṅkhatassa hetuno anuppādanirodhena. **Paccayavekallenā**ti tadavasatiṭṭhakilesābhisāṅkhārādipaccayassa vekallabhāvena, apaccayabhāvūpagamanenāti attho.

Selāsuttavaṇṇanā niṭṭhitā.

## 10. Vajirāsuttavaṇṇanā

**171. Suddhasaṅkhārapuñj**eti rūpārūpavibhāge kilesasaṅkhārasamūhe. **Paramatthatoti** sabhāvena. Yathā na hi sattasaññītasāṅkhārapuñjo nāma paramatthato upalabbhati, evaṃ tabbinimutto nāma koci na upalabbhati avijjamānattā. **Vijjamānesūti** yathāpaccayasampattiyā labbhamānesu. **Tenākārenā**ti itthipurisādiākārena. **Vavatthitesūti** paccekaṃ paccayavisesasamuṭṭhitam saṅghānavisesaṃ upādāya “puriso hatthī asso”tiādinā abhisāṅgato pavattesu. **Sammutīti** sattoti vohāro. Tenāha “**samaññāmattamevā**”ti. **Pañcakkhandhadukkhanti** pañcakkhandhasaññītam dukkham. Vuttaṃ hetam bhagavatā “saṃkhittena pañcupādānakkhandhā dukkhā”ti (dī. ni. 2.387; ma. ni. 1.120; 3.373; vibha. 202) **añño neva sambhoti** yathāvuttadukkhato aññassa saṅkhatadhammassa abhāvato. **Na nirujjhatīti** tato aññaṃ na nirujjhati, uppādato hoti nirodhoti.

Vajirāsuttavaṇṇanā niṭṭhitā.

Sāratthappakāsiniyā saṃyuttanikāya-aṭṭhakathāya

Bhikkhunīsaṃyuttavaṇṇanāya līnatthappakāsanaṃ samattā.

## 6. Brahmasaṃyuttaṃ

### 1. Paṭhamavaggo

#### 1. Brahmāyācanasuttavaṇṇanā

**172. Parivitakko udapādīti** dhammagambhīratāpaccavekkhaṇahetuko dhammadesanāya appossukko uppajji. Ayaṃ parivitakko kasmā udapādī? Kattha ca udapādīti taṃ sabbaṃ vibhāvetuṃ “**sabbabuddhāna**”ntiādi āradham. Tattha **āciññasamāciñṇoti** ācarito ceva ācarantehi ca sammadeva ācaritoti attho. Etena ayaṃ parivitakko sabbabuddhānaṃ paṭhamābhisambodhiyaṃ uppajjatevāti ayamettha dhammatāti dasseti. Tattha **aṭṭhame sattāheti** idaṃ sattamasattāhato paraṃ sattāhabbhantare uppannattā vuttaṃ, na pana itaresaṃ viya aṭṭhamassa nāma sattāhassa pavattitassa sabbhāvā. **Sapaccaggheti** mahagghe. “Paccaggheti”ti vā pāṭho, abhinaveti attho. **Selamayeti** muggavaṇṇasilāmaye.

**Paṭividdhoti** sayambhuññaṇena “idaṃ dukkha”ntiādinā paṭimukhaṃ nibbijjanavasena patto, yāthāvato avabuddhoti attho. **Dhammoti catusaccadhammo** tabbinimuttassa paṭivijjhitabbadhammassa abhāvato. **Gambhīroti** mahāsamuddo viya makasatuṅḍasūciyā aññatra samupacitaparipakkaññasambhārehi aññesaṃ ñāṇena alabbhaneyyapatiṭṭho. Tenāha “**uttānapaṭikkhepavacanameta**”nti. Yo alabbhaneyyapatiṭṭho, so ogāhituṃ asakkuṇeyyatāya sarūpato vīsesato ca passituṃ na sakkāti āha “**gambhīrattāva duddaso**”ti. **Dukkheṇa daṭṭhabboti** kicchena kenaci kadācīdeva daṭṭhabbo. Yaṃ pana daṭṭhumeva na sakkā, tassa ogāhetvā anu anu bujjanako kadāci natthīti āha “**duddasattāva duranubodho**”ti. **Dukkheṇa avabujjhitabbo** avabodhassa dukkarabhāvato. Imasmiṃ ṭhāne “taṃ kiṃ maññātha, bhikkhave, katamaṃ nu kho dukkarataraṃ vā durabhisambhavataraṃ vā”ti (saṃ. ni. 5.1115) suttapadaṃ vattabbaṃ. Santārammaṇatāya vā **santo**. Nibbutasabbapariḷāhatāya **nibbuto**. Attano paccayehi padhānabhāvaṃ nītoti vā **paṇīto**. Atittikaraṇaṭṭhena **atappako** sādurasabhojanaṃ viya. Tattha ca nirodhasaccaṃ santaṃ ārammaṇanti

santārammaṇaṃ, maggasaccaṃ santaṃ santārammaṇaṃcāti santārammaṇaṃ, anupasantasabhāvānaṃ kilesānaṃ saṅkhārānaṃca abhāvato santo. Nibbutasabbapariḷāhattā nibbuto. Santapaṇītabhāveneva tadatthāya asecanakatāya atappakatā daṭṭhabbā. Tenāha “**idaṃ dvayaṃ lokuttarameva sandhāya vutta**”nti. Uttamañāssa viśayattā **na takkena avacaritabbo**. Tato eva nipuṇaṇānagocaratāya saṅhasukhumasabhāvattā ca **nipuṇo**. Bālānaṃ avisayattā yathāvuttehi paṇḍitehi eva veditabboti **paṇḍitavedanīyo**. Ālīyanti abhiramitabbaṭṭhena sevīyantīti **ālayā**, pañca kāmagaṇā. Ālayanti allīyanti abhiramaṇavasena sevantīti **ālayā**, taṇhāvicarītāni. **Ramantīti** ratim vīdanti kīḷanti laḷanti. **Ālayaratāti** ālayaniratā.

Ṭhānaṃ sandhāyāti ṭhānasaddaṃ sandhāya, atthako pana ṭhānanti ca paṭiccasamuppādo eva adhippeto. Tiṭṭhati phalaṃ tadāyattavuttitāyāti hi **ṭhānaṃ**, saṅkhārādīnaṃ paccayabhūtā avijjādayo. Imesaṃ saṅkhārādīnaṃ paccayā idappaccayā, avijjādayo. **Idappaccayā eva idappaccayatā** yathā “devo eva devatā”. Idappaccayānaṃ vā avijjādīnaṃ attano phalaṃ pati paccayabhāvo uppādanasamattatā **idappaccayatā**. Tena paramatthapaccayalakkhaṇo paṭiccasamuppādo dassito hoti. Paṭicca samuppajjati phalaṃ etasmāti **paṭiccasamuppādo**. Padadvayenapi dhammānaṃ paccayaṭṭho eva vibhāvito. Tenāha “**saṅkhārādipaccayānaṃ etaṃ adhivacana**”nti. Saṅkhārādīnaṃ paccayā saṅkhārādipaccayā, avijjādayo. Tesāṃ **saṅkhārādipaccayānaṃ**. Ayamettha saṅkhepo, vitthāro pana **visuddhimaggasaṃvaṇṇanāyaṃ** (visuddhi. mahāṭī. 2.572-573) vuttanayena veditabbo. **Sabbasaṅkhārasamathotiādi sabbanti** sabbasaṅkhārasamathādiabhidheyyaṃ sabbaṃ atthato nibbānameva. Idāni assa nibbānabhāvaṃ dassetuṃ “**yasmā hi**”tiādi vuttaṃ. **Tanti** nibbānaṃ. **Āgammāti** paṭicca ariyamaggassa ārammaṇapaccayahetu. **Sammantīti** paṭippassaddhivūpasamavasena sammanti. Tathā santā ca savisesaṃ upasanta nāma hontīti āha “**vūpasammantī**”ti. Etena sabbe saṅkhārā sammanti etthāti **sabbasaṅkhārasamatho**, nibbānanti dasseti. Sabbasaṅkhāravisaṃyutte hi nibbāne sabbasaṅkhāravūpasamapariyāyo aṭṭhakathāyaṃ vutto eva. Sesapadesupi eseva nayo.

Upadhīyati ettha dukkhanti **upadhi**, khandhādayo. **Paṭinissatṭhāti** samucchadavasena pariccattā hontī. **Sabbā taṇhāti** aṭṭhasatappabhedā sabbāpi taṇhā. **Sabbe kilesarāgāti** kāmarāgarūparāgādibhedā sabbepi kilesabhūtā rāgā, sabbepi vā kilesā idha “**kilesarāgā**”ti adhippetā, na lobhavesesā eva cittassa pariḷāhabhāvāpādanato. Yathāha “rattampi cittaṃ vipariṇataṃ, duṭṭhampi cittaṃ vipariṇataṃ, mūḷhampi cittaṃ vipariṇata”nti (pārā. 271). **Virajantīti** palujjanti vikkhambhanato sabbaso tena viśaṃyuttabhāvato. **Sabbaṃ dukkhanti** jarāmaṇādibhedāṃ sabbaṃ vaṭṭadukkhāṃ. **Bhavana bhavanti** tena tena bhavana bhavantaraṃ bhavanikanti bhāvena saṃsibbatī. **Phalena vā saddhiṃ kammaṃ** sataṇhasseva āyatim punabbhavabhāvato. **Tato vānato nikkhantaṃ** tattha tassa sabbaso abhāvato. Ciraṇisajjācirabhāsanehi piṭṭhiāgilāyanatālugalāsosādivasena **kāyakilamatho ceva kāyavihesā ca** veditabbā. Sā ca kho desanāya atthamañāntānaṃ apaṭipajjantānaṃca vasena, jānantānaṃ pana paṭipajjantānaṃca desanāya kāyaparissamopi satthu aparissamoyeva. Tenāha bhagavā – “na ca maṃ dhammādhikaraṇaṃ vihesesī”ti (udā. 10). Tenevāha – “**yā ajānantānaṃ desanā nāma, so mama kilamatho assā**”ti. **Ubhayanti** cittakilamatho cittavihesā cāti ubhayampetaṃ buddhānaṃ natthi bodhimūle eva samucchinnatā. **Anubrūhanaṃ** sampiṇḍanaṃ. **Soti** apissūti nipāto. Vuddhippattā vā acchariyā **anacchariyā**, vuddhiatthopi hi -kāro hoti yathā “asekkhā dhammā”ti. Kappānaṃ sataśasamaṃ cattāri ca asaṅkhyeyyāni sadevakassa lokassa dhammasaṃvibhāgakaraṇatthameva pāramiyo pūretvā idāni samadhigatadhammarajjassa tattha apposukkatāpattidīpanatā gāthatthassa ca acchariyatā tassa vuddhippattīti veditabbaṃ. Atthadvāreṇa hi gāthānaṃ anacchariyatā. **Gocarā ahesunti** upaṭṭhahimsu. Upaṭṭhānaṃca vitakketabbatāvāti āha “**parivittakayitabbataṃ pāpuṇimsū**”ti.

Yadi sukhāpaṭipadāva, kathaṃ kicchatāti āha “**pāramīpūraṇakāle panā**”tiādi. **Evamādīni** dupparicajāni dentassa. **Ha**-iti vā byattanti etasmim atthe nipāto. “Ekamsatthe”ti keci. Ha byattaṃ, ekamsena vā alaṃ nippayojanaṃ evaṃ kicchena adhigatassa pakāsituṃ desitunti yojanā. **Halanti** vā alanti iminā samānatthapadaṃ “halanti vadāmī”tiādīsu viya. **Rāgadosaphuṭṭhehīti** phuṭṭhavisena viya sappena rāgena dosena ca phuṭṭhehi abhibhūtehi. **Rāgadosānugatehīti** rāgadosēhi anubandhehi.

**Niccādīnanti** niccādīnaṃ catunnaṃ vipallāsānaṃ. **Evamgatanti** evaṃ aniccantiādīnā ākārena pavattaṃ bujjhitabbaṃ. Kāmarāgarattā ca bhavarāgarattā ca nīvaraṇehi nivutacittatāya diṭṭhirāgarattā viparītābhīnivesena **na dakkhanti** yāthāvato dhammaṃ na paṭivijjhissanti. **Sabhāvenāti** aviparītasabhāvena. **Evam gāhāpetunti** aniccantiādīnā sabhāvena yāthāvato dhammaṃ jānāpetuṃ. Rāgadosaparetatāpi nesam sammūlhabhāvenevāti āha “**tamokhandhena āvuṭṭā**”ti.

Dhammadesanāya appossukkatāpattiyā kāraṇaṃ vibhāvetuṃ “**kasmā panā**”tiādīnā sayameva codanaṃ samuṭṭhāpeti. **Aññātavesenāti** imassa bhagavato sāvaka bhāvūpagamanena aññātavesena. “**Aññātaratāpasavesenā**”ti keci, so panassa arahattādhigamaneneva vīgaccheyya. Tividhaṃ kāraṇaṃ appossukkatāpattiyā paṭipakkhassa balavabhāvo, dhammassa gambhīratā, tattha ca bhagavato sātisaṃ gāravanti taṃ dassetuṃ “**tassa hi**”tiādi āradhāṃ. Tattha **paṭipakkhā** nāma rāgādayo kilesā sammāpaṭipattiyā antarāyakarattā. Tesam balavabhāvato ciraparibhāvanāya sattasantānato dubbisodhiyatāya te satte mattahatthino viya dubbalapurisaṃ adhibhavitvā ajjhottharivā anayabyasanaṃ āpādentā anekasatayojanāyāmavittāraṃ sunicitaṃ ghanasannivesaṃ kaṇṭakaduggampi adhisenti. Dūrapabhedaducchejjatāhi dubbisodhiyataṃ pana dassetuṃ “**athassā**”tiādi vuttaṃ. Tattha ca anto amatthatāya **kañjiyapuṇṇā lābu**, ciraparīvāsikatāya **takkabharitā cāṭi**, snehatintadubbalabhāvena **vasāpītapilotikā**, telamissitatāya **añjanamakkhitaṭṭho** dubbisodhanīyā vuttā. Hīnūpamā cetā rūpapabandhabhāvato acirakālikattā ca malīnatāya, kilesasaṃkilesa eva pana dubbisodhanīyataro anādīkālīkattā arūpanissittā ca. Tenāha “**atisaṃkiliṭṭhā**”ti.

Yathā ca dubbisodhanīyataratāya, evaṃ gambhīraduddasaduranubodhānampi vuttaupamā hīnūpamāva. Gambhīropi dhammo paṭipakkhavidhāmanena ñāṇena visadabhāvaṃ āpannena supākaṭo bhaveyya, paṭipakkhavidhāmanaṃ pana sammāpaṭipattipaṭibaddhaṃ, sā saddhammassavanādhīnā, taṃ satthari dhamme ca pasādāyattaṃ. So garuṭṭhānīyānaṃ ajjhesanahetukoti pañālikāya sattānaṃ dhammasamāpattiyā brahmāyācanānimittanti taṃ dassento “**apicā**”tiādīmāha.

Upakkilesabhūtaṃ appaṃ rāgādirajaṃ etassāti apparaṃ, apparaṃ akkhi paññācakkhu yesaṃ te taṃsabhāvāti katvā **apparajakkhajātīkāti** imamatthaṃ dassento “**paññāmaye**”tiādīmāha. Appaṃ rāgādirajaṃ yesaṃ taṃsabhāvā apparajakkhajātīkāti evamettha attho vedītabbo. **Assavanatāti** “**sayam abhiññā**”tiādīsu viya karaṇe paccattavacananti āha “**assavanatāyā**”ti. **Dasapuññakiriyavāsenāti** dānādīdasavidhapuññakiriyavattūnaṃ vasena. Tenāha “**katādhikārā**”tiādi. **Papañcasūdanīyaṃ** (ma. ni. aṭṭha. 1.282) pana “**dvādasapuññakiriyavāsenā**”ti vuttaṃ, taṃ dānādīsu saraṇagamana-parahitapariṇāmanādīpakkhipanavasena vuttaṃ.

Rāgādimalena **samalehi** pūraṇādīhi **chahi satthārehi** satthupaṭiññehi kabbaracanāvasena cintākaviādībhāve ṭhatvā takkapariyāhataṃ vīmaṃsānucaritaṃ sayamāpaṭibhānaṃ cintito. Te kira buddhakolāhalānussavena sañjātakutūhalaṃ lokaṃ vañcentā kohaññe ṭhatvā sabbaññutaṃ paṭijānantā yaṃ kañci adhammeva “**dhammo**”ti dīpesuṃ. Tenāha “**te hi puretaraṃ uppajjitvā**”tiādi. **Apāpuretanti** etaṃ kassapassa bhagavato sāsānantaradhānato pabhuti pihitaṃ nibbānamahādvāraṃ ariyamaggaṃ saddhammadesanāhatthena apāpura vivara.

Selo pabbato ucco hoti thiro ca, na paṃsupabbato missakapabbato cāti āha “**sele yathā pabbatamuddhanī**”ti. **Dhammamayaṃ pāsādanti** lokuttaradhammāha. So hi sabbaso pasādāvaho, sabbadhamme atikkamma abbhuggatāṭṭhena pāsādasadiso ca. Paññāpariyāyo vā idha dhamma-saddoti vuttaṃ “**paññāmayā**”nti. Sā hi abbhuggatāṭṭhena pāsādoti abhidhamme āgatā. Tathā cāha –

“Paññāpāsādamāruya, asoko sokiniṃ pajam;  
Pabbatāṭṭhova bhūmaṭṭhe, dhīro bāle avekkhatī”ti. (dha. pa. 28);

**Yathā hīti**ādīsu yathā ca pabbate ṭhatvā andhakāre heṭṭhā olokkentassa purisassa khettakedārapālikuṭīkāyo tattha sayitamanussā ca na paññāyanti anujjalabhāvato, kuṭīkāsu pana aggijālā

paññayati samujjalabhāvato, evaṃ dhammapāsādamāruyha sattalokaṃ olokayato bhagavato ñānassa āpāthaṃ nāgacchanti akatakalyāṇā sattā, ñānagginā anujjalabhāvato anuḷārabhāvato ca rattim khittā sarā viya honti, katakalyāṇā pana bhābbapuggalā dūre ʘhitāpi bhagavato āpāthaṃ āgacchanti paripakkaññāggitāya samujjalabhāvato uḷārasantānatāya himavantapabbato viya cāti evaṃ yojanā veditabbā.

Garuṭṭhānīyaṃ payirupāsivā garutaraṃ payojanaṃ uddissa abhipatthanā ajjhesanā, sāpi atthato yācanāva hotīti āha “**ajjhesananti yācana**”nti. Padesavisayaṃ ñāṇadassanaṃ ahutvā buddhānaṃyeva āveṇikabhāvato idaṃ ñāṇadvayaṃ “buddhacakkhū”ti vuccatīti āha “**imesaṇhi dvinnaṃ ñāṇānaṃ ‘buddhacakkhū’ti nāma**”nti. **Tiṇṇaṃ maggaññāṇānanti** heṭṭhimānaṃ tiṇṇaṃ maggaññāṇānaṃ “dhammacakkhū”ti nāmaṃ catusaccadhammadassanamattabhāvato. Yato tāni ñāṇāni vijjūpamabhāvena vuttāni, aggamaggaññāṇaṃ pana ñāṇakiccassa sikhāppattiyā dassanamattaṃ na hotīti “dhammacakkhū”ti na vuccatī, yato taṃ vajirūpamabhāvena vuttaṃ. **Vuttanayenāti** “apparajakkhājātikā”ti ettha vuttanayena. Yasmā mandakilesā “**apparajakkhā**”ti vuttā, tasmā bahalakilesā “**mahārajakkhā**”ti veditabbā. Paṭipakkhavidhamanasamatthātāya **tikkhāni** sūrāni visadāni, vuttavipariyāyena **mudūni**. **Saddhādayo ākāraṇī** saddahanādippakāre vadati. **Sundarāti** kalyāṇā. **Sammohavinodaniyaṃ** pana “yesaṃ āsayādayo koṭṭhāsā sundarā, te svākārā”ti vuttaṃ, taṃ imāya atthavaṇṇanāya aññadatthu saṃsandatīti daṭṭhabbaṃ. **Kāraṇaṃ** nāma paccayākāro, saccāni vā. **Paralokanti** samparāyaṃ. Taṃ dukkhāvahaṃ vajjaṃ viya bhayato passitabbanti vuttaṃ “**paralokañceva vajjaṇca bhayato passanti**”ti. Sampattibhavato vā aññattā vipattibhavo paralokoti vuttaṃ “**para...pe... passanti**”ti.

**Ayaṃ panettha pālī**ti ettha “apparajakkhā”ti padānaṃ atthavibhāvane ayaṃ tassa tathābhāvasādhanapālī. Saddhādīnañhi vimuttaparipācakadhammānaṃ balavabhāvo tappatipakkhānaṃ pāpadhammānaṃ dubbalabhāve sati hoti. Tesaṇca balavabhāvo saddhādīnaṃ dubbalabhāveti vimuttiparipācakadhammānaṃ savisesaṃ atthitānatthitāvasena apparajakkhā mahārajakkhātīdayo pālīyaṃ (paṭi. ma. 1.111) vibhajivā dassitā “saddho puggalo apparajakkho”tiādīnā. Khandhādayo eva lujjanapalujjanatṭhena **loko** sampattibhavabhūto loko **sampattibhavaloko**, sugatisaṅkhāto upapattibhavo. Sampatti bhavati etenāti **sampattisambhavaloko**, sugatisaṃvattaniyo kammabhavo. Duggatisaṅkhātaupapattibhava-duggatisaṃvattaniyakammabhavā **vipattibhavaloka-vipattisambhavalokā**. Puna ekakadukādivasena lokaṃ vibhajivā dassetuṃ “**eko loko**”tiādi vuttaṃ. Āhārādayo viya hi āhāratṭhitikā saṅkhārā sabbe lujjanatṭhena lokoti. Tattha **eko loko sabbe sattā āhāratṭhitikā**ti yāyaṃ puggalādhiṭṭhānāya kathāya sabbesaṃ saṅkhārānaṃ paccayāyattavuttitā vuttā, tāya sabbo saṅkhāraloko eko ekavidho pakārantarassa abhāvato. **Dve lokā**tiādīsūpi iminā nayena attho veditabbo. Nāmaggaṇena cettha nibbānassa aggahaṇaṃ tassa alokasabhāvattā.

Nanu ca “āhāratṭhitikā”ti ettha paccayāyattavuttitāya maggaphalānampi lokatā āpajjātīti? Nāpajjati, pariññeyyānaṃ dukkhasaccadhammānaṃ idha “loko”ti adhippetattā. Atha vā na lujjati na palujjātīti yo gahito tathā na hoti, so lokoti taṃgahaṇarahitānaṃ lokuttarānaṃ natthi lokatā. Upādānānaṃ ārammaṇabhūtā khandhā **upādānakkhandhā**. Anurodhādivatthubhūtā lābhādayo **aṭṭha lokadhammā**. **Dasāyatanānī**ti dasa rūpāyatanāni. Sesā suviññeyyameva. Vivatṭajjhāsayaṃ adhippetattā tassa ca sabbāṃ tebhūmakakammaṃ garahitabbaṃ vajjitabbaṇca hutvā upaṭṭhātīti vuttaṃ “**sabbe abhisāṅkhārā vajjā, sabbe bhavagāmikammā vajjā**”ti. Apparajakkhātādīsū pañcasu dukesu ekekasmim dasa dasa katvā “**paññāsāya ākārehi imāni pañcindriyāni jānātī**”ti vuttaṃ. Atha vā anvayato byatirekato ca saddhādīnaṃ indriyānaṃ paropariyattaṃ jānātīti katvā tathā vuttaṃ. Ettha ca apparajakkhādibhābbādivasena āvajjentassa bhagavato te sattā puñjapuñjāva hutvā upaṭṭhahanti, na ekekā.

Uppalāni ettha santīti **uppalinī**. Uppalagacchopi jalāsayaopi ca. Idha pana jalāsaya adhippetoti āha “**uppalavane**”ti. Yāni hi udakassa anto nimuggāneva hutvā pusanti vaḍḍhanti, tāni antonimuggaposīni. **Dīpitanī**ti aṭṭhakathāyaṃ pakāsītāni, idheva vā “**aññānīpī**”tiādīnā dassitāni. **Ugghaṭitaññūti**

ugghaṭaṇaṃ nāma ñāṇugghaṭaṇaṃ, ñāṇena ugghaṭitaṃ mattenēva jānātīti attho. Vipāñcitaṃ vitthāritameva atthaṃ jānātīti **vipāñcitaññū**. Niddesādīhi dhammābhisamayāya netabboti **neyyo**. Pajjati attho etenāti padaṃ, pajjate ñāyateti vā padaṃ, tadattho. Padaṃ paramaṃ etassa, na saccābhisambodhoti **padaparamo**.

**Udāhaṭavelāyā**ti udāhāre dhammassa uddese udāhaṭamattēyeva. **Dhammābhisamayoti** catusaccadhammassa ñāṇena saddhiṃ abhisamayo. **Ayaṃ vuccatīti** ayaṃ “cattāro satipaṭṭhānā”tiādīnā nayena saṃkhittena mātīkāya ṭhapiyamānāya desanānusārena ñāṇaṃ pesetvā arahattaṃ gaṇhituṃ samattho puggalo “ugghaṭitaññū”ti vuccati. **Ayaṃ vuccatīti** saṃkhittena mātīkaṃ ṭhapetvā vitthārena atthe vibhajiyaṃāne arahattaṃ pāpuṇituṃ samattho puggalo “vipāñcitaññū”ti vuccati. **Uddesatoti** uddesahetu. Uddisantassa uddisāpentassa vāti attho. **Paripucchatoti** atthaṃ paripucchantassa. **Anupubbena dhammābhisamayo hotīti** anukkamena arahattappatti hoti. **Na tāya jātiyā dhammābhisamayo hotīti** tena attabhāvena maggaṃ vā phalaṃ vā antamaso jhānaṃ vā vipassanaṃ vā nibbattetuṃ na sakkoti. **Ayaṃ vuccati padaparamoti** ayaṃ puggalo chabbidhaṃ byañjanapadaṃ chabbidhaṃ atthapadanti idaṃ padameva paramaṃ assāti padaparamoti vuccatīti attho.

**Vāsanā hotīti** desanā phalavohārena vāsanā hotīti vuttā. Na hi kāci buddhānaṃ desanā niratthakā. **Yeti** ye duvidhe puggale. Vibhaṅge **kammāvaraṇenā**ti pañcavidhena ānantariyakamma. **Vipākāvaraṇenā**ti ahetukapaṭisandhiyā. Yasmā pana duhetukānampi ariyamaggapaṭivedho natthi, tasmā duhetukā paṭisandhipi vipākāvaraṇamevāti veditabbā. **Kilesāvaraṇenā**ti niyatamicchādīṭṭhiyā. **Assaddhā**ti buddhādīsu saddhārahitā. **Acchandikā**ti kattukamyatāchandarāhitā. Uttarakurukā manussā acchandikaṭṭhānaṃ pavīṭṭhā. **Duppaññā**ti bhavaṅgapaññāya parihīnā. Bhavaṅgapaññāya pana paripuṇṇāyapi yassa bhavaṅgacalanāṃ lokuttarassa paccayo na hoti, sopi duppañño eva nāma. **Abhabbā niyāmaṃ okkamituṃ kusalesu dhammesu sammattanti** kusalesu dhammesu sammattaniyāmasaṅkhātāṃ maggaṃ okkamituṃ adhigantaṃ abhabbā. **Na kammāvaraṇenā**tiādīni vuttavipariyāyena veditabbāni. **Rāgacaritā**diādīsu yaṃ vattabbaṃ, taṃ **paramatthadīpaniyaṃ visuddhimaggasaṃvaṇṇanāyaṃ** (visuddhi. mahāṭī. 1.43) vuttanāyena veditabbaṃ.

**Nibbānassa dvāraṃ** pavisaṇamaggo **vivaritvā ṭhapito** mahākaraṇūpanissayena sayambhuññāna adhigatattā. **Saddhaṃ pamuñcantū**ti attano saddhaṃ dhammasamapaṭicchanayogyaṃ katvā vissajjentu, saddahanākārena naṃ upaṭṭhapentūti attho. Sukhena akicchena pavattaniyātāya **suppavattitaṃ**. **Na bhāsiṃ** na bhāsissāmīti cintesiṃ.

Satthu santikaṃ upagatānaṃ devānaṃ brahmānañca tassa purato antaradhānaṃ nāma atīṭṭhananti āha “**sakaṭṭhānameva gato**”ti. Saddhindriyādi sammādiṭṭhiādiko dhammo eva vineyyasantāne pavattanaṭṭhena cakkanti **dhammacakkaṃ**. Atha vā **cakkanti** āṇā. **Dhammanti** desanā. Atha vā atthadhammato anapetattā dhammañca taṃ pavattanaṭṭhena cakkañcāti **dhammacakkaṃ**. Dhammena ñāyena cakkantipi **dhammacakkaṃ**. Yathāha “dhammañca pavatteti cakkañcāti dhammacakkaṃ, cakkañca pavatteti dhammañcāti dhammacakkaṃ, dhammena pavatteti dhammacakkaṃ, dhammacariyāya pavatteti dhammacakka”ntiādi (paṭi. ma. 2.40-41). **Pavattesi**ti paṭṭhapesi.

Brahmāyācanasuttavaṇṇanā niṭṭhitā.

## 2. Gāraṇasuttavaṇṇanā

**173. Ayaṃ vitakkoti** ayaṃ “kintāhaṃ vihareyya”nti evaṃ pavattitavitakko. **Aññasminti** parasmim. Attā na hotīti hi añño, paro. So panettha na yo koci adhippeto, atha kho garuṭṭhāniyo. Tenāha “**kañci garuṭṭhāne aṭṭhapetvā**”ti. Patissavati garuno “āmā”ti samapaṭicchatīti patisso, na patissoti **appatisso**. **Patissayarahito** garupassayarahitoti attho.

**Sadevaketi** avayavena viggaho samudāyo samāsatto. Sadevakaggahaṇena

pañcakāmāvacaradevaggahaṇaṃ pārisesañāyena itaresaṃ padantarehi saṅgahitattā, samārakaggahaṇena chaṭṭhakāmāvacaradevaggahaṇaṃ paccāsattiñāyena. Tattha hi māro jāto tannivāsī ca hoti. Sabrahmakavacanena brahmakāyikādībrahmaggaṇaṃ paccāsattiñāyeneva. “Sassamaṇabrāhmaṇiyā pajāyā”ti sāsanaṃ paccatthikasamaṇabrāhmaṇaggahaṇaṃ. Nidassanamattañcetaṃ apaccatthikānaṃ asamitapāpānaṃ abāhitapāpānañca samaṇabrāhmaṇānaṃ teneva vacanena gahitattā. Kāmaṃ “sadevake”tiādīviseṣānaṃ vasena sattavisayo lokasaddoti viññāyati tulyayogavisayattā tesāṃ. “Salomako sapakkhako”tiādīsu pana atulyayogepi ayaṃ samāso labbhatīti byabhicāradassanato pajāgahaṇanti pajāvacanena sattalokaggahaṇaṃ. Devabhāvasāmaññaṇa mārabrahmesu gahitesupi itarehi tesāṃ labbhamānavisesadassanattaṃ visuṃ gahaṇanti dassento “**māro nāmā**”tiādīmāha. Māro brahmānaṃpi vicakkhukammāya pahotīti āha “**sabbesa**”nti. **Uparīti** uparibhāve. **Brahmāti** dasasahasībrahmānaṃ sandhāyāha. Tathā cāha “**dasahi aṅgulihī**”tiādi. Idha dīghanikāyādayo viya bhāhirakānaṃpi ganthanikāyo labbhatīti āha “**ekanikāyādivasena**”ti.

**Vatthuvijjādīti ādi**-saddena vijjāṭṭhānāni saṅgahitāni. Yathāsakaṃ kammakilesehi pajātattā nibbattattā pajā, sattanikāyo. Tassā **pajāya**. **Sadevamanussāyāti** vā iminā sammutidevaggahaṇaṃ tadavasiṭṭhamanussalokaggahaṇaṃ daṭṭhabbaṃ. Evaṃ bhāgaso lokaṃ gahetvā yojanaṃ dassetvā idāni abhāgaso lokaṃ gahetvā yojanaṃ dassetuṃ “**apicetthā**”tiādi vuttaṃ. **Lokavasena vuttāni** “lokīyanti ettha kammakammaphalāni”ti katvā, **pajāvasena** “hetupaccayehi pajāyati”ti katvā. **Sīlasampannataranti** ettha paripuṇṇasampannatā adhippetā “sampannaṃ sālīkedāra”ntiādīsu (jā. 1.14.1) viya. Tenāha “**adhikataranti attho**”ti. Paripuṇṇampi “adhikatarā”nti vattabbatamarahati. **Sesesūti** “samādhisampannatara”ntiādīsu.

**Kāraṇantiādīsu kāraṇanti** yuttiṃ. **Atthanti** aviparītatthaṃ. **Vuḍḍhinti** abhivuḍḍhinimittaṃ.

**Iminā vacanenāti** imasmimṃ sutte anantaraṃ vuttavacanena. Na kevalaṃ imināva, suttantarampi ānetvā paṭibhāhitabboti dassento “**na me ācariyo atthī**”tiādīmāha. Ettha yaṃ vattabbaṃ, taṃ **sumaṅgalavilāsiniyā dīghanikāyaṭṭhakathāya** (dī. ni. aṭṭha. 3.162) vuttameva. **Saranti** karaṇe etaṃ paccattavacananti āha “**sarantenā**”ti, **saranti** vā saraṇahetūti attho.

Gāravasuttavaṇṇanā niṭṭhitā.

### 3. Brahmadevasuttavaṇṇanā

**174. Ekakoti** vivekaṭṭhitāyā nissaṭo. Gaṇasaṅgaṇikābhāvo tassānena dīpito, kilesasaṅgaṇikābhāvo pana “**appamatto**”tiādīhi pakāsīto. **Pesitattoti** nibbānaṃ pati pesitacitto. **Sammadevāti** ñāyeneva. So pana yadi āgamanato paṭṭhāya labbhati, vattabbaṃ natthi, atha paṭipadārambhato paṭṭhāya labbhati, evampi vaṭṭatevāti dassetuṃ “**yathā vā tathā vā**”tiādi vuttaṃ. Aggaggādhigamena asammoḥapaṭivedhassa sikhāppattattā maggadhammesu viya phaladhammesupi sātisayo asammoḥoti “sayāṃ abhiññā”ti vuttanti āha “**sāmaṃ jānitvā**”ti. Yathā jānanā panassa sacchikaraṇaṃ attapaccakkhākiriyāti “sacchikatvā”ti vuttanti āha “**paccakkhaṃ katvā**”ti. Tathā sacchikiriyaṃ cassa vipassanāpaṭilābhōti “upasampajjā”ti vuttanti āha “**paṭilābhivā**”ti. **Etenāti** “khīṇā jāti”tiādīvacanena.

**Jāti khīṇāti** ettha jātisīsenā tabbikāravanto khandhā vuttā. **Pubbeva khīṇattāti** maggādhigamanato pageva atītabhāveneva khīṇattā. **Tattha** anāgatesu. **Vāyāmābhāvatoti** avijjamānattā. Anāgatabhāvasāmaññaṇaṃ gahetvā lesena vuttaṃ. **Na paccuppannā vijjamānattāti** saṃkiliṭṭhā ca maggabhāvanāti siyāti vacanaseso. Yathā ajātapthalataruṇarukkhamūle chinne āyatiuppajjanārahāni phalāni chedanapaccayā anuppajjamānāni naṭṭhāni nāma hontī, evameva bhāvanāya asatī uppajjanārahā kilesā tappaccayā jāti ca maggabhāvanāya satī na uppajjamānā pahīnāti vuccantīti imamatthaṃ dasseti “**magassa panā**”tiādīnā. **Anuppādadhmatam āpajjanena** ñāṇena khīṇarāgavasena.



**Soḷasakiccabhāvāyāti** soḷasakiccatāya, soḷasavidhassa vā kiccassa bhāvāya uppādanāya. Pāḷiyam **sapadānanti** sapadānacāro vutto bhāvanapūmsakaniddesenāti āha “**sapadānacāra**”nti. **Anukkammāti** anatikkamitvā. **Āhutipiṇḍanti** juhittabbapiṇḍam, juhanavasena aggimhi pakkhipitabbapāyāsapiṇḍanti adhippāyo. **Bhūtabalikammanti** tathā pakkhipitvā balikammakaraṇam. **Haritupalittanti** allagomayena kataparibhaṇḍam. **Vanamālaparikkhittanti** manoharāhi vanapupphamālāhi parikkhittam. **Dhūmakatacchūti** dhūmapānaṃ. **Silagandhanti** sīlam paṭicca uppannakittigandham. **Ghāyamānassāti** upagataṃ gaṇhantassa.

**Imambhā ṭhānāti** imasmā manussānaṃ vasanaṭṭhānā, mahāpathavitalatoti adhippāyo. **Sabbahetṭhimoti** brahmapārisajjānaṃ vāsabrahmalokamāha. **Brahmapatho nāma cattāri kusalajjhānāni** brahmalokamaggabhāvato. **Jīvitapatho nāma** jīvitapavattipūyabhāvato. “Bhuñjatu bhavaṃ mahābrahmā”ti vacanaṃ sandhāyāha “**kiṃ jappasī**”tiādi. **Tiṇabijānāti** sālitaṇḍulādīni. **Goyūsanti** khīraṃ jigucchanto vadati. Ayampi attho “netādiso brahmabhakkho”ti vadantena dīpitoti.

Atidevapattopi pañcakhandhūpadhīnaṃ atthitāya kilesūpadhiādīnaṃyeva virahitabhāvo gahito. Aññatra hi bhāvapaccayaṃ tadattho viññāyatīti āha “**atidevabhāvaṃ patto**”ti. Yasmā brahmānopi devagatipariyāpannattā devā eva, tasmā vuttaṃ “**atibrahmabhāvaṃ patto**”ti.

**Attānaṃ bhāvetvāti** sīlādīhi guṇehi attānaṃ vaḍḍhetvā paribrūhitvā ṭhito.

**Puthujjanā tasā** taṇhāmānadiṭṭhiparittāsavasena tāsanato. **Khīṇāsavā thāvarā nāma** sabbaso gatīsu sañcaraṇābhāvato. Tathā hi catunnaṃ saccānaṃ sabbaso adiṭṭhattā bhavadāyajjassa taṇhādāsabyassa bhāvato ekaccāsu gatīsu sañcaraṇasabhāvato sekkhā thāvarā na honti. **Bhajamānāti** bhajāpiyamānā. **Thāvarapakkhameva bhajanti** sabbasetṭhapakkham ekantapasaṭṭham bhajamānabhāvaṃ upādāya.

Pahīnakilesa khīṇāsavo **viseno**. Sukhaṃ āyati sukhāyati, tassa kāraṃ **sukhāyatikaṃ**.

Brahmadevasuttavaṇṇanā niṭṭhitā.

#### 4. Bakabrahmasuttavaṇṇanā

175. “Sassato attā ca loko cā”ti evaṃ pavattā diṭṭhi **sassatadiṭṭhi**. **Saha kāyenāti** saha tena brahmattabhāvena. **Brahmatṭhānanti** attano brahmavattum. **Aniccaṃ “nicca”nti vadati** aniccatāya attano apaññāyamānattā. **Thiranti** daḷham, vināsābhāvato sārabhūtanti attho. Uppādavipariṇāmābhāvato **sadā vijjamānaṃ**. **Kevalanti** paripuṇṇam. Tenāha “**akhaṇḍa**”nti. **Kevalanti** vā jātiādīhi asammissam, virahitanti adhippāyo. Uppādādīnaṃ abhāvato eva **acavanadhammaṃ**. **Koci jāyanako...pe... upapajjanako vā natthi** niccabhāvato ṭhānena saddhiṃ tannivāsīnaṃ. Niccabhāvañhi so paṭijānāti. **Tisso jhānabhūmiyoti** dutiyatatiyacatutthajjhānabhūmiyo. Catutthajjhānabhūmivisesā hi asaññāsuddhāvāsārubbhāvā. **Nibbānanti** vā ettha **iti**-saddo ādiattho, na parisamāpanattho, tasmā “sabba”nti iminā “asañña...pe... bhavā”ti vuttaṃ saṅgaṇhāti. **Paṭibāhatīti** santamyeva samānaṃ ajānantova “natthī”ti paṭikkhipati. **Eke** uttaravihāravāsino.

**Heṭṭhūpapattikoti** heṭṭhā bhūmīsu uppannaupapattiko. Idāni tamattham vivarituṃ “**anuppanne**”tiādi vuttaṃ. **Heṭṭhūpapattikaṃ katvāti** yathāṭṭhitabhūmito heṭṭhā tatiyajjhānabhūmiyaṃ upapattijhānaṃ katvā, na uparijhānassa viya patthanāmattanti adhippāyo. **Paṭhamakāleti** tasmim bhava paṭhamakāle. **Aññāsi** āsannabhāvato. **Ubhayanti** taṃ taṃ attanā katakammañceva nibbattaṭṭhānañcāti ubhayaṃ. **Pamussitvā** nibbattiṃ anupadhārento.

**Avijjāya gatoti** avijjāya saha pavatto. Sahayoge hi idaṃ karaṇavacanaṃ. Tenāha

“**samannāgato**”ti. **Aññāṇī**ti avidvā. Paññācakkhuvirahato **andhībhūto**, andhabhāvaṃ āpannoti attho. Anāgate saddo hotāyaṃ “vakkhatī”ti yatrasaddapayogena, attho pana vattamānakāliko. Tenāha “**bhaṇatī**”ti. Tenāha “**yatrā**”tiādi.

**Maggacoroti** maggaparibundhakacoro. **Santajjiyamānoti** “avijjāgato vata, bho, bako brahmā”tiādinā santajjiyamāno. **Satiṃ labhitvā**ti teneva santajjanena yoniso ummujjitvā purimajātivisayaṃ satim labhitvā. **Nippīlitukāmoti** ghaṃsetukāmo dosaṃ dassetukāmo “idaṃ passa yāvañca te aparaddha”nti. **Puññakammāti** puññakārino. **Vedehi** ñāṇehi **gatattā** pavattattā. **Antimā brahmupapattīti** sabbapacchimā brahmabhāvappatti. **Asmābhijappantīti** asme abhijappanti. Āyuvanñādivasena brūhitaguṇattā **brahmā**. Aññehi mahantā brahmā **mahābrahmā**. **Abhibhūti** taṃ brahmalokaṃ jeṭṭhakabhāvena abhibhavitvā ṭhito. **Anabhibhūtoti** aññehi na abhibhūto. **Aññadatthūti** ekaṃsavacanametam. Dassanavasena **daso**, sabbam passatīti adhippāyo. **Vasavattīti** sabbajanam vase vatteti. **Issaroti** loka issaro. **Kattā nimmātāti** lokassa kattā nimmātā. **Seṭṭho sajītāti** ayam lokassa uttamo saṃvibhajitā ca. **Vasī pitā bhūtabhabyānanti** āciṇṇavasittā vasī, ayam pitā bhūtānam nibbattānam bhabyānam sambhavesīnanti **patthenti** vikatthenti **pihenti** mānenti.

**Etanti** viparītasaññāvasena “idaṃ niccam idaṃ dhuvam idaṃ sassata”ntiādinā vuttam etam appam parittakanti taṃ bhagavā paricchinditvā dasseti. Taṃ pana “ekasmiṃ kosalake tilavāhe vassasate vassasate ekekatiluddhāre kayiramāne tilāni parikkhayaṃ gacchanti, na tveva abbude āyū”ti evam vutto abbudo, taṃvasena vīsatiṅgaṇam nirabbudo, tesam nirabbudānam vasena nirabbudasatasahassam. Ayamettha saṅkhepo, vitthārato pana padume āyuno vassagaṇanā imasmimyeva saṃyutte parato āgamissati. **Anantadassīti** anantassa ñeyyassa anavasesato dassī. **Vatasīlavattanti** samādānavasena vatabhūtam cārittasīlavasena samāciṇṇattā sīlavattam. Taṃ pana ekamevāti āha “**sīlamevā**”ti.

**Apāyesīti** ettha yadā so pipāsīte manusse pānīyam pāyesi, taṃ samudāgamato paṭṭhāya dassetuṃ “**tatrā**”tiādi āradham. **Pubbeti** purimajātiyam. Esa brahmā “jarāmaṇassa antam karissāmī”ti ajjhāsayavasena jhānam nibbattetvā brahmaloke nibbatti, so tattha nibbānasaññī ahoṣi. **Jhānaratiyā vītināmetīti** tadā tassā kiriyaṃ avicchedato pavattim upādāya vattamānapayogo. Rattandhakāre purato purato gacchantassa sakaṭassa anussaraṇavasena gacchantānam sakaṭānam nivattanam hotīti “**sabbasakaṭāni tatheva nivattivā**”ti vuttam.

**Kammasajjāti** yuddhasajjā. **Vilopanti** viluttabhaṇḍam. **Enīkūlasinti** ettha “panihatāya niccagaṅgāya nāma”nti keci. “Enīmigabahulatāya so gaṅgāya tīrappadeso enīkūlanti vutta”nti apare. **Gaṅgeyyakoti** gaṅgāsannivāsī.

**Baddhacaroti** paṭibaddhacariyo. Tenāha “**antevāsiko**”ti. **Yasmā buddho** sabbaññū, tasmā aññāsi, idha mayham pamuṭṭhañca sabbam jānāsīti adhippāyo. **Sabbam brahmalokaṃ obhāsayinganto** sabbampimam brahmalokaṃ bhagavā obhāsam abhibhavitvā anaññasādhāraṇam attano obhāsam obhāsento tiṭṭhati.

Bakabrahmasuttavaṇṇanā niṭṭhitā.

## 5. Aññatarabrahmasuttavaṇṇanā

**176. Tejokasiṇaparikkammaṃ katvāti** “tejokasiṇaparikkammajjhānam samāpajjissāmī”ti cittuppādo evettha tejokasiṇaparikkammaṃ. Na hi buddhānam aññesam viya tattha jhānasamāpajjanena parikkamma papañco atthi sabbattheva ciṇṇavasībhāvassa paramukkamsabhāvappattattā. Tassa kira brahmuno “yathāham evam mahānubhāvo añño natthī”ti laddhi, yaṃ sandhāya vuttam – “natthi so samaṇo vā brāhmaṇo vā, yo idha āgaccheyyā”ti. Bhagavā tassa taṃ laddhim vissajjetuṃ tejodhātum samāpajjitvā tassa upari ākāse nisīdi. Tena vuttam “**tejodhātum...pe... tathāgatam disvā**”ti. Aṭṭhivedham viyam vijjhitaṃ **aṭṭhivedhī**, yathā aṭṭhim vijjhivā aṭṭhimiñjam āhacca tiṭṭhati, evam

vijjhitabboti attho. Ayaṃ pana aṭṭhivedhī viya **aṭṭhivedhī**, yathā so laddhiṃ vissajjeti, evaṃ paṭipajjitabboti attho. **Sesānanti** mahākassapamahākappinaanuruddhattherānaṃ.

**Aññabrahmasarīravimānālaṅkāradīnaṃ pabhāti** brahmānaṃ sarīrappabhā vimānappabhā alaṅkāravatthādīnaṃ pabhāti imasmiṃ brahmaloke imā sabbā pabhā attano pabhassarabhāvena abhibhavantaṃ. **Natthi me sāti** idāni me sā diṭṭhi natthi, “natthi so samaṇo vā brāhmaṇo vā, yo idha āgaccheyyā”ti ayaṃ laddhi natthi. Tenāha “**tatrāssa...pe... pahīnā**”ti. **Etthāti** etasmiṃ samāgame. Yathā tassa brahmuno sabbaso diṭṭhigataṃ vimuccati dhammacakkhu uppajjati, evaṃ **mahantaṃ dhammadesanaṃ desesi**.

“Ajjāpi te, āvuso”tiādīnā vuttena **tattakeneva. Sarūpena vuttāti** paṭhamena pādena catasso, dutiyena ekanti evaṃ pañca abhiññā sarūpena vuttā. Kasmā ettha dibbasotaṃ nāgatanti? Āha “**tāsaṃ vasena āgatamevā**”ti. Yena imā lokuttarā abhiññā adhigatā, na tassa dibbasotasampādanaṃ bhāriyaṃ paṭipakkhavigamena sukheveva ijjanato.

Aññatarabrahmasuttavaṇṇanā niṭṭhitā.

## 6. Brahmālokasuttavaṇṇanā

**177. Paccekaṃ dvārabāhanti** paccekaṃ dvārabāhaṃ. Pacceka-saddo cettha āvuttivasena veditabbo; “paccekaṃ pacceka”nti āha “**ekeko ekeka**”nti. Tesu hi eko paccekabrahmā gandhakuṭiyā ekadvārabāhaṃ nissāya ṭhito, aparo aññaṃ. **Paccekabrahmāti** ca ekacārī brahmā, na parisacārī brahmāti attho. Samiddhi nāma sagge sukhopakaraṇehi, brahmānañca jhānaṃ sukhopakaraṇanti **jhānasukhena samiddhoti**. Sampattiyā vepullappattatā brahmānañca abhiññāguṇehi vepullappattīti āha “**phītoti abhiññāpupphehi supupphito**”ti. **Asahantoti** nasahanto narocento.

**Satapadanti** satasaddo. **Rūpavasenāti** rūpasaddavasena, rūpasaddena saddhinti attho. Tathā **pantivasenāti** etthāpi. **Ekacceti** eke migārī, tesam byaggghīnisārūpakānaṃ pañcasatānīti attho. “**Kassa aññassa upaṭṭhānaṃ gamissāmi**”ti vimānasampattiyā vimhayakkhiko ahaṅkāravasena vadati. Raṇanti nindanti etehīti **raṇā**, dosā. Virodhipaccayasannipāte vikāruppatti ruppanaṃ rūpassa pavedhananti āha “**sītādīhi ca niccaṃ pavedhita**”nti. **Sumedho** sundarapañño **so satthā rūpe na ramati**, kiṃ pana mandapañño rūpe saraṇaṅca pavedhitaṅca apassanto ramaṣīti adhippāyo.

Brahmālokasuttavaṇṇanā niṭṭhitā.

## 7. Kokālikasuttavaṇṇanā

**178. Pamāṇakarānaṃ rāgādīnaṃ abhāvato khīṇāsavo rāgādivasena** na sakkā imaṃ pamātunti **appameyyo**, appameyyāni vā cattārī ariyasaccāni vijjhitvā ṭhitattā pamitaṃ pameyyaṃ tassa kato parimeyyo natthi. Tenāha “**khīṇāsavo...pe... dīpeti**”ti. **Tanti** khīṇāsavaṃ. **Pametum** randhagavesī hutvā vajjato paricchinditum. Yathāsabhāvato tassa minane nihīnapaññatāya **avakujjapaññaṃ**.

Kokālikasuttavaṇṇanā niṭṭhitā.

## 8. Katamodakatissasuttavaṇṇanā

**179. Kiṃ kusālagavesitāya** “kiṃ kusalaṃ akusala”ntiādīnā kinti suṇāti etāyāti **kissa vā vuccati paññā**.

Katamodakatissasuttavaṇṇanā niṭṭhitā.

## 9. Turūbrahmasuttavaṇṇanā

**180.** Ābādhō etassa atthīti **ābādhiko**. **Anantarasutteti** anāgatānantare sutte. **Varākoti** anuggahavacanameva, na nippariyāyena vuttavacanam. **Piyasīlāti** iminā etasmiṃ atthe niruttinayena “pesalā”ti padasiddhīti dasseti. **Kabarakkhīnīti** byādhibalena paribhinnavaṇṇatāya kabarabhūtāni akkhīni. **Yattakanti** yaṃ tvaṃ bhagavato vacanam aññathā karosi, tattakam **tayā aparaddham**, tassa pamāṇam natthīti attho. Yasmā anāgāmino nāma kāmaccchandabyāpādā pahīnā honti, tvañca diṭṭho kāmaccchandabyāpādavasena idhāgato, tasmā yāva te idaṃ aparaddhanti ayamevettha attho daṭṭhabbo.

**Adiṭṭhippattoti** appattadiṭṭhinimitto. **Gilaviso viya** viṣaṃ gilitvā ṭhito viya. **Kuṭhārisadisā** mūlapacchindanaṭṭhena. **Uttamattheti** arahatte. **Khīṇāsavoti vadati** sunakkhatto viya acelaṃ korakkhattiyam. **Yo** aggasāvako viya **pasamsitabbo khīṇāsavo**, taṃ “dussīlo aya”nti yo vā vadati. **Samakova vipākoti** pasamsiyanindā vijjamānaguṇaparidhamṣanavasena pavattā yāva mahāsāvajjatāya kaṭukataravipākā, tāva nindiyapasamsāpi mahāsāvajjatāya samavipākā tattha avijjamānaguṇasamāropanena attano paresaṃ micchāpaṭipattihetubhāvato pasamsiyena tassa samabhāvakaraṇato ca. Lokepi hi ayaṃ pure samaṇagārayho hoti, pageva duppaṭipannaduppaṭipannoti samaṃ karontīti.

**Sakenāti** attano sāpateyyena. **Ayaṃ appamattako aparādhō** diṭṭhadhammikattā sappatikārattā ca tassa. **Ayaṃ mahantataro kali** katūpacitassa samparāyikattā appatikārattā ca.

“Nirabbudo”ti gaṇanāviseso ekoti āha “**nirabbudagaṇanāyā**”ti, satahassam nirabbudānanti attho. Nirabbudaparigaṇanam pana heṭṭhā vuttameva. **Yamariyagarahī nirayaṃ upetīti** ettha yathāvuttaṃ āyupamāṇam pākatikena ariyūpavādinā vuttanti veditabbaṃ. “Aggasāvakanam pana guṇamahantatāya tatopi ativiya mahantatarā evā”ti vadanti.

Turūbrahmasuttavaṇṇanā niṭṭhitā.

## 10. Kokālikasuttavaṇṇanā

**181.** Dve kokālikanāmakā bhikkhū, tato idha adhippetam niddhāretvā dassetuṃ – “**ko ayaṃ kokāliko**”ti? Pucchā. Suttassa aṭṭhuppattim dassetuṃ – “**kasmā ca upasaṅkamī**”ti? Pucchā. **Ayaṃ kirāti**ādi yathākkamaṃ tāsam vissajjanam. Vivekavāsam vasitukāmatā appicchatāya ca **mā kassaci... pe... vasiṃsu**.

**Pakkamissantīti āghātam uppādesi** attano icchāvighātanato. **Therā bhikkhusaṅghassa niyyādayiṃsu** payuttavācāya akatattā therehi ca adīpitattā. **Pubbepi...pe... maññeti** iminā therānaṃ kohaññe ṭhitabhāvaṃ āsaṅkati avaṇe vaṇam passanto viya, suddhe ādāsatale lekham utṭhāpento viya ca.

**Aparajjhivāti** bhagavato sammukhā “pāpabhikkhū jātā”ti vatvā. Āha “**saddhāya ākaro pasādāvaho**”ti. Pavattasaddhāyiko vāti atthoti āha “**saddhātabbavacano**”ti.

**Pīlakā** nāma bāhirato paṭṭhāya aṭṭhim bhindati, imā pana paṭṭhamāyeva aṭṭhim bhinditvā uggatā. **Taruṇabeluvamattiyoti** taruṇabillaphalamattiyō. **Visagilitoti** khittapaharaṇo. Tañca baḷisaṃ visasamaññā loke. “Ārakkhadevatānam sutvā”ti padaṃ ānetvā sambandho.

Magadharatṭhe saṃvohārato **māgadhako patto**, tena. Tilasakaṭam **tilavāhā**eti vutto. **Paccitabbaṭṭhānassāti** nirayadukkhena paccitabbapadesassa. **Etam** “abbudo”ti nāmaṃ.

**Vassagaṇanāti** ekato paṭṭhāya dasaṅgitaṃ abbudaāyumi, tato param vīsatiṅgaṃ nirabbudādīsū

vassagaṇanā veditabbā. **Sabbatthā**ti ababādīsu padumapariyosānesu sabbesu nirayesu. **Eseva** **nayoti** heṭṭhimato uparimassa uparimassa vīsatiḅuṇataṃ atidisati.

Kokālikasuttavaṇṇanā niṭṭhitā.

Paṭhamavaggavaṇṇanā niṭṭhitā.

## 2. Dutiyavaggo

### 1. Sanaṅkumārasuttavaṇṇanā

**182. Porāṇakattā**ti nibbattitvā cirakālattā. Jātattā jano, taṃ ito **janeto**, tasmim. **Khattiyo seṭṭho** lokamariyādaparipālanādinā sammāpaṭipattiyam suttānaṃ niyojanena bahukārattā. So hi pare tathā paṭipādentō sayampi tattha paṭiṭṭhitoyeva hotīti seṭṭho vutto. Paṭipakkhaviṅṅhanaṭṭhena pubbenivāsādīnaṃ vidītakaraṇaṭṭhena **vijjā**ti. Saddhāhirottappabāhusaccavīriyasatipaṇṇāti ime **satta saddhammā**. Caranti agatapubbaṃ disaṃ etehīti **caraṇāni**, sīlādayo pannarasa dhammā.

Sanaṅkumārasuttavaṇṇanā niṭṭhitā.

### 2. Devadattasuttavaṇṇanā

**183.** Appaṇṇatte eva sikkhāpade chejjagāmikamassa katattā salīṅgeneva ca ṭhitattā “devadatto sāsānato pakkanto”ti na vattabboti **acirapakkanteti** ettha “sāsānato pakkante”ti avatvā “**veḷuvanato gayāsīsaṃ gate**”ti vuttaṃ. Pakatatto hi bhikkhusaṅghaṃ bhindeyya, na apakatattoti. **Valāvāyāti** valāvāya kucchiyaṃ jātaṃ.

Devadattasuttavaṇṇanā niṭṭhitā.

### 3. Andhakavindasuttavaṇṇanā

**184. Janatanti** janānaṃ samūhaṃ, janasaṅcaraṇaṭṭhānanti attho. **Manussānaṃ anupacāreti** yattake kasanādīkiccaṃ karontānaṃ saṅcāro hoti, ettakaṃ atikkamitvā anupacāre. **Samyojanavippamokkhā**ti samyojanavimokkhahetu. Vivekaratiṃ pavivekasukhahjānaṃ alabhanto. **Cittānurakkhaṇaṭṭhanti** pubbe maṃ manussā “araṇṇāvāsena pavivitto asaṃsaṭṭho āradhaviṅṅriyo”ti maṇṇīṃsu, idāni gāmaṅte vasantaṃ disvā gaṇasaṅgaṅikāya nivuṭṭhoti appasādaṃ āpajjissanti. Yadiṃ me idha abhirati natthi, evaṃ santepi idheva vasissāmīti vikkhittacittena hutvā na vasitabbaṃ, ko attho cittavasamaṃ gantvāti adhippāyo. **Satipaṭṭhānaparāyaṇoti** satipaṭṭhānabhāvanārato. Evaṃ hissa gaṇavāsopi pāsāṃso vivekavāsena vinā samaṇakiccassa asijjhanato.

**Vaṭṭabhayato** pamutto ajjhāsayavasenāti adhippāyo.

**Nisīdi tattha bhikkhū**ti iminā sattūpaladdhiyā anissitattā yathāruciyaṃ tesamaṃ nisajjaṃ dasseti. Tenāha “**iminā**”tiādi.

Iminā ca iminā ca ākārena jātanti na anussavadassanametamaṃ, na anussavaggahaṇamaṃ. Takkahetu nayahetu vā na vadāmīti yojanā. Piṭakaṃ gantho sampadīyati etassāti **piṭakasampadānaṃ**, ganthassa uggaṇhanato tena piṭakassa uggaṇhanakabhāvena, kenaci ganthānusārena evaṃ na vadāmīti attho. Brahmassa seṭṭhassa dhammassa cariyamaṃ vācasikamaṃ pavattatīti **brahmacariyamaṃ**, dhammadesanā. Bhāvitena maraṇassa sabbaso bhāgena vippahānena **maraṇapariccāgīnaṃ**. Te ca khīṇajātīkāti āha “**khīṇāsavāna**”nti.

**Dasadhā dasāti** dasakkhattuṃ dasa. **Aññanti** pañcasatādhikasahassato aññaṃ. **Puññabhāginoti** vivaṭṭanissitapuññaṃ bhāgino tassa desanāya ettakā sattā jātāti gaṇetuṃ ahaṃ na sakkomīti dasseti. **Brahmadhammadesananti** brahmunā vuttaṃ āha.

Andhakavindasuttavaṇṇanā niṭṭhitā.

#### 4. Aruṇavatīsuttavaṇṇanā

**185. Abhibhū sambhavoti** tesam dvinnaṃ mahātherānaṃ nāmāni. Tesam vibhāgaṃ dassetuṃ “tesū”tiādi vuttaṃ. Ete dve tassa bhagavato aggasāvakāti dasseti. **Avajjhāyantīti** heṭṭhā katvā cintenti. **Khiyyanti** taṃ lāmakato cintetabbataṃ pāpentī pāpakataṃ karonti. **Vitthārayantīti** tameva lāmakato cintetabbataṃ vepullaṃ pāpentā. Sabbe pāsaṇḍā attano attano samaye siddhante sabbe devamanussā attano attano samaye paṭilābhe paṭiladdhaatthe purisakāraṃ vaṇṇayantīti yojanā.

**Ārambhavīriyanti** maccusenāsaṅkhātakilēsadhunane ārambhavīriyaṃ, yā “ārambhadhātū”ti vuccati. **Nikkamavīriyanti** kosajjapaṭipakkhabhūtaṃ vīriyaṃ, yā “nikkamadhātū”ti vuccati. **Payogaṃ karoṭhāti** paraṃ paraṃ ṭhānaṃ akkamanato tatopi balavataraṃ bhāvanābhīyogaṃ pavattethāti attho. Tenāha “parakkamathā”ti. **Kilesasenā** nāma rāgādikilesasamuho, so maraṇapaccayabhāvato “maccuno senā”ti vuccati. Tañhi sandhāya vuttaṃ “mahāsenena maccunā”ti (ma. ni. 3.272, 275, 276). Khandhānaṃ paṭhamābhiniṃbbatti **jāti**, tadanñānaṃ pana tesam paṭipāṭi pavattaṃ **samsāroti** adhippāyenāha “**jātiṅca samsāraṅca**”ti. Yasmā “ekampi jātiṃ dvepi jātiyo”tiādīsu tasmīṃ tasmīṃ bhava ādānanikkheparicchinnaṃ khandhappavatti “jāti”ti vuccati, sā eva yāva parinibbānā aparāparaṃ pavattamāno samsāro “ito cito samsāraṇa”nti katvā, tasmā āha “**jātiṅca samsāraṇaṃ vā samsāra**”nti. **Paricchedanti** pariyoṣānaṃ. Obhāsaṃ pharīti sambandho. **Ālokaṭṭhāneti** attanā kataālokaṭṭhāne. **Ālokakiccaṃ natthīti** andhakāraṭṭhāne ālokadassanaṃ viya ālokaṭṭhāne ālokadassanakiccaṃ natthi. Tasmā tesam sattānaṃ “kiṃ āloko ayaṃ, kassa nu kho ayaṃ āloko”ti? **Vicināntānaṃ** cintentānaṃ. **Sabbeti** sahasasilokadhātuyaṃ sabbe devamanussā. **Osaṭṭhāya parisāyāti** dhammassavanattham sabbosaṭṭhāya paricitaparicchināya parisāya. **Saddaṃ suṇimsūti** na kevalaṃ saddameva suṇimsu, atha kho atthopīti yathādhippeto tesam pakatisavanupacāre viya pākāṭo ahoṣi, tisahasasilokadhātum viññāpesīti.

Aruṇavatīsuttavaṇṇanā niṭṭhitā.

#### 5. Parinibbānasuttavaṇṇanā

**186. Evaṃ taṃ kusinārāya hotīti** yathā anurodhapurassa thūpārāmo dakkhiṇapacchimadisāyaṃ, evaṃ taṃ uyyānaṃ kusinārāya dakkhiṇapacchimadisāyaṃ hoti. **Tasmāti** yasmā nagaraṃ pavisitukāmā uyyānato upecca vattanti gacchanti etenāti **upavattananti** vuccati, tasmā. **Tanti** sālāpantibhāvena ṭhitaṃ sālavanaṃ. **Antarenāti** vemajjhe. Appamajjanaṃ **appamādo**, so pana atthato ñāṇūpasamhitā sati. Yasmā tattha satiyā byāpāro sātisayo, tasmā “**satiavippavāsenā**”ti vuttaṃ. **Appamādapadeyeva pakkhipitvā abhāsi** atthato tassa sakalassa buddhavacanassa saṅgaṇhanato.

Jhānādīsu citte ca paramukkaṃsagatavasībhāvātāya “ettake kāle ettakā samāpattiyo samāpajjitvā parinibbāyissāmī”ti kālaparicchedaṃ katvā samāpattisamāpajjanaṃ **parinibbānaparikammanti** adhippetam. **Theroti** anuruddhatthero.

**Ayampi cāti** yathāvuttapañcasatṭhiyā jhānānaṃ samāpannakathāpi saṅkhepakathā eva. Kasmā? Yasmā bhagavā tadā devasikaṃ vaḷaṅjanasamāpattiyo sabbāpi aparihāpetvā samāpajji evāti dassento “**niṃbbānapuraṃ pavisanto**”tiādimāha. **Catuvīsati...pe... pavisitvāti** ettha keci tāva āhu “bhagavā devasikaṃ dvādasakoṭisatasahassakkhattuṃ mahākaraṇāsamāpattiṃ samāpajjati, dvādasakoṭisatasahassakkhattumeva phalasaṃpattiṃ samāpajjati, tasmā tadāpi

catuvīsatiakoṭṭisatasahassasaṅkhā samāpattiyo samāpajjati. Vuttañhetam bhagavatā ‘tathāgatam, bhikkhave, arahantam sammāsambuddham dve vitakkā bahulam samudācaranti khemo ca vitakko paviveko ca vitakko’ ti (itivu. 38). Khemo hi vitakko bhagavato mahākaruṇāsamāpattim pūretvā ṭhito, pavivekavitakko arahattaphalasangāhāpattim. Buddhānam hi bhavaṅgaparivāso lahuko matthakappatto samāpattīsu vasībhāvo, tasmā samāpajjanavuṭṭhānāni katipayacittakkhaṇeheva ijjhanti. Pañca rūpāvācārasamāpattiyo catasso arūpasamāpattiyo appamaññāsamāpattiyā saddhim nirodhasamāpatti arahattaphalasangāhāpatti cāti dvādasatā samāpattiyo bhagavā paccekam divase divase koṭṭisatasahassakkhattum purebhattam samāpajjati, tathā pacchābhattanti evam catuvīsatiakoṭṭisatasahassasaṅkhā devasikam vaḷaṅjanakakasiṇasamāpattiyo’ ti.

Apare panāhu “yam tam bhagavatā abhisambodhidivase pacchimayāme paṭṭiccasamuppādaṅgamukhena paṭilomanayena jarāmaṇato paṭṭhāya ñāṇam oṭāretvā anupadadhammavipassanam ārabhanta yathā nāma puriso suviduggam mahāgahanam mahāvanam chindanto antarantarā nisānasilāyam pharasum nisitam karoti, evamevam nisānasilāsadiṣiyo samāpattiyo antarantarā samāpajjivā ñāṇassa tikkhavisadabhāvam sampādetum anulomapaṭilomato paccekam paṭṭiccasamuppādaṅgesu lakkhakoṭṭisamāpattisamāpajjanavasena sammāsanañāṇam pavatteti, tadanusārena bhagavā buddhabhūtopi anulomapaṭilomato paṭṭiccasamuppādaṅgamukhena vipassanāvasena divase divase lakkhakoṭṭiphalasamāpattiyo samāpajjati, tam sandhāya vuttam, ‘catuvīsatiakoṭṭisatasahassasaṅkhā samāpattiyo pavisitvā’ ti.

**Imāni dvepi samanantarāneva** paccavekkhaṇāyapi yebhuyyena nānantariyakatāya jhānapakkhikabhāvato. Yasmā sabbapacchimaṃ bhavaṅgacittam tato tato cavanato “cutī” ti vuccati, tasmā na kevalam ayameva bhagavā, atha kho sabbepi sattā bhavaṅgacitteneva cavantīti dassetuṃ “**ye hi keci**” tiādi vuttam. **Dukkhasaccenāti** dukkhasaccapariyāpanna cuticittena **kālam** kālakiriyaṃ **karonti** pāpuṇanti, kālagamanato vā karonti peccāti.

**Paṭibhāgapuggalavirahito** sīlādiguṇehi asadisatāya sadisapuggalarahito. Saṅkhārā vūpasammanti etthāti **vūpasamoti** evam saṅkhātam ñātam kathitam nibbānameva sukhanti. **Lomaḥṣaṇakoti** lomānam haṭṭhabhāvāpādano. **Bhimsaṇakoti** avītarāgānam bhayaṅjanako **āsi** ahoṣi. **Sabbākāravaraṅguṇūpeteti** sabbehi ākāravarehi uttamakāraṇehi sīlādiguṇehi samannāgate. **Asaṅkuṭitenāti** akuṭitena vipphārikābhāvato. **Suvikasitenevāti** pītisomanassayogato suṭṭhu vikasitena. **Vedanam adhivāsesi** sabhāvasamudayādito suṭṭhu paññātattā. **Anāvaraṇavimokkho sabbaso** nibbidabhāvo. Tenāha “**apaññattibhāvūpagamo**” ti. **Pajjotanibbānasadisoti** padīpassa nibbānasadisoti tattha vilīyivā avatṭhānābhāvato.

Parinibbānasuttavaṇṇanā niṭṭhitā.

Dutiyavaggavaṇṇanā niṭṭhitā.

Sāratthappakāsiniyā saṃyuttanikāya-aṭṭhakathāya

Brahmasaṃyuttavaṇṇanāya līnatthappakāsanā samattā.

## 7. Brāhmaṇasaṃyuttam

### 1. Arahantavaggo

#### 1. Dhanañjānisuttavaṇṇanā

**187. Dhanañjānigottāti** ettha pubbapurisato āgatassa kulavaṃsassa nāmābhidhānasāṅkhātam gam

tāyatīti gottam. (Kiṃ pana tanti? Aññakulaparamparāsādhāraṇaṃ tassa kulassa ādipurisasamudāgataṃ taṃkulapariyāpannasādhāraṇaṃ sāmāññarūpanti daṭṭhabbam.) Dhanañjānigottam etissanti **dhanañjānigottā**. Tassā udānassa kāraṇaṃ pucchitvā ādito paṭṭhāya vibhāvetuṃ “**so kirā**”tiādi vuttam. Nānārasabhojanaṃ detīti yojanā. Pañcagorasasampāditam sālibhattam sūpasākabyañjanaṃ nānārasam brāhmaṇabhojanaṃ. **Maṇḍalaggakhagganti** maṇḍalaggasaṅkhātā khaggam. Duvidho hi khaggo maṇḍalaggo dīghaggoti. Tattha yassa aggo maṇḍalākārena ṭhito, so maṇḍalaggo. Yassa pana asiputtikā viya dīgho, so dīghaggo.

**Sāsanā**ti anusāsanā. “Namo...pe... sambuddhassā”ti evaṃ vuttā **pañcapadikagāthā**. Satthusāsane hi lokiyacchandaṃ anapekkhitvā esā pañcapadikagāthāti daṭṭhabbā. **Okkāvaradharāti** pubbapurisasāṅkhātaukkākavaṃsavaradhārikā. **Sakkāti** sakkuṇeyyam.

**Evanti** “sace me aṅgamaṅgānī”tiādinā iminā pakārena. “Pañca gāthāsātāni pana aṭṭhakathaṃ āruḷhāni, idha pana dve eva uddhaṭā”ti vadanti. **Paharituṃ vāti** ekavārampi hatthena vā pādena vā paharitumpi parāmasitumpi asakkontoti attho. So hi tassā ariyasāvīkāya ānubhāvena attano sāmattihiyena vase vattāpanattham santajjitvāpi tadanuvattanto nibbiso ahoṣi. Tenāha “**bhoti**”tiādi.

**Tassa brāhmaṇassāti** attano sāmikabrāhmaṇassa. **Upasaṃharantīti** upanentī. **Tasmiṃ samayeti** tasmiṃ dukkhupattikāle “sabbe saṅkhārā dukkhā”ti bhagavato vacanaṃ anussarivā “dasabalassa bhagavato”tiādisu yathāparicitaṃ guṇapadaṃ anussari. Tenāha “**dasabalam sari**”ti.

Khantisoraccarahitatāya **kujjhivā**. **Bhijjivāti** saṃyatābhāvato tassa brāhmaṇassa antare mettibhedena bhijjivā. **Evamevāti** yathā etarahi akāraṇena, evameva aññadāpi akāraṇenāti attho. Nikkāraṇatādīpane **evaṃ**-saddo, **eva**-saddo pana avadhāraṇattho. Nikkāraṇatā ca nāma niraṭṭhakatā, niraṭṭhakavippalāpabhāvenettha **evaṃ**-saddassa gahaṇe pavatti gavesitabbā. Garahattho vāyaṃ **evaṃ**-saddo anekatthattā nipātānaṃ. Garahatthattā cassa vasalisaddasannidhānato pākāṭā eva.

**Gāmanigamaratṭhapūjitoti** iminā gāmanigamaratṭhasāmikehi pūjitabhāvo dīpito gāmādīnaṃ tesam vase vattanato. **Asukassa nāma** puggalassa. **Sesanti** abhikkantantiādi, yampi caññaṃ idhāgataṃ heṭṭhā vaṇṇitaṇca.

Dhanañjānīsuttavaṇṇanā niṭṭhitā.

## 2. Akkosasuttavaṇṇanā

**188. Bhāradvājova** soti bhāradvājo nāma eva so brāhmaṇo. Gottavasena hi tayidaṃ nāmaṃ, viśesena panetaṃ jātanti dassetuṃ “**pañcamatthehi**”tiādi vuttam. **Jānikatāti** nātivaggahānikatā. **Pakkho bhinnoti** tato eva nātipakkho naṭṭho. Yathā domanassito anattamanoti vattabbaṃ labhati, evaṃ kupitoti āha “**domanassena cā**”ti. **Dasahīti** anavasesapariyādānavasena vuttam pañcahi gāthāsatehi akkosanto tathā akkoseyyāti katvā. Tattha pana yena kenaci akkosantopi akkosatiyeva nāma. **Karosi** mama bhātikassa pabbajjam.

**Sambuñjatīti** sambhogaṃ karoti. Akkosādīhi **ekato bhuñjati**. **Vītiharatīti** byatihāraṃ karoti, akkosato paccakkosanādīnā vinimayaṃ karotīti attho. Tenāha “**katassa paṭikāraṃ karoti**”ti. Assa anussavavasena sutvā “sapati ma”nti saññino bhayaṃ uppajjīti yojanā. **Assāti** brāhmaṇassa. **Sutvāti** padaṃ ubhayatthāpi yojetabbaṃ “tavevetam brāhmaṇāti sutvā, anussavavasena sutvā”ti ca. Kāmaṃ kisavacchādayo sapanam nādaṃsu, devatānaṃyeva hi so attho, sattānaṃ pana tathā saññā uppannā, sopi tathāsaññī ahoṣi. Tenāha “**anussavavasena**”ti.

**Dantassa** sabbaso damathaṃ upagattā. **Nibbisevanassāti** rāgadosādihetukavipphandanarahitassa.



**Tassevāti** paṭikujjhantasseva puggalassa **tena kodhena pāpaṃ hoti** pāpassa santānantarasaṅkantiyā abhāvato. Keci pana “**tassevāti** tasseva paṭikujjhantapurisassa tena paṭikujjhanena. **Pāpiyoti** paṭikujjhantapuggalassa lāmakataro”ti evamettha atthaṃ vadanti. **Satiyā samannāgato hutvā** paṭisaṅkhāne ʒhito **adhivāseti**, na saho mūlho hutvāti adhippāyo. **Ubhinnaṃ tikicchantaṃ** ubhinnaṃ uppannakodhasaṅkhātāṃ kilesabyādhiṃ tikicchantaṃ vūpasantaṃ taṃ puggalaṃ. **Yo puggalotiādinā** purimāsu gāthāsu pavattitāni padāni sambandhitvā dasseti. Pañcasu khandhesu yāthāvato vinītā ariyadhammassa kovidā nāma hontīti āha “**dhammassāti pañcakkhandhadhammassā**”ti. Idāni tamatthaṃ paripuṇṇaṃ katvā dassento āha “**catusaccadhammassa vā**”ti.

Akkosassuttavaṇṇanā niṭṭhitā.

### 3. Asurindakasuttavaṇṇanā

**189. Tenevāti** bhātupabbajiteneva. **Assevāti** titikkhassa. “**Taṃ jayaṃ hotī**”ti liṅgavipallāsavasena vuttanti āha “**so jayo hotī**”ti, dujjayaṃ kodhaṃ titikkhāya jinantassāti adhippāyo. Yasmā titikkhādayo na kodhavasikaṃ dhuraṃ, taṃ pana bālānaṃ maññaṇāmattanti idha imamatthaṃ vibhāvetuṃ “**katamassā**”tiādi vuttaṃ. **Vijānatova jayo** na avijānato titikkhāya abhāvato. Na hi avijānanto andhabālo kodhaṃ vijetuṃ sakkoti. **Kevalaṃ jayaṃ maññati** kilesehi parājito samānopīti adhippāyo.

Asurindakasuttavaṇṇanā niṭṭhitā.

### 4. Bilaṅgikasuttavaṇṇanā

**190. Suddhanti** kevalaṃ sambhāravirahitaṃ. **Sambhārayuttanti** kaṭukabhaṇḍādisambhārasahitaṃ. Kaṅjito nibbattattā **kaṅjikaṃ**, āraṇālaṃ, bilaṅganti attho. **Nāmaṃ gahitaṃ** saṅgītikāle “bilaṅgikabhāradvājo”ti visesanavasena. **Tayoti** dhanaṅjāniyā sāmiko bhāradvājo, akkosakabhāradvājo, asundarikabhāradvājoti ādito tīsu suttesu āgatā tayo. **Meti** mayhaṃ.

Bilaṅgikasuttavaṇṇanā niṭṭhitā.

### 5. Ahimsakasuttavaṇṇanā

**191. Esāti** brāhmaṇo. “**Ahimsako aha**”nti tadatthaṃ sādhetuṃ icchāya kathesīti vuttaṃ “**ahimsakapaṇhaṃ pucchī**”ti. **Tathā ce assāti** yathā te nāmassa attho, tathā cetaṃ bhavyeyāsi anvatthanāmako bhavyeyāsi ahimsako eva siyāti. **Na dukkhāpeti** dukkhamattampi na uppādeti, dukkhato apanetīti attho.

Ahimsakasuttavaṇṇanā niṭṭhitā.

### 6. Jaṭāsuttavaṇṇanā

**192. Jaṭāpaṇhassāti** “antojaṭā bahijaṭā”ti evaṃ jaṭāpariyāyassa paṇhassa.

Jaṭāsuttavaṇṇanā niṭṭhitā.

### 7. Suddhikasuttavaṇṇanā

**193. Suddhikapaṇhassāti** “nābrāhmaṇo sujjaṭī”ti evaṃ suddhasannissitassa paṇhassa. **Sīlasampannoti** pañcavidhaniyamalakkhaṇena sīlena samannāgato. **Tapokammanti**

anasanapañcātapatappanādiparibhedanatapokammaṃ karontopi. **Vijjāti tayo vedāti** vadanti “tāya idhalokatthaṃ paralokatthaṃ ñāyanti”ti katvā. **Gottacaraṇanti** gottasañkhātāṃ caraṇaṃ. **Brāhmaṇo sujjhati** jeṭṭhajātikattā. Tathā hi so eva tapaṃ ācaritūṃ labhati, na itaro. **Aññā lāmikā pajāti** itaravaṇṇaṃ vadati. **Vacanasahassampīti** gāthānekasahassampi. Anto kilesehi pūtikō sabhāvena pūtikō. **Kiliṭṭhehi kāyakammādīhi** kāyaduccaritādīhi.

Suddhikasuttavaṇṇanā niṭṭhitā.

## 8. Aggikasuttavaṇṇanā

**194. Aggiparicaraṇavasenāti** aggihuttajuhanavasena. **Sannihitoti** missībhāvaṃ sampāpito. Tathābhūto ca so sappinā saddhiṃ yojito nāma hotīti āha “**saṃyojito**”ti. **Apāyamaggaṃ okkamati** micchādīṭṭhimicchāsañkappādīnaṃ attano santāne samuppādanato. Tenāha “**imaṃ laddhi**”ntiādi.

**Jātiyāti** sadosakiriyāparādhassa asambhavana parisuddhāya jātiyā. **Nānappakāre** aṭṭhārasavijjāṭṭhānasaññite **ganthe**. **Sutavāti** sutvā niṭṭhaṃ patto aggadakkhiṇeyyattāti adhippāyo.

**Pubbenivāsañāṇenāti** idaṃ loka sāsane ca niruḥhatāvasena vuttaṃ. Aññe hi pubbenivāsaṃ jānāntā pubbenivāsañāṇeneva jānanti, bhagavā pana sabbaññūtaññāṇenapi jānāti. **Dibbena cakkhunāti** etthāpi eseva nayo. Sabbaso jāti khīyati etenāti **jātikkhayo**, aggamaggo, tena pattabbattā āpannattā ca jātikkhayo arahattaṃ. **Jānitvā vositavosānoti** vijānitabbaṃ catusaccadhammaṃ maggañāṇena jānitvā soḷasannampi kiccānaṃ vositavosāno.

**Uppattiṃ dīpetvāti** pāyasadānassa āgamaṇaṃ pakāsetvā. **Gāthāhi abhigīṭanti** dvīhi gāthāhi mayā abhigītaṃ. **Abhuñjitabbanti** bhuñjitūṃ na yuttaṃ. “Abhojaneyya”nti kasmā vuttaṃ, nanu bhagavato ajjhāsayo accantameva suddhoti? Saccametāṃ, brāhmaṇo pana pubbe adātukāmo pacchā gāthā sutvā dhammadesanāya muduhadayo hutvā dātukāmo ahosi, tasmā taṃ bhikkhūnaṃ anāgate dīṭṭhānugatiāpajjanatthaṃ paṭikkhipi. Tathā hi anantarasutte kasibhāradvājasutte ca evameva paṭipajji. Tenāha “**tvam brāhmaṇā**”tiādi. **Kilañjamhi...pe... pakāsītāti** etena gāthaṃ uddesaṭṭhāneva ṭhapetvā bhagavā brāhmaṇassa vitthārena dhammaṃ desesīti dasseti. **Gāyanenāti** gāyanakena, gānena vā. **Atthañca dhammañcāti** sadevakassa lokassa hitañceva tassa kāraṇaṇca. **Sampassantānanti** sammadeva passantānaṃ. **Dhammoti** pavenīāgato cārittadhammo na hoti. Bhojanesu ukkaṃsagataṃ dassetuṃ “**sudhābhojana**”nti āha. **Dhamme satīti** ariyānaṃ ācāradhamme satī taṃ ālambitvā jīvantānaṃ etadeva seṭṭhanti “**somaṃ bhuñjeyya pāyasa**”nti taṃ ārabba kathāya uppannattā.

**Sallakkheti** ayaṃ brāhmaṇo. **Sesā** paccayā **niddosā** te ārabba kathāya appavattitattā. **Kukkucavūpasantanti** aggīāhitapadassa viya saddasiddhi veditabbā. **Annena pānenāti** lakkhaṇavacanametāṃ yathā “kākehi sappi rakkhitabba”nti. Tenāha “**desanāmattameta**”nti. **Bahusassaphaladāyakaṃ sukhettaṃ viya paṭiyattanti** sammā kasanabījanaudakānayanāpanayanādīnā susajjitaṃ khettaṃ viya sīlādiguṇavisesasampādanena paṭiyattaṃ puññakkhettaṃ etaṃ.

Aggikasuttavaṇṇanā niṭṭhitā.

## 9. Sundarikasuttavaṇṇanā

**195. Ānetvā** huntabbato **āhuti**. Sappimadhupāyasādīhi aggaṃ juhōti etthāti **aggihuttaṃ**, sādhiṭṭhānaṃ veditabbaṃ. Tenāha “**agyāyatana**”ntiādi. **Suvisodhito cassāti** nihīnājātikānaṃ anena suṭṭhu visodhito ca bhavyeyya. “Me”ti padaṃ ānetvā sambandho.

**Aphalaṃ karōtīti** ito paṭṭhāya yāva **demīti** padaṃ. Tāva anantarasuttavaṇṇanāya

āgatasadisamevāti peyyālavasena t̥hapesi, na sappisañkhāratt̥hapanam. **Himapatassa ca sītavātassa ca paṭibāhanatt̥hanti** akāraṇametanti taṃ anādiyitvā aññameva sukāraṇam dassetuṃ “**paṭibalovā**”tiādi vuttaṃ. **Sañjānitvāti** “nāyam brahmano”ti sañjānitvā.

**Nīcakesantanti** rassakesantaṃ. Brāhmaṇānaṃ suddhiatthā sikhāti āha “**pavattamattampi, sikham adisvā**”ti, “paramahaṃsaparikkhādīnā”ti keci.

**Akāraṇam dakkhiṇeyyabhāvassa jāti** adakkhiṇeyyabhāvahetūnaṃ pāpadhammānaṃ apaṭikkhepabhāvato. **Etanti** sīlādibhedam caraṇam. **Dakkhiṇeyyabhāvassa kāraṇam** adakkhiṇeyyabhāvakārapāpadhammānaṃ tadanāgādivasena pajahanato. **Assāti** brāhmaṇassa. **Tamatthanti** taṃ dakkhiṇeyyabhāvassa kāraṇatāsañkhātamattham upamāya vibhāvento. **Sālādikaṭṭhā jātovāti** sālādivisuddhakaṭṭhā jāto. Sāpānadoṇiādivisuddhakaṭṭhā jāto aggikiccaṃ na ca na karoti. **Evanti** yathā aggi yato kutoci jātopi aggikiccaṃ karotiyeva, evam caṇḍalakulādīsu jātopi dakkhiṇeyyo na na hoti guṇasampadāvasena ariyānaṃ vaṃse pajātattāti āha “**guṇasampattiyā jātimā**”ti. Dhitiyā guṇasampattiyā pamukhabhāvaṃ dassetuṃ “**so hī**”tiādi vuttaṃ. Tattha **dhitiyāti** vīriyena. Tañhi anuppanānaṃ kusalahammānaṃ uppādanaparibrūhanehi te dhāreti. **Hiriyā dose nisedheti**, sammadeva pāpānaṃ jigucchane sati tesam pavattiyā avasaro eva natthi. **Monadhammena** ñānañāsañkhātena ottappadhammena. **Kāraṇākāraṇajānanakoti** tesam tesam dhammānaṃ yathābhūtaṃ t̥hānaṃ, pāpadhammānaṃ vā vippakārasabhāvatt̥hānaṃ jānanako.

**Paramatthasaccena** nibbānena ārammaṇapaccayabhūtena ariyamaggena **danto**. **Indriyadamenāti** tato eva ariyena indriyasamvarena upagato. Vidanti tehi saccānīti **vedā**. **Maggavedānaṃ antanti** ariyaphalaṃ. **Kilesānaṃ antanti** tesam anuppādanirodhatt̥hānaṃ. **Yaññoti** aggaphalaṃ. **Niratthakanti** aphaḷam tesam anāgamanato, āgatānampi aggadakkhiṇeyyābhāvato. **Juhati** deti.

**Suyiṭṭhanti** sudānaṃ aggadakkhiṇeyyālābhena. **Suhutanti** tasseva vevacanaṃ. Atha vā **suyiṭṭhanti** sutṭhu sammadeva yiṭṭhaṃ sāre upanītaṃ mama idaṃ deyyavattu. **Suhutanti** etthāpi eseva nayo.

**Upahaṭamatteti** brāhmaṇena “bhuñjatu bhava”nti upanītamatte. **Nibbattitojamevāti** savatthukaṃ aggahetvā vatthuto vivecitaojameva. **Tena taṃ sukhumattaṃ gatanti** taṃ habysesam sabbaso sukhumabhāvaṃ gatanti ojāya oḷārikatāya purimākāreneva paññāyamānataṃ sandhāya vuttaṃ, na pana ojāya eva kevalāya gahaṇam sandhāya. Sā hi avinibbhogavuttitāya viṣuṃ gaṇhituṃ na sakkā, tasmā devatāhipi savatthukā gayhati. **Manussānaṃ vatthūti** karajakāyamāha. Oḷārikavatthutāya devānaṃ viya gahaṇī na tikkhāti dibbojasammissatāya sammā pariṇāmaṃ na gacchati. Sukhumāpi samānā dibbojā tena pāyasena missitā oḷārikasammissatāya sukhumavatthukānaṃ devānaṃ sukhadā na hotīti imamattam dasseti “**goyūse panā**”tiādīnā. Paribhogavatthuno oḷārikatāya vā devānaṃ dukkaraṃ sammā pariṇāmetuṃ, dibbojāya garutarabhāvena manussānaṃ. Tenāha bhagavā “**na khvāha**”ntiādi. Samāpatticittasamuṭṭhitā tejodhātu jhānānubhāvasantejitā tikkhatarā hotīti vuttaṃ “**aṭṭha...pe... pariṇāmeyyā**”ti. Bhagavato pana suddheneva pariṇamatīti vuttaṃ “**pākatikenevā**”ti, jhānānubhāvappattena jhānena vinā sabhāvasiddheneva.

“Appaharite”ti ettha appa-saddo “appiccho”tiādīsu viya abhāvatthoti āha “**appaharitehi aharite**”ti. **Pātisatepi** pāyase. **Na āluḷatīti** na āvilam hoti. **Anāgantāva gaccheyya** “attanāpi na paribhuñji, aññesaṃ na dāpesi, kevalam pāyasaṃ nāsesī”ti domanassappatto.

**Dāru samādahānoti** dāruhariddi dārusmiṃ tassa dahanto. **Yadītiādi** dārujhāpanassa bahiddhabhāvasādhanam asuddhahetūnaṃ paṭipakkhābhāvato tassa. **Khandhādīsu kusalāti** tesu sabhāvato samudayato atthaṅgamato assādato ādīnavato nissaraṇato jānanato chekā paṇḍitā. **Ñāṇajotinti** ñāṇamayam jotim. **Jālemīti** pajjalitam karomi. **Niccaṃ pajjalitaggi** sabbatthakameva vigatasammohandhakāratāya ekobhāsabhāvato. Sabbaso vikkhepabhāvato **niccasamāhitatto**. **Evam vadatīti** caritam brahmacariyam gahetvā carāmīti evam vattamānaṃ viya vadati āsannataṃ hadaye

ṭhapetvā.

**Khāribhāroti** khāribhārasadiso. Tenāha “**yathā**”tiādi. **Khandhena vayhamānoti** kāje pakkhipitvā khandhena vayhamāno. **Pathaviyā saddhiṃ phuseti** bhārassa garukabhāvena kājassa pariṇamanena. Mānena attano jātiādīni paggaṇhato aññassa tāni na sahatīti āha – “**tattha tattha issaṃ uppādentō**”ti, tattha tattha jātiādīmānavatthusmiṃ garutaraggahaṇena saṃsīdeyyāti adhippāyo. **Kodho dhūmoti** yathāpi bhāsure aggi dhūmena upakkiliṭṭho, evaṃ kodhena upakkiliṭṭho. **Ñāṇaggīti** tassa kodho dhūmo. Musāvādo **mosavajjaṃ**. Yathā ñāṇe sati musāvādo natthi, evaṃ musāvāde sati ñāṇampīti tena taṃ nirodhitam viya hotīti āha – “**musāvādena paṭicchannaṃ ñāṇa**”nti. Yathā sujāya vinā brāhmaṇānaṃ yāgo na ijjhati, evaṃ pahūtajivhāya vinā satthu dhammayāgo na ijjhatīti jivhā sujāpariyāyā vuttā. Joti ṭhiyati etthāti **jotiṭṭhānaṃ** vedi, yaṃ aggikuṇḍaṃ. **Sattānaṃ hadayaṃ jotiṭṭhānaṃ** ñāṇaggino tattha samujjālanato. **Attāti cittaṃ** “āhito ahaṃ māno etthā”ti katvā.

**Dhammo rahadoti** assaddhiyādiālasiyābhāvato kilesamalapakkhālanato paramagginibbutāvahanato ariyamaggadhammo anāvilo rahado. **Heṭṭhupariyavālukāti** viparivattitavālukā hutvā. **Āluḷāti** ākulajātā. **Paṇḍitānaṃ pasatthoti** paṇḍitānaṃ purato seṭṭho. Seṭṭhabhāvena santo pāsaṃso hutvā kilese bhindati samucchindaṭṭi sabbhīti vuccati. Tenāha “**uttamaṭṭhena**”ti. Tathā cāha bhagavā “**maggānaṭṭhaṅgiko seṭṭho**”ti (dha. pa. 273).

**Vacīsaccanti** iminā “caturaṅgasamānāgatā vācā suparisuddhā hotī”ti sammāvācaṃ dasseti. Saccasaṃyamapadehi dassitā maggadhammā idha “dhammo”ti adhippetāti āha – “**dhammoti iminā... pe... dasseti**”ti. **Maggasaccaṃ gahitaṃ** anantaragāthāya anekehi visesetvā vuttattā. **Atthatotī** pubbaṅgamattādiatthato. Tāya hi sakiccaṃ karontiyā itare sabbepi tadanuvattikā honti. **Taggatikkattāti** sammādiṭṭhiyā upakārahābhāvena tāya samānagatikattā. Ārammaṇaṅhi vitakkenāhaṭaṃ paññā vicinituṃ sakkoti. Tathā hi so paññākkhandhena saṅghaṃ gato. **Dhammoti** sabhāvato samādhi gahito, itare dve tadupakāratā. Tathā hi “evaṃdhammā te bhagavanto”tiādīsu (dī. ni. 2.13; ma. ni. 3.197; saṃ. ni. 5.378) samādhi “dhammo”ti vutto. **Paramatthasaccaṃ gahitaṃ** sabbesaṃ seṭṭhabhāvato. Yathāha – “yāvātā, bhikkhave, dhammā saṅkhatā vā asaṅkhatā vā, virāgo tesam aggamaṅkhaṃyati”ti (itivu. 90; a. ni. 4.34). **Atthatotī** tato eva paramatthato, anantaraṃ vuccamānānaṃ vā maggadhammānaṃ ārammaṇabhāvato. **Pañcaṅgāni gahitāni** tāsam maggabhāvato. **Tīṇi** aṅgāni. **Brahmacariyaṃ nāmāti** etaṃ nibbānagāmi uttamaṭṭhena maggabrahmacariyaṃ nāma. **Majjhe sitāti** līnuddhaccādiāntadvayavivajjanena majjhe majjhimapaṭipadābhāvanam nissitā. Sassaṭṭhacchedaggahaṇam hettha padhānatāya nidassanamattaṃ. **Seṭṭhappattīti** seṭṭhabhāvappatti. **Ta-kāro padasandhikaroti** “sa ujjubhūtesū”ti vattabbe majjhe ta-kāro padasandhikaro, “**sa dujjubhūtesūti** keci paṭhanti, tesam da-kāro padasandhikaro. Sa-iti sundariko brāhmaṇo vuttoti katvā āha “**sa tva**”nti, so tvanti attho. Dhammo sārīyo paridhānabhūtā alaṅkāra etassāti **dhammasārī**. Atha vā dhammehi sārītavāti **dhammasārī**, tehi sārītvā ṭhitavāti attho. Tenāha “**kusaladhammehi**”tiādi.

Sundarikasuttavaṇṇanā niṭṭhitā.

## 10. Bahudhītarasuttavaṇṇanā

**196. Samantatoti** dakkhiṇavāmānaṃ vasena samantato. **Ūrubaddhāsananti** ūrūnaṃ bandhanavasena nisajjanaṃ. Dvinnaṃ ūrūnaṃ aññamaññabandhanavasena ābhujitākāraṃ sandhāyāha “**ābhujitvāti bandhitvā**”ti. Heṭṭhimakāyassa anujukaṃ ṭhapanam nisajjāvācaneneva bodhitanti “ujum kāya”nti ettha kāya-saddo uparimakāyavisayoti āha “**uparimaṃ sarīraṃ ujukaṃ ṭhapetvā**”ti. Taṃ pana ujukaṭṭhapanam sarūpato payoṇato ca dassetuṃ “**aṭṭhārasā**”tiādi vuttam. **Parimukhanti** ettha **pari**-saddo abhisaddena samānatthoti āha “**kammaṭṭhānābhimukha**”nti, bahiddhā puthuttārammaṇato nivāretvā kammaṭṭhānaṃyeva purekkhatoti attho. **Pariggahaṭṭho** “pariṇāyikā”tiādīsu viya. **Mukhanti niyyānaṭṭho** “suññatavimokkhamukha”ntiādīsu viya. Paṭipakkhato niggamanatṭho hi niyyānatṭho, tasmā **pariggahitaniyyānanti** sabbathā gahitasammaṃ pariccattasammaṃ **satim katvā** paramam

satinepakkam upaṭṭhapetvāti attho. **Chabbañṇā...pe... nisīdi** brāhmaṇassa pasādasañjānanattham. **Aṭavamukhā caramānāti** gocaram gaṇhantā.

**Ajjasatṭhinti** ajja channaṃ pūraṇī satṭhī divasavutti, ajja ādiṃ katvā cha divaseti attho. Accantasamyoge cetam upayogavacanaṃ. **Ajja chadivasamattakāti** ajjato chaṭṭhadivasamattakā. **Lāmakāti** nihīnā nipphalā. Tenāha “**tilakhāṇukā**”tiādi.

**Ussāhenāti** uddham uddham pasārena abhibhavanena. Tam pana nesam abhibhavanaṃ dassetuṃ “**kaṇṇanaṅguṭṭhādīnī**”tiādimāha.

“**Uppātakapāṇakā**”ti tacam uppātetvā viya khādakapāṇakā ūkāmaṅgulādayo.

**Kaḷārapiṅgalāti** nikkhantapiṅgalakkhikā, **kaḷārapiṅgalāti** vā rattagattā ca piṅgalacakkhukā ca. **Tilakāhatāti** āhatatilakā, tilappamaṇehi bindūhi samantato santhatarā.

**Paṭigāthāhi brāhmaṇassa dhammadesanaṃ vaḍḍhesīti** pakatiyā tassa attanā kathetabbaṃ dhammadesanaṃ pabbajjāguṇakittanavasena sattahi vaḍḍhesi. **Pabbajitvāti** iṇāyikānaṃ attano palibodham tathā tathā jānāpetvā pabbajitvā.

Yathā ca tattha bhagavā paṭipajji, tam dassetuṃ “**puna divase**”tiādi vuttaṃ.

**Tam tam kulagharam pesetvāti** tam tam tassa brāhmaṇassa dhītaṃ tassa tassānucchavikassa brāhmaṇassa dento tam tam kulagharam pesetvā brāhmaṇadhamme garukaraṇābhāvato.

“Naṭṭhe mate pabbajite, napuṃsakepi bhattari;  
Itthiyā patiseṭṭhāya, na añño pati icchiyo”ti. –

Ayañhi brāhmaṇadhammo. **Ayyikaṭṭhāneti** mātāmahiṭṭhāne ṭhapesi satthu cittārādhanaṃ.

Bahudhītarasuttavaṇṇanā niṭṭhitā.

Paṭhamavaggavaṇṇanā niṭṭhitā.

## 2. Upāsakavaggo

### 1. Kasibhāradvājasuttavaṇṇanā

197. **Dakkhiṇāgirisminti** dakkhiṇāgiriṇapade, tasmim dakkhiṇāgiriṇapade dakkhiṇāgirivihāre. **Khandhesu ṭhapetvā yuge yottehīti** yottarajjūhi yuttāni payojitāni icceva attho.

**Paṭhamadivaseti** vapanadivasesu paṭhamadivase āradhadivase. Pañcaṅgānīpi paripuṇṇāni, pageva itaraṅgānīti dassetuṃ “**paripuṇṇapañcaṅgā**”icceva vuttaṃ. Haritālamanosilāañjanehi uratthanādīsū ṭhapitattā ābhāya ujjalagattā. **Avasesā** balībaddā. Kilantagoṇaṃ mocetvā akilantassa yojanaṃ **kilantaparivattanaṃ**.

**Sīhakuṇḍalānīti** sīhamukhakuṇḍalāni. **Brahmaveṭṭhananti** brahmuno veṭṭhanasadiṣaṃ, assanakhaveṭṭhanasadisanti attho.

Buddhānaṃ kiccāni kālavasena vibhattāni **pañca kiccāni bhavanti**. **Purebhattakiccanti** bhattato pubbe buddhena kātabbakiccaṃ. **Vītināmetvāti** phalasaṃpattiyā kālaṃ vītināmetvā. **Kadāci ekotiādi**

tesaṃ tesaṃ vineyyānaṃ vinayanānurūpapaṭipattidassanaṃ. **Pakatiyāti** pakatibuddhavesena. Buddhānaṃ hi rūpakāyassa asītianubyañjanapaṭimaṇḍita-bāttimsamahāpurisa- lakkhaṇa-kāyappabhābyāmapabhā-ketumālāvicittatā buddhaveso. **Kadāci anekehi pāṭihāriyehi vattamānehīti** iminā pāramānaṃ nissandabhūtāni pāṭihāriyāni rucivaseneva pakāsanakāni bhavanti, na sabbadāti dasseti. Evañca katvā “**indakhīlassa anto ṭhapitamatte dakkhiṇapāde**”tiādivacanaṃ samatthitaṃ hoti. Bhagavato kāye pītarasmīnaṃ yebhuyyatāya “**suvanṇarasasiñcanāni viyā**”ti vatvā kāyamhi nīlādirasmīhi tahaṃ tahaṃ pītamissitaṃ sandhāya “**vicitrapaṭaparikkhittāni viya cā**”ti vuttaṃ. **Madhurenākārena saddaṃ karonti** tuṭṭharavaravanato.

**Tatthāti** vihāre. **Gandhamaṇḍalamāleti** hatthena kataparibhaṇḍe samosaritagandhapupphadāme maṇḍalamāle.

**Upaṭṭhāneti** pamukhe. “**Ovadati**”ti vatvā tatthovādaṃ sāmāññato dassetuṃ, “**bhikkhave**”tiādi vuttaṃ. **Sampattīti** cakkhādiindriyapāripūri ceva hatthādisampadā ca. **Samassāsita kāyo** kilamathavinodanena. “Tañca kho samāpajjanenā”ti vadanti. **Dutiyabhāgeti** iminā aparabhāgaṃ tayo bhāge katvā tattha purimabhāgaṃ seyyanisajjāvasena samāpattīhi vītināmetīti dasseti. **Lokanti** rājagahādīsu yaṃ tadā upanissāya viharati, tattha aññattha vā bujjanakaṃ vineyyasattalokaṃ buddhacakkhunā voloketi. **Kālayuttanti** tesaṃ indriyaparipākakālānurūpaṃ. **Samayayuttanti** tasseva vevacanaṃ. **Samayayuttanti** vā tehi ājānitabbavisesapaṭilābhānurūpaṃ.

**Paṭisallīnoti** kālaparicchedaṃ katvā samāpattiṃ samāpanno. **Adhippāyaṃ sampādentō** taṃ avirādhento, ajjhāsayanurūpanti attho.

**Sakala...pe... devatāyoti** ettha lokadhātusākalyaṃ daṭṭhabbaṃ, na devatāsākalyaṃ. Na hi mahāsamaye viya sabbadā majjhimayāme dasasahassacakkavāle sabbattha sabbā devatā satthu samīpaṃ upagacchanti. **Kilāsubhāvo** kilamatho.

**Vihāracīvaraparivattanavasenāti** vihāre nivatthanivāsanaparivattanavasena. **Ādiyitvāti** pārupanavasena gahetvā. Tenāha “**dhāretvā**”ti. **Bhikkhācāranti** bhikkhatthaṃ caritabbatṭhānaṃ.

**Atirocamānanti** taṃ taṃ atikkamitvā samantato sabbadisāsu virocamaṇaṃ. **Sarīrappabhanti** attano sarīrappabhaṃ. **Jaṅgamaṃ viya padumasaranti** ratanamayakiñjakkhaṃ rajatamayakaṇṇikaṃ samantato samphullitakañcanapadumaṃ sañcārimasaraṃ viya. **Gaganatalanti** abbhamaḥikādiupakkilesavigamena suvisuddhaākāsatalaṃ viya. Tampi hi tārāgaṇakiraṇājālasamujjalatāya samantato virocanti. **Kanakasikharanti** kanakagirisikharaṃ. **Siriyā jalamānanti** sabbaso anavajjāya sabbākārena paripuṇṇakāyatāya anaññasādhāraṇāya rūpakāyasiriyā samujjalaṃ, yassā rucirabhāvo viddhe vigatavalāhake puṇṇamāsiyaṃ paripuṇṇakalamanomaṇḍalaṃ candamaṇḍalaṃ atirocati, pabhassarabhāvo sahasaraṃsikiraṇatejojālasamujjalaṃ sūriyamaṇḍalaṃ abhibhavati, hemasaṃujjalabhāvo tadubhaye abhibhuya pavattamānaṃ ekakkhaṇe dasasahassilokadhātuvijjotanasamattha-mahābrahmuno pabhāsamudayaṃ abhivihacca bhāsati tapati virocanti.

**Samantapāsādiketi** samantato pasādāvahe. Tañca kho sabbaso saritabbatāyāti āha “**pasādāniye**”ti. **Uttamadamaṭṭhasamathamanuppatteti** kāyavācāhi anuttaraṃ dantabhāvañceva anuttaraṃ cittavūpasamañca sampatte. **Appasādenāti** pasādābhāvena, pasādapaṭikkhepena vā assaddhiyena. **Ubhayathāpi notī** appasādo macchariyanti ubhayathāpi no eva, atha kho anattamanatāya upārambhādhippāyena apasādentō, bhagavato mukhato kiñci desetukāmo vā evamāha. Tattha kāraṇaṃ dassento “**bhagavato panā**”tiādimāha. **Atittanti** tittim āgacchantaṃ. **Kammabhaṅganti** kammahāniṃ.

**Tikkhapañño esa brāhmaṇo**, tathā hi na cirasseva arahattaṃ sacchikarissati. **Kathāpavattanatthampi evamāha** – “evaṃ ahaṃ imassa kañci dhammaṃ sotuṃ labhissāmī”ti.

**Veneyyavasenā**ti attano kasanakāribhāvakkittanamukhena vinetabbapuggalavasena.

**Oḷārikānī**ti pākatikāni. “Esa uttamadakkhiṇeyyo”ti **sañjātabahumāno**. Pāliyaṃ “**yugaṃ vā naṅgalaṃ vā**”ti vā-saddo avuttavikappattho. Tena bījādiṃ saṅgaṇhāti, tasmā bījaṃ vā īsaṃ vā pariggahayottāni vāti ayamattho dassito hoti. Tathā hi bhagavā brāhmaṇassa paṭivacanaṃ dento “**saddhā bīja**”ntiādimāha. **Pubbadhammasabhāgatāyā**ti paṭhamam gahitadhammasabhāgatāya. Yaṃ panettha vattabbaṃ, taṃ aṭṭhakathāruḷhameva gahetabbañca saddato atthāpattito vā idha daṭṭhabbaṃ. **Buddhānaṃ ānubhāvo** ayaṃ, yadidaṃ pasaṅgāgatadhammamukhena desanaṃ ārabhitvā veneyyavinayanaṃ.

**Ananusandhikā**ti pucchānusandhivasena ananusandhikā. **Evanti** idāni vuccamānākārena. **Etthā**ti etissā desanāya. **Soti** bhagavā. **Tassā**ti brāhmaṇassa. **Anukampāyā**ti asabbaññū hi satipi anukampāya pucchitamatte tiṭṭheyya, tathā jānantopi ananukampako, bhagavā pana ubhayadhammapāripūriyā “idaṃ apucchita”nti aparihāpetvā katheti. **Samūlantiā**dinā saṅkhepena vuttamattham vivaranto “**tatthā**”tiādimāha. Tattha bījassa kasiyā mūlabhāvo nānantariyato tappamāṇavidhānato cāti āha “**tasmim...pe... kattabbato**”ti. Tena anvayato byatirekato ca bījassa kasiyā mūlabhāvaṃ vibhāveti. **Kusalā**ti iminā akusalā tato aññathāpi karonti, taṃ pana appamāṇanti dasseti.

**Tassā**ti brāhmaṇassa bījaṭṭhāniyassa dhammassa ca **upakārabhāvato**. **Dhammasambandhasamatthabhāvato**ti tathā vuttadhammassa phalena sambandhituṃ yojetuṃ samatthabhāvato. **Tapo vuṭṭhī**ti vuttavacanaṃ sandhāya vuttaṃ. Saṅkhepato vuttamattham pākaṭam kātuṃ “**ayaṃ hī**”tiādi vuttaṃ. Kassakassa upakārassa bījassa anantaraṃ vuṭṭhi vuccamānā aṭṭhāne vuttā nāma na hoti. Kasmā? Bījassa vappakāle anurūpāya vuṭṭhiyā icchitabbato, tasmā avasāne majjhe vā vuccamānāya dhammasambandhasamatthataṭṭhā tassā vibhāvītā na siyā. **Attano avisayeti** jhānādiuttarimanussadhamme. **Pacchāpī**ti kasisambhārakathanato pacchāpi. **Vattabboti** ekantena vattabbo. **Tadanantaramyevā**ti bījanantaramyeva. **Vuccamānā** vuṭṭhi **samatthā hoti**, bījassa phalena sambandhane samatthāti dīpītā hoti anantaravacaneneva tassā āsannaupakāratadīpanato.

**Sampasādalakkhaṇā**ti pasīditabbe vatthusmiṃ sammadeva pasīdanalakkhaṇā. **Okappanalakkhaṇā**ti saddheyyavatthuno evametanti pakkhandanalakkhaṇā. **Mūlabījantiā**dīsu mūlameva bījaṃ mūlabījaṃ. Esa nayo sesesupi bījagāmassa adhippetattā. Bhūtagāmo pana mūlam bījaṃ etassāti mūlabījantiādinā veditabbo. **Bījabījanti** pañcamaṃ pana paccayantarasaṃvāyē sadisaphaluppattiyā visesakāraṇabhāvato virūhanasamatthe sārāphale niruḷho bījasaddo tadatthasiddhiyā mūlādīsupi kesuci pavattatīti tato nivattanattham ekena bīja-saddena visesetvā vuttaṃ “**bījabīja**”nti “**dukkhadukkham rūparūpa**”nti ca yathā. Evampi iminā atthena imassapi nippariyāyova bījabhāvoti dassento āha “**taṃ sabbampi...pe... gacchatī**”ti.

Idāni kathañci vattabbe saddhāya opammatte bīje saddhāya bījabhāvaṃ vibhāvetuṃ “**tattha yathā**”tiādi āradham. Kāmaṃ saddhūpanisaṃ sīlam, tathāpi samādhissa viya sabbesampi anavajjadhammānaṃ ādimūlabhāvato saddhāyapi paṭiṭṭhā hotīti āha “**heṭṭhā sīlamūlena paṭiṭṭhā**”ti. Yasmā sabbasseva puggalassa saddhāvasena samathavipassanārambho, tasmā sā “**upari samathavipassanaṅkuraṃ uṭṭhāpeti**”ti vuttā. **Tanti** dhaññābījaṃ. **Pathaviraṣaṃ āporasanti** sasambhārapathavīpesu labbhamānaṃ rasaṃ. **Gahetvā**ti paccayaparamparāya gahetvā. **Dhaññaparipākagahaṇatthanti** dhaññaparipākanibbattiattam. **Rasanti** saddhāsīlamūlahetusamathavipassanābhāvanārasaṃ ādiyivā. **Ariyamagganā**lenāti ariyamaggasotena **ariyaphaladhaññaparipākagahaṇatthanti** ariyaphalameva dhanāyitabbato dhaññaṃ tassa nibbattiattam. Dhaññanāḷaṃ nāma kaṇḍassa nissayabhūto pacchimadeso, **kaṇḍo** tabbhantaro taṃnissayoyeva daṇḍo. **Pasavo** nāma pupphaṃ. **Vuddhinti** avayavapāripūrivāsena vuddhiṃ. **Virūḷhinti** mūlasantānadalhatāya virūḷhatam. **Vepullanti** pattanāḷādīhi vipulabhāvaṃ. **Khīraṃ janetvā**ti taruṇasalāṭukabhāvappattiyā taṇḍulassa bījassa bījabhūtam khīraṃ uppādetvā. **Esā**ti saddhā. **Paṭiṭṭhahitvā**ti kammāpathākammāpathasammādiṭṭhisahitena ādito pavattasīlamattena paṭiṭṭhahitvā.

**Vuddhintiādīsu** suparisuddhāhi sīlacittavisuddhīhi vuddhiṃ, diṭṭhikañkhāvitaraṇavisuddhīhi **virūlhiṃ**. Maggāmaggaṭṭipadāññānadassanavisuddhīhi **vepullaṃ** patvā.

**Ñānadassanavisuddhikhīraṇti** sādurasasuvisuddhibhāvato ñānadassanavisuddhisankhātāṃ khīraṃ janetvā. **Aneka...pe... phalanti** anekapaṭisambhidā-anekābhīññānaparipuṇṇaṃ arahattaphalāsīsaṃ nipphādeti.

**Bījakiccakaraṇatoti** bījakicassa karaṇato. Yañhi taṃsadisassa visadisassa ca attano phalassa paṭiṭṭhāpanasambandhananippadhādanasañkhātāṃ bījassa kiccaṃ, tassa karaṇato nibbattanato “**evaṃ saddhā bījakicca**”nti vuttaṃ. Iminā anaññasādhāraṇaṃ saddhāya kusaladhammānaṃ bījabhāvaṃ dasseti. **Sā cātiādīnā** tamevatthaṃ samattheti. Idāni tattha āgamaṃ dassento “**saddhājāto**”tiādīmāha. Tena yathā sappurisūpanissayassa saddhammassavanassa ca, evaṃ anavasesāya sammāpaṭipattiyā saddhā mūlakāraṇanti dasseti.

Indriyasamvaro vīriyañca akusaladhamme, dukkarakārikā dhutaṅgañca akusaladhamme ceva kāyañca tapati vibādhatīti **tapoti** vuccati. **Indriyasamvaro adhippeto** vīriyassa dhorayhabhāvena gayhamānattā, itaresaṃ vuṭṭhibhāvassa anuyujjānattā. Ādi-saddena kalalaṅgāravuṭṭhiādīnaṃ saṅgaho. **Samanuggahitanti** upagataṃ. Viruhanāmilāyananippattivacanehi dhaññabījasantānassa viya tesam vuddhiyā saddhābījasantānassa tapovuṭṭhiyā ādimajjhapariyosānesu upakārataṃ dasseti.

**Purimapadesupīti api**-saddena parapadesupīti attho daṭṭhabbo “hirī me īsā, mano me yotta”nti icchitattā, “sati me”ti ettha me-saddo ānetvā yojetabbo. **Udakampi tāva dātappaṃ hoti** nadītaḷākādito ānetvā. **Vīriyabalībadde** catubbidhe yojetvā. **Niccakālaṃ** atthīti vacanaseso.

**Saha vipassanāya maggaṭṭipadāññā adhippetā** amatapphalāya kasiyā adhippetattā. **Vipassanā paññā cāti** duvidhāpi paññā upanissayā hoti viṭṭhabhāvato. Tenāha “**yathā hī**”tiādī. **Paññāti** pakārehi jānātīti paññā. Paññavatāṃ paññā purato hoti yonisomanasikārassa visesapaccayabhāvato, sahaṅgādhīpatīsu ca ukkaṭṭhabhāvato. **Sīrīti** sobhaggaṃ. **Sataṃ dhammā** saddhādayo, **anvāyikāti** anugāmino. **Īsābaddhā hotīti** hirisañkhātāsāya baddhā hoti, paññāya kadāci appayogato manosīsenā samādhi idha vuttoti āha “**manosāñkhātassa samādhiyottassā**”ti. **Samaṃ** upanetvā bandhitvā baddharajjukattā **samādhiyottaṃ**. **Ekato gamananti** līnaccāraddhasañkhātāṃ ekapassato gamanaṃ vāreti. Majjhīmāya vipassanāvīthiyā paṭipādanato kāyādīsu subhasukhaniccattabhāvavīgamane paññāya visesapaccayā satīti vuttaṃ – “**satiyuttā paññā**”ti tassā sativippayogāsabbhāvato. Santatighanādīnaṃ ayaṃ viseso – purimapacchimānaṃ dhammānaṃ nīrantaratāya ekībhūtānaṃ viya pavatti **santatighanattā**, ekasamūhavasena ekībhūtānamiva pavatti **samūhaghanattā**, dubbīññeyyakiccabhedavasena ekībhūtānamiva pavatti. **Kiccaghanattā**, ekārammaṇavasena ekībhūtānamiva pavatti **ārammaṇaghanattā**. Sabbesaṃ, sabbāni vā kilesānaṃ mūlasantānakāni **sabba...pe... santānakāni**. Anuppayogo hi attho. **Padāletīti** bhindati samucchindati. **Sā ca kho** “padāletī”ti vuttā **lokuttarāva** paññā anusayappahānassa adhippetattā. Santatighanādībhedanā pana lokiyāpi hoti vipassanāvasena ghanavinibbhogassa nipphādanato. Tenāha “**itarā pana lokikāpi siyā**”ti.

**Hirīyatīti** lajjati, jigucchati attho. Tasmā “**pāpakehi dhammehī**”ti nissakkavacanaṃ daṭṭhabbaṃ, hetumhi vā karaṇavacanaṃ. **Ottappampi gahitameva**, na hi lajjanaṃ nibbhayaṃ pāpabhayaṃ vā alajjanaṃ atthīti. **Rukkhalatṭhīti** rukkhadaṇḍo. Tena padesena kasanato visesato naṅgalanti vuccatīti āha “**īsā yuganaṅgalaṃ dhāretī**”ti. Kāmaṃ paññārahitā hirī atthi, hirirahitā pana paññā natthevāti āha “**hiri...pe... abhāvato**”ti. Sandhiṭṭhāne kampanābhāvato **acalaṃ**. Thirabhāvena **asithilaṃ**. Hiripaṭibaddhapaññā paṭipakkhavasena ca asithilabhāvena ca **acalā asithilāti** āha “**abbokīṇṇā ahirikenā**”ti. Nāḷiyā minamānapuriso viya ārammaṇaṃ munāti paricchedato jānātīti **mano**. **Manosīsenāti** manaso apadesena. **Taṃsampayuttoti** iminā kuntasahacaraṇato puriso kunto viya manasahacaraṇasamādhi “mano”ti vuttoti dasseti. **Sārathināti** kassakena. So hi idha balībaddānaṃ sārāṇato pācanato “sārathī”ti adhippeto. **Ekābandhananti** ekābaddhakaraṇaṃ. **Sakakicceti** sakakiccena yutte. Tena hi īsādīsu yathārahaṃ bandhitvā ekābaddhesu katesu naṅgalesu kiccaṃ ijjhati,



no aññathāti taṃ “**sakakicce paṭipādeti**”ti vuttaṃ. **Avikkhepasabhāvenā**ti attano avikkhepasabhāvena. **Bandhitvā**ti sahañātādipaccayabhāvena attanā sambandhitvā. **Sakakicce**ti hirādāhi yathāsakaṃ kattabbe kicce.

**Cirakatādimatthanti** cirabhāsitaṃpi atthaṃ. **Sarati** anussarati kāyādiṃ asubhādito nijjhāyati. **Phāletī**ti padāleti. Pājenti gamentīti taṃ **pājanam**. **Idha** imasmim̐ sutte “**pācana**”nti vuttaṃ ja-kārassa ca-kāraṃ katvā. **Phālapācananti** imamatthaṃ dassetuṃ “**yathā hi brāhmaṇa...pe... satī**”ti vuttaṃ. Idāni tamatthaṃ vitthārato dassento “**tattha yathā**”tiādimāha. **Naṅgalaṃ anurakkhati** bhijjanaphālanato. **Purato cassa gacchatī**ti assa naṅgalassa kassane bhūmiyā vilikhane purato gacchati pubbaṅgamā hoti. **Gatīyoti** pavattiyo. **Samanvesamānā**ti saraṇavasena gavesamānā. **Ārammaṇe vā** kāyādiḥ **upaṭṭhāpayamānā** asubhādivasena **paññānaṅgalaṃ rakkhati**. Sabhāvāsabhāvūpagame phālo viya naṅgalassa “**ārakkhā**”ti **vuttā** “sabbānatthato satī rakkhatī”ti katvā. Tathā hesā ārakkhapaccupaṭṭhānā. Cirakatacirabhāsitaṃpi asammussanavasena satī paññānaṅgalassa purato hotīti vatvā tassa puratobhāvaṃ dassetuṃ “**sati...pe... no pamuṭṭhe**”ti āha. **Satiparicīti**ti satiyā paṭṭhāpīte. “Upaṭṭhāpīte”tipi pāṭho, ayamevattho. **Saṃsīdituṃ na detī**ti sakiccakiriyāya saṃsīdanam̐ kātuṃ na deti. Kosajjasankhātam̐ saṃsīdanam̐ **kosajjasamsīdanam̐**.

**Pātimokkhasamvarasīlam̐ vuttaṃ** kāyikavācasikasam̐yamassa kathitattā. **Āhāre udare yatoti** paribhuñjitabbāhāre sam̐yatabhāvadassanena paribhuñjitabbatāya catūsūpi paccayesu sam̐yatabhāvo dīpīti āha “**āhāramukhenā**”tiādi. Sam̐yatabhāvo cettha paccayahetu anesanābhāvoti vuttaṃ “**nirupakkilesoti attho**”ti. Bhojanasaddo āhāraparibhoge niruḥhoti katvā vuttaṃ “**bhojane mattaññutāmukhenā**”ti. Paribhuñjanaṭṭhena pana bhojanasaddamukhenāti vutte adhippetattho labbhateva. **Tenā**ti kāyaguttādivacanena. **Na vilumpantī**ti “**dīpeti**”ti padaṃ ānetvā sambandho.

**Dvīhākārehi**ti adīṭṭhādīnam̐ adīṭṭhādivasena dīṭṭhādīnañca dīṭṭhādivasenāti evaṃ dvīpakārehi. **Avisaṃvādanam̐** avitathakathanam̐. **Chedanam̐** mūlappadesaṃ nikantanam̐. **Lunanam̐** yattha katthaci chedanam̐. **Uppāṇanam̐** ummūlanam̐. **Asitenā**ti dattena, lāyitenāti attho. **Visaṃvādanasankhātānam̐ tiṇānam̐**, atṭhannaṃ anariyavohārānanti attho. **Yathābhūtaññānanti** nāma rūpaparicchedakaññānam̐. **Saccanti veditabbam̐** aviparītavuttikattā “**chedakam̐**” chindanakam̐. **Niddānanti** niddāyakam̐. Idameva saccam̐ moghamāññanti dīṭṭhi “**dīṭṭhisacca**”nti vuccatī. **Dvīsu vikappesū**ti bhāvakattusādhanavasena dvīsu vikappesu. “Niddāna”nti upayogavaseneva attho.

**Sīlameva “soracca”nti vuttaṃ** “pāñātipātādīhi suṭṭhu oratassa kamma”nti katvā. Saṅkhāradukkhādīnam̐ abhāvato sundarabhāvato sundare nibbāne ārammaṇakaraṇavasena ratattā surato, arahā. Tassa bhāvo **soraccam̐**, arahattam̐. **Appamocanameva** accantāya pamocanam̐ na hoti.

Yadaggena vipassanāya paññāya taṃsahagatavīriyassa ca naṅgaladhoraṃyatā, tathāpavattakusalabhāvanāya ca kasibhāvo ca, tadaggena tato puretaraṃ pavattapaññāvīriyapāramīnam̐ naṅgaladhoraṃyatā, tathāpavattakusalabhāvanāya ca kasibhāvo veditabboti dassento “**yathā hi**”tiādimāha. Dhuraṃ vahatīti **dhorayham̐**. **Yathāvuttaṃ ghananti** asmimānādibhedam̐ ghanam̐. Vahitabbā ādibhūtā dhurā etesaṃ atthīti dhurā, purimadhuravāhakā. Taṃmūlakā aparaṃ dhuraṃ vahantā dhoraṃyā. **Dhurā ca dhorayhā ca dhuradhoraṃyam̐** ekattavasena. **Vahantanti** kasanena pavattantam̐.

Kāmayogādīhi **yogehi khemattā** anupaddavattā. **Tam̐** nibbānam̐ **adhikicca** uddissa. **Vāhīyati** vipassanāya sahatam̐. **Abhimukham̐ vāhīyati** maggapariyāpanam̐. **Khettaḥkoṭinti** khettamariyādam̐. **Dīṭṭhekaṭṭheti** dīṭṭhiyā sahañātekaṭṭhe pahānekaṭṭhe ca. **Olāriketi** uparimaggavajjhe upādāya vuttaṃ, aññathā dassanapahātābbāpi dutiyamaggavajjhe olārikāti. **Aṇusahagateti** aṇubhūte. Idam̐ heṭṭhimamaggavajjhe upādāya vuttaṃ. **Sabbakilese** avasiṭṭhasabbakilese **pajahantam̐ anivattantam̐ gacchati** puna pahātābbatāya abhāvato. **Anivattantanti** na nivattantam̐, yathā nivattanam̐ na hoti, evaṃ gacchati attho. Tenāha “**nivattanarahita**”ntiādi. **Etam̐ pana** tava dhuradhoraṃyam̐.

**Evamesā kasīti** yathāvuttassa paccāmasanaṃ. Tenāha “**nigamaṇaṃ karonto**”ti. Vuttasseva hi atthassa puna vacanaṃ. **Paññānaṅgalena satiphālaṃ ākoṭetvāti** paññāsaṅkhātena naṅgalena saddhiṃ satiphālassa ekābaddhabhāvakaṛaṇena ākoṭetvā. **Kaṭṭhāti** ettha “kasī”ti padaṃ ānetvā sambandhitabbaṃ “kaṭṭhā kasī”ti. **Kammaṃpariyosānanti** yathāvuttakasikammassa pariyosānabhūtaṃ. Yadi pi pubbe “paññā me yuganaṅgala”ntiādinā attuddesikavasenaṃ amatapphalā kasi dassitā, mahākāruṇikassa pana bhagavato desanā sabbassapi sattanikāyassa sādharmaṇā evāti dassento “**sā kho panesā**”tiādimāha.

**Divaseyevāti** taṃdivase eva. **Ādimāhāti** ettha **ādi**-saddena kathāpariyosāne pāṭhapadeso gahitoti tadaññaṃ “evaṃ vutte”tiādi pāṭhaṃ sandhāya “**tato parañcā**”ti āha.

Kasibhāradvājasuttavaṇṇanā niṭṭhitā.

## 2. Udayasuttavaṇṇanā

**198. Etaṃ vuttanti** “odanena pūresi”ti etaṃ vacanaṃ vuttaṃ. “**Gahetuṃ samattho nāma nāhosīti** bhagavato adhiṭṭhānabalenā”ti vadanti. **Taṃ** brāhmaṇaṃ vinetukāmatāya kira bhagavā tathā akāsi.

**Upārambhabhayenāti** parūpavādabhayena. **Avatvāva nivatto** “abbhāgatopi pāsaṅgo vācāmatte nāpi na pūjetabbo”ti brāhmaṇadhamme vuttattā. **Pakkantoti** brāhmaṇassa dhammaṃ avatvā pakkanto brāhmaṇassa na tāva ñāṇaṃ paripakkanti. **Etaṃ vacanaṃ...pe... magamāsi** “punappunañceva vapanti bīja”ntiādinā dhammaṃ kathetuṃ avassaṃ ākaṅkhanto. Pakārato kassatīti **pakaṭṭhako**, rasataṅhāya pakaṭṭhoti attho. Tenāha “**rasagiddho**”ti.

“Punappunañceva vapanti bīja”nti imaṃ desanaṃ ārabhīti sambandho. **Bījanti** ca iti-saddo nidassanatto vā. Tena avayavena samudāyaṃ nidasseti. **Osakkasīti** saṅkocasi. **Vuttanti** vapanāṃ kataṃ. Tasmā vuttaṃ “**alamettāvata**”ti. “**Vassitvā**”ti vuṭṭhiṃ pavattetvā.

**Desanā...pe... dasseti** brāhmaṇena vuttaṃ ayuttavacanaṃ parivaṭṭentopi divase divase bhikkhācariyā nāma bhikkhūnaṃ kāyagatā vuttīti. Khīraṃ hatthena nayantīti vā **khīranikā**. **Kilamatīti** taṃtaṃkiccakaraṇavasena khijjati. **Phandaṭīti** anattasamāyogavasena vipphandati. **Apunabbhavāyāti** āyatiṃ anuppattiyā. **Maggo nāmāti** upāyo nāma nibbānaṃ, tasmim laddhe punabbhavābhāvato. “Punappuna”nti vacanaṃ upādāya bījavapanādayo punappunadhammā nāma jātāti āha “**soḷasa punappunadhamme desentenā**”ti.

Udayasuttavaṇṇanā niṭṭhitā.

## 3. Devahitasuttavaṇṇanā

**199. Udaravātehi**ti vātakatavijjhanatodanādivasena aparāparaṃ vattamānehi udaravātehi, tassa vā vikārehi. Nibaddhupaṭṭhākakāle pana dhammabhaṅḍāgārikova. **Araññanti** bhagavato bhikkhūnañca vasanaṭṭhānabhūtaṃ tapovanaṃ. Taṃ **niddhūmaṃ hoti** udakatāpanassapi akaraṇato. **Tasmāti** yasmā tassa uṇhodakavikkīṇanacariyāya jīvikāppanaṃ hoti, tasmā.

**Vattametam** tassa patikāratthaṃ parikathādīnampi kātuṃ labbhanato. Idāni tattha kāraṇampi savisaṃyamaṃ dassetuṃ “**vaṇṇaṃ hī**”tiādi vuttaṃ. Bhagavā hi āyasmato upavāṇassa devahitabrāhmaṇassa taṃ sambhāvitaṃ bhavissati tikicchāpaṭiyattaṃ, tāya ca attano rogassa vūpasamaṇaṃ, tappasaṅgena ca devahitabrāhmaṇo mama santikaṃ āgantvā dhammassavanena saraṇesu sīlesu ca patiṭṭhahissatīti sabbamidaṃ ñatvā evaṃ “**iṅgha me tvam, upavāṇa, uṇhodakaṃ jānāhī**”ti avoca.

**Āgamanīyappaṭipadam** pubbhāgappaṭipadam pubbhāgappaṭipattiṃ **kathetuṃ vaṭṭati** anuttarimanussadhammā. **Sadevakena lokenā**ti anavasesato lokassa gahaṇaṃ. Phalavisesākankhāya pūjetabbāti pūjanīyā, te eva idha “**pūjaneyyā**”ti vuttā. Tathā ādarena pūjetabbatāya sakkāriyā, ā-kārassa rassattaṃ, ri-saddassa ca re-ādesaṃ katvā “**sakkareyyā**”ti vuttaṃ. “Apacayeyyā”ti vattabbe ya-kāralopaṃ katvā “**apaceyyā**”ti vuttaṃ. **Tesanti** sadevakena pūjaneyyādīnaṃ. **Haritunti** netuṃ.

**Ettakenapī**ti upasaṅkamanādinā ettakena appamattakenapi katavattena **ayaṃ kitti...pe... somanassajāto**.

**Yajamānassāti** deyyadhammaṃ dentassa. Dakkhiṇāya ijjhanaṃ nāma vipulaphalabhāvoti āha “**mahapphalo hotī**”ti. **Viditanti** paṭividdhapaccakkhakataṃ. **Ājānātī**ti vutthabhavādiṃ pariyādāya jānāti paṭivijjhati. **Jānitvāti** cattāri saccāni maggapaṭipāṭiyā paṭivijjhitvā. Aggappattatāya **katakiccatam patto**. Brāhmaṇena attanā kato kāro ca bhagavato eva paccupaṭṭhātīti taṃ dassento “**iminā khīṇāsava yajanākārena yajantassā**”ti vuttaṃ.

Devahitasuttavaṇṇanā niṭṭhitā.

#### 4. Mahāsālasuttavaṇṇanā

**200.** Yasmā tassa brāhmaṇassa anissayassa jīṇṇabhāvena visesato kāyo lūkho jāto, jīṇṇapilotikakhaṇḍehi saṅghaṭitaṃ pāvuraṇaṃ, tasmā “**lūkhapāvuraṇo**”ti padassa “**jīṇṇapāvuraṇo**”ti attho vutto. **Pāṭiyekanti** puttesu ekameko ekamekāya vācāya visuṃ visuṃ.

Sampucchanā nāma idha sammantananti āha “**saddhiṃ mantayitvā**”ti. **Nandissanti** abhinandiṃ. Atītatthe hi idaṃ anāgatavacanāṃ. Tenāha “**nandijāto...pe... ahoṣi**”nti. **Bhussantāti** nibbhussanavasena ravantā.

**Vayogatanti** pacchimavayaṃ upagataṃ. So pana yasmā purime dve vaye atikkamavasena gato. Pacchimaṃ ekadesato atikkamanavasena, tasmā vuttaṃ – “**tayo vaye gataṃ atikkantaṃ pacchimavaye ṭhita**”nti.

**Nipparibhogoti** jīṇṇabhāvena javaparakkamahāniyā aparibhogō na bhuñjitabbo. **Khādanā apanīyatī**ti yavasāṃ adadantā tato nīharanti nāma. **Theroti** vuḍḍho.

**Anassavāti** na vacanakarā. **Appatissāti** patissayarahitā. **Avasavattinoti** na mayhaṃ vasena vattanakā. **Sundarataroti** upatthambhakāribhāvena sundarataro.

**Puratoti** upatthambhakabhāvena purato katvā. **Udake paṭiṭṭhaṃ labhati** tattha paṭiṭṭhato thirapaṭiṭṭhabhāvato. Addhapaṭiṭṭho hi daṇḍo daṇḍadharapurisassa paṭiṭṭhaṃ labhāpeti.

**Brāhmaṇiyoti** attano brāhmaṇiyo. **Pāṭiyekanti** “asukassa gehe asukassa gehe”ti evaṃ uddesikaṃ katvā visuṃ visuṃ. **Mā niyyādehi, amhākaṃ ruccanaṭṭhānamevāti** tava puttānaṃ gehesu yaṃ amhākaṃ ruccanaṭṭhānaṃ. Tatthameva gamissāmāti sabbesampi etesaṃ anuggahaṃ kātukāmo bhagavā evamāha.

**Tato paṭṭhāyāti** sotāpattiphalapaṭilābhato paṭṭhāya. Yadatthaṃ mayaṃ imassa brāhmaṇassa mahāsampattidānādinā anuggaho kato, so cassa puttaparijanassapi attho siddhoti satthā na sabbakālaṃ tassa brāhmaṇassa puttānaṃ gehaṃ agamāsi, te eva pana kālena kālaṃ satthu santikaṃ gantvā yathāvibhavaṃ sakkārasammānaṃ akaṃsūti adhippāyo.

Mahāsālasuttavaṇṇanā niṭṭhitā.

### 5. Mānatthaddhasuttavaṇṇanā

**201. Mānena thaddhoti** “ayaṃ kho”tiādinā paggahitena mānena thaddho bajjhitaṅgacitto thaddhaayosālāko viya kassaciṇi anonato. **Na kiñci jānāti** loke paṭisanthāramattassapi ajānanato.

**Abbhutavittajātāti** sañjātaabbhutavittā. Vittam vuttīti ca tuṭṭhipariyāyā. **Abhūtapubbāyāti** yā tassā parisāya vitti tadā bhūtā, sā ito pubbe abhūtā. Tenāha “**abhūta...pe... samannāgatā**”ti. **Assa puggalassāti** anena puggalena. **Apacitāti** paramanipaccena pūjanīyasāmaññato tattha attano pakkhipanam idha desanākosallam.

Mānatthaddhasuttavaṇṇanā niṭṭhitā.

### 6. Paccanīkasuttavaṇṇanā

**202. “Sabbaṃ seta”**nti kenaci vutte tassa paccanīkam karontasseva assa brāhmaṇassa. **Vinetvāti** vināsetvā. **Suṇātīti atthoti** “suṇātī”ti kiriyāpadam āharitvā gāthāya attho veditabbo “jaññā subhāsita”nti vuttatā. Na hi asutvā desitam jānitum sakkonti.

Paccanīkasuttavaṇṇanā niṭṭhitā.

### 7. Vanakammikasuttavaṇṇanā

**203.** Vanakamme niyutto, kiriyamānena vanakammaṃ etassa atthīti **vanakammiko**. **Imasmiṃ vanasaṇḍeti** imasmiṃ evaṃmahante vanasaṇḍe. Na me vanasmiṃ karaṇīyamatthi yathā, “brāhmaṇa, tuyha”nti adhippāyo. Itaram pana yaṃ mahākilesavanam, tam maggañāṇapharasunā samādhimayasilāyaṃ sunisitena sabbaso ucchinnamūlam, tato eva **nibbanatho** nikkilesagahano. Vivekābhiratiyā ekako abhirato paṭipakkhavigamena. Tenāha “**aratim...pe... jahitvā**”ti.

Vanakammikasuttavaṇṇanā niṭṭhitā.

### 8. Kaṭṭhahārasuttavaṇṇanā

**204. Dhammantevāsikāti** kiñciṇi dhanam adatvā kevalam antevāsikā. Tenāha “**veyyāvaccam katvā sippuggaṇhanakā**”ti. **Gambhīrasabhāveti** samantato dūrato gahanasacchannavipulatararukkagacchalatāya ca, tadā himapiṇḍasinnabhāvena mayūrayānehi paṭiṭṭhātum asakkuṇeyyatāya ca gambhīrabhāve.

**Bahubheraveti** bahubhayānake. **Aniñjamānenāti** itthambhūtatthe karaṇavacanam. **Atisundaram vatāti** evam sante nāma araññe evam niccalakāyo nisinnō jhāyanto ativiya sundarañca jhānam jhāyasīti vadati.

**Accherarūpanti** acchariyabhāvam. **Setṭhappattiyāti** setṭhabhāvappattiyā.

“Lokādhipatisahayam ākaṅkhamāno”ti iminā brāhmaṇo lokādhipatisahayam pucchati, “kasmā bhava”ntiādinā pana tadaññavisesākaṅkham pucchati āha “**aparenapi ākārena pucchati**”ti.

**Kaṅkhāti taṇhā** abhikkhaṇavasena pavattā. **Anekasabhāvesūti** rūpādivasena ajjhantikādivasena evam nānasabhāvesu ārammaṇesu. Assādarāgo lobho abhijjhāti **nānappakārā**. **Sesakilesā vā**

diṭṭhimānadosādayo. **Niccakālaṃ avassitā** sattānaṃ avassayabhāvattā. **Pajappāpanavasenāti** pakārehi taṇhāyanavasena. **Nirantāti** antarahitā niravasesā.

**Anupagamanoti** anupādāno. **Sabbaññutaññānaṃ dīpeti**, tassa hi vasena eva nānāsabhāvesu bhagavā samantacakkhunā passatīti “**sabbe...pe... dassano**”ti vuccati. **Arahattaṃ sandhāyāha**, tañhi nippariyāyato “anuttara”nti vuccati.

Kaṭṭhahārasuttavaṇṇanā niṭṭhitā.

### 9. Mātuposakasuttavaṇṇanā

**205. Itoti** manussattabhāvato. **Paṭigantvāti** abhigantvā. Sagge hi nibbattanto kammaphalena dhammatāvasena paṭisandhikālato paṭṭhāya abhirativasena abhiramati eva nāmāti.

Mātuposakasuttavaṇṇanā niṭṭhitā.

### 10. Bhikkhakasuttavaṇṇanā

**206.** Virūpaṃ gandhaṃ pasavatīti **visso**, duggandho. **Bāhitvāti** attano santānato bahikatvā nīharitvā. Taṃ pana anavasesato pajahananti āha “**aggamaggena jahitvā**”ti. Saṅkhāyati sammadeva paricchindati eṭāyāti **saṅkhā**, ñāṇanti āha “**saṅkhāyāti ñāṇenā**”ti. **Bhinnakilesattāti** niruttinayena bhikkhusaddasiddhimāha.

Bhikkhakasuttavaṇṇanā niṭṭhitā.

### 11. Saṅgārasuttavaṇṇanā

**207. Pacceṭīti** pattiyāyati saddahati. Tathābhūto ca tamatthaṃ nikāmento nāma hotīti vuttaṃ “**icchati pattheti**”ti. **Sādhu, bhanteti** ettha **sādhu**-saddo āyācanattho, na abhinandanatthoti “**āyācamāno āhā**”ti vatvā āyācane kāraṇaṃ dassento “**therassa kirā**”tiādimāha. Udakasuddhiko na ekaṃsena apāyūpago, laddhiyā pana sāvajjakilesabhūtabhāvato āyācati. Aññaṃ kāraṇaṃ apadisanto “**apicā**”tiādimāha. Phalabhūto attho etassāti **atthavasam**, kāraṇanti āha “**atthānisamsam atthakāraṇa**”nti. **Papañcasūdaniyaṃ** pana phaleneva araṇiyato attho, kāraṇanti katvā “attho eva atthavasō, tasmā **dve atthavaseti** dve atthe dve kāraṇāni”ti vuttaṃ.

Saṅgārasuttavaṇṇanā niṭṭhitā.

### 12. Khomadussasuttavaṇṇanā

**208.** Evaṃladdhanāmaṃ piṇḍāya pāvisīti yojanā. **Evamevanti** kenaci animantitena sayameva upasaṅkamante. **Aphāsukadhātukanti** ayuttarūpaṃ. **Sabhādhammanti** sabhāya caritabbaṃ cāritadhammaṃ. **Asañcāletvāti** āsanato avuṭṭhāpetvā. **Ujukameva āgacchati** lokagganāyako bhagavā sabbasattuttamo attano uttaritarassa bhāvato lokassa apacitiṃ na dasseti. Ye sabbaso saṃkilese pajahanti, teva paṇḍite “santo”ti dasseti “**ete**”tiādinā.

Khomadussasuttavaṇṇanā niṭṭhitā.

Dutiyavaggavaṇṇanā niṭṭhitā.

Sārathhappakāsiniyā saṃyuttanikāya-aṭṭhakathāya

Brāhmaṇasaṃyuttavaṇṇanāya līnatthappakāsanā samattā.

## 8. Vaṅgīsaṃyuttam

### 1. Nikkantasuttavaṇṇanā

**209. Āḷaviyanti** āḷavinagarasamīpe. **Aggacetiye**ti gotamakacetiyaḍīhi uttamacetiye. Tam kira bhūmirāmaṇeyyakabhāvena manuññatāya padhānayuttatādisampattiyā ca itaracetiyeḥi seṭṭhasammataṃ. **Kappattherenā**ti “kappo”ti gottato āgatanāmo thero, saḥassapurāṇajaṭilānaṃ abbhantare ayaṃ mahāthero. **Ohīnakoti** theresu gāmaṃ piṇḍāya pavīṭṭhesu viḥāre eva avahīnako ṭhito. Tattha kāraṇamāha “**viḥārapālo**”tiādi. **Samalaṅkaritvāti** samaṃ alaṅkārena alaṅkaritvā. **Kusalacittam viddhamseti** pavattitum appadānavasena. **Etasminti** etasmiṃ rāge uppanne. “Ekasmi”nti vā pāṭho, ekasmiṃ visabhāgavattuke rāge uppanne. **Dhammo vāti** mama citte uppajjanakato añño dhammo vā. Yena kāraṇena paro anabhiratiṃ vinodetvā idāneva abhiratiṃ uppādeyya, taṃ kāraṇaṃ kuto labbhāti yojanā, taṃ kāraṇaṃ natthīti attho, tassa abhāvakāraṇavacanāṃ.

**Anagāriyanti** agāravirahato anagāraṃ pabbajjā. Tattha niyuttattā anagāriyaṃ ka-kārassa ya-kāraṃ katvā, pabbajjanti attho. **Ādhāvanti**ti hadayaṃ abhibhavitvā dhāvanti. **Uggatānanti** uḷārānaṃ puttā. Tenāha “**mahesakkhā rājaññabhūtā**”ti. **Uttamappamāṇanti** saḥassapalaṃ samantāti samantato. **Parikireyyunti** vijjheyyuṃ. **Etasmā saḥassāti** yathāvuttā dhanuggahasahassato. **Atirekatarā** anekasahassā. **Itthiyo** olokanasitalapitaroditasare khipantiyo. **Neva maṃ byādhayissanti** neva maṃ nijjhāyissanti. “Byādhayissati”ti pāṭhoti vuttam “**cāletum na sakkhissatīti attho**”ti. **Dhamme samhīti** sake santike patiṭṭhite sāsanaḍhamme. Tenāha “**anabhiratiṃ vinodetvā**”tiādi.

**Magganti** “maggo”ti vattabbe līngavipallāsena vuttam. Tenāha “**so hi nibbānassa pubbhāgamaggo**”ti.

Nikkantasuttavaṇṇanā niṭṭhitā.

### 2. Aratisuttavaṇṇanā

**210. Viḥāragaruko kiresa theroti** etena thero attano saddhivihārikaṃ vaṅgīsaṃ ovaditum anavasaro. Tena antarantarā tassa cittaṃ rāgo anuddhamsetīti dasseti. **Sāsane aratinti** silaparipūraṇe samathavipassanābhāvanāya ca anabhiratiṃ. **Kāmaguṇesu ca ratinti** pañcasu kāmakoṭṭhāsesu assādaṃ. **Pāpavitakkanti** kāmasaṅkappaṃ. **Sabbākārenāti** sabbe tadaṅgavikkhambhanasamucchindanākārena. Yathā mahantaṃ araññaṃ vanathanti, evaṃ mahantaṃ kilesavanaṃ “**vanatha**”nti vuttam.

**Pathaviṅca vehāsanti** bhummatthe paccattavacanāṃ, tasmā pathaviyaṃ ākāse cāti attho. Tenāha “**pathaviṭṭhita**”ntiādi. **Jagatīti** ca pathaviyā vevacanāṃ. Tenāha “**antopathaviya**”nti. **Parijīratīti** sabbaso jaraṃ pāpuṇāti. **Samāgantvāti** ṇāṇena samāgantvāti attho. Tenāha “**mutattāti viññātattabhāvā**”ti.

**Paṭighapadena gandharasā gahitā** ghānajiḥvānaṃ paṭihanavāsena pavattanato. **Mutapadena phoṭṭhabbārammaṇaṃ gahitaṃ** mutvā gahetabbato. **Na lippatīti** na makkhīyati.

Satṭhi-saddo cha-saddena samānatthoti “**satṭhinissitā**”ti padassa “**chaārammaṇanissitā**”ti attho vutto. **Puthū adhamavitakkāti** rūpavitakkādivāsena bahū nānāvittakkā micchāsāṅkappā. **Janatāya nivīṭṭhāti** mahājane patiṭṭhitā. **Tesaṃ vassenāti** tesampi micchāvittakkānaṃ vasena. **Na katthaci** ārammaṇe. **Kilesavaggagatoti** kilesasaṅgaṇikaṃ upagato na bhavēyya, kilesavitakkā na uppādetabbāti attho. **Duṭṭhullavacanāṃ** kāmapaṭisaṃyuttakathā.

**Dabbajātikoti** dabbarūpo. **Nepakkenāti** kosallena. **Nibbānaṃ paṭiccāti** asaṅkhatadhātum ārammaṇavasena paṭicca. **Parinibbānakālanti** anupādisesanibbānakālam.

Aratisuttavaṇṇanā niṭṭhitā.

### 3. Pesalasuttavaṇṇanā

**211. Etesanti** etesaṃ mahallakānaṃ. **Na pāḷi** āgacchati appaṇaṇabhāvato. Na ca pāḷi upaṭṭhāti, ekāya pāḷiyā sati pāḷigatiyā tathā tathā upaṭṭhānampi nesaṃ natthīti vadati. **Na aṭṭhakathāti** etthāpi eseva nayo. Sithiladhaniṭṭaditaṃtaṃbyañjanabuddhiṃ ahāpetvā uccāraṇaṃ **padabyañjanamadhuratā. Atikkamivā maññati** aññe bhikkhū. Hīḷaṇavasena abhibhavivā paṭibhānasutena attānaṃ pasamsati sambhāveti. Mānassa pavattitāya sahaṃjātanissayādipaccayadhammā taṃsahabhudhammā. Mānassa **vippaṭisārī ahuvā.** Mā ahoṣīti yojanā. **Vaṇṇabhaṇananti** parehi kiriyamānaṃ guṇābhittavaṃ. **Akhiloti** pañcacetokhilarahito. **Nissesam navavidhanti** navavidhampi mānaṃ kassaci ekadesassapi asesato. **Vijjāyāti** aggamaggavijjāya. Accantameva **samitatāya** vūpasamitatāya **samitāvī.**

Pesalasuttavaṇṇanā niṭṭhitā.

### 4. Ānandasuttavaṇṇanā

**212. Rāgoti** ettha āyasmato vaṅgīsassa rāgassa uppattiyā kāraṇaṃ vibhāvetuṃ “**āyasmā ānando**”tiādi vuttaṃ. **Tanti** ānandattheraṃ. **Ārammaṇaṃ pariggahetunti** kāyavedanādibhedam ārammaṇaṃ satigocaraṃ. Asubhadukkhādito, rūpādiekekameva vā chaḷārammaṇaṃ aniccadukkhādito pariggaṇhituṃ paricchijja jānituṃ. **Itthirūpārammaṇeti** itthisantāne rūpasabhāve ārammaṇe.

**Nibbāpananti** nibbāpayati etenāti nibbāpanaṃ. **Vipallāsenāti** asubhe “subha”nti vipallāsabhāvahetu. **Rāgaṭṭhāniyanti** rāgupattihetu. **Iṭṭhārammaṇanti** subhārammaṇaṃ. Ettha ca iṭṭhārammaṇasīsenā tattha iṭṭhākāraggaṇaṃ vadati. Tañhi vajjanīyaṃ. **Paratoti** avasavattanatthēna aññato. Saṅkhārā hi “mā bhijjantū”ti icchitāpi bhijjanteva, tasmā te avasavattitā paro nāma, sā ca nesaṃ paratā aniccadassanena pākaṭā hotīti vuttaṃ “**parato passāti aniccato passā**”ti. Kāmaṃ vipassanā saṅkhāranimittaṃ na paricajati saṅkhāre ārabha vattanato, yesaṃ pana nimittānaṃ aggaṇaṇena animittāti gahituṃ arahati, taṃ dassetuṃ “**niccādīnaṃ nimittāna**”ntiādi vuttaṃ. Salakkhaṇa-sāmaññalakkhaṇa-dassanavasena mānassa dassanābhisaṃmayo, vipassanāya pahānābhisaṃmayo. “Maggenā”ti vadanti, maggeneva pana asammohato pariññāpaṭivedhavasena dassanābhisaṃmayo, pahānapaṭivedhavasena pahānābhisaṃmayo. **Rāgādisantatāyāti** rāgādīnaṃ samucchadavasena paṭippassaddhivasena vūpasametabbato santabhāvena.

Ānandasuttavaṇṇanā niṭṭhitā.

### 5. Subhāsitasuttavaṇṇanā

**213. Aṅgīyanti** hetubhāvena āgamabhāvena avayavabhāvena vā ñāyantīti **aṅgāni**, kāraṇāni, avayavā vāti āha “**aṅgehīti kāraṇehi, avayavehi vā**”ti. Viratiyo subhāsitaṃvācāya pubbaṃ paṭiṭṭhitā honṭīti musāvādāveramaṇīdayo tassā viśesahetūti āha “**musāvādā...pe... kāraṇāni**”ti. Yasmā ariyavohārā viśesato cetanāsabhāvā, tasmā vacīsucaritasamudāyassa saccavācādayo aṅgabhūṭatī āha “**saccavacanādayo cattāro avayavā**”ti. **Nissakkavacananti** hetumhi nissakkavacanaṃ. Tenāha “**samanūgatā pavattā**”ti. Vācā hi tāya viratiyā sammā anurūpato āgatā pavattatī “**samannāgatā**”ti vuccati. **Karaṇavacananti** sahaṃyoge karaṇavacanaṃ. Tenāha “**yuttā**”ti. Sahaṃjātāpi hi cetanā yathāsamādināya viratiyā sammā anurūpato yuttatī vattuṃ arahati.

**Samullapanavācā**ti saddavācā, sā vuccatīti **vācā** nāma. Viññatti pana vuccati etāyāti **vācā** nāma, tathā virati cetanāvācā. **Na sā idha adhippetā**ti sā cetanāvācā viññattivācā viya idha imasmiṃ sutte na adhippetā “subhāsītā hotī”ti vacanato. Tenāha “**abhāsītabbato**”ti. Suṭṭhu **bhāsītā**ti sammā ñāyena bhāsītā vacīsucaritabhāvato. **Atthāvahatanti** hitāvahakālaṃ pati āha. **Kāraṇasuddhinti** yonisomanasikārena kāraṇavisuddhiṃ. **Dosābhāvanti** agatigamanādidosābhāvaṃ. Rāgadosādivinimuttañhi taṃ bhāsato anurodhavirodhaviyajjanato agatigamanam dūrasamugghāṭitamevāti. **Anuvādavimuttā**ti apavādavirahitā. **Sabbākārasampattiṃ dīpeti**, asati hi sabbākārasampatiyaṃ anuvajjatāpi.

Kiñcāpi pubbe dhammādhiṭṭhānā desanā āraddhā, puggalajjhāsayato pana **puggalādhiṭṭhānāya... pe... vacanametaṃ**. Kāmañcetta “**aññataraniddosavacana**”nti avisesato vuttaṃ, “dhammaṃyeva bhāsati”tiādīnā pana adhammasādirahitāya vācāya vuccamānattā idhāpi subhāsītā vācā adhippetāti. “Subhāsitaṃyevā”ti avadhāraṇena nivattitaṃ sarūpato dasseti “**no dubbhāsita**”nti iminā. Tenāha “**tasseva vācaṅgassa paṭipakkhabhāsanānivāraṇa**”nti. Paṭiyogīnivattanatto hi eva-saddo, tena pisuṇavācāpaṭikkhepo dassito. “Subhāsita”nti vā iminā catubbidham vacīsucaritaṃ gahitanti “**no dubbhāsitanti iminā micchāvācappahānaṃ dīpeti**”ti vuttaṃ. Sabbavacīsucaritasādhāraṇavacanañhi subhāsitanti. Tena parabhedanādikaṃ asabbhādikañca bodhisattānaṃ vacanaṃ apisuṇādivisayanti daṭṭhabbaṃ. **Bhāsītabbavacanalakkhaṇanti** bhāsītabbassa vacanassa sabhāvalakkhaṇaṃ dīpetīti ānetvā sambandho. Yadi evaṃ nanu abhāsītabbam paṭhamam vatvā bhāsītabbam pacchā vattabbam yathā “vāmaṃ muñca, dakkhiṇaṃ gaṇhā”ti āha “**aṅgaparidīpanatthaṃ panā**”tiādi.

**Paṭhamenā**ti “subhāsita”nti padena. **Dhammato anapetanti** attano paresaṅca hitasukhāvahadhammato anapetaṃ. **Mantāvacaṇanti** mantāya pavattetabbavacanaṃ. Paññavā avikiṇṇavāco hi na ca anattāvahaṃ vācaṃ bhāsati. **Itarehi dvīhī**ti tatiyacatutthapadehi. “**Imehi khotiādīnī**ti karaṇe etaṃ upayogavacana”nti keci. **Taṃ vācanti** yathāvuttaṃ caturaṅgikaṃ. Yañca vācaṃ maññantīti sambandho. **Aññeti** ito bāhirakā ñāyavādīno akkharacintakā ca. “Paṭiññāhetuudāharaṇūpanayanigamanāni avayavā vākyassā”ti vadanti. **Nāmādihī**ti nāmākhyātapadehi. **Liṅgaṃ** itthilingādi **vacanaṃ** ekavacanaṃ. Paṭhamādi **vibhatti** atītādi **kālaṃ**. Kattā sampadānaṃ apādānaṃ karaṇaṃ adhikaraṇaṃ kammañca **kāraṇaṃ**. **Sampattihi samannāgatanti** ete avayavādike sampādetvā vuttaṃ. **Taṃ paṭisedhetī**ti taṃ yathāvuttavisesampi vācaṃ “imehi kho”ti vadanto bhagavā paṭisedheti. **Kho**-saddo hettha avadhāraṇatto. Tenāha “**avayavādi**”tiādi. Yā kāci asabhāvaniruttillakkhaṇā. Sā milakkhubhāsā. **Sīhaḷakenevā**ti sīhaḷabhāsāya pariyaṇnena vacanena. **Arahattaṃ pāpuṇiṃsūti** saṃsāre ativiya sañjātasamvegā tannissaraṇe ninnapoṇamānasā hutvā vipassanaṃ ussukkāpetvā maggapaṭipāṭiyā arahattaṃ pāpuṇiṃsu.

**Pātova phullitakokanadanti** pātova saṃphullapadumaṃ. **Bhijjiyateti** nibbhijjiyati nibbhiggo jāyati. **Manussattaṃ gatā**ti manussattabhāvaṃ upagatā.

**Buddhantare**ti buddhuppādantare dvinnaṃ buddhuppādānaṃ antarā. Tadā hi paccekabuddhānaṃ sāsane, na buddhasāsane dippamāne.

**Jarāya parimadditanti** yathā hatthacaraṇādiāṅgāni sithilāni honti, cakkhādīni indriyāni savisayaggahaṇe asamattāni honti, yobbaṇaṃ sabbaso vigataṃ, kāyabalaṃ apagataṃ, satimatidhitiādayo vippayuttā, pubbe attano ovādapaṭikarā puttadārādayopi apasādakā, parehi vuṭṭhāpanīyasamvesanīyatā punadeva bālabhāvappatti ca honti, evaṃ jarāya sabbaso vimadditaṃ. **Etanti** sarīraṃ vadati. **Milātachavicammaṇissitanti** jīṇṇabhāvena appamaṃsalohitattā milātehi gatayobbanehi dhammehi sannissitaṃ. **Ghāsamāmisanti** ghāsabhūtaṃ āmisaṃ maccunā gilivā viya patiṭṭhapetabbato. Kesalomādinānākuṇapapūritaṃ. Tato eva **asucibhājanaṃ etaṃ**. Sabbathāpi nissaratāya **kadalikkhandhasamaṃ**.

**Anucchavikāhī**ti sammāsambuddhassa anurūpāhi. **Na tāpeyyā**ti cittañca kāyañca na tāpeyya.



Tāpanā cetha sampati āyati ca visādanā. Na **bādheyyāti** “**nābhibhaveyyā**”ti padassa atthadassanaṃ. **Apisuṇavācāvasenāti** sabbaso pahīnapisuṇavācatāvasena. **Pāpānīti** lāmakāni nikiṭṭhakāni. Tenāha “**appiyānī**”tiādi. **Anādāyāti** aggahetvā.

**Sādhubhāvenāti** niddosamadhurabhāvena. **Amatasadisāti** sadise tabbohāroti, kāraṇe vāyaṃ kāriyavohāroti āha “**nibbānāmatapaccayattā vā**”ti. Paccayavasena hi sā tadā dassanappavatti. **Cariyāti** cārittaṃ. **Porāṇā** nāma paṭhamakappikā, buddhādayo vā ariyā.

**Patiṭṭhitāti** niccalabhāvena aṭṭhiṃ katvā paccayāyattabhāvato avisamvādanakā. Ubhayathā paṭipattiṃ āha “**attano ca paresāna atthe patiṭṭhitā**”ti. **Atthe** diṭṭhadhammikasamparāyikādihite patiṭṭhitattā eva **dhamme** avihiṃsādiddhamme patiṭṭhitā. **Anuparodhakaranti** etena hitapariyāyoyam attha-saddoti dasseti. **Dhammikanti** dhammato anapetaṃ, atthadhammūpasamhitam vā.

**Nibbānappattiyāti** nibbānappattiyattham. **Dukkassa antakiriyāya** antakaraṇattham. Yasmā buddho khemāya bhāsati, tasmā khemuppattihetuyā **khemā**, tasmā sā sabbavācānaṃ uttamāti evampettha attho daṭṭhabbo. **Mantāvacaṇavasenāti** sabbadosarahitavasena.

Subhāsitasuttavaṇṇanā niṭṭhitā.

## 6. Sāriputtasuttavaṇṇanā

214. Vākkaraṇacāturiyato vacanaḡuṇahetūnaṃ pūriyā pūre bhavāti porī, tāya **poriyā**. Tenāha “**akkharādīparipuṇṇāyā**”ti. **Avibaddhāyāti** pittādīhi na vibaddhāya anupaddutāya. Tenāha “**apalibuddhāyā**”tiādi. **Niddosāyāti** atthato byañjanato vigatadosāya. **Akkhalitapadabyañjanāyāti** agalitapadabyañjanāya, **atthassa viññāpaniyāti** diṭṭhadhammikādiatthassa bodhane pariyattāya. **Bhikkhunanti** gāthāsukhattham rassam katvā vuttaṃ.

“**Samkhittenapi deseti, vitthārenapi bhāsati**”ti nayidaṃ paṭhamaṃ uddisitvā tassa atthassa kittanavasena pavattitaṃ vacanaṃ sandhāya vuttaṃ. Sā hi vitthāradesanā eva hoti. Yā pana desanā kadāci dhammapaṭiggāhakānaṃ ajjhāsaya vasena samkhitteneva dassetvā nikkhipati, yā ca kadāci vitthārena, tadubhayaṃ sandhāya vuttaṃ. Tenāha “**cattārimānī**”tiādi. Sabhāvamadhuro paccayavasena madhurataro hotīti dassetuṃ “**yathā**”tiādi vuttaṃ. Vividhākāraṃ katvā dhammaṃ kathetuṃ paṭibhātīti **paṭibhānaṃ**, desanāpakāraṇānaṃ. Tenāha “**samuddato**”tiādi. **Odahantīti** avajānanavasena gamenti.

Sāriputtasuttavaṇṇanā niṭṭhitā.

## 7. Pavāraṇāsuttavaṇṇanā

215. **Tasmiṃ ahūti** tasmiṃ ahanīti āha “**tasmiṃ divase**”ti. **Anasanenāti** sabbaso āhārassa abhuñjana. Sāsanikasīlena bāhirakaanasana vā upetā hutvāti yojanā. **Vā-saddena** khīrapānamadhusāyanādīnīpi saṅgaṇhāti. Pakārehi diṭṭhādīhi vāreti kāyakammādike sarāpeti gārayhe karoti etāyāti **pavāraṇā**, paṭipattivisodhanāya attano attano vajjasodhanāya okāsādānaṃ. Yasmā yebhuyyena vassaṃvuṭṭhehi kātābbā esā visuddhidesanā, tasmā vuttaṃ “**vassaṃvuṭṭhapavāraṇāya. Visuddhipavāraṇātipi etissāva nāma**”nti. Tadā tassa bhikkhusaṅghassa tuṅhībhāvassa anavasesatāyapi vaṇṇaṃ dassetuṃ pāliyaṃ “**tuṅhībhūta**”nti vuttanti āha “**yato yato...pe... natthī**”ti. Hatthassa kukkucātā asaṃyamo asampajāññakiriyā **hatthakukkuccaṃ**. Tathā **pādakukkuccaṃ** veditabbaṃ, **vā-saddo** avuttavikappattho, tena tadaññesamabhāvo vibhāvitoti daṭṭhabbaṃ.

**Pañcapasādehīti** pañcavaṇṇehi pasādehi. **Vossaggattho** yathārucci kiriyāya vossajjanaṃ. **Pucchanattheti** paṭikkhepamukheneva pucchanatthe **nakāro**, **me kiñci** kiriyam vā vācasikaṃ vā na

garahatha, kiṃ nu garahatha kāyavācāhīti attho. Keci “dvārānevā”ti dvārasīsenā dvārappavattacariyaṃ vadanti. Visuddhipavāraṇāya adhippetattā yena pavāritam, teneva visuddhīti ñāyati, yena na pavāritam. Kiṃ nu taṃ avisuddhanti siyā kassaci puthujjanassa āsaṅkā? Tannivāraṇatthamāha “**no aparisuddhattā**”ti. **Manodvāraṃ parisuddham** asucikārakaupakkilesānaṃ dūrīkatattā. **Idāni** etarahi buddhakāle. **Etthāti** manodvāraparisuddhiyaṃ.

Kāyavacīsamācāraparisuddhiyā paveditāya manosamācāraparisuddhi atthato paveditāva hotīti “**kāyikaṃ vā vācasikaṃ vā**”iccevāha. Tathā hi vuttaṃ “**kāyikaṃ vā vācasikaṃ vāti idaṃ catunnaṃ arakkhiyataṃ sandhāya thero āhā**”ti. “Bhikkhave, pavāremi vo”ti bhikkhusaṅghavisayattā pavāraṇāya tattha bhikkhusaṅghena vattabbaṃ paṭivacanaṃ dento dhammasenāpati “**bhikkhusaṅghassa bhāraṃ vahanto**”ti vutto. Tenāha “**na kho mayaṃ, bhante**”tiādi. **Arakkhiyānīti** parānuvādato na bhāyitabbāni suparisuddhabhāvato.

“Anuppannassā”ti idaṃ adhippāyikavacananti tadadhippāyaṃ vivaranto “**kassapasammāsambuddhato paṭṭhāyā**”tiādimāha. **Kassapasammāsambuddhatoti** vibhatte nissakkaṃ, tasmā kassapasammāsambuddhato oranti atthoti. **Aññenāti** ito bhagavato añña. **Anuppāditapubbassāti** parasantāne na uppāditapubbassa. Sasantāne pana paccekabuddhānaṃ vasena na uppāditoti na sakkā vattum. **Samanuāgatāti** sammā anu upagatā. **Bhagavato sīlādayo guṇāti** buddhabhūtassa guṇā adhippetāti āha “**arahattamaggameva nissāya āgatā**”ti. **Sabbaguṇāti** dasabalaññādayo sabbe buddhaguṇā. **Bhanteti** ettha itisaddo ādiattho. Tena “imesaṃ pana...pe... vācasikaṃ vā”ti yāvāyaṃ pālīpadeso, taṃ sabbam gaṇhāti. Tenāha “**idaṃ thero...pe... pavārento āhā**”ti.

Yaṃ attano puññānubhāvasiddham cakkaratanaṃ nippariyāyato tena pavattitaṃ nāma, na itaranti paṭhamanayo vutto. Yasmā pavattitasseva anupavattanaṃ, paṭhamanayo ca taṃsadise tabbohāravasena vuttoti taṃ anādiyivā dutiyanayo vutto. **Dasavidhanti** antojanasmiṃ, balakāye rakkhāvaraṇaguttiyā saṃvidhānaṃ, khattiyesu anuyuttesu, brāhmaṇagahapatikesu, negamañānapadesu, samaṇabrāhmaṇesu, migapakkhīsu adhammacārapaṭikkhepo, adhanānaṃ dhanānuppādānaṃ, samaṇabrāhmaṇe upasaṅkamitvā pañhapucchananti evaṃ dasavidham. Tattha gahapatike pakkhijāte ca visuṃ katvā gahaṇavasena **dvādasavidham**. **Cakkavattivattanti** cakkavattibhāvāvahaṃ vattaṃ. Yasmā yāthāvato pavattitaṃ, tadanurūpaṃ pana ñāyena yuttakena pavattitaṃ nāma hotīti āha “**sammā nayena hetunā kāraṇenā**”ti. **Ubhatobhāgavimuttāti** ubhayabhāgehi ubhayabhāgato vimuttāti ayamettha atthoti dasseti “**dvīhi bhāgehi vimuttā, arūpā...pe... nāmakāyato**”ti iminā. **Tevijjādibhāvanti** tevijjachaḷabhiññacatuppaṭisambhidabhāvaṃ. Paññāvimuttā hi taṃ tividham appattā kevalaṃ paññāya eva vimuttā.

**Visuddhatthāyāti** visuddhipavāraṇatthāya. Saṃyojanaṭṭhena **saṃyojanasaṅkhāte ceva** bandhanaṭṭhena **bandhanasaṅkhāte ca**. **Vijitasāṅgāmanti** yathā rāgādayo puna na sīsaṃ ukkhipanti, evaṃ ariyamaggasenāya vasena vijitasāṅgamaṃ. Tenāha “**vijitarāgadosamohasaṅgāma**”nti. **Mārabalassāti** mārasenāya, mārasa vā sāmattihiyassa. **Veneyyasatthanti** vinetabbajanasamūhaṃ. Sakaṭādisatthasabhāgato vineyyova satthoti taṃ veneyyasattham. Silasārādiabhāvato **antotuccho**.

Pavāraṇāsuttavaṇṇanā niṭṭhitā.

## 8. Parosahassasuttavaṇṇanā

216. Sahassato paraṃ aḍḍhateyyabhikkhusataṃ tadā bhagavantaṃ payirupāsati āha “**parosahassanti atirekasahassa**”nti. **Nibbāne kutoci bhayaṃ natthīti** kutocipi kāraṇato nibbāne bhayaṃ natthi asaṅkhatabhāvena sabbaso khemattā. Tenāha bhagavā – “khemaṅca vo, bhikkhave, dhammaṃ desessāmi khemagāminiṅca paṭipada”ntiādi (saṃ. ni. 4.379-408). Na kutoci bhayaṃ etasmiṃ adhiगतeti **akutobhayaṃ**, nibbānaṃ. Tenāha “**nibbānappattassā**”tiādi. **Vipassito paṭṭhāyāti**

amhākaṃ bhagavato nāmasena isīnaṃ sattamabhāvadassanattaṃ vuttaṃ. Te hi tattha tattha sutte bahuso kittitā. **Isīnanti** vā paccekabuddhasāvakaḥāhirakaisīnaṃ sattamo uttaro seṭṭhoti attho.

**Aṭṭhuppattivasenā**ti kāraṇasamuṭṭhānavasena. Tadassa aṭṭhuppattiṃ vibhāvetuṃ “**saṅghamajjhe**”tiādi vuttaṃ. Paṭibhānasampannavācāya aññe īsati abhibhavatīti **vaṅḡiso**. Tenāha “**paṭibhānasampatti**”ntiādi.

**Kilesummujjanasatānī**ti rāgādikilesānaṃ rajjanadussanādinayehi savisaye ayoniso uṭṭhānāni. Yadi anekāni satāni, atha kasmā “ummaggapatha”nti? Vuttanti āha “**vaṭṭapathattā pana patha**”nti. Rāgadosamohamānadiṭṭhivasena **rāgakhilādīni pañcakhilāni**. **Vibhajantanti** vibhajanavasena kathentaṃ. **Vibhajitvā**ti nāṇena vivecivā.

**Amate akkhā**teti amatāvahe dhamme desite. **Dhammassa passitāro** saccasampāṭivedhena. **Asamhīrā** diṭṭhivātehi.

**Ativijjhivā**ti paṭivijjhivā. **Atikkamabhū**tanti atikkamanaṭṭhena bhūtaṃ. **Dasaddhānanti** dasannaṃ upaḍḍhānaṃ. Tenāha “**pañcanna**”nti. **Jānantenā**ti dhammassa sudullabhattaṃ jānanta.

Parosahassasuttavaṇṇanā niṭṭhitā.

## 9. Koṇḍaññasuttavaṇṇanā

**217. Evaṃgahitanā**moti “aññāsi vata, bho, koṇḍañño”ti satthu vacanaṃ nissāya bhikkhūhi aññehi koṇḍaññāmakehi visesanattaṃ evaṃgahitanāmo. Dvādasannaṃ saṃvaccharānaṃ vasena **cirassaṃ**. **Chaddantabhavaneti** chaddantanāgarājabhavanaṭṭhāne. **Paññavā mahāsāvako** rattaññutāya. “**Dasahassacakkavāḷe devamanussānanti** dasahassacakkavāḷe devānaṃ, imasmim cakkavāḷe devamanussānañcāti evaṃ dasahassacakkavāḷe devamanussāna”nti vadanti. **Agganti**ādito. **Tatthā**ti mandākinitīre.

**Vassagenā**ti vassapaṭipāṭiyā. **Tanti** aññāsikoṇḍaññattheraṃ. Mahābrahmānaṃ viya lokiyamanussā harāyanti. Pāmokkhabhūto āyasmā thero antarantarā tattha tattha janapade vasitvā tadanukkamena mandākinitīraṃ upagato, tasmā vuttaṃ – “**icchāmaṃ, bhante, janapade vasitu**”nti.

Ānubhāvasampannā dibbāyukā te hatthināgāti vuttaṃ “**pubbe paccekabuddhānaṃ pāricariyāya kataparicayā**”ti. Therassa sañcaraṇaṭṭhāne **āvaraṇasākhā haritvā** apanetvā. **Mukhodakañceva dantakaṭṭhañca ṭhapeti**ti saḷaladevadārukaṭṭhādīni aññamaññaṃ ghaṃsitvā aggim nibbattetvā jāletvā tattha pāsānakhāṇḍāni tāpetvā tāni daṇḍakehi vaṭṭetvā taḷākāsu udakasonḍīsu khipitvā udakassa tattabhāvaṃ nītvā nāgalatādantakaṭṭhaṃ upanento mukhodakañca ṭhapeti. **Vattaṃ karoti**ti antokuṭiyā bahi ca pamukhepi aṅgaṇepi sākḥābhaṅgehi sammajjanto vakkhamānanayena āhāraṃ upanento vattaṃ karoti.

**Patiṭṭhappamā**ṇeti kaṭippamāṇe, ayameva vā pāṭho **tāva mahantamevā**ti yāva mahantaṃ setapadumavanaṃ, tāva mahantameva. Eseva nayo **rattakumudavanādīsu**. **Khādantā** manussā. **Pakkapayoghanikā viyā**ti supakkapayoghanaṃ viya. Ghanabhāvena pana pakkhattakhuddamadhu viya hoti. Tenāha “**etaṃ pokkharamadhu nāmā**”ti. **Mulā**lanti setapadumānaṃ mūlaṃ. **Bhisanti** tesamyeva kandaṃ. **Ekasmim pabbeti** ekekasmim pabbantare. **Pādaghaṭakanti** doṇassa catubhāgo saṅṭhānato khuddako, tasmā **pādaghaṭakappamā**ṇanti tumbamattaṃ. **Soṇḍiāvā**ṭeti khuddakasonḍiyo ceva khuddakaāvāṭe ca.

**Etaṃ bhojananti** yathāvuttaṃ nirudakapāyasabhojanaṃ. **Keci sañjānanti** ye therā vuḍḍhatarā.

**Keci na sañjānanti** ye navā acirapabbajitā.

**Buddhānubuddhoti** buddhassa anubuddho. **Bālhavīriyoti** catunnaṃ sammappadhānānaṃ vasena ciranicitavīriyo. **Tiṇṇaṃ vivekānanti** kāyacittaupadhivivekānaṃ lābhīti yojanā. **Catasso vadati** vaṅṅisatthero sayamṇapaṭibhānaṃ, na sesābhiññānaṃ abhāvatoti āha “**itarā**”tiādi. **Parisā sannisīdi** nissaddabhāvena tuṅhī ahosīti attho. **Anujānāpesīti** paṭhamam attanā ñātaṃ upaṭṭhitam attano parinibbānakālam anu pacchā satthāraṃ jānāpesīti evaṃ ettha attho daṭṭhabbo.

**Tanti āsāhipuṇṇamāya** isipatane yaṃ dassanaṃ, yaṃ vā dukkaracariyāyaṃ tumhākaṃ upaṭṭhānaṃ ādito dassanaṃ, taṃ, bhante, paṭhamadassanaṃ. **Onatavinatāti** heṭṭhā upari ca onatā vinatā. **Kampetvāti** thokaṃ cāletvā dassanatthaṃ **ekaninnādo** tesam hatthināgānañceva nāgayakkhakumbhaṇḍānaṃ devatānañca saddena. Brahmāno devānaṃ adamsūti sambandho.

**Sajjhāyamakamsu** pasādanīyesu pasādavasena sannipatitaparisāya pasādajananatthaṃ **bhagavati nikkhamitvāti** bhagavati gandhakuṭito nikkhamitvā. **Dharatiyevāti** aduṭṭhatam patvā tiṭṭhateva.

Koṇḍaññasuttavaṇṇanā niṭṭhitā.

### 10. Moggallānasuttavaṇṇanā

**218. Paccavekkhatīti** tesam ariyānaṃ cittaṃ attano ñānacakkhunā pati avekkhati paccavekkhati. **Pabbatassāti** isigilipabbatassa. **Dukkhapāraṃ gatanti** vaṭṭadukkhassa pāraṃ pariyantaṃ gataṃ. **Sabbaguṇasampannanti** sabbehi buddhaguṇehi ca sāvakaḡuṇehi ca paripuṇṇaṃ. **Anekākārasampannanti** rūpaghosalūkhadhammappamaṇikānaṃ sattānaṃ tehi tehi ākārehi sabbesaṅca anekehi anantāparimeyyehi pasīditabbākārehi samannāgataṃ. Te pana ākāra yasmā anaññasādhāraṇā buddhaguṇā eva, tasmā āha “**anekehi guṇehi samannāgata**”nti.

Moggallānasuttavaṇṇanā niṭṭhitā.

### 11. Gaggarāsuttavaṇṇanā

**219. Teti** te devamanusse. “**Sarīravaṇṇenāti** sarīre chavivaṇṇenā”ti vadanti. **Sarīravaṇṇenāti** vā dhammarūpakāyaguṇena. “**Yasasā**”tipi pāṭho, so evattho. **Vigatamaloti** abbhāmahikādīhi vigatūpakkilesa. Bhāṇu vuccati pabhā, sātisayo bhāṇu etassa atthīti **bhāṇumā**. Sūriyoti āha “**ādicco viyā**”ti.

Gaggarāsuttavaṇṇanā niṭṭhitā.

### 12. Vaṅṅisasuttavaṇṇanā

**220.** So kira vicaratīti sambandho. “**Yathāyaṃ dīpo jambudīpoti** jambunā paññāto, evāhampi tena jambunā paññāyissa”nti **jambusākhaṃ pariharitvā**. **Vādaṃ katvāti** “imasmim vāde sace te parājayo hoti, tvam me dāso hohi. Sace me parājayo, aham te bhariyā”ti evaṃ katikaṃ katvā. **Vāde jayaparājayānubhāvenāti** tathāpavattite vāde paribbājakassa jayānubhāvena ceva attano parājayena ca. **Vayaṃ āgammāti** sippuggahaṇavayaṃ āgamma. **Vijjanti** mantam.

Nibbattagativibhāvanavasena chavasīsabhāvaṃ dūseti vināsetīti **chavadūsakaṃ sippaṃ**, tathāpavattaṃ mantapadaṃ. **Attano ānubhāvenāti** niraye nibbattasattassa sīsam yattha katthaci ṭhitam buddhānubhāvena ānetvā dassetvā. **Khīṇāsavassa sīsanti** paramappicchatāya kañcīpi ajānāpetvā araṇṇam pavisitvā parinibbutassa khīṇāsavassa chaḍḍitaṃ sīsakaṭāham. **Dassesīti** attano ānubhāvena

ānetvā dassesi.

“**Tumhe, bho gotama, jānāthā**”ti kāmam vaṅgīso nibbattaṭṭhānaṃ sandhāya pucchati, bhagavā pana anupādisesanibbānaṃ sandhāya “**āma, vaṅgīsa...pe... gatim jānāmi**”ti āha. Vuttañhetam “nibbānaṃ arahato gatī”ti. Vaṅgīso sayam mantabalena gatipariyāpannassa gatim jānanto bhagavantampi “ayampi tathā”ti maññamāno “**mantena jānāsi, bho gotamā**”ti āha. Bhagavā attano buddhañānameva mantam katvā dīpento “**āma, vaṅgīsa, ekena manteneva jānāmi**”ti āha. Mudhā eva dātābanti **amūliko**. Anantarāhitāya bhūmiyā sayanam **thaṇḍilaseyyā**. Ādi-saddena sāyatatiyam udakoroḥaṇabhūmiharaṇādīm saṅgaṇhāti. **So tam...pe... arahattam pāpuṇī**ti iminā vaṅgīsatthero pabbajitvā na cirasseva sukhāya paṭipadāya arahattam patto viya dissati, na kho panetam evam datṭhabbam, āyatim thero pabbajitvā samathavipassanāsu kammam ārabhitvāpi dukkhāya paṭipadāya tādisam kālam vītināmetvā arahattam pāpuṇi. Tenāha –

“Nikkhantam vata mam santam, agārasmānagāriyam;  
Vitakkā upadhāvanti, pagabbhā kaṇhato ime”. (sam. ni. 1.209; theragā. 1218);

Āyasmato vaṅgīsassā anabhirati uppanā hoti, rāgo cittaṃ anuddhamseti, “kāmarāgena ḍayhāmi, cittaṃ me pariḍayhatī”tiādi (theragā. 1232).

**Vimuttisukhanti** sabbaso kilesavimuttiyam nibbāne ca uppannam sampatiarahattaphalasukham **paṭisamvedentoti** yathāparicchinnam kālam pati sammadeva vedento anubhavanto. Kavinā katam, tato vā āgataṃ, tassa vā idanti kāveyam, tadevettha “**kāveyya**”nti vuttam. **Ye niyāmagataddasāti** ye bhikkhū ariyā buddhānaṃ sāvaka phalaṭṭhabhāvena niyāmagatā ceva maggaṭṭhabhāvena niyāmadasā ca. **Niyāmoti** hi sammattaniyāmo adhippeto. **Suāgamananti** mama imassa sathhuno santike āgamanam upagamanam, imasmiṅca dhammavinaye āgamanam pabbajanam upasampadā sundaram āgamanam. Tatha kāraṇamāha “**tisso vijjā**”tiādi. **Avuttampi** gāthāya atthato gahitameva therassa chaḷabhiññabhāvato.

Vaṅgīsasuttavaṇṇanā niṭṭhitā.

Sāratthappakāsiniyā samyuttanikāya-aṭṭhakathāya

Vaṅgīsasamyuttavaṇṇanāya līnatthappakāsanaṃ samattā.

## 9. Vanasamyuttam

### 1. Vivekasuttavaṇṇanā

**221. Samvejetukāmā**ti atthato samvegam uppādetukāmā. Tathābhūtā nam kilesasaṅgaṇikādito vivecetukāmā nāma hotīti vuttam “**vivekam paṭipajjāpetukāmā**”ti. **Bāhiresūti** gocarajjhattato bahibhūtesu. **Puthuttārammaṇesūti** rūpādīnānārammaṇesu. **Caratīti** pavattati. **Tvam janoti** tvam attano kilesehi janānato visum jāto tādisa eva aññasmiṃ jane imam ayonisomanasikāravasena pavattamānam chandarāgam vinayassu vinodehi. **Satam tam sārāyāmeti** niyyānikasāsane pabbajitvā satthu santike kammaṭṭhānam gahetvā araññāvāsena ca satimantam paṇḍitam tam mayampi yathāuppannam vitakkam vinodanāya sārāyāma, satam vā sappurisānam kilesavigamanadhammam paṭipajjitvā vasantam tam sārāyāma vaṭṭadukkham. **Pātālanti** mohapātālam kilesarājo, tadeva “pātāla”nti vuttam. **Mā avaharīti** heṭṭhā duggatisotam mā upanesi. **Sitanti** sambandham. Tenāha “**sarīralagga**”nti. **Vivekamāpannoti** kilesavivekam samathavipassanābhāvanamāpanno. **Uttamavīriyanti** ussohlilakkhaṇappattam vīriyam, catubbidham samappadhānavīriyam vā sampattam. **Paggayhāti** āropetvā. **Paramavivekanti** paramam samucchadavivekam.

Vivekasuttavaṇṇanā niṭṭhitā.

## 2. Upaṭṭhānasuttavaṇṇanā

**222. Kāyadaratho hotiyeva** niyamena, na cittadaratho tassa maggeneva samugghāṭitattā.

**Jarāturoti** jarābhibhavanena āturoyeva. Padadvayepi eseva nayo. Upariṭṭhatāya parito dīghaputhulatāya ativiya vijjhatīti sattisallaggahaṇaṃ. Evaṃ hissa taṇhāsallassa sadisatā. Avijjāya pana sammohāpādanena dukkhāpādanena ca visasadisatā. **Ruppatoti** vikāraṃ āpādiyamānassa pīḷiyamānassāti atthoti āha “**ghaṭṭiyamānassā**”ti.

**Pabbajitanti** sasantānato pabbajitaṃ vā rāgādimalato pabbajitaṃ vā. **Tasmāti** yasmā therassevetam vacanaṃ, tasmā **ayaṃ** idāni vuccamāno **ettha** gāthāya attho. **Devatāya** hītiādi vuttasseva atthassa pākāṭakaraṇaṃ. **Etthāti** sesagāthāsu. Atthassa vuttanayatā “**anuttānapadavaṇṇanā**”ti āha. **Vinayāti** hetumhi nissakkavacananti tassa hetumhi karaṇavacanena atthamāha “**vinayenā**”ti. Tathā “**samatikkamā**”ti etthāpi. **Paramaparisuddhaṃ** saṃkilesasamucchindanato. **Āraddhavīriyanti** sambhāvītavīriyaṃ. Sambhāvanañcassa paggaṇhanaṃ paripūraṇañcāti āha “**paggaḥitavīriyaṃ paripuṇṇavīriya**”nti.

Upaṭṭhānasuttavaṇṇanā niṭṭhitā.

## 3. Kassapagottasuttavaṇṇanā

**223. Chetanti** migānaṃ jīvitaṃ chetaṃ. Tenāha “**migaluddaka**”nti. **Rohitamiganti** lohitavaṇṇaṃ khuddakamigaṃ, “mahārohitamiga”nti keci. Satthu santike kammaṭṭhānaṃ gahetvā tassa janapadassa sulabhabhikkhatāya tattha gantvā viharatīti imamattaṃ sandhāya “**paṭhamasutte vuttanayenevā**”ti vuttaṃ. Ayaṃ pana thero pañcābhiñño vipassanākammiko. **Ṭhatvāti** padānubandhanavasena gamanaṃ upacchinditvā therassa āsannaṭṭhāne ṭhatvā. Tassa vacanaṃ **sotum āraddho. Aṅguṭṭhakaṃ jālāpesīti** adhiṭṭhānabalena daṇḍadīpikaṃ viya attano aṅguṭṭhakaṃ jālāpesi. **Akkhīhipi passati** aṅguṭṭhakaṃ jālamānaṃ. **Kaṇṇhipi** suṇāti tena vuccamānaṃ dhammaṃ ekadesena. Cittaṃ panassa dhāvatīti sambandho. **Etassapīti** luddakassapi.

**Appapaññanti** ettha **appa**-saddo “appaharite”tiādīsu viya abhāvatthoti āha “**nippañña**”nti. **Kāraṇajānanasamatthenāti** iminā kāraṇena sattānaṃ sukhaṃ, iminā dukkhanti evaṃ samācaramānena kāraṇaṃ jānituṃ samatthena kammassakatañānasampayuttacittenāti attho. **Suṇātīti** kevalaṃ savanamattavasena suṇāti, na tadatthavasena. Tenāha “**atthamassa na jānātī**”ti. **Kāraṇarūpānīti** sabhāvākāraṇāni. **Kiṃ me imināti?** “Idaṃ papañca”nti pahāya. **Vīriyaṃ paggayhāti** catubbidhaṃ sammappadhānaṃ vīriyaṃ paggaṇhitvā.

Kassapagottasuttavaṇṇanā niṭṭhitā.

## 4. Sambahulasuttavaṇṇanā

**224. Sambahulāti** suttantanayena sambahulā. Suttante sajjhāyimsūti **suttantikā**. Vinayaṃ dhārentīti **vinayadharā. Yuñjantīti** vāsadhure yogaṃ karonti. **Ghaṭentīti** tattha vāyāmaṃ karonti. Karontānaṃyeva aruṇo uggacchatīti sambandho.

**Kometi** kiṃ ime? Tenāha “**kahaṃ ime**”ti? Vajjibhūmiṃ vajjiraṭṭhaṃ gatāti **vajjibhūmiyā**. Tenāha “**vajjiraṭṭhābhimukhā gatā**”ti. Natthi etesaṃ nīkebhaṃ nibaddhanivāsaṭṭhānanti **aniketā** tenāha “**agehā**”ti. Utu eva sappāyaṃ, utuvasena vā kāyacittānaṃ kallattā sappāyaṃ. Esa nayo sesesupi.

Sambahulasuttavaṇṇanā niṭṭhitā.

### 5. Ānandasuttavaṇṇanā

**225. Ativelanti** atibahukālaṃ. Bhikkhunā nāma upagatānaṃ upanisinnakathāmattaṃ vatvā ganthadhurehi vāsadhurehi vā yuttapayuttacittena bhavitabbaṃ, nātiavelaṃ tesam saññattibahulena. Thero pana tadā kenaci kāraṇena bahuvelaṃ gihisaññattibahulo ahosi, taṃ sandhāya vuttaṃ “ativela”ntiādi. Idāni tamatthaṃ vibhāvetuṃ “**bhagavati**”tiādi vuttaṃ. **Tanti** taṃ tādisaṃ saññāpanaṃ sandhāya etaṃ “ativelaṃ gihisaññattibahulo”ti vacanaṃ vuttaṃ. **Bhikkhusaṅghassa kathaṃ sutvāti** saṅghassa majjhe nisīditvā therena kathitattā vuttaṃ. **Satthusāsananti** piṭakattayaṃ vadati.

**Pasakkiyāti** upasakkitvā gantvā. Taṃ pana tattha ajjhogāhanaṃ hotīti āha “**pavisivā**”ti. Saṅkhāradukkhatō nibbinnahadayassa sabbasaṅkhāravinissaṭaṃ nibbānaṃ yāthāvato paccavekkhantassa sammadeva samassāsakaraṃ hutvā upaṭṭhahantaṃ taṃ upari adhigamāya ussukkaṃ karonto nibbānaṃ hadaye nikkhipati nāmāti āha – “**nibbānaṃ...pe... opeti nāmā**”ti. Nibbānaṃ...pe... ārammaṇato opeti nāmāti ānetvā sambandho. Atthavirahitā “biḷibiḷi”ti pavattakiriyaṃ biḷikā, ayaṃ pana gihisaññattikathā therassa attano sāmāññatthaasādhanato devatāya biḷikā viyāti **biḷibiḷikāti** vuttā.

Ānandasuttavaṇṇanā niṭṭhitā.

### 6. Anuruddhasuttavaṇṇanā

**226. Anantare attabhāveti** atītānantare devattabhāve. Thero hi tāvatimsadevalokā cavivā idhūpapanno. **Aggamahesīti** kāci paricārikā devadhītā cittaṇḍhānamattena idānipi devakāye bhavissati upacitakusaladhammattāti maññamānā tasmim vattamānaṃ viya kathenti “**sobhasi**”ti āha. Evaṃ atītampissa dibbasotaṃ paccuppannaṃ viya maññeyya nāticirakālattāti dassento “**pubbepi sobhasi**”ti āha. Sugatinirayādīduggatīyā vasena duggatā etarahīti adhippāyo. **Paṭipattiduggatīyā** kāmesu sammucchitabhāvato.

**Paṭiṭṭhahantoti** nivisanto. **Aṭṭhahi kāraṇehīti** cirakālaparibhāvanāya viruḷhamūlehi ayonisomanasikārādiṭṭhāpaccayamūlakehi vuccamānehi aṭṭhahi kāraṇehi. **Ratto rāgavasenāti** sabhāvato saṅkappato ca yathāsamīhite iṭṭhākāre sakkāye sañjātarāgavasā ratto giddho gadhito. **Paṭiṭṭhātīti** oruyha tiṭṭhati. **Duṭṭho dosavasenāti** sabhāvato saṅkappato ca yathāsamīhite aniṭṭhākāre sakkāye sañjātadosavasena duṭṭho rupitacitto. **Mūḷho mohavasenāti** asamapekkhanaena mūḷho muyhanavasena. **Vinibaddhoti** ahaṃkārena visesato nibandhanato mānavatthusmim bandhito. **Mānavasenāti** tena tena maññanākārena. **Parāmaṭṭhoti** dhammasabhāvaṃ niccādivasena parato āmaṭṭho. **Diṭṭhivasenāti** micchādassanavasena. **Thāmagatoti** rāgādikilesavasena thāmaṃ thirabhāvaṃ upagato. **Anusayavasenāti** maggena appahīnatāya anu anu santāne sayanavasena. Appahīnaṭṭho hi tesam anusayaṭṭho. **Aniṭṭhaṅgatoti** saṃsayito. **Vikkhepagatoti** vikkhittabhāvaṃ upagato. **Uddhaccavasenāti** cittassa uddhatabhāvavasena. **Tāpīti** tāpi devakaññāyo. **Evaṃ paṭiṭṭhitāvāti** yathāvuttanayena rattabhāvādinā sakkāyasmim paṭiṭṭhitā eva. **Naradevānanti** purisabhūtadevānaṃ.

**Paṭigantunti** apekkhāvasena tato apagantaṃ apekkhaṃ vissajjentaṃ. **Dussantanti** dasantaṃ, “vattha”nti keci. **Sūcim yojetvāti** sibbanasuttana sūcim yojetvā pāse ca pavesetvā. Manāpakāye devanikāye jātā **manāpakāyikā**. Tesam pabhāvaṃ dassentaṃ “**manasā**”tiādi vuttaṃ. **Samajjanti** saṃhitam. **Gamanabhāvanti** gamanajjhāsayam. **Vikkhīṇoti** vicchindanavasena khīṇo. Devatānaṃ uttarimanussadhammārocane doso natthīti tāsam puna anāgamanatthaṃ arahattaṃ byākāsi.

Anuruddhasuttavaṇṇanā niṭṭhitā.

## 7. Nāgadattasuttavaṇṇanā

**227. Atikālenāti** ativiya pubbaṅhakālena, kālassevāti attho. **Koṭisammuṅjanīyāti** sammuṅjanikoṭiyā, sammuṅjanīyā ekadesenevāti attho. Iminā sammajjane amanāpakāritam dasseti. **Majjhanhike vītivatteti** gihisaṃsaggavasena kālam vītināmento majjhanhe bahuvītivatte. **Aññehi bhikkhūhīti** nātikālam pavīṭṭhehi. Nissakkavacanañcetam. **Bhāyāmi nāgadattanti** tassa paṭipattim bhāyitabbam katvā devatā vadantī paṭipattiyam niyojeti. **Suppagabbhanti** kāyapāgabbīyādīhi ativiya samannāgatam.

Nāgadattasuttavaṇṇanā niṭṭhitā.

## 8. Kulagharāṇīsuttavaṇṇanā

**228. Ogāhappattoti** vissāsavasena anuppavesam patto. **Aññataram kulanti** tasmim kule jāyampattim sandhāya vadati. “**Bahūpakāram me etam kulam** ciram sappāyāhāradānādinā; tasmā idhāham aggadakkhiṇeyyo jāto; imesaṃyeva deyyadhammapaṭiggaṇhanena puññam vaḍḍhessāmī”ti cintesi. Tenāha “**aññattha gantvā kim karissāmī**”tiādi. **Sāti** devatā. **Ubhopeteti** tam bhikkhuñca gharāṇiñca sandhāya vadati. **Paṭigādhappattāti** paṭigādham pattā aññamaññasmim patiṭṭhitavissāsena.

Vissamappattivasena santiṭṭhanti etthāti **saṅghānam**, vissamanatṭhānam. **Samāgantvāti** sannipattivā. Paṭiññūdāharaṇehi mantayatīti **mantanam**, ñāpakam kāraṇam. **Paṭilomasaddāti** paṭilomabhāvena patitattā asaccavibhāvanā paṭikūlasaddā. **Tena kāraṇenāti** tena kāraṇapaṭirūpakena micchāvacaṇena. **Na maṅkuhotabham** akārahābhāvato. **Saddena paritassatīti** parehi attani payuttamicchāsaddamattena paritassanaṣīlo. **Vatam na sampajjatīti** yathāsamādinnavatam lahucittatāya na pāripūrim gacchati. **Sampannavatoti** paripuññasīlādivatagūṇo

Kulagharāṇīsuttavaṇṇanā niṭṭhitā.

## 9. Vajjiputtasuttavaṇṇanā

**229. Vajjiraṭṭhe rājaputtoti** vajjiraṭṭhe jātasamvaddho vajjirājaputto. **Sabbaratticāroti** chaṇasampattiyā ito cito carantehi anubhavitabbanakkhattamaho. Tenāha “**kattikanakkhattam ghoṣetvā**” tiādi. **Ekābaddham hotīti** yasmā cātumahārājikadevā tasmim divase nakkhattam ghoṣetvā attano puññānubhāvasiddhāya dibbasampattiyā mahantam nakkhattakīlāsukham anubhavanti, tasmā tam tehi ekābaddham viya hoti. **Bheriādītūriyānanti** bherimudīngasaṅkhapaṇavavīnādītūriyānam. **Tālitānanti** āradhalayānurūpam pahaṭānam. **Vīṇādīnanti** vīṇaveṇugomukhīdīnam. **Vādītānanti** yathāradhamucchanānurūpam saṅghaṭṭitānam. **Abhāsīti** tena saddena ākaḍḍhiyamānahadayo ayoniso ummujjitvā “mahatī vata me jānī”ti anutthunanto abhāsi. **Chaḍḍitadārukam viyāti** vane chaḍḍitaniratthakakaḷaṅgaram viya. **Lāmakataroti** nihīnataro. Devatā paṭhamappitam āṇim paṭāṇiyā nīharantī viya tena bhikkhunā vuttamattham apanentī “tassa te bahukā pihayanti”ti avocāti vuttanti dassento “**thero**”tiādimāha. Saggam gacchantānam yathā nerayikā pihayanti, evam sammāpaṭipannassa tuyham bahū pihayanti, tasmā tvam “pāpiyo”ti attānam mā maññitthāti adhippāyo.

Vajjiputtasuttavaṇṇanā niṭṭhitā.

## 10. Sajjhāyasuttavaṇṇanā

**230. Nissaraṇapariyattivasenāti** addhā imam pariyattim nissāya vaṭṭadukkhatto nissaritam labbhāti evam nissaraṇapariyattivasena. **Sajjhāyanatoti** vimuttāyatanasīse ṭhatvā sajjhāyanato. Idāni tassa nissaraṇapariyattivasena sajjhāyanakaraṇam, paṭipattivasena vattapaṭivattakaraṇam,



vipassanābhāvanañca dassetum “**so kirā**”tiādi vuttam. Arahattam pattadivase paṭipattikittanāya purimadivasesupi tathā paṭipajji, vipassanam pana ussukkāpetum nāsakkhīti dasseti. **Kālam ativatteti** idaṃ “**saṅkasāyatī**”ti padassa atthavacanam. **Therassāti** sajjhāyakattherassa.

**Dhammapadānīti** sīlādidhammakhandhadīpakāni padāni. Tenāha “**sabbampi buddhavacanam adhippeta**”nti. Na gaṇhāsi uddesanti adhippāyo. Pāḷiyam “bhikkhūhi saṃvasanto”ti iminā tesam dhammassavanatthāyapi dhammo pariyāpuṇitabboti dasseti. Virajjati etenāti **virāgo**, ariyamaggo. **Jānītvāti** pariññābhisamayavasena diṭṭhasutādiṃ yāthāvato jānītvā paṭivijjhitvā. **Vissajjananti** pahānam. **Na buddhavacanassa** vissajjanam. Bhaṇḍāgārikapariyattiyāpi anuññātattā pageva nissaraṇatthāya, tattha pana mattā jānītabbāti dassento “**ettāvātā**”tiādimāha.

Sajjhāyasuttavaṇṇanā niṭṭhitā.

### 11. Akusalavitakkasuttavaṇṇanā

**231. Akusale vitakketi** akosallasambhūtaṭṭhena akusale micchāvitakke. Yoni vuccati upāyo, tasmā asubhādike subhādivasena manasikāro ayonisomanasikāroti āha “**anupāyamanasikārenā**”ti. **Pāsādikakammaṭṭhānanti** pasādāvaham buddhānussatiādikammaṭṭhānam. **Balavapītiñca sukhañcāti** nīvaraṇavikkhambhanato balavantam upacārajjhānasahagatam pītiñca sukhañca.

Akusalavitakkasuttavaṇṇanā niṭṭhitā.

### 12. Majjhanhikasuttavaṇṇanā

**232. Nandanavaggeti** nandanavaggavaṇṇanāyam tattha idhāpi gāthāya visesābhāvato. Yadi evam kasmā tattha saṅgītam idha gahitanti? Devatāpaṭisaṃyuttatam upādāya devatāsaṃyutte saṅgahitampi aṭṭhuppattiyā paṭisaṃyuttattā idha gahitam.

Majjhanhikasuttavaṇṇanā niṭṭhitā.

### 13. Pākatindriyasuttavaṇṇanā

**233. Terasame** yam vattabbam, tam vitthāritamevāti yojanā. **Jantudevaputtasutteti** jantudevaputtasuttasaṃvaṇṇanāya. “Tattha saṅgītam idhāpī”tiādi anantarasuttavaṇṇanāyam vuttanayameva.

Pākatindriyasuttavaṇṇanā niṭṭhitā.

### 14. Gandhatthenasuttavaṇṇanā

**234. Gandhārammaṇam upanijjhāyatīti** gandhasaṅkhātam ārammaṇam upecca nijjhāyati, rūpārammaṇena viya viññāṇena rūpaṃ, gandhārammaṇena tam upecca nijjhāyati paccakkhato, yāthāvato sabhāvato paṭivijjhatīti attho. **Upasiṅghissatīti** tanhāvasena upagantvā siṅghissati.

**Ekaṅgametaṃ theyyānanti** ārammaṇavasena theyyavatthūsu vibhajyamānesu ekamaṅgametaṃ gandhārammaṇanti āha “**thenitabbāna**”ntiādi. Ojāpekkhāya theyyāya pavattamānāya dhammārammaṇatāpi tassā siyā, sā pana na madhurā theyyakatā cāti “**pañcakotṭhāsāna**”nti vuttam. Kāmañca tam gandhārammaṇam kenaci pariggahitam na hotīti ādiyitum sakkā, satthārā pana ananuññātattā na yutto tassa paribhogo. Yam pana tena bhikkhunā vuttam “**na harāmi na bhañjāmi**”ti, tassapi ayameva parihāro. Vaṇṇiyati phalam etenāti **vaṇṇam**, kāraṇanti vuttam

“vaṇṇenāti kāraṇenā”ti.

**Tasminti** tasmim bhikkhusmim. **Ākiṇṇakammantoti** taṇhādīṭṭhiādivasena akusalakammanto dīṭṭhimohataṇhādivasena ādito paṭṭhāya kusalakammānaṃ paṭikkhepanato. Dīṭṭhivasena ca kathinakakkhaḷakharigatattā “**akhīṇakammanto kakkhaḷakammanto**”ti vuttaṃ.

**Ākiṇṇaluddoti** ākiṇṇo hutvā kakkhaḷo. Tenāha “**bahupāpo**”tiādi. **Makkhitoti** litto. **Tanti** devatācodanaṃ. **Tasmāti** atikkamma ṭhitattā “tvañcārahāmi vattave”ti evamāha.

**Gavesantassa** attano santāne uppādanavasena pariyesantassa. Anekayojanāyāmaṃvitthāraṃ gaganatalaṃ byāpetvā uppannavalāhakakūṭappamāṇaṃ viya. **Suddhoti** sīlena parisuddho ayanti jānāsi. **Sugatinti** sundaranibbattiṃ. Tena nibbānassapi saṅgaho siddho.

Gandhatthenasuttavaṇṇanā niṭṭhitā.

Sāratthappakāsiniyā saṃyuttanikāya-aṭṭhakathāya

Vanasaṃyuttavaṇṇanāya līnatthappakāsanaṃ samattā.

## 10. Yakkhasaṃyuttaṃ

### 1. Indakasuttavaṇṇanā

**235.** Attano pariṇāyakattena indo nāma mahesakkho, indoti samaññā assāti katvā “indako”tipi vuccati, tassa **indakassa**. Indakūṭe pabbate nivasatīti indakūṭanivāsī, tassa **indakūṭanivāsino**. Balikammehi yajitabbato pūjitabbato yakkho, tassa **yakkhassa**. Indassa nivāsaṭṭhānabhūtaṃ kūṭaṃ indakūṭanti **yakkhato kūṭena nāmaṃ laddhaṃ**. Indakūṭo indo uttarapadalopena yathā “kelāsakūṭo kelāso”ti. Indo yakkhoti **kūṭato yakkhena nāmaṃ laddhaṃ**. Na cettha itarītanissayadoso aññamaññūpalakkaṇabhāvato yathā taṃ “kāyakammaṭṭhāna”nti. **Rūpanti** sakalaṃ rūpakkaṇḍhamāha, na rūpāyananti. Imaṃ sarīraṃ pecca ayaṃ kinti paṭilabhatīti codeti.

**Kuto āgacchatīti** parādhārarūpe jīve attani mātukucchimokkante rūpassa sambhavoti kuto nāma ṭhānato āgacchati. Tenāha “**imāni ca aṭṭhīni imā ca maṃsapesiyo**”tiādi. **Kathaṃ nvayanti** ayaṃ kucchisaṅkhāte gabbhare kathaṃ sajjatīti pucchati. “Sīhānaṃva nadantānaṃ, dāṭhīnaṃ girigabbhare”tiādinā (theragā. nidānagāthā) gabbharo ca kucchivācako āgato. Tenāha “**gabbharasminti mātukucchismi**”nti. **Puggalavādīti** attavādudupādāno. Yathā hi macchamaṃsaṃ bhuttaṃ pheṇaṃ viya hutvā vilīyati, na ca paññāyati sattabhāvena appavattanato, evamevaṃ yadi mātukucchismiṃ gabbhabhāvena uppannaṃ rūpaṃ satto na bhaveyya no vaḍḍheyya, vilīyitvā gaccheyya, paññāyati ca taṃ rūpaṃ, tasmā jīvoti imāya **laddhiyā**. **Evamāhāti** “rūpaṃ...pe... gabbharasmī”nti evamavoca. **Paṭhamanti** etesaṃ pañcannaṃ paṭhamaṃ. Tenāha “**paṭhamena paṭisandhiviññānena saddhi**”nti. “**Jātiuṇṇamsūhīti** jātielākāya uṇṇamsūhī”ti vadanti. “Gabbhaṃ phāletvā gahitauṇṇā **jātiuṇṇā**. Tassā aṃsūhi **tīhi katasuttage**”ti saṃyuttabhāṇakānaṃ adhippāyo.

**Anāviloti** accho, suppasannoti attho. **Evamvaṇṇappaṭibhāganti** vuttappamāṇasaṅghānasamparicchinnaṃ. **Kalalaṃ sampavuccatīti** attabhāvo bhūtopādārūpasāṅkhāto santānavasena pavattamāno kalalaṃ nāmāti kathīyati.

**Kalalāti** yathāvuttakalalarūpahetu taṃ nissāya paccayaṃ katvā. **Maṃsadhovanaudakavaṇṇanti** vaṇṇato maṃsadhovanaudakavaṇṇaṃ, saṅghānato pana vilīnatipusadisamaṃ.

**Paripakkanti** paripākakalalabhāvato paripākaṃ gatam suparipākaṃ gatam. **Samūhatanti** samūhabhūtam saṅgataṃ. **Vivaṭṭamānanti** pariṇamantaṃ. **Tabbhāvanti** karaṇe etaṃ upayogavacanam, tabbhāvena pariṇamantanti attho. Nissakke vā upayogavacanam, tabbhāvato kalalabhāvato kalalam vipariṇamantaṃ. **Abbudaṃ nāma jāyati**, abbudaṃ nāma sampajjatīti attho.

**Vilīnatipusadisā** saṅṭhānavasena, vaṇṇavasena pana sitā arattāva hotīti vadanti. **Maṇḍanti** dārikānaṃ tathā pīlanato nibbattamaricapakkassa sārabhūtam rasaṃ. **Sabbabhāgehi muccatīti** so maṇḍo kapāle alaggo hutvā tassa sabbabhāgehi mucchitvā piṇḍito hutvā tiṭṭhati. **Evarūpā pesi hotīti** sā pesi gabbhāsāye katthaci alaggā yathāvuttamaṇḍo viya piṇḍito hutvā tiṭṭhati. Tenāha “**vilīnatipusadisā**”ti.

**Pesi nibbattatīti** ettha **pesīti** nissakke paccattavacananti āha “**tato pesito**”ti.

**Ghanassa saṅṭhānaṃ. Nibbattaṃ kammapaccayāti** taṃsaṅṭhānaṃ rūpadhammanibbattiyā jāyati. “Jarāmarāṇaṃ aniccaṃ saṅkhatam paṭiccasamuppanna”nti (saṃ. ni. 2.20) hi vuttaṃ.

**Pīlakāti** pīlakasadisā maṃsapiṇḍā jāyanti.

**Sattamādīnīti ādi-**saddena aṭṭhamasattāhato paṭṭhāya yāva ekacattālīsā catuttimśa sattāhāni saṅgaṇhāti. **Pariṇatakālanti** gabbhassa pariṇatakālam. Navamāsato bahi paripakko nāma hoti kesalomādīnibbattito. Tenāha “**dvācattālīse sattāhe etāni jāyanti**”ti.

**Tassāti** gabbhaseyyakasattassa. **Mātuudarapaṭalena ekābaddho hoti** yato mātārā paribhuttaāhāro āmāsāye paṭiṭṭhite gabbhassa nābhinaḷānusārena gabbhagatassa sarīraṃ sampatvā āhārikiccaṃ karoti. **Āhārasamuṭṭhānarūpaṃ samuṭṭhāpetīti** gabbhagatassa kāye oḷāya paccayo hoti. Sā ca taṃ paccayam labhitvā ojaṭṭhamakaṃ rūpaṃ samuṭṭhāpeti. Evaṃ mātārā paribhuttaāhārapaccayena gabbhagato dasa māse yāpeti attano nābhinaḷānusāragateneva tena yāva āhārasamuṭṭhānasattāho, tato paṭṭhāya āharaṇato. Keci pana “mātārā paribhuttaāhāro bāhiravaggo viya tassa kāyam abhisanneti parisanneti, tena so yāpeti”ti vadanti. Kucchigataṃ udarapaṭalena tirohitattā bahi ṭhitanti vattabbaṃ na arahatīti “**kucchiyā abhantaragato**”ti āha. **Mātukucchigato naroti** mātu tirokucchigato. **Evaṃ khoti** iminā yathāvuttākārena ayam satto...pe... nibbattati, tasmā rūpaṃ na jīvo. Na hi diṭṭhigatassa sattāhakkamena vuḍḍhippatto icchito aniccatāpattito.

Indakasuttavaṇṇanā niṭṭhitā.

## 2. Sakkanāmasuttavaṇṇanā

**236. Sakkanāmakoti** baliputto viya sakkassa vasena gahitanāmo. “Eso kirā”ti pāṭho. “Eko kirā”tipi likhanti. Mārassa pakkhe gato **mārapakkhiko. Yadaññanti** ettha **yanti** kiriyāparāmasanaṃ, tasmā yaṃ aññassa anusāsaṃ, taṃ samaṇassa na sādhiṭi yojanā. **Kāraṇenāti** kāraṇamattena saṃvāso jāyati. **Yena kenaci** gahaṭṭhena vā pabbajitena vā. **Taṃ** kāraṇantaraṃ samāgataṃ purisaṃ **sappañño** sambuddho **anukampitaṃ nārahati** visesādhiḡamābhāvā, sati pana tasmim savisesaṃ pasādo hotīti. **Manasā ce...pe... na tena hoti saṃyutto** sinehasena anukampā anuddayā tassā asaṃkiliṭṭhasabhāvattā.

Sakkanāmasuttavaṇṇanā niṭṭhitā.

## 3. Sūcilomasuttavaṇṇanā

**237.** Gayāya avidūre bhavo gāmo “gayā”ti vuttoti āha “**gayāya**”nti, tenāha “**gayāya avidūre**

**nivīṭṭhagāmaṃ upanisāyāti attho**”ti. Gocaragāmanidassanaṃ hetama. **Idaṃ upari idaṃ heṭṭhāti natthi** uppaṭipāṭiyo mañcapādānaṃ dvīsu passesu dīghabhāvena. Balikammaṭṭhāya kama devatādhiṭṭhānanti adhippāyena **devaṭṭhāne ṭhapenti**. Aṭṭhapādamañcasadiso kira so heṭṭhupari parivattetabbato. Kathinasibbanasūci **kathinasūci**. **Apaccattharivāti** kiñci saṅghikasenāsanassa upari paṭicchadanaṃ apaccattharivā. **Gavacchivijjhitaṃ viyāti** tehi sūcilomehi gavacchijālaṃ viya gataṃ sabbaso samohataṃ.

Idhāpi “kharasarīro”ti vatvā kharasarīraṃ kathinasūcisadisatāya lomassāti tassa tathābhāvassa kāraṇaṃ dassento “**so kirā**”tiādimāha. **Attano hatthehīti** saṅghikatelasammakkhitehi attano sarīraṃ makkhesi. **Itīti** vuttākārena.

**Samāgamaṭṭhānanti** yakkhasannipāṭaṭṭhānaṃ. **Soti** sūcilomo yakkho. **Manti** ca tameva vadati.

**Uṭṭhāpetvāti** uddhaggā katvā. **Apanāmesīti** yathā so attano kāyaṃ upanetaṃ na sakkoti, tathā karonto thokaṃ apanāmesī. **Amanuññoti** pharusatikkhatāya na manuñño. **Cittaṃ vā te khipissāmīti** mayhaṃ ānubhāvena tava cittavikkhepaṃ vā karissāmi. Yathā pana so cittavikkhepaṃ kareyya, taṃ dassetaṃ “**yesaṅhī**”tiādi vuttaṃ. **Bheravaṃ vāti** vuttākārena aññathā vā bhayānakaṃ dassanamatteneva sattānaṃ bhayaṃ chambhitattaṃ lomahaṃsaṃ uppādetuṃ samatthaṃ. “Kathentānaṃyevā”ti vā pāṭho. Taṃ dvīsu pādesu gahetvā pāraṃ gaṅgāya khipissāmīti yojanā.

**Kutonidānāti** kasmā kāraṇā? Aṭṭhakathāyaṃ pana samāsapadametaṃ, vibhattialopena niddesoti dassetaṃ “**kiṃnidānā kiṃpaccayā**”ti? Attho vutto. **Cittaṃ ossajantīti** kusalacittaṃ pavattituṃ appadānavasena purato khipanti. **Kuto samuṭṭhāyāti** micchāvitakkānaṃ samuṭṭhānaṃ pucchati?

Kāmarāgādayo subhanimittādīsu ayonisomanasikārahetū. Kāmo pana ayonisomanasikāro ca niyakajjhataṭṭhāpariyāpannoti āha “**ayaṃ attabhāvo nidānaṃ etesanti itonidānā**”tiādi. **Evamevāti** aṭṭhakathāyaṃ kīlāpasutakumārakā viya micchāvitakkā daṭṭhabbā, tesamaṃ uppattiṭṭhānabhūto loko viya ayaṃ attabhāvaloko. Tehi ossajiyamānaṃ dhaṅkaṃ viya cittaṃ, tassa pāde baddhadīghasuttakaṃ viya taṃ dūrānubandhaṃ saṃyojananti evamaṃ upamāya saṃsandanaṃ daṭṭhabbamaṃ.

Pāpavitakkānaṃ taṃsampaṃyuttakilesānañca taṅhā visesapaccayo tadabhāvena tesamaṃ abhāvatoti āha “**taṅhāsinehato jātā**”ti. Attabhāvapariyāpannattā “**attani sambhūtā**”ti vuttaṃ. Tena nesamaṃ anaññahetukataṃ dasseti, **nigrodhasseva khandhajātīti** iminā pana puthubhāvañca, **visattāti**tiādinā dubbinissaṭṭhānañca. **Vatthukāmesu** rūpārammaṇādīsu puthūsu. **Puthū kilesakāmā** kāmarūpataṅhādayo. **Tehi** kilesakāmehi karaṇabhūtehi. **Attabhāvaṃ** khandhapañcakaṃ. **Ye** vipassanāya yuttapayuttā yāthāvato **jānanti**.

**Yatoti** paccatte nissakkavacananti āha “**yaṃ nidānamassā**”ti. “Vinodentī”ti kattuniddesena yena na vinodenti, taṃ kāraṇaṃ bādhitamevāti āha “**maggasaccena vinodentī**”ti. Vinodanañcetta santānato nīharaṇaṃ bahikaraṇaṃ sabbaso pahānaṃ, pahīne ca tasmaṃ kilese oghamaṃ tarantīti dassento “**duttara**”ntiādimāha. Etasmaṃ adhigate na puna bhavoti **apunabbhavo, nibbānanti** āha “**apunabbhavasāṅkhātassā**”tiādi. Yasmā ettha “ye namaṃ pajānanti, yatonidāna”nti padadvayena dukkhasamudayasaccāni, vinodanaggahaṇena maggasaccamaṃ, apunabbhavaggahaṇena nirodhasaccamaṃ pakāsitaṃ, tasmā vuttaṃ “**cattāri saccāni pakāsento**”ti.

**Tasmimyevāti** yattha ṭhito “rāgo ca doso cā”tiādinā pañhaṃ pucchi, tasmimyeva padese ṭhito. **Desanānusārenāti** satthu sāmukkaṃsikkadhammadeśanāya anussaraṇena. **Ñānaṃ pesetvāti** vipassanāpaṭipāṭiyā nibbānaṃ pati anubodhañānaṃ pesetvā pavattetvā. **Sotāpatti phale patiṭṭhitoti** saḥassanāyapaṭimaṇḍitassa paṭhamamaṃgassa adhigamena paṭhamaphale patiṭṭhito paṭilabhatīti yojanā. **Na kiliṭṭhattabhāve tiṭṭhanti** mahānubhāvattā ariyadhammassa. **Setakaṇḍupīlakasūciyoti** setabhāvaṃ patvā kaṇḍupīlakā lomasūciyo **sabbā** anavasesā **patitā** paribhaṭṭhā apagatā.

**Bhummadevatāparihāranti** bhummadevattabhāvanti.

Sūcilomasuttavaṇṇanā niṭṭhitā.

#### 4. Maṇibhaddasuttavaṇṇanā

**238. Sukhaṃ paṭilabhatīti** diṭṭhadhammikādibhedam sukhaṃ adhigacchati. **Niccomeva seyyo** satimato āyatim hitacaraṇato. Maṇibhaddo “satimāpuggalo satokārī sampati veram nappasavati”ti adhippāyena “verā ca parimuccati”ti āha. Bhagavā pana satimantatāsiddhiyā veraparimuccanam na accantikam, nāpi ekantikam paṭipakkhena parato ca appahīnattāti tam nisedhento “**verā ca na parimuccati**”ti vatvā, yam accantikam ekantikaṇca parassa vasena veraparimuccanam, tam dassento “**yassā**”ti gāthamāha. **Karuṇāyāti** appanāpattāya karuṇāya. **Karuṇāpubbabhāgeti** karuṇābhāvanāya vasena uppāditapaṭhamajjhānūpacāre. **Soti** karuṇābhāvanam bhāvento puggalo. **Mettaṃsoti** mettacittam aṃso eko kusalakoṭṭhāso etassāti mettaṃso. **Tassa kenacīti** tassa arahato karuṇāya mettābhāvanāya ca sātisayattā tadabhāvena kenaci puggalena saddhim verappasaṅgo nāma natthi. Iminā khīṇāsavepi mettākaruṇābhāvanārahite koci attano cittadosena veram kareyya, na pana tasmim mettākaruṇācetovimuttisamannāgate koci veram kareyya. Evaṃ mahiddhikā brahmavihārabhāvanāti dasseti.

Maṇibhaddasuttavaṇṇanā niṭṭhitā.

#### 5. Sānusuttavaṇṇanā

**239. Yakkhena gahito hotīti** yakkhena anupaviṭṭho hoti. Tassa yakkhagahaṇassa kāraṇam mūlato pabhuti vitthārato dassetuṃ “**so**”tiādimāha. Tassa antimabhavikattā ādito paṭṭhāya adhisīlasikkhāya sakkaccam pūraṇanti dasseti “**so pabbajitakālato**”tiādinā. **Paccāhāranti** paṭikkhepaṃ. **Imasmim sarabhaññeti** imasmim mama dhammabhaṇane. **Pattinti** pattidānam. **Piyā honti**, tenāha bhagavā “ākaṅkheyya ce, bhikkhave, bhikkhu ‘sabrahmācārīnam piyo ca assam manāpo ca garu ca bhāvanīyo cā’ti, sīlesvevassa paripūrakārī”ti (ma. ni. 1.65). Tathā cāha “**tasmim sāmaṇere**”tiādi.

**Vuḍḍhimanvāyāti** jobbanappattiyā aṅgapaccāṅgānam parivuḍḍhimāgama.

Kāmasambhogasamattatāvāsena **paripakkindriyo**. **Anuyojetvāvāti** vissajjetvāva, gihbhāve vā anuyojetvāva. “Pubbe tuyham putto sīlavā kalyāṇadhammo lajjī kukkucako sikkhākāmoti sambhāvito, idāni tato aññathā jāto”ti ghoṣanāvasena **devatānam antare māheva me lajjam uppādeyya**.

**Pāṭihāriyapakkhañcāti** cātuddasīpañcadasīaṭṭhamīnam yathākkamaṃ ādito antato ādiantato ca pavesanikkhamanavasena uposathasīlassa paṭi paṭi abhimukham paccāvahitabbapakkaṇca. **Terasiyāpīti** param sattamīnavamīsūpīti attho. Pavesabhūtañhi uposathasīlassa sattamīsu samādinnaṃ sīlam paṭipadam, navamīsu nikkhamabhūtanti ācariyā. Porāṇaṭṭhakathāyaṃ pana paccuggamanānugamanapariyāyena vuttanti āha “**manussā**”tiādi. **Aḍḍhamāsanti** sakalākālapakkham. Evañhi vassavāsassa anugamanam gataṃ hoti. **Suṭṭhu samāgatanti** suparisuddham sampannam katvā attano santānam āgataṃ. Tam pana attano cittaṃ samam pakārehi yuttam hotīti āha “**sampayutta**”nti. Arahantānam anukaraṇena **seṭṭhacariyam**. “**Na te hi yakkhā kīlanāti**”ti attano puttassa kāye adhimuccanam attano kīlanam viya hotīti katvā āha.

Upāsikā yathāvuttauposathasīlena sīlavatī, sāmaṇero pana attano sāmaṇerasīlena sīlavā.

**Uppatitvāti** ākāse uppatitvā. **Mokkho natthi** dukkhāvahassa kammassa katūpacittā.

**Duvidhepi kāmeti** vatthukāmakilesakāme. Kilesakāmaṃ pariccajanto eva hi vatthukāme pariccajati nāma. **Vibbhamanavasena āgacchati** bhikkhāya āhinḍanādipabbajitakiccato. **Uppabbajitvā**

vigatasīlassa jīvato ānāpānamattena **jīvantopi so matakova**. Vuttañhetam “maraṇañhetam, sunakkhatta, ariyassa vinaye, yo sikkham paccakkhāya hīnāyāvattatī”ti (ma. ni. 3.45).

**Uṇhaṭṭhenā**ti sapaṇḍāhaṭṭhena. **Abhidhāvathā**ti abhidhāvattīti imasmiṃ abhidhāvanakicce bhaddam te hotūti vatvā gihibhāvāya abhidhāvatha. **Nīharitvā**ti nikkhāmetvā. Ekādasahi aggāhi ādittatā **mahādāhasadise**. **Sallakkhetvā**ti gihibhāve ādīnavam, pabbajjāya ānisamsaṇca sallakkhetvā. **Hirōttappam paṭilabhitvā** “mama uppabbajjitukāmatam sabrahmacāriṇo jānissantī”ti. Catunnam parisānam cittasaṅkhobhavasena **sakalajambudīpam khobhetvā**.

Sānusuttavaṇṇanā niṭṭhitā.

## 6. Piyaṅkarasuttavaṇṇanā

**240. Paccanteti** pariyante. **Pāṭiyekanti** saṅgītikāle visuṃ. Yamakavaggādikā brāhmaṇavaggapariyosānā chabbīsati vaggā etissāti **chabbīsativaggā**, **tantīti** pāḷi. Uccārapassāvādi evarūpam **dubbhojanam**, “asucijegucchabhāvena duṭṭhu bhojana”nti katvā, dubbhojanaggahaṇena vā vantagabbhamalādīni atidisati. **Chaviādīni chetvā**ti chaviādīni ativiṃjha ativiya pavisitvā. **Aṭṭhimiṅjam āhacca aṭṭhāsi** pītisamuṭṭhānaulāroḷārārūpappavattiyā. Tenāha “**hadayaṅgamanīyo hutvā**”ti.

**Dhammatāya samādiṇṇanti** kassaci santike aggahetvā sayameva tasmīṃ khaṇe saṃyatā homāti yathāsaṃyatā. **Tatīyapadenā**ti “sikkhema susīlya”nti iminā padena. **Sesāti** vuttāvasesā. **Tisso** adinnādānamicchācārasurāpānaviratiyo. **Gahitā** gobalībaddaṅāyena. Chātakam dubbhikkhaṇca etthāti **chātakadubbhikkhā**, jighacchādubbhikkhābahulāyāti attho. **Pisācayakkhayoniyāti** pettivisayasadisayakkhayoniyā api nāma mucceṃtīti yojanā.

Piyaṅkarasuttavaṇṇanā niṭṭhitā.

## 7. Punabbasusuttavaṇṇanā

**241.** Vasanatṭhānaggahaṇena rattitṭhānadivāṭṭhānādayo saṅgaṇhāti. **Dvādasahatthamattameva gaṇhāti** pakatisaṅcaraṇūpacāramattabyāpanato. **Yathāparisanti** parisānurūpam, yattha yattha parisā tiṭṭhati, tam tam ṭhānam gacchati parisapariyantikattā. Satthu mukhavikārābhāvato pavesānuṅṅam sallakkhentī “nūna ayaṃ katādhikārā bhavissatī”ti anumānasiddham **upanissayam disvā**. **Ekībhāvagamānenāti** hatthapāsūpagamanena parisāya missībhāvappattiyā. **Puttakāti** puttaputtiyo. Anukampāyaṅhi **ka-saddo**.

Nibbānārammaṇena ariyamaggena muñciyamānā ganthā “**nibbānam āgamma pamuccantī**”ti vuttā. **Velātikkantāti** pamānato paricchindituṃ na sakkāti āha “**pamāṇātikkantā**”ti. **Piyāyanāti** āsīsanā. Āsīsanam pemavasena pemavatthuno esanā patthanāva hotīti āha “**magganā patthanā**”ti. **Tatoti** piyaputtādīto. **Pāṇinanti** sāmiatthe puthuvacanam dukkhasaddāpekkham. **Ke mocetīti** mocanakiriyāya kammaṃ pucchati? Ibhāro pana atthavasena vibhattivipariṇāmoti “**pāṇineti āharitvā vattabba**”nti āha. **Abhisambudhanti** abhisambudhanto. Tenāha “**abhisambuddho**”ti. **Saddhammassāti** upayogathe sāmivacananti āha “**saddhammeva ajānitvā**”ti.

**Puttassa anumodanam karontīti** puttassa paṭipattianumodanam karontī. **Uggatāti** ettha kalale vaṭṭadukkhe nimujjamānā tato sīsam ukkhipituṃ asakkonti ajja buddhānubhāvena paññāsīsam ukkhipitā uggatā. Puna vinipātābhāvato sammadeva uggatattā **samuggatā**. Tathābhūtā sāsānēpi uggatā samuggatā jātā. **Catusaccapaṭivedhabhāvanti** catusaccapaṭivedhassa atthibhāvam. **Kaṇḍukacchuādīti ādi-**saddena jegucchaasātādīṃ saṅgaṇhāti. **Dibbasampattim paṭilabhati** pavattiyam sampattidāyino kammaṃsa katokāsattā. **Tuṇhī uttarike hohīti** mātu-vacanam sampaṭicchitvā tassa visesādhigamassa

avibandhakaraṇasammāpayogena yathāladbhavisesāya mātuyā vasena yasmā dhītā diṭṭhadhammikasampattilābhī, tasmā vuttam **“mātu ānubhāvenevā”**ti.

Punabbasusuttavaṇṇanā niṭṭhitā.

## 8. Sudattasuttavaṇṇanā

**242. Karaṇīyenāti** ettha **karaṇīyanti** vāññjakammaṃ adhippetanti taṃ vivaranto **“anāthapiṇḍiko cā”**tiādimāha. **Vikkīyatīti** vikkayaṃ gacchati. **Tatheva karotīti** yathā rājagahaseṭṭhinā sāvattim gantvā kataṃ, tatheva rājagahaṃ gantvā karoti. **Svāyanti** anāthapiṇḍiko.

**Taṃ divasanti** yaṃ divasaṃ anāthapiṇḍiko, gahapati, rājagahasamīpaṃ upagato, taṃ divasaṃ. **Paṇṇanti** sāsanaṃ. **Na suṇīti** asuṇanto **“paṇṇaṃ na suṇī”**ti vutto. Dhammagāravena hi so seṭṭhi aññaṃ kiccaṃ tiṇāyapi na maññi. Tenāha **“dhammassavanatthāyā”**tiādi. **Dārakarūpānanti** dārakānaṃ. Anattantarakaro hi **rūpa**-saddo yathā **“gorūpāna”**nti. **Pañcavaṇṇanti** khuddikādibhedam pañcappakāraṃ pītiṃ paṭilabhi. Anukkamena hi tā etassa sambhavanti. **“Sisena utṭhāya...pe... gacchati”**ti padaṃ pītisamuṭṭhānarūpavasena lakkhetvā vuttam.

**Sivathikāya vasatīti** sivathikāya samīpe vasati. Susānassāsannaṭṭhāne hi so vihāro. **Athassāti** athassa anāthapiṇḍikassa **“akālo...pe... upasaṅkamissāmī”**ti etaṃ ahosi. **Buddhagatāya satiyāti** aññaṃ kiñci acintetvā buddhagatāya eva satiyā sayanavaragato nipajji. Tena vuttam **“taṃ divasa”**ntiādi.

**Balavappasādoti** buddhārammaṇā balavatī saddhā. **Pītiālokoti** purimabuddhesu cirakālam paricayaṃ gatassa balavato pasādassa vasena **“buddho”**ti nāmaṃ savanamattena uppanāya ulāraya pītiyā samuṭṭhāpito vipassanobhāsasadiṣo sātisayo āloko hoti cittapaccayautusamuṭṭhāno. Tenāha **“sabbatamaṃ vigacchī”**tiādi. **“Devatā hi katā”**tipi vadanti, purimo evettha yutto.

**Amanussāti** adhigatavisesā devatā. Tā hi seṭṭhissa sampattiṃ paccakkhato passimsu. Tenāha **“ayaṃ mahāseṭṭhī”**tiādi. **Allasarīranti** tāvadeva chaḍḍitaṃ acchinnaṃ vā kaḷevaraṃ. **Aparampīti** mataṃ kuthitakuṇapaṃ. **Parikirimsūti** samantato osaritā ahesuṃ. **Āloko antaradhāyipi**ti vegassa mandabhāvena taṃsamuṭṭhānarūpānaṃ dubbalabhāvato.

**Imināvāti** adhiḱārena sahasapadena eva sambandhitabbāni. Padaṃ vītiharati etthāti **padavītihāro**, padavītihāraṭṭhānaṃ. **Samagamanti** dutavilambitaṃ akatvā samagamane. **Tatoti** tesu soḷasabhāgesu. **Eko koṭṭhāsoti** yathāvuttam padavītihārapadesaṃ soḷasadhā bhinnassa eko bhāgo. **Pavattacetanāti** yathāvuttakalāsāṅkhātassa padesassa laṅghanadhāvanapavattacetanā. Padaṃ vā vītiharati etenāti **padavītihāro**, tathāpavattā kusalacetanā. **“Tassā phalaṃ soḷasadhā katvā”**ti vadanti. Patiṭṭhahantassa vasena gahitanti yojanā. Vittaṇṇanissitāya eva ratanattayapūjāya dhammassavanassa sikkhāpadasamādānassa saraṇagamanassa ca atthāya gacchatopi vasena vaṭṭati. Paṭhamaṃ vuttagamanam lokuttaravisesādhigamassa ekantikaṃ, dutiyaṃ anekantikanti **“vaṭṭatiyevā”**ti sāsāṅkavacanaṃ.

**Soti** anāthapiṇḍiko seṭṭhi. **Anuyuttāti** anugāmino sahāyā. Teva sandhāya vadati. **“Sivako amanusso”**ti apare. Na kevalam **“anuyuttāpi me atthi, kasmā bhāyāmī”**ti evaṃ sūro ahosi? Atha kho buddhagatāya tikkhavisadasabhāvena sabbam parissayaṃ madditvāpi agamāsīti dassetuṃ **“apicā”**tiādi vuttam. Pakkhandanalakkaṇā hi saddhā, tāya yuttako sappurisopi saddhammaguṇavasena sabbam parissayaṃ madditvā pakkhandatīti daṭṭhabbam.

Sabbakāmasamiddhatā pariccāgasīlatā ulārajjhāsayaatā paradukkhāpanayakāmatā paresam hitesitā

parasampattipamodanāti evamādīnaṃ mahāguṇānaṃ vasena niccakālaṃ anāthānaṃ piṇḍadāyakattā “anāthapiṇḍiko”ti evaṃ **uppannaṃ nāmaṃ. Evamāhāti** “ehi sudattā”ti evaṃ āha.

**Kilesaparinibbānenāti** sabbaso rāgādikilesavūpasamena. **Kilesavūpasamanti** sabbaso sabbesaṃ kilesānaṃ vūpasamaṃ aggamaggena patvā. **Anupubbikathanti** dānādikathaṃ. Sā hi anupubbena kathetabbattā “anupubbikathā”ti vuccati. Taṃ sandhāya vuttaṃ – “atha kho bhagavā anupubbiṃ kathaṃ kathesi. Seyyathidaṃ – dānakathaṃ sīlakathaṃ saggakathaṃ kāmānaṃ ādīnavāṃ okāraṃ saṃkilesaṃ nekkhamme ānisaṃsaṃ pakāsesī”ti (cūlava. 305). **Matthaketi** anupubbikathāya upari parato. **Cattāri saccāni pakāsesīti** yathā mahāseṭṭhi saḥassanayapaṭimaṇḍite sotāpattiphale patiṭṭhāti, evaṃ pavattinivattiyo saha hetunā vibhajanto cattāri ariyasaccāni pakāsesīti.

Sudattasuttavaṇṇanā niṭṭhitā.

### 9. Paṭhamasukkāsutavaṇṇanā

**243. Rathikanti** racchaṃ. **Gahetvāti** gantvā. **Siṅghāṭakanti** aññattha tikoṇā racchā vuccati. Idha pana “catukka”nti vuttaṃ. “**Madhupikā**”ti ettha **madhu**-saddena madhuviseso vuccatīti āha “**gandhamadhupānaṃ pītā viyā**”ti. Sāmaññajotanaṃ hi visese tiṭṭhatīti **gandhamadhūti** ca ativiya madhuro madaniyo eko madhuviseso. Tenāha “**asaññī hutvā sayatevā**”ti.

Na paṭivānīyaṃ na apañetabbanti **appaṭivānīyaṃ**. Tenāha “**bāhirakañhī**”tiādi. Yaṃ kiñci santapaṇītabhāvāvahaṃ na secananti **asecanakaṃ**. Tato eva **anāsittakaṃ. Ojavantanti** bahusammataojavantasadisatāya ojavantaṃ. Tenāha “**yathā hī**”tiādi. **Dhammatāyāti** attano sabhāveneva. **Madhuro** iṭṭho. **Pivanti viyāti** sukkāya bhikkhuniyā upanīyamānaṃ saddhammāmataraṃ attano sotañjaliṃ pūretvā odahantīva. Valāhakato āgataṃ **valāhakaṃ**.

Paṭhamasukkāsutavaṇṇanā niṭṭhitā.

### 10. Dutiyasukkāsutavaṇṇanā

**244. Bahum vata puññaṃ pasavati** sabbaganthavimuttiyā sīlasamannāgatena aggadakkhiṇeyyāya sukkāya theriyā bhojanassa dinnatā.

Dutiyasukkāsutavaṇṇanā niṭṭhitā.

### 11. Cīrasuttavaṇṇanā

**245. Ekādasamaṃ uttānameva** dasamena sadisattā. Tattha hi bhojanaṃ upāsakassa ābhatāṃ, idha cīvaradānanti ayameva viseso.

Cīrasuttavaṇṇanā niṭṭhitā.

### 12. Ālavakasuttavaṇṇanā

**246. Ālavīyanti** itthilingavasena taṃ raṭṭhampi nagarampi vuccati. Raṭṭhe adhippetepi na ettha bahuvacanaṃ tathāruḷhiyā abhāvato. **Taṅca bhavananti** taṅca ālavakassa yakkhassa bhavanaṃ. **Tatthāti** ālavakassa bhavane. “Atha kho ālavako yakkho yena bhagavā tenupasaṅkamī”ti **ettha** tasmim paṭhapadese. **Ayamanupubbikathāti** ayaṃ idāni vuccamānā anupubbato āgatā kathā. Ālavīyā issaroti ālavo, **ālavakoti** ca rājā vutto. Kadāci corapaṭibāhanatthaṃ, kadāci ussāhasattivibhāvanavasena paṭirājanisedhanatthaṃ, kadāci lakkhayogyavinīyogavasena byāyāmakaraṇatthaṅca. Migānaṃ vananato



vasanato vānato vā “migavā”ti laddhasamaññaṃ **migavaṃ**. Tassevāti rañño eva. **Migoti** eko eṇimigo. **Tiyojananti** accantasamyoḡe upayogavacanāṃ. **Udakaṃ viya pavisitvā** **ṭhitanti** yathā parissamappatto udakaṃ pavisitvā **ṭhito** nirassāso hoti, evaṃ viya **ṭhitaṃ**. **Mūlanti** samīpaṃ. Yakkhaṃ dīsvāva rañño bhayaṃ chambhitattaṃ ūrutthambhaṃ ahosi, tasmā rājā palāyituṃ nāsakkhi. Tena vuttaṃ “**khādituṃ upagato**”ti. Atha rājā dvidhā chinnaṃ migavaṃ datvā attānaṃ mocetukāmo ahosi. Yakkho “nanu mama hatthagatakālato paṭṭhāya migopi mama santako, tattha kinnāma te kerāṭiyamidaṃ datvā attano mocana”nti rājānaṃ na muñci. Atha rājā tassa tādisaṃ paṭiññātaṃ akāsi. Tena vuttaṃ “**rājā tena saddhi**”ntiādi. **Bhavanaṃ anupagatanti** idaṃ mama bhavanaṃ anupagataṃ. **Ananuññātanti** upagatena sāmibhūtena ananuññātañca. Etena upagataṃ taṃ, idāni tādīsena anuññātañca khādituṃ labhāmīti dasseti.

**Maccupatheti** maccugocare. Āsannamaraṇatāya evamāhaṃsu.

Taṃ āḷavakakumāraṃ ādāya pakkamimsūti yojanā. Tassa rañño mahesī āḷavakakumārassa mātāti vuttā. Devisahassānaṃ vippalapantīnanti vacanaṃ pariṇāmetabbaṃ.

**Desanāpariyosāneti** yakkhaṃ dametvā paccāgantvā nagaradvārasamīpe rukkhamūle nisinnena bhagavatā sarājjikāya mahatīyā parisāya desitadesanāya pariyosāne. **Soti** bhagavā. **Bhavane evāti** vimāne eva. **Bhagavāpi passati** pakaticakkhunāva nigrodhassa upari nibbattatā.

**Tatrāti** tasmim “rosetukāmatāyā”ti vacane. **Tesanti** sātāgirihemavatānaṃ. Kāladīpadesakulajanettiāyupamāṇavisayaṃ **pañcamahāviloḡitaṃ**. “**Sītaṃ byapagataṃ hoti, uṇhañca upasammāti**”tiādīnā (bu. vaṃ. 2.83) āgatāni **dvattimsa pubbanimittāni**. Kaṭippadesavatthikosakaṇṇato **tīdhā**. **Saddoti** āḷavakassa ugghositasaddo.

Iminā pasaṅgena sakalajambudīpaṃ byāpetvā pavatte aparepi tayo sadde yathā ete, evaṃ āḷavakassa ugghositasaddopīti dassetuṃ “**cattāro**”tiādi vuttaṃ. **Osakkanteti** parihāyamāne.

**Cuṇṇentāti** cuṇṇetuṃ samatthataṃ sandhāya vuttaṃ, na pana cuṇṇanavasena vuttaṃ. Tenāha “**mā kassaci**”tiādi. **Ussāvabindumattampīti** ussāvapatanamattampi. **Khurappaṃ** sallaṃ.

**Seṭṭhānīti** ajeyyena appaṭihatabhāvena uttamāni. **Dussāvudhanti** āvudhakiccakaraṃ uttariyaṃ dussaṃ. Imāni kira sakkādīnaṃ puññānubhāvena nibbattāni appaṭihatappabhāvāni paṭipakkhavidhamanayuttāni avajjhāni āvudhāni. Tenāha “**yadi hī**”tiādi.

**Asanivicakkaṃ viyāti** asanimaṇḍalaṃ viya.

**Pittanti** alagaddapittaṃ. **Bhindeyyāti** āsiñceyya. **Sukhanti** sukaraṃ. **Mudubhūtacittavavattānākaraṇatthanti** mudubhūtaṃ attano citte vavattānassa karaṇatthaṃ.

**Evaṃ vutteti** “na khvāha”nti evaṃ vutte. Bhagavato sāsane **ṭhite** payirupāsivā uggahitaṃ bhagavantaṃ payirupāsivā uggahitameva nāmāti āha “**kassapaṃ...pe... uggahesu**”nti. **Puṭṭhapañhāti** sammāsambuddhena puṭṭhapañhā. Yasmā buddhavisaye puṭṭhapañhā, tasmā buddhavisayāva honti.

**Paṭisedhetvāti** vācāya asakkuṇeyyabhāveneva paṭisedhetvā. “Yadākañkhasī”ti padasandhivasena niddesoti āha “**yadi ākañkhasī**”ti. Tena tuyhaṃ pucchāṃ tāva sutvā vissajjessanti dasseti. Tenāha “**na me**”tiādi. Dutiyavikappe **da**-kāro padasandhikaroti āha “**yaṃ ākañkhasī**”ti. “Puccha, āvuso, sutvā jānissāmī”ti avatvā sabbaññubuddhassa aniyametvā vacanaṃ sabbavisayaṃ hotīti āha “**sabbaṃ te**”tiādi.

**Kim** sūti ettha **kinti** pucchāyaṃ, **sūti** saṃsaye, kim nūti attho? **Idhāti** imasmiṃ loke. **Tasmā vittanti** yasmā vittikaraṇato vittaṃ. **Sukatanti** suṭṭhu sakkaccaṃ kataṃ. **Sukhanti** iṭṭhaphalaṃ. Tattha yaṃ padhānaṃ, taṃ dassetuṃ “**kāyikacetasiḱaṃ sāta**”ntiādi vuttaṃ. Nissandaphalañhi taggahaṇena gahitameva hoti. **Appetīti** pāpeti. Atisayatthajotano tara-saddoti āha “**atisayena sādū**”ti. Rasasaññitāya iṭṭhānaṃ rāgādiddhammānaṃ. **Kena pakārenāti katham**-saddassa atthamāha. **Kathamjivinti** yadi samāsapadametaṃ, “katha”nti sānunāsikā katāti āha “**gāthābandhasukhattha**”ntiādi.

**Saddhīdha vittanti** ekadesena samudāyadassanaṃ samuddapabbatanidassanaṃ viya. **Iti**-saddo ādiattho daṭṭhabbo. “Vittikaraṇato vitta”nti vuttamatthaṃ sandhāya hetūpamāhi yojetvā dassetuṃ “**yathā hi**”tiādi vuttaṃ. Tena sukhāvahanato, dukkhapaṭibhāhanato, dāliddiyūpasamanato, ratanapaṭilābhahetuto, lokasantatiāvahanato ca saddhā vittaṃ yathā taṃ hiraññasuvaṇṇādīni. Tenāha “**eva**”ntiādi. Nanu cetanā sammādiṭṭhiādayo ca sātisayaṃ vipākasukhaṃ āvahanti, taṃ katham saddhā āvahaṭīti? Saddhādhurabhāvasabhāvato. Tenāha “**saddhādhurena paṭipannāna**”nti. Tassa ca sesapadesupi yojetabbaṃ.

Idāni yaṃ hiraññasuvaṇṇādi saddhāvittassa opammaṃ, taṃ hīnaṃ, saddhāvittameva uttamanti pāliyaṃ seṭṭhaggahaṇaṃ katanti dassetuṃ “**yasmā panā**”tiādi vuttaṃ. Paralokaṃ gataṃ anugacchatīti **anugāmikaṃ**. Aññehi na sādharmaṇanti **anaññasādhāraṇaṃ**. **Sabbasampattihetūti** sabbāsaṃ sīlasampadādīnaṃ lokiya lokuttarānaṃ sampattīnaṃ hetu. **Anatthāya hoti** anupāyapaṭipattito. **Tasmā** anugāmikattā. Anaññasādhāraṇattā sabbasampattihetubhāvato hiraññādivittanidānattā ca **saddhāvittameva seṭṭhaṃ**. Ukkaṭṭhaparicchedadesanā yathā “sattā devamanussāna”nti.

“**Dasakusaladhammo**”ti iminā ekaccānaṃyeva dānādiddhammānaṃ saṅgaho, na sabbesanti asaṅgahitasāṅgahaṇatthaṃ “**dānasīlabhāvanādhammo vā**”ti vuttaṃ. “**Sukha**”nti tividhassapi sukhassa sādharmaṇaggahaṇametanti taṃ savisesaladdhaṃ puggalavasena dassento “**soṇaseṭṭhi...pe... āvahaṭī**”ti āha. Yo so padumavatiyā deviyā putto mahāpadumo nāma rājā dibbasukhasadisam rajjasukhamanubhavivā pacchā paccekabuddho hutvā nibbānasukhamanubhavi, taṃ nidassanabhāvena gahetvā āha “**mahāpadumādīnaṃ viya nibbānasukhañca āvahaṭī**”ti.

Atthuddhāranayena saccasaddaṃ saṃvaṇṇento “**anekesu atthesu dissatī**”ti āha. **Vācāsacce** dissati saccasaddo “bhaṇe”ti vuttattāti adhippāyo. **Viratisacce** dissati. Veramaṇīsu hi paṭiṭṭhitā samaṇabrāhmaṇā “**sacce ṭhitā**”ti vuccanti. Attākāraṃpi vatthuṃ idameva saccaṃ moghamaññanti pavattiyākāraṃ upādāya diṭṭhi eva saccanti diṭṭhisaccaṃ, tasmim **diṭṭhisacce** dissatīti yojanā. **Brāhmaṇasaccānīti** paramatthabrahmānaṃ saccāni, yāni “sabbe paṇā avajjhā, sabbe kāmā aniccā, sabbe bhavā aniccā, nāhaṃ kvacani kassaci kiñcanatasmi”ntiādinā (a. ni. 4.185) catukkanipāte āgatāni. Paramatthabhūtaṃ saccaṃ nibbānaṃ. **Abbhantaram katvāti** antogadhameva katvā, tehi saddhinti attho paramatthasaccānaṃpi sādutarattā. **Yassānubhāvenāti** yassa vācāsaccassa ānubhāvena.

**Udakamhi dhāvati**ti udakapiṭṭhiyaṃ abhijjamānāyaṃ pathaviyā viya dhāvati gacchati mahākappinarājā viya. **Visampi saccena hananti paṇḍitāti** kaṇhadīpāyanādayo viya. **Saccenāti** macchajātake bodhisattassa viya saccena **devo thanayaṃ pavassati**. **Sacce ṭhitāti** viratisacce vācāsacce ca ṭhitā tayopi bodhisattā. **Nibbutinti** nibbānaṃ patthayanti. **Sādutaranti** sātatarāṃ iṭṭhataravipākādānato.

**Rasānanti** niddhāraṇatthe sāmivacanaṃ. Niddhāraṇaṇca koci kutoci kenaci imanti kassaci vacanaṃ na sādhetīti dassento “**ye ime**”tiādimāha. Tena hi nibbānaṃ rasasamudāyato sādutaratāvisesena niddhāriyati. Tattha ye ime vuccantīti yojanā. **Sāyanīyadhammāti** jivhāya sāyitabbā dhammā. Rasāyatanam rasoṭi āha “**mūlaraso khandharaso**”tiādi. **Phalarasanti** phalassa rasaṃ, phalaṃ piḱetvā tāpetvā gahetabbarasanti attho. **Arasarūpoti** ācārarahitasabhāvo. Rūpassa assādanavasena uppajjanakasukhadhammā **rūparasā**. Esa nayo **saddarasādīsu**. **Saddarasoti** byañjanasambhūto raso. **Vimuttirasoti** vimuttisampattiko raso. **Attharasoti** atthassa paṭivijjanavasena uppajjanakasukhaṃ

attharaso, tathā **dhammaraso veditabbo**. **Rūpācārāti**ādīsū rasaggahaṇena phalarasaṃ vadati. So hi phalassa rūpo ca, rasitabbato āsādetabbato raso cāti “**rūparaso**”ti vuccati. **Ācāro** pana sāmaggīrasahetutāya “**raso**”ti vutto. **Saccam haveti** ettha **haveti** ekamsatthe nipāto, ekamsattho ca avadhāraṇamevāti āha “**saccameva sādutara**”ntiādi. **Sarīramupabrūhenti**, na cittaṃ. Nanu ca sukhuppattipayojanattā cittampi upabrūhenti? Na, sukhasa sarīrabrūhanam paṭicca uppannattā. **Viratisaccavācāti** saccavisesena sampajjanam vadati. **Cittamupabrūheti** padālikāya virativācāya saccarase sati samathavipassanādīhi cittaaparibrūhanassa sambhavato maggaphalānisamsam gaṇhāti. **Asamkilesikañca sukhamāvahati** vivaṭṭasannissitattā. **Vimuttirasoti** phalasukham vadati nibbānasukhampi vā. **Paramatthasaccaraso** nāma nibbānaraso. Tathā hi taṃ “accutirasam assāsakaraṇarasa”ntipi vuccati. Tena **paribhāvitattāti** vimuttirasassa sādutarabhāvadassanattam. Evaṃ santepi “vimuttirasaparibhāvitattā”ti etena kāmam vimuttirasō vā paramatthasaccaraso vā sādutararasāti dasseti. **Tadadhigamūpāyabhūtanti** tassa paramatthasaccassa adhigamūpāyabhūtam. **Atthañca dhammañcāti** phalañca kāraṇaṇca nissāya pavattito attharasā dhammarasā ca sādū, tatopi paramatthasaccameva sādurasanti adhippāyo.

Lokuttaram lokiyañca attham ajānanto **andho**, lokiyatthameva jānanto **ekacakkhu**, ubhayam jānanto **dvicakkhu**. Parahitam attahitañca ajānanto **andho**, attahitameva jānanto **ekacakkhu**, ubhayattham jānanto **dvicakkhu**. So dvicakkhupuggalo **paññājīvī**. Taṃ pana gahaṭṭhapabbajitavasena vibhajivā dassetuṃ “**gahaṭṭho vā**”tiādi vuttam. Gahaṭṭhapatiṭpadaṃ ārādheta cāti yojanā. **Ārādheta**vāti ca sādhetvāti attho.

**Purimanayenevāti** kassapasammāsambuddhavissajjitanayeneva. **Kiñcāpīti** anujānanasandassanatte nipāto. Kiṃ anujānāti? Gāthāya catūhi padehi vuttasu atthesu ekassa atthassa siddhiyam itaresampi siddhiṃ anujānāti. Tenāha “**yo catubbidhamogham...pe... parisujjhati**”ti. Kiṃ sandasseti? Yesam pāpadhammānam balavabhāvena oghataraṇādi na sijnhati, tesam paṭipakkhānam nissandehavasena sandassanam. Tenāha “**evaṃ santepī**”tiādi. **Oghataraṇanti** oghataraṇapaṭipattim. **Asaddahantoti** evam paṭipajjanto imāya paṭipattiyā ogham taratīti na saddahanto. **Na pakkhandatīti** pakkhandanalakkhaṇāya saddhāya na ugghāṭiyatīti na otarati. **Cittavossaggenāti** yathākāmācāravasena cittassa vossajjanena. **Pamatto** pamādam āpanno. **Tatthevāti** kāmesu eva. **Visattattā** laggattā. **Vokiṇṇoti** visevito. **Tasmāti** vuttassa catubbidhassapi atthassa hetubhāvena paccāmasanam. **Tappaṭipakkhanti** assaddhiyādīnam paṭipakkham saddhādīnam okāsattā.

**Etāyāti** gāthāyam iminā padenāti sambandho. Sappurisasamsevo saddhammassavanam yonisomanasikāro dhammānudhammapaṭipattīti imesam sotāpattimaggādhigamassa aṅgānam āsannakāraṇam saddhindriyanti āha “**sotāpattiyāṅgapadaṭṭhānam saddhindriya**”nti. Vuttañhetam – “saddhājāto upasaṅkamati, upasaṅkamanto payirupāsati, payirupāsanto sotaṃ odahati, ohitasoto dhammam suṇāti”tiādi (ma. ni. 2.183, 432). Diṭṭhogaṃ tarati etenāti **diṭṭhogaṃ taranam**, diṭṭhoghassa taranam. Kāmañcetta “tarati ogha”nti vuttam, vattamānasamīpepi pana vattamānam viya voharanam yuttam diṭṭhoghassa tiṇṇabhāvassa ekantikattāti “**sotāpannañca pakāsetī**”ti vuttam. Esa nayo sesesupi. Diṭṭhivicikekchādipaṭipattantarāyakarānam pāpadhammānam samucchinnattā **sotāpanno...pe... appamādena samannāgato**. “**Sotāpatti...pe... taratī**”ti ettake vutte sakideva imassa lokassa āgamanampi gahitam siyāti tannivattanattam “**ārādheta...pe... avasesa**”nti vuttam. Nanu “avasesa”nti vuttattā sotāpattimaggena atinṇam avasesam bhavoghavattu gahitameva siyāti? Na, upari dvīhi maggehi taritabbānam tesam parato dvinnam pahnāvasena vuccamānattā. Apavādivisayampi pariharati – “evaṃ esā codanā attano visaye na paṭiṭṭhāti”ti. Anādikālabhāvattā kāmasaññāya kāmoghataranam mahatā eva vīriyena sādhetabbanti āha “**vīriyenā**”ti. **Tatiyam maggam ārādheta**. Kāmoghassa vatthu **kāmoghavattu**, kāmagaṇehi saddhiṃ sabbo kāmabhavo. **Kāmoghasaññanti** kāmoghasaṅkhātam. Kāmanatṭhena kāmo ca so dukkho cāti **kāmadukkham**. Assādanaṭṭhena kāmo eva saññāti kāmasaññā, sabbaso samucchinnattā vigatā kāmasaññā etissāti **vigatakāmasaññā**. Sabbesam rāgādimalānam mūlabhūtatā sattasantānassa visesato malīnasabhāvāpādanato paramam ukkamsagatam malanti **paramamalam**, avijjā. Tenāha bhagavā –

“avijjāparamaṃ mala”nti (dha. pa. 243).

**Paññāpadaṃ gahetvāti** yathāvuttamaṃ paññāpadaṃ hadaye ṭhapetvā. Tappasaṅgena attano paṭibhānena sabbehi viya uggahitaniyāmena. **Sabbatthevāti** pañcasupī ṭhānesu. **Atthayuttipucchāti** paññādiatthasamadhigamassa yuttiyā kāraṇassa pucchā. Tenāha “**ayaṃ hī**”tiādi. **Paññādiattham ṇatvāti** paññādhana-kitti-mitta-abhisamparāyasaṅkhātamaṃ atthamaṃ sarūpato saccapaṭivedhanipphādanena ṇāṇena jānitvā. Nanu esa lokuttaramaṃ sotāpattimaggaḥapaṇṇamaṃ tadadhigamūpāyamaṃ lokiyapaññaṅca abhibhavitvā ṭhito, so kasmā tattha atthayuttimaṃ pucchati? Saccametaṃ, upari pana samādhissa yuttimaṃ pucchitukāmo paññāya seṭṭhabhāvato, tassa ca ekadeseneva adhigatatā tameva ādiṃ katvā pucchati. “**Kāya yuttiyā**”tiādi atthavaṇṇanaṃ atidissati “**esa nayo dhanādīsū**”ti. Tatthāpi atthayuttipucchābhāvo pana “sabbatthevā”ti iminā vibhāvīti.

Saddhāsussūsāppamādaṭṭhānasaṅkhātehi **catūhi kāraṇehi. Kāyasucaritādibhedena** ājīvaṭṭhamakasīlabhūtena. Samathavipassanābhūtena nippariyāyena bodhipakkhiye eva gaṇhanto “**aparabhāge**”ti āha. Pariyāyabodhipakkhiyā pana visesato vuṭṭhānagāminivipassanākālepi labbhanti. **Pubbabhāgeti** vā taruṇavipassanākālaṃ. Tato pubbasādhanaṅca sandhāya “**aparabhāge**”ti punāha, tato paranti attho. **Dhammanti** paṭipattidhammaṃ. Na saddhāmattakeneva paññaṃ labhatīti yojanā. Yadi evamaṃ kasmā “saddahāno”ti vuttanti āha “**yasmā panā**”tiādi. **Kim vuttam hotīti**ādinā vuttameva atthamaṃ vivarati. Na kevalamaṃ sussūsāmattena paññāpaṭilābhō, atha kho appamādena paññaṃ labhatīti dassetaṃ pāliyaṃ “appamatto vicakkhaṇo”ti vuttanti tadatthamaṃ dassento “**eva**”ntiādimāha.

Idāni saddhādīnaṃ paññāpaṭilābhassa taṃtaṃvisesapaccayāni nīharitvā dassetaṃ “**eva**”nti vuttamaṃ. **Sussūsāyāti** sotukāmatāya. Sā atthato upasaṅkamanādi. **Paññādhigamūpāyanti** pariyaṭṭidhammamaṃ. Tenāha “**suṇātī**”ti. **Gahitaṃ na pamussati**, satiavippavāsalakkhaṇo hi appamādoti. Na kevalamaṃ yāthāvato gahaṇakosallameva vicakkhaṇatā, atha kho yāthāvato paññāsampavedhanaṅcāti āha “**vitthārikaṃ karotī**”ti. Idāni paññāpaṭilābhahetumaṃ matthakamaṃ pāpetvā dassetaṃ “**sussūsāya vā**”tiādi vuttamaṃ. **Atthamupaparikkhatīti** sutakatānaṃ dhammānaṃ pāliatthūpaparikkhāpubbakamaṃ rūpārūpavibhāgaṃ paramatthamaṃ salakkhaṇato sāmāññalakkhaṇato ca upaparikkhati vīmaṃsati. **Anupubbenāti** evamaṃ ṇītapariññaṃ patvā tīraṇapariññāya tato anukkamena tīraṇapariññaṃ pahānapariññaṅca matthakamaṃ pāpento maggappaṭipāṭiyā paramatthasaccabhūtaṃ nibbānaṃ sacchikaroti.

Imāni saddhādīni cattāri kāraṇāni matthakamaṃ pāpetvā dassento āha “**desakālādīni ahāpetvā**”ti. Yasmaṃ dese yasmaṃ kāle ye ca sahāyake nissāya yaṃ kiccaṃ tīretabbaṃ, tāni desakālādīni anatikkamitvā attano abhivuḍḍhiṃ icchantena “ayaṃ nāma deso, yatthāhaṃ etarahi vasāmi, ayaṃ kālo, ime mittā, ime amittā, ime āyavayā, ahaṅca ediso jāti-kula-padesa-balabhoga-parivārādīhi, taṃ kiccaṃ idāni āradhabbaṃ, idāni nāraddhabba”nti sabbaṃ upaparikkhitvā paṭipajjitabbaṃ. Evamaṃ paṭipajjanto hi lokiyassa dhanassa paṭirūpādhigamūpāyamaṃ karoti nāma. Lokuttarassa pana sīlavisoḍhanādivasena veditabbaṃ. Vahitabbabhāvena dhuro viyāti dhuro, bhāro. Idha pana dhurasampaggaho uttarapadalopena dhuro, vīriyaṃ. So sātisayo etassa atthīti **dhuravā**. “Uṭṭhātā”ti padena kāyikavīriyassa vakkhamānattā “**cetasikavīriyavasenā**”ti visesitaṃ. **Anikkhittadhuro** dhorayhabhāvato. **Tiṇā bhiyyo na maññatīti** tiṇaṃ viya paribhavanto atibhuyya vattatīti attho. **Ādinā nāyēnāti** ettha **ādi**-saddena –

“Kamaṃ purisakiccāni, so sukhā na vihāyati; (Dī. ni. 3.253);

“Na divā soppasīlena, rattimuṭṭhānadessinā;

Niccaṃ mattena soṇḍena, sakkā āvasitumaṃ ghara”nti ca. (dī. ni. 3.253); –

Evamādīnaṃ saṅgaho. **Asithilaparakkamo** analasabhāvato. **Ekamūsikāyāti** ekāya matamūsikāya. **Nacirassevāti** catumāsabbhantareyeva. **Catusatasahassasaṅkhaṃ cūlantevāsī viyāti** kākaṇikaḍḍhakahāpaṇa-soḷasa-kahāpaṇa-catuvīsati-kahāpaṇa-sataharaṇakkamena dve satasahassāni,

cūlakamahāseṭṭhino dhītulābhavasena dve satasahassānīti evaṃ catusatasahassasaṅkhaṃ dhaṇaṃ ekamūlena yathā cūlantevāsī vindi, evaṃ aññopi patirūpakārī dhuravā uṭṭhātā vindate dhaṇaṃ. Ayañca attho cūlakaseṭṭhijātakena dīpetabbo. Vuttañhetam –

“Appakenapi medhāvī, pābhatena vicakkhaṇo;  
Samuṭṭhāpeti attānaṃ, aṇuṃ aggimva sandhama”nti. (jā. 1.1.4);

**Vattam katvāti** adhiṭṭhānavattam katvā. “Saccavādī bhūtavādī”ti kittim pappotīti yojanā. **Icehitapatthitanti** yehi mittam icchati, tehi itaram patthitam. **Mittāni ganthātīti** mittabhāvaṃ ghaṭeti. Dānassa piyabhāvakarāṇato “**dadam piyo hotī**”ti vuttam. Yaṃ dānaṃ ekantato mittabhāvāvahaṃ, tam dassento “**duddadam vā dadam tam ganthati**”ti āha. **Dadanti** ca lakkhaṇavacanametanti āha “**dānamukhena vā**”tiādi.

Āḷavakassa ajjhāsayanurūpaṃ **gahaṭṭhavasena vissajjento**. Saddhā etassa atthīti saddho, tassa **saddhassa**. **Ghamesinoti** gharāvāsasaṅkhātāṃ gharāṃ esantassa. Gharāvāsasannissitā “ghara”nti kāmagaṇā vuccantīti āha “**pañca kāmagaṇe**”ti. “Ete caturo dhammā”tiādinā gahitā anantaragāthāya vuttadhammā evāti dassento “**vuttappakāraṃ sacca**”ntiādimāha. Tattha “ime kusalā, ime akusalā”tiādinā te atthe yāthāvato dhāraṇato upadhāraṇato **dhammo**. Saññā cittacetasaṅkhaṃ dhāraṇaṃ, avicchedato sandhāraṇato kusalasantānaṃ dhāretīti **dhiti**, vīriyaṃ. Cajati etenāti **cāgo**, dānaṃ. Paccayavekallato phaluppādanasamattatāvasena **santi**.

**Aññepīti** ito yathāvuttadhammasamudāyato aññepi dhammā yadi santi, te dhamme pucchassūti. Kilese, kāyavācādi ke vā dametīti **damo**, paññā. Uṭṭhahati ussahati etenāti **uṭṭhānaṃ**, vīriyaṃ. **Etthāti** etissā pucchāya. **Saddhinti** saṅkhepato bhāvatthapadānaṃ bandhanena saha. **Ekamekaṃ padanti** paññādikamekekaṃ padaṃ. “Paññā imasmim ṭhāne paññāti dhammoti ca āgatā”tiādinā paññādiatthassa uddharaṇaṃ **atthuddhāro**. Tassa tassa atthassa “paññā pajānanā”tiādinā (dha. sa. 16) vevacanapadānaṃ uddharaṇaṃ **paduddhāro**. Pajānātīti paññā, dhāretīti dhammo, dametīti damoti evaṃ padassa kathanam **padavaṇṇanā**.

**Ajjāti** vā etarahi. **Yathāvuttena pakārenāti** “saddahāno arahata”ntiādinā vuttappakārena. Saccasampañivedhāvagahaṇaṃ vā yathāvuttena pakārena diṭṭhasaccatāya idhalokaparalokattham yāthāvato jānanto. Evañca yakkho satthu desanānubhāvasiddham pañham pucchanaṃ attano paṭilābhasampattim vibhāvento “kathamsu labhate pañña”ntiādimāhāti ācariyā. **Samparāyikoti** ettha **ca**-saddo luttaniddiṭṭho, tena “diṭṭhadhammiko cā”ti ayamattho vutto evāti dassento “**yo attho...pe... dasseti**”ti āha. Arīyati phalaṃ etasmāti **attho**, kāraṇaṃ. **Vicakkhaṇe** sapayojanatāya.

**Tassa ñāṇassāti** tassa atthassa āvibhāvanassa ñāṇassa. Guṇavisesehi ca sadisassapi aññassa abhāvato **aggadakkhiṇeyyo buddho** bhagavā. Tenāha –

“Nayimasmim loke parasmim vā pana,  
Buddhena seṭṭhova samova vijjati;  
Āhuneyyānaṃ paramāhutim gato,  
Puññatthikānaṃ vipulaphalesina”nti. (vi. va. 1047);

**Sahitapaṭipattinti** paññāsaṅgāhikaṃ attano paṭipattim. Sundarā bodhi subodhi, buddhassa subodhi buddhasubodhi, sā eva **buddhasubodhitā**. Dhammassavanattham sannipatitadevatāhi **saṅghuṭṭhasādhukārasadduṭṭhānañca**.

**Satapuññalakkhaṇanti** satasahassakappe puññasambhārasa katattā tesam puññānaṃ vasena satapuññalakkhaṇaṃ anekapuññanibbatalakkhaṇaṃ. Abhinandiyatāya sabbehi aṅgehi samupetaṃ samannāgataṃ. Katapuññabhāvaṃ byañjentīti byañjanāni, aṅgapaccaṅgāni. Tesam paripuṇṇattā

**paripuṇṇabyañjanaṃ. Taṃ yakkho...pe... pūresīti** gāthāpūraṇatthameva hi bhagavā tathārūpāni akāsi. **Abyādhītā**ti arogā. “Abyathitā”ti keci paṭhanti, sayasantāsarāhitāti attho.

“Hatthayo”ti vattabbe “**hatthako**”ti vuttaṃ. **Āḷavinagaranti** āḷavinagaravāsino vadati. Bhavati hi tatraṭṭhatāya taṃ-saddo yathā “gāmo āgato, mañcā ukkuṭṭhiṃ karontī”ti. **Ekakolāhalena** vattamānena.

**Sampiṇḍitvā**ti sannipatitvā. Kāmaṃ sambhāro tena katoti natthi, yuddhatthaṃ pana bahuso ussāhassa katattā “**yuddhamādiṃ katvā**”ti vuttaṃ. **Tameva āḷavakasuttaṃ kathesi** tassā **eva** desanāya sannipatitaparīsāya sappāyattā. Tenāha “**kathāpari...pe... ahoṣī**”ti. **Catūhi vatthūhīti** catūhi saṅghavatthūhi. **Parisanti** attano parisam. “**Itarañcā**”tipi vadanti.

Āḷavakasuttavaṇṇanā niṭṭhitā.

Sārathhappakāsiniyā saṃyuttanikāya-aṭṭhakathāya

Yakkhasaṃyuttavaṇṇanāya līnatthappakāsanaṃ samattā.

## 11. Sakkasaṃyuttaṃ

### 1. Paṭhamavaggo

#### 1. Suvīrasuttavaṇṇanā

**247. Abhiyaṃsūti** yuddhasajjābhimukhā hutvā gacchiṃsu. **Tatrāti** tasmim asurānaṃ abhiyāne **ayaṃ** dāni vuccamānā anupubbato kathā. **Tettiṃsa purise gahetvāti** tettiṃsa purise puññakiriyāya sahāyabhūte gahetvā. “Yāvajīvaṃ mātāpitubharo assa”ntiādīnā samādinnāni **satta vatapadāni pūretvā. Adhigaṇhantaṃ** abhibhavantaṃ. **Puttahaṭṭhāyāti** hataputtāya. Sā surā na hoti, na suraṃ pivimhāti adhippāyo. **Tato paṭṭhāyāti** “na surā”ti vuttakālato paṭṭhāya. “Na suranti na dibbantīti asurā”ti keci. **Heṭṭhimatale** antobhūmiyaṃ āyāmato dasayojanasahassaṃ.

Uragādisahacaritāni ṭhānāni uragādīnīti āha “**uragādīsu pañcasu ṭhānesū**”ti. **Paṭhamālindeti** paṭhame paribhaṇḍe. Pañcayojanasahassavithhāraputhubahalāhi sinerussa catūsipi passesu cattāro paribhaṇḍā. Sinerussa hi tasmim tasmim passe yugandharādīsu pañcasataparittadīpaparivāre mahādīpe ca labhitabbassa mahato atthassa vasena **mahaṭṭhā. Kupitāvilacittāti** kupitena kopena ākulacittā. **Yuddhesīti** yuddhesino. **Sesesūti** sesesu paribhaṇḍesu. **Sesāti** supaṇṇādayo.

**Vammikamakkhikāti** sapakkhikaupacikā. **Osakkitvāti** piṭṭhibhāgena nivattitvā.

**Pamādaṃ apādesīti** sakkassa āṇāya pamādaṃ apajji. **Saṭṭhiyojanaṃ** vitthārena. **Suvaṇṇamahāvīthinti** suvaṇṇamayabhūmijagativīthim.

**Anuṭṭhahantoti** uṭṭhānaṃ kāyikavīriyaṃ akaronto. **Avāyamantoti** vāyāmaṃ cetasikavīriyaṃ akaronto. **Kiñci kiccanti** kasivāṇijjādibhedaṃ aññataraṃ kiccaṃ kattabbakammaṃ. **Varanti** pavaraṃ. Tenāha “**uttama**”nti. Tañca kho kasitabbaṭṭhānaṃ adhippetanti āha “**okāsa**”nti. **Kammaṃ akatvāti** kiñcipi jīvitahetubhūtaṃ kammaṃ akatvā. **Jīvitaṭṭhānaṃ nāmāti** tassa jīvitassa hetu nāma. **Nibbānassa maggoti** nibbānassa adhigamupāyabhūto maggo.

Suvīrasuttavaṇṇanā niṭṭhitā.

#### 2. Susīmasuttavaṇṇanā

**248. Antareti** abbhantare. **Evamṇāmakanti** “susīmo”ti evamṇāmakam. **Ekam puttameva** aññataram attano puttameva.

Susīmasuttavaṇṇanā niṭṭhitā.

### 3. Dhajaggasuttavaṇṇanā

**249. Samupabyūḷhoti** ubhinnaṃ saha eva samāgamo, bhusaṃ vā byūḷhoti attho. Bhusā panassa byūḷhatā dvinnaṃ senānaṃ samāgantvā sampiṇḍitabhāvenāti āha “**sampiṇḍito rāsibhūto**”ti. **Pacchimantoti** rathapañjarassa paranto pacchimanto pacchimakoṭṭhāso. **Rathasandhitoti** rathapañjarassa kubbarena saddhiṃ sambandhanaṭṭhānato. **Tadeva pamāṇanti** tadeva “**diyaḍḍhajojanasatāyāmo**”ti vuttappamāṇameva. **Diguṇaṃ katvāti** “pacchimanto satayojano”tiādinā diguṇaṃ katvā. Candamaṇḍalasūriyamaṇḍalakiṇṇikajālādibhedassa **sesālaṅkāra**ssa. **Passantānaṃ** devānaṃ. **Rājā noti** amhākaṃ rājā devaseṭṭho. **Dutiyaṃ āsanaṃ labhatīti** sakke nisinne tassa anantaram dutiyaṃ āsanaṃ labhati. Tasmā devaseṭṭhatāya sakko viya gāraṇaṭṭhāniyo, yato sakko “tassa dhajaggaṃ ullokeyyāthā”ti āha. Esa nayo sesesupi. **Asurehi parājitoti** asurehi parājayaṃ āpādito. **Rajadhajam disvāti** parasenāya upagacchantiyā uṭṭhitarajamattampi disvā ṭhitopi taṃ rajadhajam disvā bhīrubhāvena **palāyanadhammo**.

**Yassa** dhajaggaparittassa. **Ānubhāvo vattati** asammukhībhūtāhipi devatāhi sirasā sampaṭicchitabbato. **Corabhayādihīti ādi-**saddena rogabhayādīnañceva vaṭṭadukkhassa ca saṅgaho daṭṭhabbo vidhinā bhāvite parittassa atthe upacārajjhānādīnampi ijjanato.

Dīghavāpīnāmake gāme cetiyaṃ **dīghavāpicetiyaṃ. Muddhavedikā** nāma hammiyaṃ parikkhīpitvā katavedikā. Buddhagataṃ satīṃ upaṭṭhapetvā parittarakkhaguttiṃ āha. Parittassa ānubhāvena **dve iṭṭhakā...pe... aṭṭhamsu.** Tathā hi **tasmiṃ nissenīyaṃ ṭhite...pe... aṭṭhamsūti.**

Dhajaggasuttavaṇṇanā niṭṭhitā.

### 4. Vepacittisuttavaṇṇanā

**250.** “Mahānubhāvatāya asurānaṃ cittavepanena vepacittī”ti vadanti. Isīhi pana abhayaṃ yācite “bhayameva dadāmi”ti vatvā tehi “akkhayaṃ hotu te bhaya”nti abhisapavasena vuttakālato paṭṭhāya vepanacittatāya “**vepacittī**”ti vuccati, yaṃ lokiyā “pulomo”ti ca vadanti. Nīpātapadānīpi kānīci atthavisesajotakāni hontīti āha “**nīpātamatta**”nti hetuatthādīnamettha asambhavato. **Tanti** sakkam devānamindaṃ. **Kaṇṭhe pañcamehīti** kaṇṭhabandhanapañcamehi, vibhattialopena niddeso. **Cittenevāti** “imaṃ bandhāmi, ayaṃ bajjhatū”ti uppannacitteneva. **Bajjhati** baddho hoti, ayaṃ devānubhāvo. **Muccatīti** etthāpi eseva nayo. **Dasahīti** “corosī”tiādinā idha vuttehi dasahi. Tenāha “**imehī**”ti. Nibbattitvā cirakālatam upādāya khumsanavasena vadati “**jarasakkā**”ti. **Na taṃ** akkosam **manasi karoti** dīgharattam khantisoraccesu niruḷhaajjhāsayaṭṭā. **Mahāpaṭiggahaṇanti** mahantam upasamabyañjanaṃ. **Assāti** vepacittassa.

**Paṭisaṃyujeti** paṭisattu hutvā saṃyuddham kareyya. Tenāha “**paṭippareyyā**”ti. **Upasamaṃ... pe... maññe** upasameneva paccatthikassa nāyakabhūtassa kodhassa paṭisedhanato. Tādise hi kodho paṭikiriyaṃ alabhanto anupādāno viya jātavedo vūpasammati. **Yadā-**saddo hetuattho, na kālatthoti āha “**yasmā taṃ maññati**”ti. **Tāvadeva dve gāvo yujjhanteti** tasmiṃyeva khaṇe dvīsu goṇesu yujjhantesu.

**Khantito uttaritaro añño attho na vijjati** anantareva assa virodham anattam paṭibāhitvā diṭṭhadhammikassa ceva samparāyikassa ca saṃvidhānato. **Tam khantiṃ paramam āhu** seṭṭhabalam

virodhapaccayaṃ abhibhuyya pavattanato. Bālayogato bālo, tassa balaṃ **bālabalaṃ**, aññānti āha “**bālabalaṃ nāma aññānabala**”nti. **Taṃ yassa balanti** taṃ aññānabalaṃ yassa puggalassa balaṃ, **abalameva taṃ** paññābalena viddhamsetabbato. **Paṭivattā na vijjatīti** dhammaṭṭhaṃ paṭippharivā abhibhavitvā pavattā natthi. Paṭivacanamattaṃ pana koci vadeyyāpi, taṃ akāraṇanti dassento “**paṭippharivā vā**”tiādīmāha. **Bālabalanti** “paṭippharivā”ti vacanassa kāraṇavacanāṃ. **Tasseva puggalassa** paṭikujjhanakassa. Nānattāvitakkanato **ubhinnaṃ atthaṃ. Tikicchantanti** anattapaṭibāhanamukhena paṇḍitakiccakaraṇena paṭisedhentāṃ. “Bālo aya”nti evaṃ paññāpetuṃ hetuphalānaṃ anavabodhato **catusaccadhamme achekāti**.

Vepacittisuttavaṇṇanā niṭṭhitā.

### 5. Subhāsitaḥajayasuttavaṇṇanā

251. “**Chekatāyā**”ti vatvā tassa vattuṃ chekabhāvaṃ dassetuṃ “**evaṃ kirassā**”tiādīmāha. **Gāhanti** laddhiṃ. **Mocetvāti** yassa puna “coro”ti uttari vattuṃ na sakkoti, evaṃ vimocetvāti paṭhamāṃ vattuṃ na sakkā. **Garūti** bhāriyaṃ, dukkaranti attho. **Pacchāti** “parassā”ti vutto so kiñci paṭhamāṃ vadanto attano adhippāyaṃ pavedeti nāma, taṃ yathāsatti viditamano tassa uttari vattuṃ sakkoti. Tenāha “**parassa vacanaṃ anugantvā pana pacchā sukhaṃ vattu**”nti. Api ca asurindena “hotu, devānaminda, subhāsitena jayo”ti paṭhamāṃ vuttaṃ, viseso ca pubbaṃ upanentaṃ anuvattati. Vacasi kusalo sakko devarājā taṃ visesaṃ teneva pubbaṃ upanayāpento upalāpanavasena “tumhe khvetthā”tiādīmāha. **Pubbadevāti** sakkapamukhāya devaparisāya loke pubbeva uppannattā “pubbadevā”ti pasamsavacanāṃ. Vepacittiṃ sandhāya “tumhe”ti “pubbadevā”ti ca vuttattā “**tumhākaṃ tāva paveniāgataṃ bhaṇathā**”ti vuttaṃ. Gāraṇaṭṭhāniyattā vepacittino bahuvacanapayogo. Daṇḍena avacāro avacaraṇaṃ daṇḍāvacaro, natthi ettha vutto daṇḍāvacaroti **adaṇḍāvacarā**, sakkena vuttā gāthāyo.

Subhāsitaḥajayasuttavaṇṇanā niṭṭhitā.

### 6. Kulāvakasuttavaṇṇanā

252. **Rathasaddoti** rathālaṅkārabhūtānaṃ kiṅkiṇikajālādīnaṃ saddo. Tathā **dhajasaddo**. **Ājānīyasaddoti** ājānīyānaṃ hasitasaddo ca. **Karuṇāsamāvajjitahadayoti** pāṇānaṃ anuparodhena paṇāmitacitto. **Īsāmukhenāti** rathakapparamukhena. **Puññapaccayanibbattoti** uḷāraṃ suvipulaṃ puññaṃ paccayaṃ katvā nibbatta. **Na sajjati** katthaci appaṭighaṭṭanaena gacchanto. **Simbalivanenāti** simbalivanamajjhena. **Vibhaggaṃ nimmathitanti** ito cito vibhaggañceva niravasesato mathitañca hoti.

Kulāvakasuttavaṇṇanā niṭṭhitā.

### 7. Nadubbhīyasuttavaṇṇanā

253. **Supaccatthikoti** suṭṭhu ativiya paccatthiko paṭisattu. **Gahitosīti** devapāsenā bandhitvā gahito asi. **Baddhova ahoṣi** sakkassa puññānubhāvena. Cetiyaṛājā kira imasmimṃ kappe tato pubbe kenaci avuttapubbaṃ kharamusāvādaṃ abhāsi, tāvadeva virajjhivā mahāpathaviyā vivare dine nipatitvā avīciaggijālānamindanamahosi. Taṃ sandhāya vuttaṃ “**cetiyaṛaṅño pāpaṃ sandhāyā**”ti. **Mahāpāpānīti** mahantāni garutarāni pāpāni. Tathā hi vepacittino sapaṭhakarāṇe nidassanabhāvena etāni aṭṭhakathāyaṃ āgatānīti.

Nadubbhīyasuttavaṇṇanā niṭṭhitā.

### 8. Verocanaasurindasuttavaṇṇanā



**254. Dvārapālarūpakāni viyāti** dvārapālākārena katapaṭimāyo viya. **Vāyametheva**, na antarā saṃkocaṃ āpajjeyyāti adhippāyo. **Nipphannasobhanesūti** nipphannabhāvena sundaresu. Sabbe hi anipphannā atthā na sobhanti. **Kiccajātāti** vippakatabhāvena sañjātakiccā. **Akiccajātoti** asañjātakicco kiccarahito nāma natthi gamanaṭṭhitasayanānisajjādivasena uppajjanakadukkhavinodanabhāvato. **Samyogaparamātveva sambhogāti** imesaṃ sattānaṃ saṃbhuñjitabbavatthūni nāma pakatiyā virodhasīlānipi asaṃyogena vā asundarānipi, tāni abhisāṅkharāṇapacanasamyojanaparamāni vedittabbāni tathā sati sambhogārahābhāvūpagamanato. Tenāha “**pārivāsikaodanādīni**”tiādi. Uṇhāpetvā paribhuñjitabbayutte paribhajjivāti adhippāyo.

Verocanaasurindasuttavaṇṇanā niṭṭhitā.

## 9. Araññāyatanaṇṇanā

**255.** Jāmātikā vuccati dhītupati, sasuro bhariyāya pitā, tasmā ime antaravattino dve janā sakkavepacittino sujāya vasena **jāmātikasasurā**. “**Ciradikkhitāna**”nti dikkhitvā pabbajitvā cirakālānaṃ vatasamādānavasena ito bāhirakānaṃ pabbajitānanti āha “**cirasamādinnavatāna**”nti. **Ito paṭikkamāti** ito yathāṭṭhitāṇato apehi apakkama. **Na paṭikkūlasaññino** guṇe gāravayogato. Devā hi yebhuyyena “mayāṃ pubbe guṇavante payirupāsivā tesāṃ ovāde ṭhatvā puññāni upacinitvā idhūpapannā”ti guṇavantesu ādarabhāvaṃ upaṭṭhapenti.

Araññāyatanaṇṇanā niṭṭhitā.

## 10. Samuddakasuttavaṇṇanā

**256. Cakkavāḷamahāsamuddapiṭṭhiyanti** cakkavāḷapabbatapādasamantā mahāsamuddatīrapiṭṭhiyaṃ. Yatheva sinerusamīpe mahāsamuddo anupubbaninno anupubbaponaṃ anupubbapabbhāro, evaṃ yebhuyyena cakkavāḷapādasamīpepi. Tenāha “**rajatapaṭṭavaṇṇe vālukapuline**”ti. **Vuttappakārāsūti** anantarasutte vuttappakārāsu. **Assamapadenāti** assamapadavemajjhena. **Evaṃ cintayimsūti** “yaṃ nūna maya”ntiādinā yathā pāḷiyaṃ āgataṃ, evaṃ mantayimsu.

**Icehitakaroti** yadicchitakaraṇaṃ. **Duṭṭhānanti** durāsayānaṃ. Te pana duṭṭhajjhāsaya viruddhā hontīti āha “**duṭṭhānaṃ viruddhāna**”nti. **Pavuttanti** bījaṃ sandhāya vapitaṃ. Tenāha “**khetto patīṭṭhāpita**”nti.

**Sāyamāsabhattanti** sāyaṃ asitabbabhojanaṃ. Yathāvāraṃ bhakkhitametaṃ devānaṃ viya sukhumāṃ guruvāsaṅga na hotīti “**bhatta**”nti vuttaṃ. **Gelaññajātanti** sañjātagelaññaṃ. **Vepatīti** kampati pavedhati.

Samuddakasuttavaṇṇanā niṭṭhitā.

Paṭhamavaggavaṇṇanā niṭṭhitā.

## 2. Dutiyavaggo

### 1. Vatapadasuttavaṇṇanā

**257.** Samādātābato **vatāni**, aññamaññaṃ asaṅkarasabhāvena pabbajitābato **padāni**, tato eva asaṅkiṇṇabhāgāti katvā “**vatakoṭṭhāsāni**”ti vuttaṃ. **Samattānīti** puññavisesatāya puṇṇabhavaphalanibbattanena kittisaññānena ca samāṃ attāni samattāni. **Paripuṇṇānīti**

akhaṇḍādibhāvena sabbaso puṇṇāni. **Samādinnaṅgī**ti tatha sakkaccakāritāya sammā ādinnaṅgī. **Mātulanā**ti pitubhaginī, na yā kāci mātulassa bhariyā kulajetṭhakānaṃ adhippetattā, bhariyāpi vā mātulasambandhato gahetabbā, tathā sati mahāpitubharyādīnaṃpi saṅgaho daṭṭhabbo.

Ādi-saddena jetṭhabhaginīnaṃ saṅgaho. **Apacitikāra**koti tesam paccuṭṭhānakaro. Yo koci dadantopi sāpekkho deti, so muttacāgo na hoti, ayaṃ pana na evanti “**muttacāgo hoti**”ti vuttaṃ. **Vissaṭṭhacāgoti** nirapekkhapariccāgoti attho. Yathā paṇātipātabahulo “**lohitapāṇi**”ti vuccati, tathā dānabahulo “**payatapāṇi**”ti vuttoti āha “**deyyadhammānāthāya sadā dhotahatto**”ti. **Vossagaratoti** deyyadhammassa pariccajane abhirato. **Parehi yācitabbārahoti** parehi yācituṃ yutto icchitassa atthassa tāvadeva vissajjanato. **Dānena yuttoti** sabbakālaṃ dānena yutto abhiṇṇaṃ pavattamahādānattā. **Dāne ca saṃvibhāge cāti** parassa sampuṇṇaṃ katvā pariccajanasaṅkhāte dāne ca attanā paribhuñjitabbato saṃvibhajanasāṅkhāte saṃvibhāge ca **rato** abhirato.

Vatapadasuttavaṇṇanā niṭṭhitā.

## 2. Sakkanāmasuttavaṇṇanā

**258. Manussabhūtoti** manussesu bhūto, manussattaṃ vā patto. **Āvasathanti** nivāsaṭṭhānaṃ kāretvā adāsi, tasmā vāsaṃ adāsīti **vāsavo**. Attha-saddo idha kāraṇapariyāyoti āha “**sahassampi kāraṇāna**”nti. Svāyamatto heṭṭhā vibhāvitova. **Vinicchinati**, tasmā sahassaṃ paññāakkhīni etassāti **sahassakkho**. Maghaṃ vuccati dhaṇaṃ, taṃ pana saddhāsaṅkhātaṃ maghaṃ assa atthīti **maghavā**. Pure dānaṃ dadātīti **purindado** anunāsikalopaṃ akatvā. Puññāni kātuṃ sakkotīti **sakko**.

Sakkanāmasuttavaṇṇanā niṭṭhitā.

## 3. Mahālisuttavaṇṇanā

**259. Soti sakko** devarājā. Bahuvacane vattabbe ekavacanaṃ vuttaṃ. Vuccatīti vacanaṃ, attho. Tasmā **bahuvacaneti** bahumhi attheti attho. Yathā paṭipajjanto anukkamena te dhamme samādiyitvā sakko sakkattaṃ ajjhagā, taṃ paṭipattiṃ dassetuṃ “**sakko kirā**”tiādi vuttaṃ. **Anantareti** sakkabhāvassa atītanantare attabhāve. **Taṃ sabbanti** sakkassa maghamāṇavakāle sammāpaṭipattiṃ, tāya sakkabhāvūpagamaṇācāti taṃ sabbam. **Vutto**, tasmā tatha vuttanayeneva veditabboti adhippāyo.

Mahālisuttavaṇṇanā niṭṭhitā.

## 4. Daliddasuttavaṇṇanā

**260. Manussadaliddoti** manussesu duggato. **Manussakāruṇṇatanti** manussesu paramanihīnataṃ. **Manussakapaṇoti** manussesu vā paramanihīno. **Tasmim ṭhāneti** tassa devaputtassa tasmim uppajjanaṭṭhāne. **Lāmakato cintenti**ti tassa purimavatthuṃ nissāya hīnato cintenti. **Kathenti**ti tameva paresaṃ kathenti. **Vitthārenti**ti vuttamatthaṃ vitthārikaṃ karonti. Sabbadā paricchijja parivārasampanno hutvā aḍḍhaṭṭharatane hatthikkhandhe mahaccarājānubhāvena nisinnattā **janakāyena samullokiamāno**. **Avalambanti**ti olambanti. **Vandanamattaṃ vā nāhosi**, aññadatthu paccakabuddhato attano samānādarakiriyaṃ paccāsīsatī. Tena vuttaṃ “**so**”tiādi. **Kvāyanti** ko ayanti byāpannavasena vadati. Kālarattehi suttehi sibbitattā vaṇṇavikāraṃ dīsvā “**kuṭṭhicivarāni pāruto**”ti āha. **Mahāniraye nibbattivā** mahādukkhaṃ paccanubhoti. Tadanurūpapāpakammaṃ vipākāvasena laddhokāsenā **rājagahe...pe... paṭisandhim ganhi**. Kāmañca ettha paṭisandhiggahaṇaṃ kusalakammeneva, tassa pana akusalakammaṃ vipākino balavabhāvato vuttaṃ “**vipākāvasenā**”ti. Tenāha “**gahitakālato...pe... nikkhanto**”ti. Bhikkhāya carituṃ samatthakālato paṭṭhāya rogassa balavatāya **maṃsāni...pe... patanti**. **Nānaṃ pesetvāti** vipassanāpaṭipāṭiyā bhāvanāñānaṃ nibbānaṃ

paṭipesetvā pavattetvā. Indriyānaṃ paripakkattā satthu desanāvilāsenā **sotāpattiphale paṭiṭṭhito**. **Cumbaṭanti** pādacumbaṭaṃ. Kuṭṭhino hi sakalapādatalaṃ mā ruḷḷi cumbaṭaṃ katvā taṃ pādātale bandhitvā gacchanti, **mattikapātiṃ bhinditvā viya** tathā nihīnāmanussattabhāvato cavitvā **suvaṇṇapātiṃ paṭilabhanto viya** devattabhāvaṃ gaṇhanto cuticittato dutiyacittavāre ādānacittakkhaṇe devaloke nibbatto.

**Maggenāgatāti** maggādhigāmanena āgatā uppannā. **Ariyakantasīlanti** ariyānaṃ kantaṃ manāpaṃ manoramaṃ sīladhammaṃ. Ariyānaṃ adhicittaadhipaññāsikkhā viya adhisīlasikkhāpi sabbā ativiya kantā evāti āha “**kiñcāpi**”tiādi. **Imasmiṃ panattheti** imasmiṃ sotāpannassa bhavasāṅkhāte atthe niddhāretvā vuccamāne. **Pañcasīlampi** yasmā diṭṭhi viya bhavantarepi **appahīnaṃ**.

Daliddasuttavaṇṇanā niṭṭhitā.

## 5. Rāmaṇeyyakasuttavaṇṇanā

**261.** Āramanti ettha sattāti **ārāmā**, manoramā upavanādayo. Te eva cetenti ettha saddhāya attano pītisomanassaṃ sandhahantīti **cetiyāti** ca vuccanti. **Manussaramaṇīyabhāvassāti** manussānaṃ āramaṇīyabhāvassa. Tassa pana sīlādiguṇavasena acinteyyāparimeyyānubhāvātāpi hotīti bhagavā “**nāgghanti soḷasi**”nti avoca. Acetanāya bhūmiyā ramaṇīyatā nāma guṇavisitṭhānaṃ ariyānaṃ sevanavasena veditabbāti vuttaṃ “**idāni...pe... gāme vātiādīmāhā**”ti.

Rāmaṇeyyakasuttavaṇṇanā niṭṭhitā.

## 6. Yajamānasuttavaṇṇanā

**262.** **Yajantānanti** dakkhiṇeyyaṃ uddissa dentānaṃ. Aṭṭhuppattiko suttanikkhepoti dassetvā atthavaṇṇanaṃ kātuṃ “**tadā kirā**”tiādi vuttaṃ. **Agganti** seṭṭhaṃ. Tehi tehi vā yathāladhasappiādayo mā nassantu, aggabhāvena gahitāni sappiādīni kevalaṃ aggimhi jhāpanena, devā manussā micchāgāhena mā nassantu. **Takkenāti** takkamattena. “Kathemā”ti amhe maññatha, idāni passatha, paccakkhato ayaṃ vo...pe... āgacchatīti āhaṃsūti yojanā.

**Upadhivipākanti** upadhīsu vā vipaccati, upadhayo vā vipākā etassāti upadhivipākaṃ. **Vipphāravantaṃ hoti** vipulapakkhatāya. **Bhikkhusaṅghassa adamsu** “sammāsambuddhena mahābrahmunā ca evaṃ ovādo dinno”ti.

Yajamānasuttavaṇṇanā niṭṭhitā.

## 7. Buddhavandanāsuttavaṇṇanā

**263.** **Uṭṭhahāti** uṭṭhānaṃ kāyikavīriyaṃ karohi. Tenāha “**vicara, loke**”ti. Cetasikavīriyaṃ pana bhagavatā matthakaṃ pāpitameva. Tenāha “**vijitasāṅgāmā**”ti. **Dvādasayojanikassa** uccabhāvena. Vitthārato pana āyāmato ca anekayojanasatasahassaparimāṇacakkavālaṃ atibyāpetvā ṭhitassa. **Pannabhārāti** pātītabhāra. Nikkhepitabbato bhārāti āha “**oropitakhandhā**”tiādi. Te hi taṃsamāngino puggalassa sampātanaṭṭhena **bhārā** nāma. Vuttañhettaṃ “bhārā have pañcakkhandhā”ti (saṃ. ni. 3.22). Tadekadesā ca **kilesābhisaṅkhārā**. **Pannarasāya puṇṇamāya rattinti** yathā pannarasapuṇṇamāya rattiyaṃ pariṇṇakāle upakkilesavimutto cando sobhati, evaṃ tava cittaṃ sabbaso upakkilesavimuttaṃ sobhatīti adhippāyo.

Buddhavandanāsuttavaṇṇanā niṭṭhitā.

## 8. Gahaṭṭhavandanāsuttavaṇṇanā

264. Puthuddisāti bahudisā. Kā pana tāti āha “**catasso disā catasso anudisā cā**”ti.

Anudisāgahaṇena cettha uddham adhopi gayhatīti ca dasseti. **Bhūmivāsinoti** bhūmipaṭibaddhavuttino. Etena rukkhapabbatanivāsinopi gahitā honti. **Cirarattasamāhitacitteti** upacārappanājhānāni uppādetvā aparihīnajjhānatāya cirakālam samāhitacitte. **Āpāṇakoṭṭikanti** jīvitapariyantam yāvajīvam. **Evamādīti ādi-saddena** avasesapuññakiriyavatthūni saṅgaṇhāti. Niccāsilavasena **pañcahi**, niyamasīlavasena **dasahi**. **Pi-saddena** tato katipayehi uposathasīlavasena aṭṭhahipīti dasseti. **Dhammikehīti** dhammato anapetehi. **Pamukhoti** pamokkho.

Gahaṭṭhavandanāsuttavaṇṇanā niṭṭhitā.

## 9. Sathhāravandanāsuttavaṇṇanā

265. **Brahmajāṇukoti** dakkhiṇajāṇumaṅdalam pathaviyaṃ ṭhapetvā vandamāno brahmajāṇuko nāma tathābhūto hutvā. Yajitabbato **yakkho**, pūjaniyo. Evaṃ pūjāvisesayogato sakkoti āha “**so yakkhoti so sakko**”ti. Sakkassa namakkārabhājanabhūtañhi pucchanto mātali “**ko nāma so yakkho**”ti āha. **Guṇanemittakehīti** guṇahetukehi anantāni hi buddhānaṃ nāmāni, tāni ca kho sabbānīpi guṇanemittakāneva. Anantaḡuṇattā. Vuttañhetam –

“Asaṅkhyeyyāni nāmāni, saḡuṇena mahesino;  
Guṇena nāmamuddheyyaṃ, api nāmasahassato”ti. –

Tasmā **anomanā**manti paripuṇṇaḡuṇanāmanti attho. **Samatikkamenā**ti sammā samucchindanavasena atikkamanena. Kilesārīnaṃ apetaḡayoti **apacayo**, so āramitabbaṭṭhena ārāmo etesanti **apacayārāmā**. Tenāha “**vaṭṭaviddhamsane ratā**”ti.

Sathhāravandanāsuttavaṇṇanā niṭṭhitā.

## 10. Saṅghavandanāsuttavaṇṇanā

266. **Pūtimhi** dehe **mātu sarīre** sayanato, **attano eva vā** pūtideham **sarīraṃ** tasmim ṭhitatāya **avattharivā sayanato pūtidehasayāti** yojanā. **Kuṇapamheteti** ete manussā asuciduggandhājegucchapaṭikkūle mātukucchisaṅkhāte kuṇapasmiṃ dasa māse nimuggā. Tesam kinnāma tvaṃ pihayasīti yojanā. **Etesam etaṃ vihayāmīti** etesam isīnaṃ etaṃ sammāpaṭipattim vihayāmi. Idāni taṃ paṭipattim dassetuṃ “**na te sam koṭṭhe opentī**”ti vuttaṃ. **Dhaññaṃ koṭṭhe na pakkhipanti** pakkhipitabbassa ca abhāvato. Tenāha “**na hi etesam dhañña**”nti. **Paresam niṭṭhitanti** paresam gahitaṃ santakaṃ tesam pākāya niṭṭhitam. **Bhikkhācāravattenā**ti piṇḡācariyāya. **Esamānā** pariyesantā. **Evam pariyaṭṭhena**. Yāpenti, na esanti anesanaṃ. **Susamādinna**sundaravatāti suṭṭhu samādinna sobhanavatā.

**Evam subhāsita**bhāsinoti ganthadhuravipassanādhurānaṃ vasena ḡuṇaparimāṇasubhāsitasseva bhāsanasīlā. Ariyena tuṅhībhūtena **tuṅhībhūtā**. Tato eva manassa sātisayaṃ **samañcarā**. Gahitadaṇḡesu parāmāsādiḡayuttesu daṇḡādānādi hetu uppajjanakakilesapariḡāhābhāvato **nibbutā**. Tenāha “**vissaṭṭhadāṇḡā**”ti. **Sādānesūti** sabhavādānesu. **Anādānā**ti tabbiraḡhitā. Tenāha “**bhavayonī**”tiādi.

Saṅghavandanāsuttavaṇṇanā niṭṭhitā.

Dutiyavaggavaṇṇanā niṭṭhitā.

### 3. Tatiyavaggo

#### 1. Chetvāsuttavaṇṇanā

267. **Vuttatthameva** heṭṭhā devaputtasamṃyuttavaṇṇanāyaṃ.

Chetvāsuttavaṇṇanā niṭṭhitā.

#### 3. Dubbaṇṇiyasuttavaṇṇanā

268. **Dubbaṇṇo** duddasiko virūpavaṇṇo. **Okoṭimakoti** rassabhāvena avarakoṭimako. **Sakkena gahitanāmamevetam**, na pana so tathārūpo koci yakkho. Tenāha “**eko rūpāvacarabrahmā**”ti. Yadi evaṃ kasmā so tathārūpo hutvā āgatoti āha “**sakko kirā**”ti. Kathaṃ panettha ñāyati “so eko rūpāvacarabrahmā, na paneso avaruddhakayakkho”ti yuttiṃ dassento “**avaruddhakayakkhā panā**”tiādīmāha. **Devānaṃ** vacanaṃ **sutvā**. **Pharusenā**ti pharusasamācārena. “Ko nāma mayhaṃ āsane sannisinno”ti akkhantiṃ anuppādentō **khantiyaṃ thatvā**. **Balavacittikāra**nti garutaraṃ sakkārabahumānaṃ. **Nīcavuttiyā**ti paramanipaccakāre suvūpasamane ca dassiyamāne. Sakkassa tāya eva ācārasampattiyā **sakkāsane ṭhātuṃ**, attano ca āvikātuṃ **asakkonto antaradhāyi**. **Upahatacittomhī**ti khantimettānuddayāsabbhāvato parasmim upahatacittomhīti sakko attano sabhāvaṃ vadati. **Kodhavase vattetunti** kodhena attano vase nibbattetuṃ na sukaromhi, atha kho kodhaṃ mayhaṃ vase na vattemīti adhippāyo. **Ciraṃ na kujjhāmī**ti yadi me kadāci kodho uppajjeyya, taṃ kodhaṃ anuvattento cirakālaṃ na kujjhāmi. **Na upanayhāmī**ti anto sace me kodho uppajjeyya, khippameva ca naṃ paṭivineyyanti taṃ me pubbeva vataṃ paripūritaṃ.

Dubbaṇṇiyasuttavaṇṇanā niṭṭhitā.

#### 3. Sambarimāyāsuttavaṇṇanā

269. **Ābādhikoti** ābādho assa atthīti ābādhiko. **Vācesī**ti sikkhāpesi. Sambaro nāma asuramāyāya ādipuriso purātano asurindo. Taṃ sandhāyāha “**yathā sambaro**”tiādi. **Evaṃ paccati** aññopi māyāvī māyaṃ payojetvā. Upavādantarāyo nāma khamāpane sati vīgacchati, pākātikameva hotīti āha “**evamassa phāsu bhavyā**”ti. **Tenā**ti vepacittinā sambaravijjāya adānena vañcitattā. **Tathā akatvā**ti isīnaṃ santikaṃ netvā khamāpanavasena kātabbaṃ akatvā.

Sambarimāyāsuttavaṇṇanā niṭṭhitā.

#### 4. Accayasuttavaṇṇanā

270. **Sampayojesunti** aññamaññaṃ vācasikaṃ pharusaṃ payojesuṃ. Tenāha “**kalahaṃ akaṃsū**”ti, vivādaṃ akaṃsūti attho. **Atikkammavacana**nti vacīsamvaraṃ atikkamitvā vacanaṃ. Yasmā accaye desiyamāne taṃ khīṇayati aññamaññaṃssa khamamānassa khamanaṃ paṭiggaṇhato, tasmā vuttaṃ “**nappaṭigaṇhātīti na khamatī**”ti. Tumhākaṃ vase vattatu, visevitaṃ akatvā yathākāmakaraṇīyo hotu. Mittadhammo idha uttarapadalopena “mitto”ti vuttoti āha “**mittadhamme**”ti. **Karaṇavacana**nti “mittehī”ti karaṇavacanaṃ bhummatthe. Tenāha “**mittesū**”ti. Yathā nibbattasabhāvassa bhāvato aññathattaṃ **jarā**, evaṃ mittabhāvato vuttavipariyāyo amittadhammo jarāpariyāyena vutto. **Agārayhaṃ anavajjaṃ sabbaso pahīnakilesaṃ**. **Tenāha** “**khīṇāsavapuggala**”nti.

Accayasuttavaṇṇanā niṭṭhitā.

## 5. Akkodhasuttavaṇṇanā

271. **Kodho tumhe mā abhibhavīti** ettha kodhena anabhibhavanīyattaṃ khantimettākaruṇāditappaṭipakkhadhammaparibrūhanena. Tathā hi taṃsamaṅgino kodho abhibhuyyati āha “**tumheva kodhaṃ abhibhavatha. Kujjhantānaṃ mā paṭikujjhithā**”ti. **Paṭipadāti** esā paṭipatti. **Mettāti** appanāpattā mettā. Tadupacāro **mettāpubbabhāgo**. Na vihiṃsati kiñci etāyāti **avihiṃsā**. **Karuṇāti** appanāpattakarūṇā vedītabbā. Tadupacāro **karuṇāpubbabhāgo**. **Lāmakajananti** khantiādīsu yonisomanasikārābhāvena gārayhasamācārasamāyogena ca nihīnaṃ janaṃ. Paccayaparisuddhiyā **kodho** abhimaddamāno puggalaṃ **abhimaddati**, tassa so paṭisaṅkhānabhāvanābalehi sammadeva pahātabboti.

Akkodhasuttavaṇṇanā niṭṭhitā.

Tatīyavaggavaṇṇanā niṭṭhitā.

Sāratthappakāsiniyā saṃyuttanikāya-aṭṭhakathāya

Sakkasaṃyuttavaṇṇanāya līnatthappakāsanā samattā.

Niṭṭhitā ca sāratthappakāsiniyā

Saṃyuttanikāya-aṭṭhakathāya sagāthāvaggavaṇṇanā.

Paṭhamo bhāgo niṭṭhito.